



UNIVERS



Digitized by Google

9000





Van der Meren.


OK E. 144

Ephesus

Edw. Mansoor
Frederick
1828

DE OK.E 44 44
FIDELIVM
ANIMARVM PURGA-
TORIO, LIBRI DVO.

DE LIMBO PATRVM,
Moury f. H. petri LIBER TERTIVS *leand*
Authore IOANNE LENSÆO BEL-
LIOLANO, Sacræ Theologiæ Lo-
uanij Regio Professore.



LOVANII,
Excudebat Ioannes Masius, suis & Petri
Fabri Bibliopolæ sumptibus. ANNO
CLD. ID. LXXXIIII.

CVM GRATIA ET PRIVILEGIO.

UNIVERSITEITSBIBLIOTHEEK
GENT

REVERENDISSIMO

DOMINO MAXIMILIANO
MORILLONIO, TORNACENSIS
ECCLESIAE PRÆSVLI DIGNISSIMO,

Ioannes Lensæus S. D.



Agnas deberi gratias,
Reuerendis. Præsul,
hominibus ijs quo-
rū in Rempub. Chri-
stianam cura propensior, studio-
rum nobis Vniuersitates crexit,
omnes qui verè studiosi sunt, lu-
bentes agnoscunt. Est enim apud
omnes pios in confesso, quanto-
perè sit per illos adiuta pietas, quā
inter imperitos rudiorum & in-
cultam suisque destitutam nervis
atque ornamentis iacere necesse
erat, nisi liberalium artium studiis
accuratius excoleretur & illustra-
retur. Sed illis vt communibus
quibusdam studiorum & politico-

* ij ris

ris doctrinæ parentibus, si eos forsitan æquare non possumus, qui parta & adultiora iam literarum Gymnasia conseruârūt, proximo tamen hos profectò loco subiungere debere videmur. Quorum beneficij in re literaria conseruanda magnitudo, tum demum euidentius clariusq; patescit, cum in aliquo pereundi periculo illa versetur. Siquidem labentem eam ne penitus corruat sustinere, aut propè iam in prædonū manibus trepidantem eripere, tantumq; non oppressam atque extinctam in spe aliqua recuperandæ libertatis ac lucis collocare, id illi primorum, quos dixi, parentum gloriæ, tanta accessione vicinum est, vt meriti æstimatione vix quicquam distare videatur. Porro hac rerum nostra-

strarum tempestate tantum non modo periculorum formidauit, verumetiam malorum detrimentoꝝq; perpeſſa res literaria eſt, vt his quidem in locis tanquam vulneribus conſectam, & vltima iaculantem ſuſpiria, ſpectare ac deplorare cogamur. Cùm enim literarum ſtudijs, pacem & tranquillitatem amantibus, armorum ſtrepitus bellorumq; furor per ſeipſum ſit inimiciſſimus, tum ita Sathanæ ſubtiliſſima induſtria cõparatum eſt, vt ipſa ſtudiorum illorum ſedes, peiore & iniquiore loco eſſe non poſſet. Quid igitur in ea ipſius nomine dignum ageretur, quam non modo cinxiſſent vndique latrones corporum, verum etiam hoſtes ex profeſſo talium ſtudiorum? Veruntamen

✱ iij tot

tot circumuallata inimicorum cuneis, tot exterrita periculis, tot infidijs appetita, tot afflicta & operata malis, numerositatem & decorem perdidit, professionem suam & exurgendi spem non reliquit. Idque cum Dei in primis Optimi Maximi summæ erga nos benignitati, deinde Regiæ Maiestatis pijssimæ vigilantissimæque prouidentia acceptum ferendum sit; tum Vestræ Reuerendissimæ Paternitatis officia, semperque pro nobis anxia & sollicita sedulitas, quantum eodem contulerit nos id nescire stuporis esset; non agnoscere, ingratitude non ferendæ, iure optimo videretur. Sed cum eius rei publicum, & quoad fieri posset, longissimi temporis testimoniū extare quam maximè

con-

conueniret, præstarique id ipsum etiam à pluribus æquissimum, honestissimumque esse iudicarem; nolui ipse quidem, pro mea virili, deesse tam honestæ æquitati & æquissimæ honestati. Quæ caussa fuit, vt cum tres hi Libelli iusta quadam ratione poscente, prodituri essent in lucem, eos Vestrę potissimum Reuerentiæ, præfixa hac epistola, donandos dedicandosque putauerim. Tametsi cur id facere me debere crederem, & illæ accedebant causæ, quod Parcensem familiam, in qua per annos iam complures versor, magnis officijs beneficijsque deuinctam iam dudum teneres. Pro qua quidem familia, de me citra controuersiam optimè merita, etsi Paternitati Vestræ satisfacere nullo mo-

do possim, tamen ut eò voluntate quam proximè accederem, conatumque aliquem satisfaciendi, vel hunc in modum susciperem, mearum partium esse mihi omninò persuadebam. Patronum quoque valentem quempiam, cuiusque magna & grauis in Ecclesia esset authoritas, prudentiaque celebris hi Libelli requirebant; propterea quod ijs aduersus hostem acriter præliantibus, accidere fortè posset, ut non benè fixo pede, subindè leuiter cespitantes, confirmatore quopiam indigerent. Quod igitur eiusmodi causis adductus feci, rogo, Paternitati Vestræ non minus acceptum gratumque sit, quam & candido animo factum est, & ut fieret honestissima ratio mihi persu-

sua-

DEDICATORIA.

suafisse videtur. Oro interim illum pastorum principem, vniuersique Christiani gregis primum ducem, vt Vestræ Paternitatis ministerium quam diutissimè Ecclesiæ suæ integrum, incolum expeditumque conseruet.

LOVANI, è domo Parcensi.

Anno 1584.

Reuerendiss. Vestræ Paternit.

addictissimus,

Ioan. Lensæus.

INDEX CAPITVM

PRIORIS LIBRI

De Purgatorio.

QUOD in hoc argumento, hæretici
Ecclesiæ sanctæ se aduersari pa-
lam demonstrent. CAPVT I.

Catholici scriptores quid sentiant esse
Purgatorium, triplici descriptione
ostenditur. CAPVT II.

Aduersus primam descriptionem, Aretij
obiccta diluuntur. CAP. III.

Quomodo post hanc vitam nullus sit sa-
tisfactioni locus; vbi aduersus secun-
dam descriptionem Aretij argumen-
ta dissoluuntur. CAP. IIII.

Quæ sit Fulgentij doctrina, de remissio-
ne in hoc tantum sæculo obtinenda.

CAPVT V.

Non esse statuendum, bonos omnes
continuò transire ad vitam beatam.

CAPVT VI.

Tertia descriptio, contra Aretij obiecta
defenditur. CAP. VII.

Non esse de Purgatorio dubitandum,
etiamsi de eius loco nihil definitum ac
fide certum habeatur. CAP. VIII.

Esse aliquem locum purgatorium, Græ-
cis Latinisque Ecclesiis minimè du-
bium

INDEX CAPITVM.

bium fuisse, etſi eſſet aliqua de igne
controuerſia, neque quicquam de lo-
co vbi eſſet definitum. CAP. IX.

Quæ ſit veriſimilior de Purgatorij loco
ſententia. CAP. X.

Apparitiones defunctorũ fidelium, quæ
apud ſcriptores catholicos leguntur,
quam malè generatim repudientur ab
Aretio. CAP. XI.

Quæ ſcripturæ vim habeant ad proban-
dum Purgatorium: ac primum de illo
ſcripturæ loco: Non exhibis indè, do-
nec vltimum etiam minutum reddas.
CAPVT XII.

Satiſne magnam vim habeat ad Purga-
torium probandum locus Matthei 12.
& Lucæ 12. de peccato in Spiritũ ſan-
ctum, quod dicatur non remittendum
in hoc ſæculo, neque in futuro.

CAPVT XIII.

Pertineátne quicquam ad Purgatorium
conſtruendum, quod ſcriptum eſt de
Lazaro & diuite. CAP. XIII.

Locus Apoſtoli de quorũdam per ignem
probatione & ſalute, quomodo acci-
piendus ſit. CAP. XV.

Quid ſentiendum ſit de Auguſtini du-
bitatione, circa memoratum ſcriptu-
ræ locum. CAP. XVI.

Non

Non benè colligi, ignem cuius meminit
Apostolus non esse Purgatorium, quia
significetur bonis & malis esse com-
munis. CAP. XVII.

De loco Apocalyp. Beati mortui qui in
Domino moriuntur. CAP. XVIII.

Quid de loco scripturæ ad Philip. cap. 2.
In nomine Iesu omne genu flectetur,
&c. sentiendum sit, in causa confir-
mandi Purgatorij. CAP. XIX.

Faciátne pro Purgatorio, locus Psalmi
66. Transiuimus per ignem & aquam.
CAP. XX.

Quónam modo intelligendus sit locus
Zachariæ 9. de lacu in quo non est
aqua. CAP. XXI.

Quid sibi velit apud Tobiam locus, Pa-
nem tuum & vinum tuum super sepul-
turam iusti constitue. CAP. XXII.

De loco secundi Machabæorum duode-
cimo. CAP. XXIII.

Præter scripturas, etiam Veterum tra-
ctatorum conformi doctrina, Purga-
torium animarum probari.

CAP. XXIII.

Catholicæ Ecclesiæ Patres non consen-
su tantum suo, verum etiam interdum
ex professò vrgere ad credendum.

CAP. XXV.

Quod

CAPITVM.

Quod licet consuetudo non præiudicet
veritati, index tamen sit testisque ve-
ritatis.

CAP. XXVI.

Dupliciter intelligi posse, afflictionem
Purgatoriam.

CAP. XXVII.

Ex veteri pro defunctis officio Ecclesia-
stico, clarè colligi Purgatoriū Christia-
narum animarum.

CAP. XXVIII.

Quid de illis sentiendum sit, qui ex gen-
tilium libris aliquam Purgatorij signi-
ficationem petunt.

CAP. XXIX.

CAPITA LIBRI II.

De Purgatorio.

Quas hæretici fingant origines do-
ctrinæ de Purgatorio.

CAPVT I.

Frustra gloriari hæreticum in hac caussa,
de claritate scripturarum.

CAP. II.

Quomodo intelligendum sit, mortuos
nescire quicquam, & non esse eis am-
plius mercedem.

CAP. III.

Nec de vijs duabus, nec de Latrone ob-
esse nobis argumentum.

CAP. IIII.

Homines etiam iustos in hac vita, pro-
pter sua peccata flagellari, non tantum
exerceri.

CAP. V.

Ad locum Pauli 1. Corint. 3. ineptum esse
de igne poenitentiae commentarium.

CAPVT VI.

Malè

INDEX CAPITVM.

Malè probari vitiosum fuisse Iudæ Machabæi factum, quod Sacrificia legis nihil prodesse coram Deo, sed tantum coram Ecclesia. CAP. V. I. I.

Non rectè improbari Machabæi factum, eò quod nulla essent in Veteri lege pro mortuis instituta sacrificia.

CAP. VII. I.

Falsò caussari Caluinum, quod Machabæi exemplo vtentes, in hac Purgatorij caussa, Sacrificia legalia tanquam nondum abolita, trahant ad nouum testamentum. CAP. IX.

Quibusdam Augustini locis quam abutantur hæretici. CAP. X.

Fueritne quæstio de Purgatorio, Diui Augustini ætate controuersa.

CAP. XI.

Quod Purgatorij assertio magis illustret vim Dominicæ passionis. CAP. XII.

Quemadmodum circa locum Matth. 12 de peccato in Spiritum sanctum non remittendo neque in hoc sæculo neque in futuro, se torserit Theodorus Beza in suis annotationibus.

CAP. XIII.

In locum 1. ad Corinth. 3. quid Theodorus Beza notauerit contra Purgatorium.

CAP. XIII. I.

C A-

CAPITA LIBRI TERTII,

De Limbo Patrum.

QUÆ sit Catholicorum de Limbo
sententia. CAPVT I.

Quemadmodum in cælo apud Patrem,
ita & apud inferos diuersas esse pro cu-
iusque meritis mansiones. CAP. II.

De Sinu Abrahæ. CAP. III.

Apud inferos non solum gehennam seu
Tartarum statui debere, ex scripturis
ostenditur. CAP. IIII.

Diluitur argumentū petitum ex vtriuf-
que testamenti Sanctorum fide com-
muni. CAP. V.

Ostenditur imbecillitas argumenti quod
ex eò fit, quia meritum Christi sem-
per fuerit paternis oculis præsens.

CAPVT VI.

Respondetur ad argumentum petitum
à Sacramentis veteris Testamenti.

CAPVT VII.

Ridiculo conatu descensum Christi ad
inferos, ad mortis manifestationem
detorqueri. CAP. VIII.

Petri locus num quam vim habeat ad
Limbum stabiliendum. CAP. IX.

De loco i. Petri 3. quid annotatum Beza
reliquerit. CAP. X.

Fru-

INDEX CAPITVM.

Frustrà exagitari locum Lucæ, de Lazaro & Diuite, aduersus Limbum Patrum.

CAP. XI.


Argumentum ex consensu Patrum, aduersus hæreticorum exceptiones defenditur.

CAP. XII.

Absurdè statui Christi animam vno duntaxat die apud inferos fuisse, propter id quod dictū est Latroni; Hodie mecum eris in paradiso.

CAP. XIII.

PRÆ-



P R Æ F A T I O.

I



*N*ulla doctrina Catholica pars est, nullus omnino fidei nostræ articulus, quem sic parvi momenti putare debeamus, ut non pro eo sit vigilantissime depugnandum. Etenim aduersarius, si qua in parte nos deprehenderit minus instructos atque munitos, ut iure bono possit nostram imbecillitatem traducere & suam ostentare victoriam; facile persuadet grauioribus etiam in rebus minus esse causæ nostræ confidendum, ac tanquam lapide vno moto atque excusso, posse breui totum ædificium labascere, pauloq; maiore conatu subuerti. Recusandum certè non est quantum ille omnia circumspectat, tentat, modisq; & artibus quibus potest oppugnat, tantum nos elaborare in eo oportere, ut partes nostræ non solum inuictæ permaneant (quia nequit veritas errori succumbere) sed ne etiã labefacta esse videantur. Ac sicuti alius post alium surgit, ac veluti fatigato & cadenti succedit ad oppugnandum, perq; ingenia multa & varia, & linguas & stylos armatur hostis veritatis: ita

A

no-

nobis esse non debet satis, si qui de maioribus nostris, ipsis authoribus ac auctoribus primis restiterint, fidemq; nostram libris eruditis ex omni parte munierint; nisi & discipuli discipulis sese fortiter prompteq; opponant; ut quoniam vel nouis subinde argumenta proferruntur à recentioribus hæreticis, vel antiqua ipsa nouè proponuntur, atque explicantur argutius; non desint hominibus catholicis aduersum hæc antidota propria, quibus muniantur, nec apta instrumenta quibus errorum dissoluantur nexus. Hac autem eò dico, ne qui mirentur, cur eadem de re tam variè scribatur à multis, necuiq; indies libelli prodeant in lucem, quibus explicetur aliquid aut defendatur catholica & auita doctrina. Quid enim habeat rationis, ut illis quotidie noui quippiam cudentibus, nos otio & desidia torpescamus? Ac patior non necessarium videri, ut propter eos libellos qui procul ab orbe nostro seminantur, sedulus hic à nobis suscipiatur labor: sed cum ij iam qui procul licet editi sint, his tamen locis habeantur, legantur, ediscantur, passimq; nobis ingerantur in manus; nemo dixerit dissimulandum silentiumq; fuisse: ne veritatis professores

seffores, minus promptè ei seruiant ad hominum salutem, quam erroris ministri hunc student propagare ad pernitiem plurimorum. Cum igitur ex copia librorum, quibus vicina civitates ad infelicissimam egestatem abundant, obrusa mihi esset Benedicti Arctij Problematum Theologicorum pars quadam, in eaque vidiſsem, inter ea quæ partim verè ex institutione retenta catholicorum, partim contra veritatis regulam, in scholis hæreticorum posterius percepta, disputantur, magno hoc agi molimine ut Purgatorium esse nullam crederetur; existimaui mei esse studij ac muneris, ea breuiter refellere, quæ pro errore tam noxio afferuntur ab hoc authore; ordine quidem non incommodo rerum tractandarum, sed magna tamen imbecillitate rationum.

A ij Quod

Quod in hoc argumento, hæretici Ecclesiæ sanctæ se aduersari palàm demonstrent. CAPVT PRIMVM.

DE Purgatorio, inquit, acturi, hoc ordine rem tractabimus. Primum, quid dicant Purgatorium. Deinde ubi sit collocatū. Tertio, quomodo ex sacris literis confirmetur. Quarto, quam commodè affirmetur ex Philosophorum & Poëtarum placitis. Demum, quod tandem sit verum Christianorum hominum Purgatorium, quo expiant culpam & pœnam plenariè. Ita tandem constabit quam malè hætenus de eo disputatum & traditum sit in Scholis & Ecclesia.

Postremis verbis quid haberet sibi propositum cum de Purgatorio differeret, declarauit. Nimirum hic scopus erat, vt constaret quam malè hætenus esset in Scholis Catholicis de Purgatorio disputatum, quamque falsa de eo traditio Ecclesiam occupauisset per annos iam circiter mille & quingentos. Et vide quam se detegat, vtque se aduersarium esse sanctæ Dei Ecclesiæ imprudens profiteatur. Non enim ait: Ita tandem constabit quam malè hætenus de eo traditum sit inter Papistas, aut ab aduersarijs nostris: sed quam malè de eo traditum sit in Ecclesia. Veruntamen non aduertit quam hoc scripturæ canonicæ parum consonet, in qua expressum est Ecclesiam esse columnam & firmamentum veritatis, & portas inferorum aduersus eam non esse præualituras,

1. Tim. 3.
Matth. 16.

ras, aliaque permulta eodem pertinentia. Quæ quonam modo vera esse possunt, si tam falsa de Purgatorio traditio, ab ipsis, vt sentiunt, profecta portis inferorum, præualuit in Ecclesia tamdiu, & hanc quam isti nunc proferunt doctrinam, vt solam veram & salutarem oppressit? Sed quemadmodum à Catholicis constituta sit Purgatorij ratio; deinde in eo quid huius iudicio peccarint, videamus.

Catholici scriptores quid sentiant esse Purgatorium, triplici descriptione ostenditur. CAPVT II.

Quod rem, inquit, concernit, *Purgatorium aiunt locum medium inter æternam felicitatem & supplicium damnatorum: in quo qui sint, sunt extremi vtriusque participes. Ita quidem tria distincta nobis proponunt loca; Cælum, Inferos, & inter hac medium Purgatorium.*

Est hæc indubiè, Areti, Catholicorum de Purgatorio sententia, esse locum, siue, vt loquitur Augustinus, receptaculum quoddam ab- Euch. 109.
ditum, in quo quæ continetur animæ, medium quendam habent inter felicitatem æternam, & damnationem reproborum statum; extremi quidem vtriusque participem, sed ab utroque interim longo discrimine separatum. Etenim in eo statu, ærumna est & afflictio & pœna, quæ pro peccatis in hac vita contractis exoluitur; id quod habet cum gehenna commune. Est ni-

A iij hilo-

hilominus in eodem iustitia, pax & tranquillitas conscientiæ, societas cum Christo eiusque omnibus membris; magna denique securitas, qua habet exploratum se de iustitiæ statu nunquam esse deinceps casuras. Atq; hæc illi sunt cum cælesti beatitudine cōmunia; immo quædam eius sunt inchoationes, quibus & ab ipsa consummatione, quæ est in regno, & ab æterna damnatione, quæ est in gehenna, differt plurimum. Quippè hoc in extremo sempiternæ infelicitatis, horrida, turbulenta & plena desperationis sunt omnia: ubi iniquitas, quamvis torquetur, dominatur; & à societate sanctorum, incommutabili decreto segregata & proiecta reproborum turba, æternis pœnarum vinculis, societati dæmonum astringitur.

Alij, inquit, dicunt: Est satisfactio qua post mortem à defunctorum animis pro peccato penditur. Hi non tam locum describunt quam utilitatem illius. Nam duplicem constituunt satisfactionem: unam in hac vita; alteram post hanc vitam in Purgatorio.

Rectè hi quoque non locum describunt. Quæ enim abditissimi receptaculi & loci, descriptio dari potest? Ut enim spiritus & expers corporis substantia, quid sit concipere animo vix possumus; ita quis, qualisque eius sit locus, quoque in eo sit modo, ægrè possumus aut cogitatione concipere, aut verbis explicare. Neq; id quod à prioribus medius esse dicitur inter felicitatem æternam & supplicium damnato-
rum

rum locus, propter corporeum situm dici intelligendum est; sed propter ipsum illum quem explicauimus animorum statum. Vt enim æterna felicitas, seu Paradisus, regnumq; cælorum, non est æstimandum ex loco propriè, sed ex statu, hoc est, ex clara Dei visione, quæ mundis corde promittitur, vbi scriptum est: Beati *Matth. 5.* mundo corde, quoniam ipsi Deum videbunt. Vnde & Latroni dicitur: Hodie mecum eris in *Luce 23.* paradiso: neque etiam Angeli sancti, quia hic nobis dati sint ad tutelā, propterea in regno suo non sunt; de quibus dicitur: Angeli eorū semper vident faciem patris, qui in cælis est. *Matth. 18.* Vt ipsi quoque dæmones quocunque loco circumuolent, suum secum supplicium & gehennam, damnationemque trahunt: idque potissimum spectamus in inferno; loci interim ipsius, quis & vbi, qualisq; sit multum ignari: Ita cum Purgatorium dicimus animarum, non tam locum aliquem in quo reclusi illi spiritus sint attendere debemus (quamuis in hoc admodum pro sua consuetudine, nostra propendeat cogitatio) quam statum ipsorum ærumnosum, & afflictione doloribusq; plenum; sed temporarium, nō æternum; & alijs quidem productiorē, alijs breuiorem, prout se hic cuiusq; merita habuerint. Benè proinde vt prima, ita illa quæ secūdo loco ponitur, Purgatorij descriptio, nō tam locum designat, quam statū, eiusq; vtilitatem. Est enim alicuius modi satisfactio, quæ post mortē à defunctorum animis pro peccato penditur.

A iiij

Gene-

Generatim autem ac iuxta grammaticam significationem, satisfactio est cum tantum supplicij, tantumq; vindictæ exolvitur, quantum irato satis sit ut placetur, & irasci desinat. In inferno igitur satisfactio quidem esse potest, ut sic loquar, Satisfactio vero esse non potest, ubi nullus expectetur supplicij finis, nulla in amicitiam reditio. Quippe satis patitur, qui dignâ suis meritis pœnam pendit, etiam si æterna illa sit. Satisfacimus verò læso cuiuspiam & irato, cum pœna quam subimus, illius tandem ira cōquiescit. Nam cum irasci desinit nunquam, sed incessanter affligit, quamvis iustitiæ satisfiat æterno supplicio; tamen offenso, tunc intelligimus esse satisfactum, cum eum aliquando placatum recipimus. Porro duplex est, ut hic etiâ commemorat, satisfactio. Id quod explicare docendi gratia, sic (ni fallor) haud incommode possumus; ut alia sit satisfactio in pœna, alia satisfactio pro pœna. Cum enim lege fixa est pro offensæ pœna, ut, verbi gratia, effusio oculi, amputatio manus, patibulum, &c. hæc pœnas si quis iudicij decreto subire cogitur, eius est in pœna satisfactio. Sin autem permutatio, & pœnæ eius, quam lege fixam diximus, redemptio quædam & compensatio recipitur; velut multa pecuniaria, aut vltroneum quodpiam erga eum qui læsus est officium servitutis, hæc erit pro pœna satisfactio nuncupanda. Cum igitur destinatum peccato supplicium propriè futuri seculi sit, quod tempus non frustra

stra iudicij, quemadmodum Augustinus anno- *Euseb., 66.*
 tauit, significatur esse in diuinis literis; velut
 cùm ait Apostolus, Statutum esse hominibus
 mori, post hoc autem iudicium; quisquis post
 hanc vitam ob suas offensas in ærumna est, tem-
 porarium de manu Dei supplicium excipiens,
 eius est satisfactio in pœna. At si quis non hoc
 expectet, vt in vltices incidat Dei manus, sed
 præueniendi studio, pœnas hic de seipso pro
 culpæ magnitudine expetit, seque ipsum affli-
 git modis Euangelica & Apostolica doctrina
 probatis, vt ieiunijs, vt orationibus, vt pijs vigi-
 lijs, vt subtractione propriæ substantiæ ad elee-
 mosynas largiendas, aliisque eiusmodi carnem
 affligentibus officiis; quoniam talem commu-
 tationem, siue redemptionem diuina recipit be-
 nignitas, suæque misericordiæ præcepto requi-
 rit, cùm iubet dignos fructus pœnitentiæ facere,
 aut peccata redimere elemosynis, huius ergo
 satisfactio pro pœna esse censenda est. Seipsum
 enim hic punit, vt præparatam in futuro seculo
 pœnam euitet. Quæ vltro suscepta, & ex offen-
 sâ sincero dolore oblata Deo satisfactio, per-
 grata illi & accepta est, pleniorēque gratiam
 & vitam æternam promeretur. Atque hæc talis
 pœnitentiæ satisfactio est, quam hic agere iu-
 bemur. Altera verò futuri seculi satisfactio, nō
 ad nostrum pertinet officium, sed ad Dei iudi-
 cium, qui illic animaduertit in eos, qui seipsos
 hic non iudicauerunt, iuxta id quod scriptum
 est; Si nos ipsos iudicemus, non vtique a Do- *1. Cor. II.*

A v mino

2. Cor. 11.

mino iudicaremur. Cùm autem iudicamur, & Domino corripimur, ut non cum hoc mundo damnemur. Cùm igitur in nos ipsos, pœnitentiae dolore extimulati vlciscimur, tùm ipsi Domino satisfacimus. At cum nos ipse Deus iudicans flagellat post hanc vitam, atque acerbis excipit cruciatibus, magis ipse sibi de nobis satisfacit, corripiens nos & repurgans penitens, ut à perdita mundi societate segregemur. Nam si id in hac vita subindè facit, morborum, mortiumque plagas immittens, quemadmodum loco memorato significauit Apostolus, quid alienum si quod hic non fecit, post hanc vitam facere credatur, præsertim cum illud tempus, sicut dictum est, propriè iudicij dies, tempusque sit? Si quis autem obijciat in Purgatorio pœnam temporariam suscipi, ut æterna non incurratur, sicut docere videtur Augustinus lib. 21. de ciuit. Dei, cap. 24. cùm ait, quosdam in futuro sæculo, post pœnas consecuturos esse misericordiam, ne in ignem mittantur æternū. Et eiusdem libri capite 3. Quibusdam, inquit, quod in isto sæculo non remittitur, remitti in futuro, id est, ne futuri sæculi æterno supplicio puniantur iam diximus. Eiusmodi igitur sententias ex Augustino collectas, si quis obijciat, tanquam quæ significant, Purgatorij pœnam satisfactionem esse pro pœna; temporariam videlicet pro æterna; responderi poterit, hæc ideo dixisse Augustinū, quod per remissionem quæ fit in hac vita virtute clauium, reatus damnationis.

tionis æternæ, in supplicium temporariū commutetur; ideoq; hoc pro illo suscipi: quia nisi esset Dei benignitate ea facta commutatio, vigore tamen præstitæ hic condonationis, illa æterna fuerat subeunda.

Tertiam adiungit Aretius Purgatorij notationem, his verbis: *Summa angelica inquit. Est pœna grauissima, minor tamen quam infernalis. Opinor, pœna illi dicitur, quia non pro culpa, sed pro pœna diluenda est institutum.*

Pœnam verè dixit grauissimam, comparatione suppliciorum vitæ huius: quæ tametsi magna sæpè acerbæque sunt, tamen cum futuri sæculi purgatorijs comparata cruciatibus, parua ducuntur. Sententia est hæc D. Augustini, cùm scribit in Psalmum 37. atque in eum versiculum; Domine ne in furore tuo arguas me, sic commentatur; vt deprecari Prophetam significet futuri sæculi pœnas, quas Domini furor infert. Atque ad id proferens Apostoli testimonium, de his qui salui futuri sunt per ignem, *1. Corint. 3* inter cætera sic dicit: Quia dicitur, saluus erit, contemnitur ille ignis. Ita planè, quamuis saluus per ignem; grauior tamen erit ille ignis, quam quidquid potest homo pati in hac vita; & nouimus quanta hic passi sunt mali, & possumt pati. Hæc Augustinus. Sed quamuis pœna hac comparatione grauissima sit, minor est tamen quam infernalis. Primum, quia illa temporaria est, hæc æterna: siquidem ad damnationis & infelicitatis magnitudinem, incredibiliter

biliter facit ipsa æternitas; cum cogitatur quantumcunque temporis detractum sit, tamen adhuc infinitum esse quod restat. Deinde, ut sit par subindè cruciatus ab igne, tamen illic mirifice consolatur, summi boni vel post longa tormenta adipiscendi securitas. Hic extremum malum est, à facie Dei sine spe reuocationis esse proiectum. Cuius quidem mali magnitudinem D. Augustinus expendens epist. 75. quæ scripta est ad Auxilium, negat cum damno vnius animæ infantis sine regenerationis lauacro decedentis, innumerabiliū mortes corporum posse comparari. Ideoque & D. Chrysostomus hoc ipsum vigilanter nostrę cōsiderationi subijciens: Ponamus, inquit, ante oculos, quanti doloris sit excludi ac projici à regno cælorum, quod ut mihi videtur, grauius est ipsa gehenna. Nam etsi ignis ille non arderet, & immortalis illa pœna non esset parata, hoc solum quod alieni efficimur à Christo, & excludimur à bonis æternis, nōne omni pœna cruciabilius diceretur? Ex quibus Chrysostomi verbis elucet pœnas inferni & purgatorij, non sola æternitate differre (quod ab omnibus concedi, Lutherus temerè affirmabat) sed ipsa omninò pœnæ damnationisquę natura. Aliud quippè est regnum differri, aliud penitus auferri. In quo inest pœnarum ingens distantia, etiamsi ignem eiusdem rationis, paremque ab eo interdum existere cruciatum utrobique fateamur. Tribus autem hisce purgatorij descriptioni-

*Libro 1. de
compunct.
cordis.*

*Vide apud
Rossem
art 37.*

ptionibus, ad hunc modum breuiter explicatis, videndum iam est, quónam modo eas, hic noster Benedictus, non bene dicendo labefactare conetur.

Aduersus primam descriptionem Aretij obiecta diluuntur. CAP. III.

Prima definitio, inquit, eò mala est, quia tria constituit loca, cum sacra litera tantum Caelos norint & Infernum post hanc vitam, dextram & sinistram; quemadmodum totum mortalium cœtum in hados & ones partitur Matthæi 25. Sinistris & dextris solum loquitur rex illa glorie. Et virgines solum prudentes & stolidæ sunt. Ager Dominicus solum xizaniæ & triticum fert. Rete euangelicum, bonos & malos pisces, nullos inter medios capit. Non debuit igitur locus tertius induci sine certo Dei verbo. Quod quam verè dicatur, audi Aug. differentem contra Pelagianos libro 5. Tertium locum ignoramus penitus, immò nec esse in scripturis sanctis inuenimus. Finge Pelagiane locum ex officina dogmatis tui, ubi alieni à Christi gratia, vitam requiei & glorie possidere paruuli possunt. Pelagianos euertit quod malè negarent infantibus baptismum, quia tertius nullus dari potest locus inter cælum & inferos post hanc vitam. Pari argumento exploditur Purgatorium, quia tertius non est locus inter vitam beatam & damnationem.

Principiò, Areti, cùm ais, sacras literas cælum tantum nosse & infernum, si constare tibi velis, nomi-

nomine inferni locum intelligis damnatorum, seu reproborum, in quo gehenna est & suppliciorum æternitas. Nam si de inferis loqueris, quomodo scriptura loqui solita est, velut cùm

Genes. 42. ait Iacob: Traheris canos meos cum dolore ad inferos. Cùm ait Anna illa Samuëlis mater in

1. Reg. 2. Cantico; Dominus mortificat & vivificat, deducit ad inferos & reducit. Cum deplorat

Isaia 38. Ezechias; Ego dixi in dimidio dierum meorum, vadam ad portas inferi. Cum in Christi

Psalms. 29. persona, gratulantis voce dicitur; Domine eduxisti ab inferno animam meam, saluasti me à descendentibus in lacum. Cum idem ipse lo-

Psalms. 15. quitur de sua resurrectione securus; Quoniam non derelinques animam meam in inferno, nec dabis sanctum tuum videre corruptionem. Quomodo etiam inter fidei nostræ articulos ponitur, Christum ad inferos descendisse: tum etiam si dederimus scripturam diuinam præter Cælum & Inferos nihil nosse, non id magis Purgatorij nobis assertionem extorserit, quam Limbi, vt passim vocant, patrum: vtrumque enim apud inferos promptissimè intellexerimus. Nam sicut cæli nomine vnus designatur locus, in quo tamen pro varietate meritum mansiones multæ, variaque receptacula sunt beatarum animarum: ita etiam latissimè patent inferi, iuxta familiarem scripturis vsus; locusque licet ponatur vnus, in varia tamen est ille ipse, loca statusque diuisus. Nam & Patriarcharum, Prophetarumque spi-

ritus,

ritus, laxati corporeis vinculis, in certam quam-
 piam inferorum regionem deducebantur. Ne-
 que enim cuiquam fas fuit in cælum conscen-
 dere, priusquam sanctorum omnium princeps
 Christus, victor cælos penetraffer; sed ascen-
 dens ille, quemadmodum Apostolus ait, cap- E. h. 4.
 tiuam duxit captiuitatem, homines nimirum
 diaboli faucibus ereptos, ascendens duxit in
 cælum, viamque hanc ignotam antea, minime-
 que tritam primus aperuit; vt quo præces-
 serat caput, eodem deinceps membra seque-
 rentur. Et quamuis (ait Ambrosius in com-
 mentario) captiui & inuiti & alieni ducantur;
 Saluator tamen & suos duxit & voluntarios.
 Ac rursus: Ex inferis, inquit, resurgens ante
 omnes mortales ascendit super cunctos cælos,
 vt illam mortem ostenderet creaturæ. Sic ille
 commentarius. Iuxta familiarem ergo scriptu-
 ris vsum, ecce duo loca tantum, cælorum & in-
 ferorum: & tamen ea re nihil obstante, Purga-
 torium, sicut & Limbum, pulchrè retinemus,
 tanquam inferorum quasdam partes. Quibus
 tamen locis qui inclusi tenebantur, firmissimo
 interuallo disclusi erant ab ijs, qui apud eosdem
 inferos quasi in profundissimas atque teretri-
 mas partes deiecti, egressionis spem non habe-
 bant. In quibus & ipse est princeps superborum
 Lucifer, sicut de eo scriptum est apud Isaiam: cap. 14.
 Veruntamen ad infernum detraheris, in pro-
 fundum laci. Quas partes si solas, inferni no-
 mine pro vulgato magis loquendi modo quam
 pro

pro vsu & consuetudine scripturarum Aretius hic noster intelligit, videt iam quam alienum à vero sit quod assumit, sacras literas duo tantum loca nosse, Cælum & Infernum reproborum. Etenim sanctos illos Iudæorū pariter & Christianorum patres, non in cælo fuisse ante Christi ascensum, sed apud inferos potius, nec tamen loco damnatorum; si præter scripturam canonicam, qua & sedulus operator, cultorque

Eclès 9. iustitiæ properare dicitur ad inferos, Patrum quoque testimonijs docere voluerimus, adierit continuò grauissimorū scriptorum iustus numerus. Velut Irenæi in fine libri aduersus hæreses. Tertulliani lib. de Resurrectione carnis, & 4. contra Marcionem. Basilij in illud Psalms, Veruntamen Deus redimet animam meam de manu inferi. Nazianzeni in oratione de Paschate. Ambrosij in oratione de fide resurrectionis. Epiphani in hæresi Tacianorum. Hieronymi in caput 4 ad Ephesios, & tertium Ecclesiastis, & nonum Zachariæ. Augustini 17 de Ciuitate, cap. 11. & 20. cap. 15. Cyrilli libro 12 in Ioannem cap. 36. Gregorij Magni libro 6. epistolarum, epistola 179. & homilia 19 super Euangelia. Damasceni lib. 4. de orthodoxa fide cap. 29. Bernardi serm. 4. de omnibus sanctis. Anselmi in cap. 5. posterioris ad Corinthios: pluraque his suo loco videre licebit. Quod verò adiungitur de dextra & sinistra, de hædis & ouibus, de virginibus prudentibus & stolidis, de bonis malisque piscibus, quibus ad-

dere

dere licet (quod alij faciunt) austrum & aquilonem ex Ecclesiasticis capite II. vias item duntaxat duas morituris propositas, vnā vitæ, alteram interitus, inter quæ media non sint, ideoque tertium induci non debuisse locum, quis non videt quam sit futile? Non enim tertius inducitur locus, in quo qui sint, neq; ad dexteram, neque ad sinistram pertineant; neque ad austrum, neque ad aquilonem; aut neque sint in numero ouium, neque hædorum; aut medij sint inter virgines prudētes & fatuas; pisces bonos & malos. Sed sicuti Patres illi sancti, nondum in cælo erant collocati ad dexteram patris, sed apud inferos degebant, & ad dexteram nihilominus pertinebant; quomodo & omnes prædestinati mortalem adhuc in terris vitam agentes: vnde cum dictum esset piscantibus discipulis; Mittite in dexteram nauigij rete, quoniam illic erant ij quos Deus præordinauerat ad vitam, copiosam cepere piscium multitudinem. Sicut etiam iidem de numero erant ouium, quamuis nondum in cælum subuecti. Quod mirum non est, cū dicat Christus; Alias multas oves habeo quæ non sunt de hoc ouili: & illas oportet me adducere. Si enim oves appellantur, quæ nondum erant adductæ in ouile, quomodo non oves censendæ sint, nondum etiam ad dexteram patris in cælo constitutæ? Vt denique Patres iidem inter prudentes non inter fatuas virgines; inter bonos, non malos pisces numerandi erant: ita

Ioh. 21.

Ioh. 10.

B

quo-

quoque illi, quos ad tempus purgatoria quædam claustra continent, non ad sinistram, sed ad dexteram (cum sint prædestinati) pertinere censendi sunt. Cumque iidem iusti sint, & misericordiæ aliarumque virtutum quibusdam officijs sibi prouidè prospexerint in futurum, & hic cibum oleumque sibi compararint; quoniam apud inferos non est cibum inuenire aut oleum emere, profectò à prudentium cetu virginum, segregari non possunt. Sed habet varios prudentia gradus, neque par in omnibus est, qui prudentes meritò dicantur: sicut non omnes æquè fortes, neque æquè temperantes. Qui proinde hic ita se ieiunijs macerant, orationibus, pijsque studijs affligunt, elemosynis ita præparatos inferorum redimunt cruciatus, ut nihil reliquum sit quod debeat flagello Dei post mortem expiari, inter prudentes iure prudentissimi habentur. Quomodo etiam non oues, à dextris, qui sint audituri: Venite benedicti patris mei? Quomodo non pisces boni, qui non abijciendi sint, sed in æternum beata felicitate conseruandi? Quomodo non habendi in aceruo granorum, qui sint in horrea Domini congregandi, non ut zizania colligandi in fasciculos ad combustionem æternam? Ab alijs quoque quod profertur de austro & aquilone, similem habet duorum extremorum, inter quæ medium nullum sit, rationem. Si quidem ad Aquilonem pertinent omnes reprobi, qui in diaboli parte futuri sunt: ad Au-
strum

strum omnes prædestinati; quia sunt, vel futuri sunt in parte & societate sanctorum, quos gratia tanquam in austro illuminat, fouet ac recreat. Nam diabolus, inquit Augustinus, & angeli eius à luce atq; feruore charitatis auersi, & nimis in superbiam inuidiamque progressi, velut glaciali duritia torpuerunt: & ideo per figuram tanquā in aquilone ponuntur. Vnde cum generi humano diabolus incubaret, de ventura gratia saluatoris dicitur in Cantico canticorum: *Cap. 4.*
**Exurge aquilo, & veni auster, perfla hortum meum, & fluent aromata. Exurge qui irruisti, qui subditis incumbis, qui possessos premis; Exurge vt à tuo pondere releuati erigantur, quorum animas premendo curuasti; Et veni auster inquit, spiritum inuocans gratiæ flantem de meridie, velut à parte feruida & luminosa, vt fluant aromata. Vnde Apostolus dicit: Christi 2. Corin. 2.
**bonus odor sumus in omni loco. Hinc etiam dicitur in quodam Psalmo: Conuerte Domine psal. 123.
 captiuitatem nostram, sicut torrens in austrō: Captiuitatem; scilicet qua sub diabolo, tanquam sub aquilone tenebantur, vbi abundante iniquitate frigerant, & quodammodo congelauerant. Hinc enim & Euangelium dicit: Quoniam abundabit iniquitas, refrigescet charitas multorum. At verò flante austro glaciēs resoluitur, & torrentes fluunt, id est, peccatis remissis, populi ad Christum charitate concurrunt. Hinc & alibi scriptum est: Sicut glaciēs in sereno, ita soluentur peccata tua. Hactenus****

nus Augustinus de austro & aquilone. : Cuius authoris quam nihil deinde premat nos locus ex libro quinto Hypognosticon : facillimum erit animaduvertere , si eius verba plenius aliquantò prolixiusque recitentur . Interrogat Pelagianum antea, ut præter regnum cælorum alium daret locum, ubi vitæ requies posset esse perennis. Talem enim Pelagiani fingeant, paruulis ijs qui sine baptismo ex hac vita migrauerant ; ut neque essent in gehenna , neque in regno : sed alicubi tamen ab omni doloris & tristitiæ sensu remoti , vita quadam beata, eaque sempiterna fruerentur . Sed, primum locum (inquit Augustinus) fides Catholicorum diuina autoritate regnum credit esse cælorum; unde non baptizatus excipitur. Secundum gehennam, ubi omnis apostata, vel à Christi fide alienus , æterna supplicia experietur. Tertium penitus ignoramus, imò nec esse in scripturis sanctis inueniemus. Tertium igitur Augustinus locum ignorari dicit, imò reperiri posse negat, in quo videlicet qui sint, neque crucientur à gehenna , & tamen extra regnum vitam viuât beatam. Unde cum primò requirit à Pelagiano, ut talem designet vel fingendo locum; Finge, inquit, Pelagiane locum, ex officina peruersi dogmatis tui, ubi alieni à Christi gratia vitam requiei & gloriæ possidere paruuli possint; consequentibus deinde verbis, ut palam faceret eum se tertium intelligi velle locum, in quo qui esset, non pertineret ad regnum aut gehennam.

gehennam; non ad dextram, neque ad sinistram, ideoq; non ad vitam neque ad mortem; subiunxit continuò: Dextera est iusti iudicis sedentis & sinistra, regnum est & gehenna, vita est & mors, iusti & iniqui. In dextera igitur iusti sunt constituti, in sinistra operarij iniquitatis. In regno requies baptifatorum; in gehenna poena incredulorum. Vita ad lætitiā gloriæ, mors ad fletum & stridorem dentium. Iusti in regno patris cum Christo; iniqui in igne æterno parato diabolo & angelis eius. Hæc Augustini verba in quo nostram sententiā infirmant? quid habent quod non libenter fateamur? an eos qui in Purgatorio ad tempus sunt; à dextera in qua sunt collocandi; à regno ad cuius possessionem vocandi sunt; à vita quam expectant certā securitate; à numero, & societate iustorum, cum sint iusti nostra opinione reijcimus? Quod alienissimum à nobis esse, si luce meridiana clarius est, qua fronte illa nobis obijciuntur? Præsertim cum ea quæ consequuntur, satis declarent D. Augustinum, sub regno comprehendisse ea omnia quæ referuntur ad regnum. Nam hoc dicens, inquit, non diuisiones locorum multorum dedi, nisi duorum tantum: quoniam ad duo, regnum videlicet & gehennam, hæc omnia referuntur, etiam si plura dicantur. Dextera enim vita iusti, vel, sicut dixi, addamus iustitia, sanctitas, beatitudo, & cætera bona, quæ ad regni cælorum requiem referuntur. Sic ille. Cum igitur in

B iij Pur-

Rom. 14.

Purgatorio, iustitia & sanctitas adsint, eaque pertineant ad regnum, consequens est illas etiam animas horum ratione ad regnum pertinere. Regnum enim Dei non est esca & potus, quemadmodum Apostolus ait, sed iustitia, & pax, & gaudium in Spiritu sancto. His autem frui bonis iustos posse, etiam in cruciatu, martyres testantur. Iam ergo regni participes illae sunt animae, quamvis plenius incomparabiliter maculis omnibus expurgatis regnaturae. Denique cum hoc sit argumentum quo D. Augustinus Pelagianos evertit: Nullus dari potest tertius locus, in quo paruuli sine baptismo decedentes beati esse possint: ergo ut beati sint ac miseriam euitent, necessariò sunt baptizandi; quis non intelligat quam ridiculè dicatur pari argumento euerri purgatorium? Neque enim assumebat Augustinus, non esse medium locum inter beatam vitam & damnationem, quod iste praesupponit, nam Pelagiani haud grauatim id annuissent Augustino: Paruulos enim sine baptismo abeuntes, in extremo altero, hoc est, in vita beata collocabant. Sed hoc, quod dixi, assumebat, non esse medium locum inter regnum & gehennam, in quo vita posset esse beata, quæ tribueretur paruulis sine baptismo decedentibus: Quod idem si assumitur ad euertendum Purgatorium, vides agi perinde atque si quis aërem feriat ut solem extinguat. Docet sanè alibi quoque B. Augustinus, non esse locum medium, velut libro 21 de ci-

de ci-

de ciuitate Dei capite 25. sed attende quo modo; nimirum vt non sit in æterno supplicio, qui nunquam sit futurus in regno. Sic enim ait: **Iam inquit respondeamus etiam illis, qui non solum diabolo & angelis eius, sicut nec isti, sed ne ipsis quidem omnibus hominibus liberationem ab æterno igne promittunt: verum eis tantum qui Christi baptismo abluti & corporis eius & sanguinis participes facti sunt, quomodolibet vixerint, in quacunque hæresi, vel impietate fuerint. Sed contradicit eis Apostolus dicens: Manifesta sunt opera carnis, quæ Galat. 5. sunt fornicatio, immunditia, &c. quæ prædico vobis, sicut prædixi; quoniam qui talia agunt, regnum Dei non possidebunt. Hæc profectò apostolica falsa est sententia, si tales post quantalibet tempora liberati, regnum Dei possidebunt. Sed quoniam falsa non est, profectò regnum Dei non possidebunt. Et si in regni Dei possessione nunquam erunt, æterno supplicio tenebuntur: quoniam non est locus medius, vbi non sit in supplicio, qui illo non fuerit constitutus in regno. Hæc B. Augustinus, quibus nihil à nobis contrarium dici, luce meridiana clarius est; quando eos qui sunt in Purgatorio, non dubitamus futuros in regno.**

B iiij Quo-

Quomodo post hanc vitam nullus sit satisfactioni locus; ubi aduersus secundam descriptionem, Aretij argumenta dissoluuntur. CAP. IIII.

Altera definitio, inquit, eò mala est, quia satisfactionem transfert in futurum seculum, seu post mortem defunctorum. Primum enim, tempus gratia solum in hac est vita, iuxta Apostoli sententiam Galatarum sexto. Dum tempus habemus, operemur bonum. Quod D. Hieronymus explicans, ait: Tempus sementis, tempus est presens, & vita quam currimus. In hac licet nobis quod volumus seminare: cum ista vita transierit, operandi tempus aufertur. Et Augustinus: In futuro solum est remuneratio & condemnatio. Hic autem, aut solvuntur aut ligantur peccata. Et Cyprianus expressè inquit: Quando hinc excessum fuerit, nullus poenitentia locus, nullus satisfactionis effectus relinquitur. Et Christus hoc ipsum docet exemplo Latronis, *Lucæ 23.* qui dicit: Hodie mecum eris in Paradiso. Et Ioã. 5. ait: Qui credit in eum, &c. de morte transit in vitam. Statuamus ergo bonos hinc transire ad vitam aeternam; malos contra ad damnationem aeternam: nec esse vllum locum poenitentia, postquam semel mortui fuerimus. Præterea, nocens est illa opinio, cum homines securos faciat, quasi post mortem poenitentiam agere possint; etiam si illam in hac vita negligent.

Haftenus ille. RESPONSIO.

Satisf-

Satisfactionem aliquam, Areti, ad futurum sæculum nonnulli transferunt, sed quæ neque actio frugiferæ pœnitentiæ, neque meritoria sit: tum quod illic per iudicium pœna legis incurritur quæ hic redimi potuisset, vt esset voluntatis non necessitatis satisfactio: tum quia nec patientia in perferendo, nec virtus vlla in agendo meritum habet post hanc vitam. Quippe alia est meriti, alia boni operis aut mali ratio. Quis enim neget, aut beatos spiritus benè, aut damnatos malè operari? & illorum quidè magnas esse virtutes, perfectamq; iustitiam; horum obduratissimam iniquitatem? Et tamen nec illi merentur præmium quod sunt assecuti, neque isti supplicium quo iam afficiuntur. Vt ergo bonum opus sine merito, ita & satisfactio quædam esse potest. Quemadmodum & contritio, seu dolor de peccatis admissis, ex dilectione iustitiæ profluens, seu tristitia quæ secundum Deum est; & confessio, siue peccati sui humilis agnitio coram oculis diuinæ maiestatis; planèque ipsa pœnitentiæ virtus; sicut fides & spes, atque ex ipsa spe orta deprecatio, & charitas, post hanc vitam consistere sine merito potest: Non quia tum æquè bona non sint hæc, atque prius; cum etiã illic forsitan augeantur: sed quia merendi post hanc vitam nō sit locus. Etenim vsque ad mortem voluit Dominus merendi tempus extendere, vt quæstus hic interim posset fieri cumulator, præmiaque maiora, & vberiora gaudia, comparari. Post verò,

verò, iudicium esse ex quo quisque secundum merita hic cōparata reciperet. Nemo proinde aut vitam æternam, quam hic non fuerit meritus, mereri post hanc vitam potest, neq; vllam conciliare sibi misericordiam & gratiam, quam in hac mortali vita non conciliauerit: sed quæcunque illic misericordia præstabitur, ea dabitur intuitu meritorum vitæ huius; non autem propterea quod illic primum fuerit impetrata. Non enim emerendæ vel impetrandæ gratiæ tempus illud est; sed benè si quis eam hic est meritus recipiendæ. Fatemur proinde hic solum esse gratiæ tempus; non quod ea tantummodo hic detur: Alioqui quomodo scriptum erit: Gratia Dei vita æterna? &: Qui coronat te in miseratione & misericordia? Quomodo item beati misericordes, quoniam ipsi misericordiam consequuntur? Ac rursus: Iudicium sine misericordia ei qui non fecit misericordiā. Vnde colligitur eius qui misericordiam fecerit, iudicium misericordia esse temperandum. Quo etiam pertinet quod illa dicebat fortissima septem filiorum mater, vltimum adhortās ad martyrij constantiam. Dignus fratribus tuis effectus suscipe mortem, vt in illa miseratione te recipiam. Et iterum: Qui formauit hominis natiuitatem, quique omnem inuenit originem, & spiritum vobis iterum cum misericordia reddet, & vitam. Et si propterea hic tantum gratiæ tempus est, quod illic nulla gratia detur, quomodo ipsi vitam æternam vsque

adco

Rome 6.

Psal. 102.

Matth. 5.

Iacob. 2.

2. Mach. 7.

ad eò intelligunt esse gratiam, vt nullo merito reddatur indignis? Ecce ipsorum confessione quanta est hæc gratia, quæ post mortem datur. Quomodo ergo tempus gratiæ, solum est in hac vita? Primum, quia gratia quædam est, & ea quidem præcipua, quæ non nisi hoc tempore conceditur. Ea nimirum est gratia conuersionis, qua mundo & peccato reiecto, ad Deum atque iustitiam animus conuertitur; siue ipsa iustificatio prima, qua ex iniusto iustus, ex inimico amicus, ex seruo liber ac filius quispiam efficitur: Ea cum hic præstita non fuerit, post hanc vitam nemini tribuetur. Sera ergo illic erit, ad obtinendam reconciliationem & amicitiam Dei, pœnitentia. Deindè, quod ad reliqua pertinet; quæ ad Domini gratiam & misericordiam spectare noscuntur, tempus hoc solum est promerendæ impetrandæque à Domino gratiæ; vt siue hic donetur, siue post hæc vitam, non tamen alijs votis, precibus, satisfactionibus, quam ijs quas in hac vita susceptæ sint, impetrata, obtenta, & conciliata esse, debeat intelligi. Neque verò video quid obftet, quo minus interpretemur, propter vtrumque horum à B. Paulo dictum esse: Dum tempus *Galat. 6.* habemus operemur bonum ad omnes; maxime autem ad domesticos fidei. Primum enim hoc ait: exerceamus hic erga proximos officia charitatis: neque solum erga Deum, verum etiã erga fratres nostros, Christiano dignos geramus affectus. Nam eius vitæ hoc nunc tempus

pus est: quod si præterierimus, atq; id per ignamiam & malos mores exegerimus, frustra nos alios sperauerimus futuros post hanc vitam. Significat ergo primam illam, conuersionis & bonæ Christianæque vitæ gratiam, non nisi in hac vita dari. Propter quod Apostolus ait alio loco: *2. Corin. 6.* Ecce nunc tempus acceptabile, ecce nunc dies salutis. Nam salutem, qui hic non pararit sibi, ei que maturè consuluerit, de nihilo eam quærat postea. Præterea & hoc comprehensum arbitror, vt moneamur hic merita comparare, quibus post hanc vitam leuemur. Id etiam huius duntaxat est temporis. Atque tum hoc dixerit Apostolus: Dum merédi tempus affuerit, ne cessemus bonorum operum accumulare nobis merita. Illud etiam Ecclesiastici decimo quarto capite scriptum: Antè obitum tuum operare iustitiam, quoniam non est apud inferos inuenire cibum. Rursum (quod illi simile est) apud Ecclesiasten capite 9. Quodcunque facere potest manus tua, instanter operare; quia nec opus, nec ratio, nec sapientia, nec scientia, erunt apud inferos quo tu properas, potest ad utrūque referri, hoc est, ad boni operationem, comparisonemque iustitiæ, & meriti rationem. Tanquam si diceretur; Si non fueris ante obitum iustitiam operatus, non eam post obitum comparabis: & si hic tibi bona merita non congregaueris, nullus erit postea merendi locus, etiam si non desit operandi. Hoc ipsum D. Augustinus clarissimè scriptum reli-

reliquit, Enchiridij cap. 110. Hic inquit, omne meritum comparatur, quo post hanc vitam releuari quisquam possit vel grauari. Nemo autem speret quod hic neglexerit, cum obierit apud Deum promereri. Sed & Diuus Hilarius eandem sententiam, doctè & grauitè expressit, in explanatione Psalmi 51. Non enim confessio peccatorum (inquit) nisi in huius sæculi tempore est, dum voluntati suæ vnusquisque permissus est, & per vitæ licentiâ habet confessionis arbitrium. Decedentes namque de vita, simul & de iure decidimus voluntatis. Tunc enim ex merito præteritæ voluntatis, lex iam constituta, aut quietis aut pœnæ, excedentium ex corpore suscipit voluntatem. Cuius temporis non iam liberam sed necessariam voluntatem ostendit propheta, dicens. Non est mihi in diebus illis voluntas. Cessante enim voluntatis libertate, etiam voluntatis, si qua erit, cessabit effectus. Transire namque ad Abraham volens diues, chaos medio non finitur; cum tamen per libertatem voluntatis in Abraham sinibus esse potuisset. Interclusa est ergo libertas voluntatis, quia confessio nulla sit mortuis, secundum id quod dictum est: In inferno autem quis confitebitur tibi. Hæc D. Hilarius. Quibus pulchrè cōsonat quod ^{apud} D. Hieronymus in Epistolam ad Galatas scribens: Tempus seminis, tempus est præsens & vita quam currimus. In hac licet nobis quod volumus seminare: cum illa vita transierit, operandi tempus aufer-

Lucæ 16.

Psalm. 6.

capit. 5.

aufertur. Quæ iste verba, more peruerso, ad suum detorquet institutum. An enim existimandum est D. Hieronymum significare voluisse animas post mortem esse otiosas, & sicut quidam somniant, dormire eas vsque ad extremum iudicij diem? nihil operabuntur sancti post resurrectionem, laudantes assidue redemptorem suum, & perpetuum alleluya canentes? nihil impij, qui iustorum salute conspecta turbabuntur & dicent: Ecce hi quos habuimus in derisum? Quomodo ergo per mortem operandi tempus aufertur, nisi quia nullum erit merendi? Sed vt non sequitur nullum fore post hanc vitam opus bonum, quia nullum erit meritum; ita prorsus effici non potest, nullam esse futuri sæculi satisfactionem, quia nullum possit ibi meritum comparari. Quid autem hunc Cyprianus adiuuât, quia dicat scribens contra Demetrianum, quando hinc excessum fuerit, nullum relinqui pœnitentiæ locum, nullum satisfactionis effectum? Primum enim hoc dicere vult: si cum Deo hic non redierimus in gratiam, nobisque eius amicitiam, pœnitendo, & pro delictis satisfaciendo conciliauerimus, frustra quæsituros post hanc vitam aditum aliquem quo possimus ad Dei gratiam peruenire. Infidelẽ quippe Demetrianum adhortatur, vt credat, agatque pœnitentiam, tantisper dum viuit; quia (inquit) hîc vita amittitur, aut tenetur: Hîc salutis æternæ cultu Dei, & fructu fidei prouidetur. Nunquid fideli & iam

amico

amico & iustificato dicitur : Nisi hic plenissimam fueris affecutus remissionem peccatorum, nulla postea vite spes, nulla expectanda remissio ? Non ergo illic amicitiam inchoari, quæ prius nulla fuerit dicimus, sed hinc cœptâ munere iustificationis, posse illic perfici, minimè dubitamus : non illic frugifera pœnitentiæ, cū hinc acta non sit, locum facimus : sed si hinc acta quidem per contritionem & confessionem, & aliquantam, saltem in desiderio, satisfactionem, minus plenè peccatum expiauerit, pœnasque aliquas temporarias propter insufficientiam sui reliquerit, has dicimus post hanc vitam expendi, istoque modo satisfieri Deo, ut eius ira conquiescēt, post pœnam, plenè purgatas animas ad sui vultus conspectum admittat. Loquitur deinde Cyprianus de satisfactione ea qua peccata redimuntur, quæque pro pœna abolenda suscipitur, non ea quæ in ipsa pœna per Dei iudicium sustinetur. Demetrianum quippe, eiusque similes hortabatur, ut maturè sibi consulerent, prouiderentque in futurum, & satisfactionibus vltionis futura supplicia euitarent : idque hic monebat faciendum esse, quoniam post hanc vitam nullus sit talis satisfactionis effectus, cuius intuitu præparata alioqui supplicia relaxentur. At Augustini forsitan magis verba premunt, quia dicat in futuro solum esse remunerationem & condemnationem ; item hic, & non ibi videlicet, peccata solui & ligari. Quæ molestiæ quidem
affer-

afferrent nonnihil, si cogermur omnem futuri sæculi remunerationem seu retributionem, in ipsa beatione & regno constituere, aut omnem condemnationem in gehenna: verum id necesse non est, quia nisi & ipsa misericordia qua parcit Deus & indulget, deque iudicij sui severitate remittit aliquid, ad ipsam quoque

Matth. 5. futuri sæculi remunerationem pertineret, non legeremus scriptum; Beati misericordes, quoniam ipsi misericordiam consequentur; quod ad futurum maximè sæculum pertinere cætera ostendunt beatitudines, in quibus quod

2. Tim. 1. promittitur propriè futuri sæculi est. Nō etiam Onesiphori domui precaretur Paulus misericordiam in illa die, propterea quod ipsum pio miserationis officio refrigerasset, atque adiunisset. Non alia dicerentur, quæ supra de futuræ vitæ misericordia protulimus, nisi misericordiæ, quæ hic præstatur ab homine, aliqua esset futuri sæculi remuneratio, ipsa Dei misericordia. Nam & hanc Propheta inter

Psal. 102. retributiones connumeravit, cum ait: Benedic anima mea Domino, & noli obliuisci omnes retributiones eius. Qui propitiatur omnibus iniquitatibus tuis, & sanat omnes infirmitates tuas. Qui coronat te in misericordia & miserationibus. Plena igitur illa propitiatio, quæ in futuro sæculo tribuitur, remuneratio est, sicut etiam quod omnes sanat languores & infirmitates nostras. Quæ quidem remuneratio, non his quæ aguntur post hanc vitam comparatur,

ratur, sed iam vitę huius officijs comparata est; vt hic quoque intelligendum sit quod B. Apostolus dicit; Deum vnique redditurum secundum opera sua; Item quod scribit in posteriore ad Corinthios: Omnes nos manifestari oportet ante tribunal Christi, vt vnusquisque referat propria corporis prout gessit, siue bonam, siue malum. Ipsam quippe illam misericordiam, qua omnimoda fiat peccatorum abolitio, plenaque remissio, recipiet quisque secundum ea quę gessit in corpore suo; non secundum ea quę illic gesturus est. Ideoque sic erit misericordia, vt tamen ad iustitię pertineat retributionem, ipsa quę illic fiet remissio peccatorum: quemadmodum B. Augustinus eam rem explicauit in libro de correptione & gratia, capite 13. his verbis: Numerus ergo sanctorum, inquit, per Dei gratiam Dei regno prædestinatus, donata sibi etiam vsque in finem perseverantia, illuc integer perducetur, & illic integerrimus iam sine fine beatissimus seruabitur, adhærente sibi misericordia saluatoris sui, siue cum conuertuntur, siue cum præliantur, siue cum coronantur. Nam & tunc esse illis Dei misericordiam necessariam, sancta scriptura testatur, vbi sanctus Dauid de Domino Deo suo dicit animę suę: Qui coronat te in miseratione & misericordia. Dicit etiam Iacobus Apostolus; Iudicium sine misericordia illi qui non fecit misericordiam: vbi ostēdit etiam in illo iudicio in quo iusti coronantur, iniusti-
C dam-

Rom. 2.

cap. 6.

Psal. 102.

cap. 2.

damnantur, alios cum misericordia, alios sine misericordia iudicandos. Propter quod etiam

2. Mach. 7. mater Machabæorum filio suo dicit: Vt in illa miseratione cum fratribus tuis te recipiam.

Præter. 20 Cùm enim rex iustus, sicut scriptum est, sedet in throno, non aduersabitur ante eum omne ne malum. Quis gloriabitur castum se habere cor, aut quis gloriabitur mundum se esse à peccato? Ac per hoc etiam ibi Dei misericordia necessaria est, qua fiet beatus cui non imputauit Dominus peccatum: sed tunc pro bonorum operum meritis, iusto iudicio etiam ipsa misericordia tribuetur. Cùm enim dicitur:

Iacob. 2. Iudicium sine misericordia illi qui non fecit misericordiam, manifestatur in his in quibus inueniuntur bona opera misericordiæ, iudicium cum misericordia fieri, ac per hoc etiam ipsam misericordiam meritis bonorum operum reddi. Hactenus D. Augustinus, perspicuè docens, misericordiam qua in illo iudicio iustis quædam peccata remittentur, ad futuri sæculi retributionem iustam pertinere. Iam & ipsa quoque futuri sæculi bipartita damnatio est: Alia æterna; alia temporaria. Neque enim sine aliqua damnatione quisquā per iudicis sententiam pænæ vel tēporariæ destinatur, quando & reos hîc damnari dicimus, vel ad metalla, vel ad carceres, vel alia supplicia etiā finienda. Idcirco B. Augustinus; Preces & sacrificia aliâq; officia misericordiæ, quæ pro defunctorum animis fiunt hîc à fidelibus, ad id prodesse dicit quibus

pro-

Euchiridij
cap. 110

profunt, vt sit plena remissio, aut certè tolerabilior fiat ipsa damnatio. Neque enim in ijs verbis, Augustinus æternam reproborum damnationem intelligit, pro quibus sciebat in Ecclesia non orari, haud magis quam pro dæmonibus; sed temporariam quarundam animarum, quæ in hac vita non ea sibi merita parauerant, vt ad plenam condonationem possent eis à corpore diuulsis, suffragia prodesse viuorum. Ex his, opinor, perspicitur potest, quam nihil nobis metuendum sit quod dicit Augustinus, in futuro nihil aliud fore quam remunerationem aut condemnationem. Amplectimur enim hoc, verissimeque dici cõsemus; quia & ipsa quæ illic fit peccati remissio, remuneratio est; & temporaria ipsa pœna, damnatio. Quod autè additur, solum hic peccata solui & ligari, ad clauium Ecclesiæ pertinet vsum, quo pœnitentibus & delicta sua confitentibus, absolutio per sacerdotē impenditur, id quod procul dubio vitæ huius est, non futuræ. Neque enim in futuro pœnitentia suscipitur, aut confessio fit ad consequendam absolutionem ministerio clauium: sed hoc necesse est in ista vita præcesserit, (nisi id forte angustia temporis exclusum est) vt sperari salus possit in futura. Cùm igitur author ille (neque enim Augustinus est) contra Nouatianum disputaret, negantem eum qui in idololatriæ crimen esset prolapsus, posse per clauis Ecclesiæ reconciliari Deo, & vtilem agere hîc pœnitentiam; argu-

mentatur hunc in modum. Constat ex scripturis etiam idololatram posse per pœnitentiam recuperare salutem, ergo debet ei in hac vita prodesse ad remissionem pœnitentia. Si enim hîc ad reconciliationem non proficit, in futuro saculo non proderit, ubi non est tempus impetrandæ vel emerendæ reconciliationis, sed duntaxat remunerationis & damnationis.

Quamobrem si concedendum est utiliter agi posse de quantocunque crimine pœnitentiam, ut videlicet absolutio consequatur, redeaturque in pristinum iustitiæ & gratiæ statum, profectò necesse est hîc illa agatur, ubi prodesse possit; quæ hîc prætermissa, in futuro prodesse non poterit, quia nec illic à quoquam veraciter agetur. Sic autem se habent verba quæ leguntur in quæstionibus ex utroque testamento mixtim positis: Ecce, inquit, quantus profectus est pœnitentiæ. Sed fortè dicatur e contra. Concessa quidem est, sed non de crimine idololatriæ: quamvis enim graua sint, maius est tamen crimen idololatriæ. Rectè tamē explosa est non ex modica parte Nouatiani assertio, qua duo crimina graua concessa pœnitentiæ videntur; Quia si fornicationi ignosci non debet, sicut Nouatiano videtur, quāto magis homicidio aut adulterio? Sed hinc vanitas eius apparet, quando hæc quæ graua sunt, concessa probantur. Quamobrem nūc an idololatriis concedi posse promiserit Deus requirendum est. Omne enim quod iure hic concessum non fuerit, nec in futurum

*Quæst. 102.
inter prim-
cipium &
medium.*

turum poterit concedi. Hic enim sicut dixit Dominus, aut ligantur, aut soluuntur peccata: *Matth. 16*
 In futuro autem, nihil aliud erit, nisi remuneratio aut condemnatio. Omnis enim qui hic iure reprobat, non poterit eligi, aut dignus in futurum iudicari. Sic ille. Quid autem luculentius, quam ibi non esse sermonem de iusto homine & reconciliato, quasi non possit is post mortem, pleniorē veniam consequi, sed de idololatra & impio? qui si per pœnitentiam hic non sit à tanto crimine absolutus, post mortem non sit reconciliationem impetraturus. De iustis verò hominibus, si Diuus Augustinus id persuasum habuisset, nullam posse aut potuisse vnquam solutionem peccatorum fieri post hanc *Lib. 17. de*
 vitam, non incunctanter diceret, Christum ad *cinit. Del,*
 inferna descendisse, propter quorundam sol- *cap. 11.*
 uenda vincula peccatorum.

Quæ sit Fulgentij doctrina, de remissione in hoc tantum sæculo obtinenda.

CAPVT V.

EXtant & apud Diuum Fulgentium sententiæ similes, quæ imperitis, & non satis attentis lectoribus offundunt tenebras. Velut libro 2. de remissione peccatorum cap. 20. Hinc est, inquit, quod beato Petro, hoc est, Ecclesiæ suæ, in terra ligandi soluendique tribuat potestatem, ut agnosceremus in tempore huius vitæ gratuitam tribui in peccatorum remissione misericor-

C iij ricor-

ricordiam : in futuro autē iustam cunctis mercedem pro factorum qualitate reddendam, nec ambigeremus nūc omnia posse peccata dimitti, & nunc quæcunq; non fuerint dimissa, tunc exigi. Et cap. 21. Præsens, inquit, sæculi tēpus, misericors Dominus & iustus solū remissionis beneficio deputauit, futurum verò iustæ retributioni seruat, quo vnusquisque pro qualitate credulitatis & operis, condigna, sed non finienda, recipiat. Et capite 4. eiusdem : Illud etenim tempus, non erit remissionis sed retributionis, nec indulgentiæ sed vindictæ. Estque in ijs libris hoc Fulgentio propositum, vt doceat remissionem peccatorum, post hanc vitam nemini dari, cui hîc data non sit. Verum quid intelligat nomine remissionis peccatorum, diligenter intuendum est. Sicut enim iustificationem, docendi gratia, facimus duplicem; vt alia sit prima qua remouetur iniustitia, alia secunda qua iustitia augetur & perficitur, de qua videlicet scriptum est: Qui iustus est, iustificetur adhuc. Et iterum : Qui lotus est, non indiget nisi vt pedes lauet. Quibus verbis insinuat prima quædam lotio seu iustificatio, quæ lauacro regenerationis efficitur, quaque ipsum in primis lauatur caput; Secunda, qua quotidie pedes repurgantur à puluere sæculari. Vnde & Augustinus primam libertatem dicit carere criminibus: secundam significans eam qua ipsa quoque venialia, suppressis concupiscentiæ motibus, minuuntur à proficientibus atque à

per-

Apoca. 22.

Ioan. 13.

perfectis penitus absterguntur. Sic remissio peccatorum prima quædam est, qua reconciliatur inimicus; alia secunda, qua perficitur ipsa propitiatio, quæque indies etiam amicis quotidiana peccata donantur, quam utique petunt filij Dei, qui Deum patrem appellant suum; cum precantur; Dimitte nobis debita nostra. Neque *Matth. 6.* enim iniustus erat Apostolus, aut de solis loquebatur iniustis cum diceret: In multis offendimus omnes. Neque B. Ioannes in epistola sua prima iustos volebat exceptos esse cum scriberet: Si dixerimus quia peccatum non habemus nos ipsos seducimus, & veritas in nobis non est. Quocirca remissio de qua subiungitur: Si confiteamur peccata nostra, fidelis est & iustus ut remittat nobis peccata nostra, & emundet nos ab omni iniquitate; proculdubio ea remissio est, qua & iustis & cum Christo societatem habentibus pijs sanctisque hominibus, aut prius remissa plenius donantur, aut quotidie admissa remittuntur ea sine quibus difficillimum est conuersationem, quamlibet sanctam & castam, inueniri. Ideoque & B. Iacobus in epistola, de iusto loquens infirmo & vngendo, ipsiusque vñctionis & orationis fructum ostendens; Si in peccatis, inquit, sit, remittentur ei. Et Dauid post translatus ab eo peccatum, Dele, inquit, iniquitatem meam. Et *Psal. 50.* Diuus Hieronymus, Petrum qui tamē ob hoc ipsum amare iam fleuerat, scribit trinam negationem trina confessione deleuisse. *Ad Oceanū de vita Fabiola.* Consti-

C iiij tuen-

*Psal. 31.
Rom. 4.*

*Capite 4.
libri 1.*

Coloss. 1.

tuendum est igitur, non solum iniusto homini ad hoc peccata remitti, ut iustus fiat, de qua remissione dictum est in Psalmis (quod & Paulus citat) Beati quorum remissæ sunt iniquitates: verum etiam iusto, & benè laudabiliterque viuenti, ut euadat iustior, pleniusque munde- tur ab omni iniquitate. Sed sicuti est vsitatus, ut iustificari dicamus hominem cum sit iustus ex iniusto, promptiusque & familiarius primā iustificationem eo verbo cum nihil additum est accipimus: sic etiam cum remissionem peccatorum dixit Fulgentius, in hac duntaxat vita dari, eam intellexit, pro loquendi consuetudine, qua reconciliatur iniquus, & qua peccator in gratiam atque amicitiam cum Deo recipitur. Hoc ut dubium non sit, eius verba celeriter efficient. Ait enim sic: Non de re parua differimus, nec vile aliquid quærimus, cum de remissione peccatorum, quantum diuina largitas adiuuat, disputamus. Per hanc enim de potestate tenebrarum eripiuntur, quos Deus transferet in regnum filij dilectionis suæ; Per hanc liberantur ab æterna pœna, ut potiantur æterna lætitia: Per illam deponitur onus, seu quod natiuitas vitiosa attraxit, seu quod iniquitas vitiosæ iuuentutis adiecit: Per ipsam gratis iustificatur impius, ut reputetur fides eius ad iustitiam: Per illam caret mala vita qua fuerat implicatus, & accipit gratis bonam qua fuit indignus. Per remissionem peccatorum gratis homines discernuntur ab illis qui cruciabun-
tur

tur in æternum cum diabolo, & adiunguntur his qui sine fine regnabunt cum Christo. Hæc eo loco; Et ideo cum dixisset capite 6. libri 2. Illud etenim tempus non erit remissionis, sed retributionis; continuò secutus adiunxit. Non ibi misericordia iustificabit impium: sed iustitia discernet iustum & impium. Et alia eodem pertinentia. Ac rursus postquam dixisset capite 21. ea quæ supra commemorauimus, subnexuit quæ sequenti capite continentur. Proindè, inquit, nunc omnis iniquus intra Ecclesiam positus, malam conuersationem respuat, & bonæ vitæ cursum festinet arripere; vt ad æternam vitam valeat peruenire: Nunc omnis impius prauam fidei sententiam deponat, & ad Ecclesiam venire non differat. Nunc sibi omnis homo dexteræ partis comparet meritum, si non vult sinistræ partis perferre tormentum: Et alia, in eam prorsus sententiã, vt nihil aliud significauerit, quam conuersioni & iustificationi primæ nullum esse in futura vita locum: & ideo quæcunque hic dimissa non fuerint misericordia primæ huius iustificationis, & piæ, vt loquitur, remissionis, quæ bonos ex malis faciat, in futuro exigì, supplicijsque non finendis puniri: eam ob causam precari Dauidem, atque istam quæ peccatorem iustificat remissionem hic petere, cùm dicit: Remitte mihi vt refrigerer, priusquàm eam & amplius non ero. Quod beatus Propheta non tam sollicitè, inquit, postularet ante præsentis vitæ terminum

Ca. 10. li. 2.

Psalm. 38.

C v sibi

sibi dari, si sciret post hanc vitam vel cuiquam profuturam pœnitentiã, vel remissionem peccatorum tunc pœnitentiã agentibus diuino munere concedendam. Hæc capite 20. libri secundi. Quod autem ea quæ hîc remissa essent mortalia peccata quo ad reatum æternæ damnationis, non dubitauerit Fulgentius in futuro sæculo plenius posse remitti, illa eius insinuat oratio qua vsus est, dissoluens argumentum quod obijciebatur ex verbis Euangelij, de peccato in Spiritum sanctum, quod neque hîc, neque in futuro sæculo remitti diceretur. Hoc enim verbo inquit, Dominus & saluator noster non aliqua peccata insinuauit in futuro sæculo dimittenda, quæ in hoc sæculo dimissa nō fuerint; sed bene intelligentibus ostendit, non alia sed illa tantū (mortalia videlicet de quibus loquitur) in futuro sæculo dimittēda, quæ in hoc sæculo, in vna & vera Ecclesia Catholica fuerint vnicuiq; dimissa: Soli enim illi Dominus ligandi, soluendiq; tribuit potestatem dicēs: Tibi dabo clauēs regni cælorū. Et hætenus quidē de Fulgentij doctrina, prout eam nobis suis literis explicatam reliquit, quam profectò existimādum non est, ab ipsius viua voce discrepasse, qui cum per septuaginta propè dies, graui morbo fatigaretur, id solum frequenter dicebat; Domine, da mihi modo hîc patientiam, postea indulgentiam: satis id declarans, non hic modò remissionem peccatorum dari, verum etiam post hanc vitam rectè à pijs talem expectari.

Non

Libro 1.

cap 24.

Matth. 12.

Matth. 16

Non esse statuendum , bonos omnes
continuò transire ad vitam beatam.

CAP. VI.

NVnc ad Aretium redeamus, videamus-
que ex scripturis, Veterumque testimo-
nijs prauè intellectis, quid obijciat.

*Statuamus ergo, inquit, bonos hinc transire ad
vitam aternam; malos contra ad damnationem
aternam: necesse vllum locum pœnitentia, post-
quam semel mortui fuerimus.*

Quasi verò dubitemus, Areti, quin sint hæc
vti exprimuntur verissima. Sed sic arbitror di-
cere maluisti, vt opinionem induceres, qua
existimaretur à tuis, nos aliter sentire; & vel bo-
nos, negare hinc transituros ad vitam, vel as-
serere pœnitentiam frugiferam agi posse post
mortem. Quid autem de pœnitentia quæ post
hanc vitam agi possit sentiamus, credo te ex ijs
quæ supra dicta sunt, & ex beati Fulgentij cla-
rissima in hoc argumento doctrina, posse fa-
cillimè percipere. Ad quem etiam Bernardus
accedat, qui in libello sententiarum suarum,
breuissimè docet triplicem esse animæ statum.
Vnum in corpore; secundum posito corpore;
tertium recepto corpore: Primum datum esse
ad agendam pœnitentiam; reliquos duos ad ha-
bendam requiem vel pœnam: Porrò ad agen-
dam pœnitentiam requiri tria, Tempus, corpus,
& locum: Tempus huius vitæ, quia hoc tem-
pus acceptabile: Corpus ad patiendum pro de-
lictis

licitis commissis : Locum Ecclesiæ , quia qui extra Ecclesiam sint , sic videlicet vt ne animo quidem sint intus , ij frugiferam pœnitentiam agere non possunt. Ad vitam verò hinc transire bonos non negamus : sed , quod tu vis intelligi , omnes omnino bonos & iustos , nullis pœnis quenquam remorantibus , continuò transire ad vitam beatam , id verò est quod pernegamus . Sunt enim boni quidem multi , & iusti & amici Dei : sed qui sicut cùm viuerent , habebant plerunque aliquid temporarijs pœnis dignum atque purgandum ; Ita etiam hinc morte decedentes , tale quippiam secū deferre potuerunt , quod post hanc vitam purgari esset necesse. Vna enim hæc ratio est , propter quam non sit consequens , vt si bonus hinc quisquam emigret , beata continuò vita potiatur . Bonus enim est , quia Deum sic amet , vtei nihil in sua dilectione præponat ; sed , vt se habet infirmitas humana , & languor quidam , cui non feruentissima charitate , & promptissima vigilantia resistitur , carnalibus affectibus tenetur adhuc multis implicatus : qui vt secundum virtutis rationem iure improbantur , correctionemque desiderant ; ita etiam permanentes & neglecti , meritò puniuntur ; sed temporarijs flagellis , non æternis ; quod ijs venialiter duntaxat delinquitur , non iustitia euertitur . Quales sunt , verbi gratia , coniugatorum affectus eorum , de

1. *Corin.* 7. quibus Paulus ait , quod cogitent quæ mundi sunt , quomodo placeat alter alteri , & ea cupiditate

dirate distractiones crebras ab ijs quæ Domini sunt, patiuntur. Neque enim cum vitæ statum in quo hæc insunt, malum & damnabilem esse, voluit significare beatus Apostolus, sed ad aliū tanquam meliorem purioremque adhortari, in quo facultas inesset liberius seruiendi omnium Domino. Boni ergo illi quidem homines sunt, vereque iusti, qui cum vitæ statum sequuntur: sed ita iusti vt sine peccato plerique non viuāt, non eo solum quod raprim quasi perstringat, celeriterque præteruolet, qualia sunt etiam in hac mortali vita perfectorum; sed eo planè qui tenaciter inhæreat infideatque penitus, vt nec magnis ægritudinibus, alijsque flagellis reuelatur. Habent ergo isti in fundamento Christum, quem sic non haberent, nisi eum affectu cordis, temporarijs omnibus bonis anteponerent: ita vt si conditio proponeretur, aut illa bona, aut Christum amittendum esse, citius, quam hunc negando, aut crimen aliquod perpetrando perderent, illis se carete paterentur. Quippè in ædificio, inquit Augustinus, nihil *Lib. 1. v. de ciuit. Dei c. 26.* præponitur fundamento. Benè proinde his in fundamento Christus est, qui ei nihil in vlllo genere rerum anteponunt. At cum sic teneant Christum in corde per veram in eum charitatem, superædificant tamen ligna, fœnum, stipulam ignis videlicet pabulum, & ea quæ tanquam non aptè suo fundamento congruentia, corrumpi, exuri que mereantur. Superædificari autem intelligenda sunt, non quæ veloci-

ter

ter transeunt, & charitatis ardore celeriter assumuntur, aut pœnitentiæ lachrymis promptè absterguntur; sed ea propriè quæ permanent, fixaque cohærent, vt ex his ædificium quasi quoddam extrui & constare videatur. Ac ligna quidem affectus sunt vitiosiores, magisque tenaces & permanentes, aut humani erroris imprudentiæ, in quibus interdum, etiam ij qui inter prouectiores numerantur, sibi tanquam rectè iudicantes applaudunt, seque corrigi nō oportere censent. Cuiusmodi peccata vel cupiditatum vel ignorationū, si in hac vita flagellantur in iustis hominibus, varijs sepe numero temporalium commodorum detrimentis, vt isto modo tāquam scoria ab auro detracta purgatiores euadant ij quibus inhærebant; quid mirandum est tale quiddam euenire post hanc vitam, cum illic præsertim iudicii dies sit atque examinis? Nam tales affectus atque errorum culpas, quas inter grauissimas & longissimas ægritudines cernimus perdurare, vnde quæso diuinauerimus in morte ipsa & extirpari radicitus, & plena obliuione aboleri? Ac scio quidem hos veram negare iustitiam solere, quæ non sit perfectæ, ipsaque venialia peccata quæ vocamus, affirmare veram iustitiæ rationem excludere; sed hoc vt liber teneant, ad rem enim non admodum pertinet: satis est, si iustos esse concedant eos qui eiusmodi vitiosis laborent affectibus, in ijsque interim viuant. Si iusti sunt, meritò ergo iusti propter eiusmodi pecca-

peccata temporaliter flagellantur, & si hîc aliquando; ordinariè ergo in futuro, cum eos nãuos ante mortem non deposuerint. Non enim dicturos esse credo, manere peccata illa & tamen esse per fidem remissa, ideoque propter ea neminem hîc iustum puniri, sed dũtaxat exerceri. Dici enim absurdius nihil potest, quam vt simul consistent manere, verbi gratia, mentiendi affectum & studium, & tamen idem simul esse remissum. Quomodo enim peccare quisquam potest, nec tamen eum in quem peccetur offendere? Quomodo autem idem esse potest simul in eodem & offensus & placatus? Et si ea quæ leuiora dicuntur peccata, eodem tempore & committuntur & remittuntur, quid impediat, cur non & grauiora? si mendacium, cur non & latrocinium? præsertim cum etiam hoc isti dicere soleant, omne peccatum esse mortale suapte natura: Omne ergo peccatum suapte natura mortale cum sit, si vno remanente nec adhuc per affectum deposito, eius tamen facta remissio est per fidem, nihil est profectò cur non de omnibus alijs, quantumvis suo genere grauioribus peccatis, idipsum dicendum esse videatur: Quod tamen, si absurditate non ferenda diceretur, sequitur vt fateri debeant homines iustos ob sua quotidiana peccata, quæ vulgò venialia nuncupantur, non modò exerceri temporarijs huius vitæ flagellis, verum etiam verè proprièque puniri, idque in hac vita si fiat, ex eadem

dem prorsus caussa multo magis post hanc vitam euenire oportere: Quia, quemadmodum *Matth. 12.* scriptum est, etiam de verbo otioso, reddituri sunt homines rationē in die iudicij. Quid autem est, reddent rationem? aut quomodo verbi otiosi reddi ratio poterit, cuius si ratio aliqua reddi posset, otiosum non fuisset? Quid igitur aliud significat Dominus quam etiam verba otiosa, quibus difficile est vitā carere iustorum, in iudicium post hanc vitam vocanda esse, exigendamque eorum rationem: quæ quoniam reddi non poterit, ob id pœnā esse subeundam, aut impetrandam remissionis gratiam? Neque enim quenquam dicturum arbitror, aut solos iniustos & impios, verbi otiosi offensam contrahere; aut eos solos ad reddendam rationem cogendos in die iudicij, ait enim; Omne verbum quod loquuti fuerint homines, reddent rationem de eo in die iudicij. Qui omne dicit, nullum excipit, siue id à iusto siue ab iniusto profectum sit. Quare sequitur & iustos qui in eius generis culpis ad mortē vsque perseuerauerint, in die iudicij rationē earum esse reddituros; ac vel propterea puniendos, vel si id hac in vita meruerint, remissionem accepturos. Est & altera ratio, ex qua hoc idem intelligi queat, quonam modo iustus & bonus, aliquas post hanc vitam temporarias pœnas incurrat; quæ quidem ratio, non iam in venialibus tantummodo, sed in mortalibus etiam peccatis spectanda proponitur. Mortalia namque peccata, quæ

quæ sacræ literæ crimina vocât, de quibus pronunciant, qui ea fecerint regnum Dei non esse consecuturos, sic remitti certum est in iustificatione peccatoris, vt tamen subindè remaneât supplicia temporaria, in flagellis vitæ huius & calamitatibus, de ira Domini ob peccata priora prouenientibus, quæ quidem remissa sunt eatenus, vt ad pœnas non obsint æternas (quæ magna indulgentia Domini est) sed authores tamen suos ad temporales afflictiones teneant obstrictos. Neq; verò obscura rei huius exempla sunt, neque procul petenda. Mox occurrit David rex, cuius post crimina grauissima, nota simul fuit pietas, & tamen aduersa multa & calamitates graues: casus filiorum, & factiones; exturbatio è domo propria: violationes vxorum; maledicta seruorum; mors filij; pestilentia grauis. Quæ omnia ad vindictam priorum criminum; iam tamen quo ad æternam mortem condonatorum, pertinere si quis neget, is nihilo minus agat quam si sacram librorum diuinorum historiam apertè mentiri fateatur. Propheta quidem Nathan posteaquam dixisset, transtulisse Dominum à Dauide peccatum ipsius ne moreretur, mox adiunxit; Veruntamen quoniam blasphemare fecisti inimicos Domini propter verbum hoc; filius qui natus est tibi, morte morietur: quod nihil aliud est quam si dixisset planius: Tu quidè ipse non morieris, câq; tibi ex parte (quæ sanè potissima est) do veniam; sed tamen filij tui temporanea D morte

2. Reg. 12.
c. 24.

2. Reg. 12.

Numer. 20 morte punieris. Sic & de Aaron legitur: Per-
 gat Aaron ad populos suos. Non enim intrabit
 terram quam dedi filiis Iſrahel, eo quod incre-
 dulus fuerit ori meo ad aquas contradictionis.
 Excepitque Moysen eadem diuinæ ſeueritatis
 ſentētia; nec ipſe quamuis Deo charus, terram
 promiſſam ingredi permiſſus eſt, ob contractā
 ad aquas cōtradictionis offenſam. Quid etiam
1. Cor. 11. illa quæ ſcribit Apoſtolus de indignè commu-
 nicantibus, è quibus propterea imbecilles &
 ægroti & morte rapiebantur etiam multi? Quid
 ſignificant niſi peccatum mortiferum ſic fuiſſe
 remiſſum, vt non pertraheret in æternam cum
 mundo ſeu reprobis damnationem, & tamen
 morbis & morte temporaria fuiſſe vindicatum?
Ibidem. Cū enim iudicamur, inquit, à Domino cor-
 ripimur, vt non cum hoc mundo damnemur.
 Quid autem iudicari, niſi condemnari ad pœ-
 nam? Quæ correptio niſi iudiciaria & pœnalis
 propter culpam? Mors ergo temporis huius in
 carnis reſolutione, pœna fuit illis peccati remiſ-
 ſi quidem, ſed ad id tantummodo ne obſeſſet in
 æternum. Quapropter ſi diuinæ iuſtitiz ſeue-
 ritas, tantam hic criminis admiſſi rationem ha-
 bet interdum, vt ſoluto etiam mortis æternæ
 reatu, non tamen omnino inultum abire patia-
 tur; quid facere exiſtimanda eſt in futuro ſæ-
 culo, quod propriè iudicij eſt & retributionis?
 Ac præuenire quidem hic poſſumus, de nobis-
 iſis ſupplicium expetentes, noſque ipſos iudi-
 cantes, quod relapſorum pœnitentia poſtulat.

Non

Non enim in Baptismo & reconciliationis sacramento, par est indulgentiæ diuinæ facilitas: quod ipsum satis ostendit author ille sub nomine Augustini supra citatus, ex libro quæstionũ, quem sicut illic Aretius pro suo errore facere existimauit, vtinam eum hic pro veritate amplectenda sequeretur. Ad se, inquit, conuersis *Quæst. 102 in mixtis.* credentibus, omnia simul peccantibus concedit, nulla interueniente lamentatione pœnitentiæ. Vnde dicit Apostolus: Sine pœnitentiâ enim *Roma. 11.* sunt dona & vocatio Dei. Post autem si peccauerint, per pœnitentiam poterunt mereri veniam. Et quia post acceptam gratuitam misericordiam peccauerunt, non iam gratis, sed interueniente gemitu & fletu, possunt ad indulgentiam peruenire. In his verbis nomine pœnitentiæ ipsum significauit pœnitentiæ sacramentum, quod Christus pro relapsis instituit: neque enim nescius fuit aliquam esse etiam ante baptismum pœnitentiam, quâ nomine conuersionis designauit. Non gratis autē ad indulgentiam perueniri postea dicit, non quia gratuita non sit illa per Christum iustificatio, sed quia non sine pœnali satisfactione, plena (vt prius) indulgentia statim conferatur. Cypriani quoque totiusque verustatis est doctrina confirmis, à relapsis requiri lamenta, saccos, ieiunia; & alia opera satisfactionis, quibus in seipsum quisque animaduertat. Quæ si non adhibita hîc sint pro modo & magnitudine peccatorum, & tamen sincera cordis ad Deum non defuerit

D ij con-

conuersio, mirandum est, si post mortem expectantur, & postea tamen salus æterna speretur? Ergo & hic quosdam inuenimus sic bonos, vt tamen hinc emigrantes, quibusdam excipiantur tēporarijs afflictionibus & ærumnis, donec iustitiæ Dei sit satisfactum. Sunt sanè ita boni quidam & iusti, vt liberi statim euolent ad superos, digni per omnia qui societate beata nulla interueniente mora perfruantur: Verū non omnium ista excellentia est; Quin id Tertullianus ex sola martyrij prærogatiua putauit euenire. Nemo enim (inquit) peregrinatus, à corpore, statim immoratur penes Dominū, nisi ex martyrij prærogatiua, scilicet paradiso non inferis deuersurus. Hoc ille in eo libro, quem scripsit de Resurrectione carnis, illos etiam sub martyribus compræhendens, qui tanta flagrant charitate, vt eorū magis animo martyrium, quàm animus martyrio desit. Sed his tanto animi robore præditis hominibus, num cæteros omnes quamuis bonos æquabimus? Et si tanta fuerit virtutis in vita disparitas, nullum erit post excessum è vita discrimen? Nullum vos quidem esse vultis, qui præmia etiam omnium paria facitis; qui sola peccatorum remissione omnium iustitiam definitis; qui non solum apud inferos, sed nec in cælo apud patrem plures mansiones agnoscitis; qui tollitis stellarum viuentium in beatæ resurrectionis claritate distantiam. Hic nimirum fons est, vnde emanat illius impuritatis riuulus, quo iustos omnes Apostolis etiam
ip̄is

ipsis cœquatis; vnde sibi apud Deum vel ex-
 tremæ horæ tenuis post flagitiosam vitam con-
 uersio, tantum vendicat, quantum innocentia
 longissimæ & præclarè actæ vitæ. At aliter cum
 Tertulliano Cyprianus, cuius luculenta oratio
 est libro 4. epistolârum, epistola 2. quæ scripta
 est ad Antonianum: Floret, inquit, Ecclesia tot
 virginibus coronata, & castitas ac pudicitia te-
 norem gloriæ suæ seruat: nec quia adultero pœ-
 nitentia ac venia laxatur, continentiae vigor
 frangitur. Aliud est ad veniam stare; aliud ad
 gloriam peruenire: aliud missum in carcere nō
 exire inde donec soluat nouissimum quadran-
 tem; aliud statim fidei & virtutis accipere mer-
 cēdem: aliud pro peccatis longo dolore crucia-
 tum emendari, & purgari diu igne; aliud pecca-
 ta omnia passione purgasse: aliud denique pen-
 dēre in die iudicij ad sententiam Domini; aliud
 statim à Domino coronari. Agnouit etiam Au-
 gustinus bonorum hanc differentiam, talesque
 vitæ bonæ gradus, cum agens de ijs operibus
 quibus Christiani post mortem possint adiuua-
 ri & leuari: Est (ait) quidā viuendi modus, nec
 tam bonus vt non requirat ista post mortē, nec
 tam malus vt ei non prosint ista post mortē. Et
 alia quæ sequuntur, Enchiridij cap. 110. Rursum,
 In his, inquit, qui filij sunt promissionis & vasa *Lib. 21. de*
 misericordiæ, valet quod ait idē Apostolus: Su- *ciuit. Dei:*
 perexultat autem misericordia iudicium. Quo- *cap. 27.*
 niam & illi iusti, qui tanta sanctitate vixerunt, *Iacob, 23*
 vt alios quoque recipiāt in tabernacula æterna,
 D iij quibus

- Luce 16.** quibus amici facti sunt de mammona iniquitatis, ut tales essent, misericordia liberati sunt ab eo qui iustificat impium, imputans mercedem secundum gratiam, non secundum debitum. In eorum quippe numero est Apostolus
- 1. Corin. 7.** qui dicit: Misericordiam consecutus sum ut fidelis essem. Illi autem qui recipiuntur à talibus in tabernacula æterna, fatendum est quod non sint his moribus præditi, ut eis liberandis sine suffragio sanctorum, sua possit vita sufficere; ac per hoc multo amplius in eis superexaltat misericordia iudicium. Et paulò infra: Est itaque quidam vitæ modus, nec tam malæ, ut his qui eam viuunt, nihil profit ad capeffendum regnum cælorum largitas eleemosynarum, quibus etiam iustorum sustentatur inopia, & fiunt amici, qui in tabernacula æterna suscipiant: nec tam bonæ, ut ad tantam beatitudinem adipiscendam eis ipsa sufficiat, nisi eorum meritis quos amicos fecerint, misericordiam consequantur. Hæc Augustinus. Quamuis igitur latro ille bonus, magna & singulari quadam charitate ad Christum conuersus, hoc diuinæ clementiæ priuilegio usus sit, ut statim donatus sit paradisi felicitate: non tamen conuincit hoc, de alijs omnibus bonis ita esse sentiendum, propter illam, quam diximus, in bono differentiam. Sunt enim & pœnitentiæ, & charitatis, & omnino iustitiæ, sicuti & criminum atque delictorum varij admodum gradus: propter quos non solum multæ mansio-
- nes

nes sunt in domo patris cælestis, nec solum magna claritatis in resurrectione differentia; verūetiam multa inæqualitas in egressu cuiusque, distantiaque multiplex suppliciorum. Mali verò propter dominantem in eis iniquitatem, continuò in tenebras deuoluuntur. Quippe iniustitia in qua sunt depræhensi, bonorum si qua per eos facta sunt, obliuionem inducit. Iustitia verò in bonis omnibus præponderans, transitum quidem patefacit ad vitam; sicut scriptum est; Quia qui verbum meum audit, *Ioh. 5.* & credit ei qui misit me, habet vitam æternam: & in iudicium non venit; sed transiet à morte in vitam: verum ita sæpenumero imperfecta reperitur, vt sicut non omnem affectionem malam, & amorem sæculi, ita non omnem afflictionem & pœnam excludat. Et quia malum ex singulis oritur defectibus, bonum verò integra constat caussa; idcirco vnum quidem in quo quis discedit crimen, statim damnat; sed iustitia nisi tota sit, non continuò beat. Cùm autem dicitur; In iudicium non venit, hoc significatum est iudicium, de quo postea subiungitur: Et procedent qui bona fecerunt in resurrectionem vitæ; qui verò mala egerunt, in resurrectionem iudicij, id est, æternæ damnationis. Quomodo etiam iudicium accipit Apostolus, cùm ait: Qui manducat & bibit indigne, iudicium sibi manducat & bibit. *1. Cor. 11.* Ac post iterum; Vt non in iudicium, inquit, conueniatis. Hoc ergo tristissimæ damnationis iudicium

Cap. 14.

Roma. 8.

Matth. 15.

Lib. 22. de
civit. Dei,
cap. 23.

diciunt effugiunt omnes boni, ideoque ad omnes etiam illud pertinet bonos, quod scriptum est in Apocalypsi; Beati qui in Domino moriuntur: Amodo enim iam dicit spiritus, ut requiescât à laboribus suis: Opera enim illorum sequuntur eos. Boni siquidem iusti que omnes moriuntur in Domino, propterea que moriuntur benè, quia moriuntur boni. Beati ergo illi, non tantummodo spe, quod sunt etiam in hac mortali vita, periculorum licet plenissima: Spe enim salui facti sumus, inquit Apostolus: Et, Beati mites, ait Saluator; beati pauperes spiritu, aliaque plura, quæ propter spem dicuntur, quam illi gerunt qui beati esse pronuntiantur: Sed beati sunt peculiariter ab ipsa continuè morte; quia vel sunt adepti quod sperabant, vel omni cadendi periculo liberati, id se consecuturos esse exploratum habent. Si enim spes vitæ huius cum magno coniuncta metu excidendi, facit ut sancti beati appellentur, multo profectò magis propter ipsam securitatem beati poterunt æstimari, etiam si ad tempus quibusdam crucientur afflictionibus. Requiescunt autem à laboribus suis, quibus in hac vita sudarunt; contra diabolum, carnem, & mundum periculosa militia decertantes. Sunt enim hi sanctorum labores proprii; quibus cum timore & tremore suam salutem operantur: De quibus vitæ huius malis D. Augustinus ita scriptum reliquit: Præter mala, inquit, huius vitæ, bonis malisque communia, habent

habent in ea iusti etiam proprios quosdam labores suos, quibus aduersus vitia militant, & in talium præliorum tentationibus periculisq; versantur. Aliquando enim concitatus, aliquando remissius, non tamen desinit caro concupiscere aduersus spiritum, & spiritus aduersus carnem, vt non ea quæ volumus faciamus, omnem malam concupiscentiam consumendo, sed eam nobis quantum diuinitus adiuti possumus non ei consentiendo subdamus, vigilijs continuis excubantes; ne opinio verisimilis fallat; ne decipiat sermo versutus; ne se tenebræ alicuius erroris offundant, ne quod bonum est malum, aut quod malum est bonum esse credatur; ne ab his quæ agenda sunt metus reuocet, ne in ea quæ agenda non sunt cupido præcipitet: ne super iracundiam sol occidat; ne inimiciæ prouocent ad retributionem mali pro malo; ne absorbeat inhonestas vel immoderata tristitia; ne impartientorum beneficiorum ingerat mens ingrata torporem; ne maledicis rumoribus bona conscientia fatigetur; ne temeraria de alio suspicio nostra decipiat, ne aliena de nobis falsa nos frangat; ne regnet peccatum in nostro mortali corpore ad obediendum desiderijs eius; ne exhibeantur membra nostra arma peccato; ne oculus sequatur concupiscentiam; ne vindicandi cupiditas vincat; ne in eo quod malè delectat vel visio, vel cogitatio, remoretur; ne improbum aut indecens verbum libenter audiat;

D v ne

ne fiat quod non licet etiam, si liber; ne in hoc bello laborum periculorumque plenissimo, vel de viribus nostris speretur faciēda victoria, vel viribus nostris facta tribuatur, sed eius gratiæ

1. Cor. 15. de quo ait Apostolus; Gratiarum autē Deo qui dat nobis victoriam per Dominum nostrum Iesum Christū. Sic Augustinus de laboribus sanctorum proprijs, quibus perfuncti, post mortem in magna securitate acquiescunt: & eis tamen adhuc ab Ecclesia requies petitur, donec eius sint plenitudinem assecuti: quæ tum contingit, cum per claram diuinitatis contemplationem datur summo bono perfrui, ipsumque possidere. Tunc enim omnia desideria expleta & satiata; velut in suo fine, & loco naturali conquiescunt. Hæc autem propterea post mortem eueniunt bonis, quia opera ipsorum sequuntur illos. Reddunt igitur bonos, opera iustitiæ, in quibus se hic laboriosè exercuerunt, beatos; sicuti mala, miseros. Vnum his addam, beatum Augustinum interpretari locum illum totum de martyrum animabus, in quas hæc peculiariter excellentiūsq; competunt. Ideo, inquit, tantummodo martyrum animas commemoravit, quia ipsi præcipuè regnant mortui, qui vsque ad mortem pro veritate certarunt. Sed à parte totum, inquit, etiam cæteros mortuos intelligimus, pertinentes ad Ecclesiam, quod est regnum Christi. Rectè etiam D. Cyrillus docet animas sanctorum neque vagari in terris donec sepulturæ honoribus affectæ sint, neque

**Lib. 10 de
civit. Dei,
cap. 9.**

**Lib. 12. in
Ioh. cap. 36.**

neque vt peccatorum animas deferri ad immensi cruciatus locum, id est, ad inferos, sed in manus patris euolare, vitamque sortiri cum Christo perpetuam; quemadmodum Paulus significat, cum ait, cupere se resolui & esse cum Christo. Euolant enim omnes in manus patris, quia statim eas in suam tutelam protectionemque recipit, malignos arcens spiritus ne conturbent, aut aliorum quam meritæ sint rapiant, iuxta id quod scriptum est apud Sapientem: Iustorum animæ in manu Dei sunt, & non tanget illos tormentum mortis, visi sunt oculis insipientium mori; illi autem sunt in pace. Magna enim pax, ubi tentatione remota, nullus cadendi metus, nullum amittendæ iustitiæ periculum: Ideo enim raptus est iustus, ne malitia mutaret intellectum, aut ne fictio deciperet animam illius. Hic enim fascinatio nugacitatis obscurat bona, & inconstantia concupiscentiæ transuertit sensum sine malicia. Vitam quoque quam hæc sit meliorem, & cum Christo perpetuam, certum est habituras esse iustorum animas, vel mox resolutis corporibus si nihil impediat; vel certè, non multò post.

Philipp. 2.

Cap. 3.

Sapient. 4.

Tertia descriptio, contra Aretij obiecta defenditur. CAP. VII.

Tertia, inquit, descriptio perniciosa est, quia culpam hic solum remitti affirmat, pœnas autem elui in Purgatorio. Sic autem meritum Christi

Christi imperfectum est : & Deus cum peccatorem recipit in gratiam , non solum culpam sed & pœnam remittit . Contra , illi , culpam condonari , sed pœnas soluendas in Purgatorio . Accedit illud , quod ne ipsi quidem in hac doctrina persistunt . Nam ut dicant pœnas in Purgatorio tantum deleri , tamen affirmant satisfactionem Purgatorii interdum valere etiam contra peccata mortalia : Quæ omnia euacuant Christi meritum .

Haftenus ille.

Obsecro , Areti , quæ tibi potuit hoc videri consequens , ut si Purgatorium esse statueretur pœna grauissima , minor tamen quam infernalis , (id quod habet secunda purgatorii notatio) propterea diceretur hic tantummodo culpam non pœnam remitti , aut etiam pœnam dilui in purgatorio ? Qui enim purgatorium dicit esse pœnam , is de eius remissione & dilutione dicit omnino nihil , possetque consistere , ut esset in purgatorio pœna , & eius tamen nulla fieret per Dei misericordiam diminutio , aut remissio , sed tota pro peccatorum meritis exigeretur , donec esset iustitiæ rigori satisfactum . Nam iusto quidem non potest æterna pœna deberi , ne fraudetur præmio iustitiæ ; sed potest interim temporaria , quam meritis est pœna , post hanc vitam seuerè & sine aliqua remissione deposci . Quod si intelligit remitti hîc culpam , sed pro pœnæ remissione illam in purgatorio pœnam sustineri , quid fingit , quod nemini Catholico vnquam in mentem venit ? Neque enim pro dilu-

lucen-

luenda pœna ille in purgatorio cruciatus irrogatur, quasi sit illic pro pœna satisfactio, cum ipsa sit pœna quæ propriè rependitur peccato. Non ergo in purgatorio propterea ponitur aliqua pœnæ dilutio, quia ponitur pœna. Neque enim seipsam pœna diluit: quamuis tolerata & suscepta à reo, si temporanea sit, dici possit reatum diluere quodam modo. Desinit enim esse reus pœnæ, postquam eam ad iustitiæ rigorem exoluit. At in hac vita per eam pœnam quæ studio satisfaciendi vltro suscipitur, futuri sæculi diluitur pœna. Ad hoc enim sustinetur hic, ut ibi nulla, vel certè leuior multo superfit, grauius enim est incōparabiliter illic puniri, quam hîc. Quod si in hoc mundo condigna subitur satisfactio, quæ diuina æstimatione pro futuri sæculi ærumna sufficiat, aut quæ tanquam sufficiens misericorditer acceptetur, tū hic non culpa solum remittitur, verum etiam pœna. Neque alia ratio est quam obrem cum per sacerdotem quisque absoluitur, non accipiat plenā remissionem quoad culpam & pœnam, quā quia non expleuerit omnia, quæ ad huius perfectionem pœnitentiæ desiderantur, cum sit plerunque frigida & perexigua satisfactio: In qua si esset, ut erat olim studium ardentius, non æternæ modo pœnæ, seu gehennæ reatus solueretur; verum etiam, omnis aut penè omnis aboleretur purgatorij supplicij obligatio. Nec verò insufficiens est Christi meritum, quia remissa per iustificationem culpa, plerunque post mortem

pœna

pœna aliqua luenda relinquitur; sed cum sit sufficientissimum ad plenam remissionem consequendam; nos vitio nostro fructum plenæ indulgentiæ ex eo percipere negligimus. Est enim ille quidem fons patens in ablutionem peccatoris & mēstruatur, qui ad omnes omnium sordes perfectè eluendas cumulatissimè sufficiat; id quod declarat multorum sanctorum, & imprimis beatorum martyrum perfecta etiam ante mortem purgatio: sed sicuti quod multi interim alij suis in sordibus computrescant & pereant, non arguit meriti & fontis imperfectiōnem; ita ex eo colligi imperfectio atque imbecillitas meriti nulla potest, quod quibusdam non plena donetur remissio peccatorum. Non enim imperfecta purgatio est ex eo quod fons perfectè purgare non potuit, sed ex eo quod ij qui purgandi veniebant, id agere noluerint, ut ex eo perfectè purgarentur. Nec propterea parum accipitur, quia dari nō potuerit multū, sed quia vasculum quod affertur, propter angustia sui, capere multum non possit. An est imperfecta etiam Dei bonitas aut potentia, quia tam multi exitio pereant sempiterno? Minimè inquis; sua enim quisque perit culpa & voluntate, non imbecillitate Dei, aut misericordiæ defectu. Cur ergo inquam, quod hic tam commodè responderetur, non illò quoque transferunt, ut propositæ rationis latius pateat utilitas? perfectum esse videlicet meritum Christi; sed languorem nostrum impedimento esse, quo

quo minus ex eo plenissimè hauriamus. Aut mihi alioqui respondeant, cum sit perfectum Christi meritum, cur adhuc, uti volunt, in peccatis nostris simus? Cur nō veritate iustitiæ, sed sola reputatione iusti censeamur? Cur peccet iustus etiā mortaliter in singulis operibus? cur maneat in baptizato concupiscentia, veri proprijque nominis peccatum? Quam præposterum est, ut seipsos non videant propter hæc facere Christi meritum imperfectum; nos acculent tanquam id faciamus, quia hominem minus pro sua salute vigilantem atque sollicitum, negemus plenam statim accipere remissionem peccatorum? Quod autem additur, Deum cum peccatorem recipit in gratiam, non solum culpam, sed etiam pœnam remittere, id falsum esse supra Davidis exemplo & Corinthiorum ostendimus. Nam his quidem Corinthijs, nisi culpa fuisset remissa, hoc est, nisi per iustificationis gratiam solutus fuisset ante mortem damnationis æternæ reatus, fuerant plane cum hoc mundo damnandi: & tamen hoc soluto reatu, mors temporaria, citius quam alioqui vêtura fuisset, in vindictam peccati sequeretur. Possumus & paruulos eis obijcere, quibus remissa per baptismū culpa, plenissimè quidem quoad futuri sæculi pœnas, ita ut nihil eos emigrâtes hinc, ab ingressu cœli remoretur, restat tamen mors sæculi huius, pœna indubiè permolesta, ex antiqua iudicis sententia proveniens: Quacunque die comederis, morte moriê- *Genes. 2.*

Genes. 3.

moriêris : Ac rursum; Pulvis es & in puluerem reuertêris. Hanc enim quotidie sententiam suam Dominus exequitur in grandibus & paruulis. Vnde scire possumus mortem hanc, quæ in resolutione carnis est, pœnam esse peccati: quam quia Dominus pro nobis suscipere dignatus est, propterea peccata ipse nostra dicitur in sua carne portasse. Nam quod hic ad exercitium confugiunt, propter quod vitæ huius ærumnas & mortem dicant iustis esse relictas, id profectò locum nullum habet in paruulis; quos tantis quibus premuntur sæpè malis, nemo exerceri dicat, nisi qui benè de rebus iudicando, parum ipse se exercuit. Idcirco beatus Augustinus de morte & cōmunibus vitæ huius

*Tract. 124
in Iohannē.*

ærumnis loquens, Temporaliter (inquit) hominem detinet pœna, quem iam ad sempiternam mortem non detinet culpa. Ac Dauidem quidem ipsum non totam statim veniam consecutum esse, præter scripturas, Veteres annotauerunt: Ambrosius in psalmum 37. Qui pœnitentiam, inquit, agit, offerre se debet ad pœnam, vt hic puniatur à Domino, non ad supplicia æterna seruetur; nec expectare tempus, sed occurrere diuinæ indignationi. Vide facta Dauid eius precibus conuenire: Offenderat Dominum, quia numerari iusserat populum; confessione præuenit Dei nuntium; peccasse se valdè, & nimis stultè fecisse commemorans. Et infra: Non ergo penitus sibi peccatum remitti postulat, sed moderata solutione deleri,
hoc

hoc est, vt in futurum eius memoria deleatur. Docet his verbis Ambrosius quod dicimus, remissionem quandoque dari non plenam, seu non penitus remitti peccatum; sed ita vt relictis vitæ huius supplicijs in futurum eius memoria deleatur, id quod Dauidi accidisse significat. Augustinus quoque: Ad hoc vnum verbum inquit, peccaui, meruit audire quod accipit veniam: Ad quam rem, nisi ad sempiternam salutem? Neque enim prætermissa est in illo secundum comminationem flagelli paterni disciplina, vt & confessus in æternum liberaretur, & afflictus temporaliter probaretur. Quamuis autem B. Augustinus probationis meminerit, non tamen consequens est, cum intelligi voluisse Dauidem probatum, non punitum fuisse: non enim flagelli paterni secundum comminationem Dei suscepisse diceret disciplinam, nisi intelligi voluisset pœnam, quæ propter commissâ peccata inferretur. Nemo siquidem flagellatur, nisi propter peccata priora. Ipsa quoque Dei comminatio, nō exercitij, sed supplicij fuit. Veruntamen probationem appellauit Augustinus, quod sic esset supplicium secundum Dei comminationem inflictum, vt tamen non tantum ad pœnam irrogaretur, quomodo flagellantur perditî, sed vltèrius hoc ipsum ad probationis vtilitatem referretur.

*Libro 22.
contra Fan-
at., ca. 67.*

At in hac doctrina qua remissa hîc culpa pœnam in purgatorio docemus permanere, quomodo, te rogo Areti, non persistimus? videlicet

E quia

quia purgatorij satisfactionem affirmamus **valere** interdum etiam contra peccata mortalia, quæ omnia, inquit, euacuant Christi meritum. Primum, nemo hoc affirmat Catholicus sic ut tu prædis, quasi videlicet hic non remissa peccata mortalia, ibi pœnis purgatorijs dilui possint. Sed dicitur à catholicis mortale peccatum in hac vitâ remissum, quoad immensos illos gehennæ cruciatus, puniri adhuc temporarijs post hanc vitam supplicijs, penitusque illic expiari, istoque modo non venialia modò peccata, verumetiam mortalia, quantum ad suas pertinet reliquias, aboleri. Deinde etsi quis id affirmaret, non remissum hîc mortale peccatum, illic satisfactionibus & pœnitentia deleri posse, cur is meritum Christi euacuaret? an quia satisfactionē poneret post hanc vitam? sed vti des, ut charitas, ut sincerus ob peccata dolor tristitiaque secundum Deum, ut laus, ut confessio aliaque bona post hanc vitam, esse possunt & sunt citrà iniuriam meriti Christi, quoniam ex merito Christi profluxerint; quamobrem illic quoque statui satisfactio, nisi euacuata Christi morte, non posset? Nam quod ad euacuandum quidem attinet meritum Christi, nihilo plus euacuaret satisfactio ibi tolerata quam hic suscepta, modò sanguini Christi, vbicunque esset, ascriberetur, vimque suam & efficaciam inde statueretur accipere. Satisfactionem igitur mortalia peccata diluentem quæ hic remissa non sint, non hoc metu remouemus à purgatorio,

torio, quod euacuandum esset meritum Christi: Redimentem enim peccata satisfactionem *Daniel. 4.* iuxta id quod scriptum est, Peccata tua eleemosynis redime, ipsi hic ponimus: nec tamē euacuare nos Christi meritū arbitramur, ex quo omnis nostra satisfactio, visque eius vniuersa promanat. Si enim ne hic quidem vllus est nostræ satisfactioni locus, quia pro nobis Christus plenissimē satisfecit; nec orationi igitur nostræ vllus erit relictus locus, quoniam plenissimē sufficientissimeque pro nobis Christus orauerit, atque etiamnum pro nobis interpellat; nec dubium quin plenē & sufficienter, ad eumque modum, vt in omnibus exaudiatur pro sua reuerentia. Orare tamen ipsi iubemur & remissionem peccatorum petere, quo sic ad nos Dominicæ intercessionis fructus, deriuetur. Planeque ad eum modum satisfactiones suscipimus laboriosas, vt satisfactionis eius quam in cruce mediator noster obtulit patri, ad plenam peccatorum abolitionem efficiamur participes. Quamuis enim plenē pro nobis satisfecerit atque orauerit, nostrum tamen non in credendo modò, verum etiam orando satisfaciendoque requirit officium: quomodo cum pro nostra æterna salute comparanda abundē passus sit, postulat tamen compatiamur vt conregnemus. Non igitur hoc metu remouemus à purgatorio satisfactionem mortalia diluentem, ne quam merito Christi faciamus iniuriam, si vllam talem satisfactionem introduceremus; quæ tamē

Iohann. 8.

exactum pretium non haberet; quod in sola Christi morte potest inueniri: sed propterea, quod hoc solum mortalis vitę spatium esse credamus gratiæ illius primæ & præcipuæ tempus, quo peccator ab errore viæ suæ ad Dominum conuertitur, solutisque æternæ mortis vinculis ex inimico amicus, ex iniusto iustus, ex infelicissimo peccati & diaboli seruo liber efficitur, ea libertate de qua scriptum est: Si vos filius liberauerit, tunc verè liberi eritis. Hæc illa est à peccati regno & diaboli dominatu libertas, cuius spes adipiscendæ nulla est in futuro sæculo. Sed quæ hîc sit inchoata libertas per veram iustificationem, si quis negauerit post hanc vitam perfici posse, is non ferendo errore aberrat à doctrina scripturarum sanctarum: Quemadmodum enim illic perficietur ex ea parte qua non plenum hîc regnum obtinemus super carnem nostram, vbi adhuc illa suis motibus aduersus spiritum obluetur, cadendi quę periculum & metum facit: ita etiam perficietur in multis, ex ea parte qua non plena hic propitiatio, perfecta quę admissarum culparum abolitio est: omnino quę, vt nostra liberatio duabus agitur rebus, remissione peccatorum quę commissa sunt, & concupiscentiæ mortificatione, quę in corpore mortis huius bellum mouet perpetuum; ita prorsus post hæc vitam vtraque ex parte absoluetur perficietur quę. Neque enim existimandum est promissiones gratiæ noui testamēti de perfecta per Christum

stum libertate (vbi etiam illud est, Et propitius ero omnibus iniquitatibus eorum, & peccato- *Isaia 36.*
rum eorum nō recordabor amplius) in hac vi-
ta compleri, sed in futura, vbi illud proprium
est: Et omnes cognoscent me à maiore vsque *Ierem. 31.*
ad minorem, & non dicet vnusquisque ad pro-
ximū suum; Cognosce Dominum, vbi exclu-
so omni defectu, Deus erit omnia in omnibus.

Non esse de Purgatorio dubitandum,
etiam si de eius loco nihil definitum ac
fide certum habeatur. CAP. VIII.

SVbiungit Aretius de Purgatorij loco: quem
vbi incertum effecit, hoc etiam incertum
effecisse se putat, sitne aliquod purgatoriū post
hanc vitam: *Audiamus etiam*, inquit, *vbi*
tandem collocatum sit illud Purgatorium. *Tho-*
mas collocat illud in visceribus terra, proxime in-
ferno. *Idem alij multi faciunt.* *Opiner, vt me-*
lius curari à malis spiritibus possit. *Alcuinus au-*
tem quidam monachus, affirmat in aëre esse; &
ita diffusum, vt etiā omnes sanctissimi per id tran-
sire debeant priusquam calos intrent. *In qua sen-*
tentia magna est impietas, nam ipsi etiam marty-
res exiunt à Purgatorio. *Non potest igitur il-*
lic esse: nec oportet sanctissimis illa retia tendere.
Sed & de Christo quid dicet Alcuinus? ascensu-
rus calos in illud ne incidit? At peccatoribus est *† alias pec-*
constructum; quod cum in Christo nulla habeat *catis*
ne vestigia quidem, quomodo absurdum immò
E iij *impium*

impium non est, illis transferre Purgatorium? Antoninus & alij nonnulli, de loco dubitant. Et rectè quidem: Ideoq; vocant quoddam Purgatorium extraordinaria locationis: Nam duplex illi comminiscuntur: aliud commune omnium; aliud extra ordinarium, quod scilicet Deus pro clementia sua designat alijs atque alijs, hinc inde; ut alios in aquis, alios in glacie, alios in igni, quosdam in balneis, alios in stabulis, alios alibi ad certos purgari dies. In horum sententias si inquiras, solas audies apparitiones quibus totum hoc confirmatur: Quare totum hoc suis relinquatur authoribus. Et quia ipsi etiam de loco dubitant, nullum esse sciamus: Non enim res tanta, in tanta haberet obscuritate. Hactenus ille de purgatorij loco.

Satis declarat Aretius, se propterea de Purgatorij loco dubitationes Catholicorum, aut varias & incertas opiniones inducere, ut iustam efficiat de re ipsa dubitationem, assertionemq; eorum qui id negant plausibilem reddat: quasi sit consequens, ut quia de loco incertum sit quid existimari oporteat, de re quoque ipsa, nulla certa sententia habeatur. Atqui res sunt complures, de quibus quin sint, aut fuerint, aut futuræ sint dubitare non liceat, quarum tamen circumstantiæ ignorentur permultæ. Iudicium futurum non dubia tenemus fide, sed quando sit futurum, aut quo in loco ignoramus. Paradisum initio quo in loco plantauerit Dominus, quaq; in parte orbis terrarum, non una
etiam

etiam eruditorum, sententia est, an idcirco plantatam à principio paradysum nesciamus? Euangelistas inter se, & omnes omnino diuinæ scripturæ libros, summa consentire concordia extra controuersiam est: attamen quanta est interim compluribus in locis de cõciliandi ratione & modo ambiguitas? Dicat ergo hic etiam Aretius: Quia quomodo conciliari debeant ipsi dubitant, nos concordēs esse nesciamus. Addam his, quod est vicinius, de inferno damnatorum, quem esse vspiam nemo in dubium vocat qui velit haberi Christianus; sed vbi sit, in terra, sub terra, an super terram, ea de re nihil habetur fide fixum aut certa notitia comprehensum. Ideoque D. Gregorius in suis Dialogis percunctanti Petro, super terram hanc esset infernus, an sub terra, ita respondit vt definiendi caueret temeritatem. Nonnulli namque vt ait, in quadam terrarũ parte infernum esse existimauerunt; alij verò hunc sub terra esse æstimant: Ac verbis consequentibus nihil ob stare dicit, quo minus sub terra infernus esse credatur. Cur ergo hic Areti non dicis: Et quia ipsi de loco inferni dubitant, nos nullum esse sciamus? Vbi adiungis: Non enim res tanta in tanta hæreret obscuritate; in rebus magnis quid esse debeat, certum, quid remanere obscurum possit, non satis profecto distinguis. Res magna est (vt eodem quo supra, ytar exemplo) futurum esse aliquando commune de omnibus iudicium, & ideo inter Christianos nulla obscu-

*Lib. 4 dia-
log cap. 42*

E iiij ritate

ritate incerta est : sed quo tempore, & quater-
rarum in parte habendum sit, non magna in
religione res est, potuitque etiam vtiliter igno-
rari. Sic damnatorum esse pœnas æternas, &
ignem inextinguibilem, magna profectò res
est, neque eam nesciri, aut dubiam esse ex-
pediebat : sed vbi esset, quæ in elemento
crucieret, id quid attinebat nosse ? Nam vt fu-
giatur, sat est certa fide credi existere. Sic pur-
gatorium esse aliquod animarum, & eiusmodi
statum aliquem post mortem, vt in eo nostris
indigeant officijs, res profectò magna est, cu-
iusque ad nos cognitio magnopere pertinebat :
sed quonam esset hoc loco situm, vt quid sciri
necesse fuit ? An minus prodesse mortuis pos-
sumus, quam si id teneremus indubitata no-
titia exploratum ? In magnis igitur rebus dis-
cernenda sunt ea quæ vtilem habent cogniti-
onem, ab ijs quæ curiositatem magis pascunt,
quam ædificandæ fidei & charitati subserui-
unt. Illa nobis incerta esse Dominus, prou-
dentissimè nobis consulens, passus non est :
hæc latere voluit & patienter ignorari. Qua-
nam igitur, Ateti, res tanta est, quam hæcere in
tanta obscuritate significas ? an purgatorium
aliquod esse ? sed id in Ecclesia Dei & est, &
fuit semper ex scripturarum sanctarum expressa
doctrina certissimum : An illud potius, quonam
esset in loco, & qua orbis in parte constitutum ?
sed ea res magna nō est, nec interest admodum
sciamus hoc, an nesciamus : imò verò vtilius
est

est nesciri, quam haberi definitum. Nam & hoc patefecisset mortalibus diuina benignitas, si scire profuisset. Igitur vbi sit purgatorius locus, id ex ijs est quæstionibus quæ sunt præter fidem. Vbi etsi esset corrigendus error, non eum tamē tanquam hæresim infectari & damnare oporteret: cuiusmodi quæstiones aliquas D. Augustinus enumerat libro de originali peccato, capite 23. ad obscurissima, vt ait, Dei opera pertinentes.

Esse aliquem locum purgatorium, Græcis Latinisque Ecclesiis minimè dubium fuisse, etsi esset aliqua de igne controuersia, neque quicquam de loco vbi esset definitum. CAP. IX.

Q Vamuis autem ad obscurissima pertineat opera Dei, vbi purgatorius hic sit locus, tamen esse aliquem in Florentina Synodo, quæ Ferraria cœpit, magno consensu & sine omni dubitatione cum Latinis Græci tenuerūt. Hoc inter eos solum differebat, quod ignem Græci in eo loco esse sibi statuerint. His autem Latini verbis, suam explicarūt de purgatorio loco sententiam. Nos ignem, Patris amplissimi, in hoc mundo credimus esse, quo quidem animæ peccatis leuioribus, vel vt vulgò dicitur, venialibus obnoxia, coadiuuante Ecclesia, sacerdotum precibus, missis ac eleemosynis explantur. Nam sanctorum & iustorum animas in celo esse, ac

Trinitati assistere, suam denique felicitatē consecutus esse nemo dubitat: Animas verò eorum qui sine pœnitentia mortem obierint, in inferno una cum Iuda pœnas æternas luere profite-
mur; Ita ut tria mortuorū loca simpliciter sint: Vnus quidem sanctorum, quod cælum credi-
tur esse; alter delinquentium, qui sunt inferi.

Qui verò confessi, sacratissimum Christi corpus, absque tamen pœnæ præuia satisfactione sumunt, continuoq; moriuntur, hi dubio procul in supradicto igne, quod purgatorium appellari solet, purgantur. De quo quidem igne, *2. Corin. 3.* Paulus ad Corinth. scribit; Vniuscuiusque opus quale sit ignis probabit. Et paulò infra. Ipse autem saluabitur: sicut tamen quasi per ignem. Hæc Latinorum de purgatorio confessio fuit. Ad quam ita Græci responderunt. Quæcunque, Patres amplissimi, protulistis atque ciuitatis, Orientalis Ecclesia profitetur: quamvis inter Græcos & Latinos parua sit differentia. Vestram ergo sententiam literis tradite, quod ipsi quoque facturi sumus, ut in quonā à vobis differamus, palām fiat. Quæ cum audissent Latini, magno affectu gaudio, gratias Deo egerunt, & datis literis discesserunt. Ad decimam autem quartam diem eiusdem mensis iterum conuenerunt. Et Græci, Pauli dictum longè aliter exposuerunt, ac suam expositionem ita literis mandarunt. Paulus ad Corinth. scribens, Patres amplifs. Si quis autem superædificat super fundamentum hoc, aurum, argentum, lapides
pre-

pretiosos; lingua, fœnum, stipulam & reliqua, hominum vitam & opera intellexit, videlicet an praua, studiosaue sint: ita vt cuius opera in ignem combusta permanserint, is bonus censetur ac operum suorum mercedem accipiat: cuius autem opus arserit, id est cuius opera friuola fuerint combusta, ipse detrimentum patitur, hoc est, damnabitur, & saluus erit, sic tamen quasi per ignem, id est, in igne semper saluabitur, in eo luens pœnas æternas: ita vt ignis ipse de quo Paulus loquitur non purgatorius, verum æternum supplicium sit: de quo etiam inquit Euangelista; Discedite à me maledicti in ignem æternum. Nam ipsi purgatorium non ignem, sed obscurum quendam locum ac laborum plenum esse censemus: in quo quidem existentes animæ lumine diuino priuantur, donec coadiuuante Ecclesia, vt supradictum est, expientur ac liberentur. Sic ergo sentimus de purgatorio. Habes Areti manifestum Ecclesiæ totius quæ tum fuit consensus de Purgatorio, id est, de vno quopiam loco, de pœna & ætümna qua animæ quædam expientur atque purgentur. In eo verò quod ignem esse Græci nollent, quam malè fuerint ipsi fundati in vnius Chrysostomi commentario, dū videlicet nimium & coacto, illi ipsi quoque Latini patres demonstrarunt in ijs quæ consequuntur loco designato; ex quo illa reprobenda relinquimus. Itaque cum iuxta meliorem & certiolem, magisque patrum consensu roboratam

Matth. 25.

ratam loci illius expositionem, purgatorium aliquem ignem esse statuere debere videamur, tamen ubi, & quo loco sit ignis ille, iudicare est difficillimum; neque id est à patribus illis, aut Græcis, aut Latinis iudicatum, quamvis inter eos aliqué esse eiusmodi locum optimè conueniret.

Quæ sit verisimilior de Purgatorij loco sententia. C A P. X.

AC Diui quidam Thomæ sententiam, si quis amplectatur, non video qua ratione reuelli, aut possit aut debeat. Aretius certe commemorare contentus, nihil attulit quo illa infirmaretur opinio. Quid verò Alouinus? propterea cuncta retendit & Christo & sanctis martyribus, quia diffusum in aere illum ignem affirmant? Ergo ipsum prius accusent creatorem, qui quæ proxima cælo sunt, æris ignisque spacia ingentia, maximis voluit perpetuisque feruere caloribus; in quibus fragilem hanc nostri corporis naturam certum est sine grauissima doloris afflictionisque molestia non posse subsistere. Cur ergo hæc corpori Christi celestia petenti, retia non fuerunt? Cur non quotidie sunt animabus sanctis, peracta hic purificatione ex corporis ergastulo euolantibus? Nimirum dicet Aretius, quia Christi corpus immortalitatis & impassibilitatis ornatum dotibus, nulla potuerit læsione corrumpi, nullo effici sensu doloris, nulla mora retardari: Anima

mae verò iam exutæ corporibus, cum spiritus sint, à corporeo elemento suscipere nequeant ullam impressionem, nisi quantum diuinæ voluntati subseruiat, cui subest posse etiam per ignem corporeum, & dæmonibus, & damnatorum spiritibus inferre cruciatum. Aliquid ergo tale hunc dicturum puto, vnde intelligatur pro diuersitate naturarum aliquid pati ab aliquo naturaliter, aliud non pati: à quo proinde requiro, cur etiam pro diuersitate meritum non aliud supernaturali operatione crucietur, aliud intactum & illæsum pertranseat? vnde intelligetur, plenè purgatis spiritibus nulla in igne esse posse retia, quando nulla sint supplicij merita: nec magis profectò illis retia esse possint quam angelis sanctis, qui in quouis elemento sine omni molestiæ sensu versantur cum volunt, & cum aliqua in re famulantur diuinis iussionibus. Hoc etiam, credo, Aretius tanquam subtilis philosophus perspectum habuit atque constitutum, non posse aut angelum aut animum auulsum à corpore, de loco in locum, nisi per spatium quod medium, sit commigrare: nam si hoc necesse non est vt per media spiritus transeat, sequaturque locorum continuitates sua progressionem, nihil iam prorsus ab igne medio fuerit illi metuendum, ne fortè in ea incidat retia, quæ facillimè possit transuolare. Atque hic quidem Aretium crederem suis retibus risum magis captare voluisse, quam quicquam concludere, nisi tam grauiter, serioque

que colligeret, quomodo absurdum, imò impium non sit illuc transferre purgatorium. Maluisset forsitan in terræ visceribus, vt à D. Thoma factum est, collocari, ne foret illi impedimento commigranti in cælum, si esset in aëre. Sed ego cum hac cura liberabo: Non enim purgatorium timere debet, qui purgatorium nullum credit, cum sit de gehenna securus. Malim tamen ipse etiam cum D. Thoma in terræ collocare visceribus, propter id quod dicit de se ipso Christus Dominus: Sicut fuit Ionas in vētre ceti tribus diebus & tribus noctibus, ita filium hominis in corde terræ esse oportere tri-

Manh. 12 duī spatio. Apostolus quoque Christum ait descendisse in inferiores partes terrę: quod etiam si propter mortem dici Diuus Chrysostomus interpreteretur, tamen quod mortem subsequutum est secundum animam, id sciungendum à morte non putauit; quia propter solam mortē, si ea totus Christus fuisset extinctus, quonam modo intelligi posset descendisse in inferiores terræ partes? Deinde D. Hieronymus in eum locum sic est commentatus, vt infernum significatum acciperet in humilioribus terræ partibus constitutum. Inferiora, inquit, terræ infernus accipitur, ad quem Dominus noster saluatorque descendit, vt sanctorum animas quæ ibi tenebantur inclusæ, secum ad cælos victor abduceret. Vnde & post resurrectionem eius plurima corpora iustorum in sancta ciuitate visa sunt. Quod autem infernus, inquit, in inferiore

riore parte terræ sit, & Psalmista testatur dicēs:

Aperta est terra, & operuit super congregatio- *Psal. 105.*

nem Abyron: quod ipsum in Numerorum li- *Cap. 16.*

bro plenius explicatur. Alio quoque loco legi- *Psal. 54.*

mus: Veniat mors super eos, & descendant in

infernum viuentes. Hæc apud D. Hieronymū. *Lib. 2. de-*

Ipse quoque Augustinus in libros quos scripse- *trist. 4. 24.*

rat de Genesi ad literam, sui iudicij censuram

annorās, In duodecimo (inquit) de inferis ma-

gis mihi videor docere debuisse quod sub ter-

ris sint, quam rationem reddere cur sub terris

esse credantur siue dicantur, quasi non ita sit.

Sic August. de inferorum loco. Cū igitur

purgatorius locus inferorum pars sit quædam,

vti & Limbus, iuxta eum sensum quo sacræ li-

teræ plerunque inferos nominant seu infernū,

non improbabilis D. Thomæ & aliorum opi-

nio est, esse locum purgatorium in terræ visce-

ribus, procul tamen ab ipsis gehennæ portis;

non tam loci distantia, de qua diuinare nihil

possumus, quam immutabili decreto Dei se-

iunctum. Quod etiam intelligitur significatum *Luce 16.*

esse per chaos illud magnum, quod Abraham

inter Lazarum & diuitem epulonem interie-

ctum esse dicebat, cum foueretur tamē alter in

limbo, alter in gehenna torqueretur, quæ duo

apud inferos erant. Torqueri quippe (inquit

Tertullianus) animas foueri que penes inferos,

licet nudas, licet adhuc exules carnis proba-

bit Lazari exemplum. Ipsum quoque infero-

rum nomen tale quiddam significat, cum in-

fera

*Lib. de Re-
surrectione
carnis.*

fera superis opponatur: Sicut igitur superos in cælo intelligimus, ita etiam inferos in imo terræ intelligere debere videmur. Quid etiam aliud sonet, vt ascensus in cælum, ita etiam descensus in infernum? iuxta id quod scriptum

Psal. 128. in psalmis est; Si ascendero in cælum tu illic es;

cap. 7. Si descendero in infernum ades: Quid item ille apud Isaiam locus; Pete tibi signum à Domino Deo tuo in profundum inferni, siue in

cap. 11. excelsum supra: aut ille Iob; Excelsior cælo est,

& quid facies? profundior inferno, & vnde cognosces? Quod autē propriè pertinet ad sententiā Alcuini, qui Caroli Magni fuit institutor, & venerabilis Bedæ discipulus, suæque ætate doctrinæ & eruditionis nomine clarissimus, non eam ostendit Aretius à D. Thomæ discrepare sententiā, quantum concernit ipsas animas, quæ sine corporibus ante iudicium extremum puniuntur. Siquidem vbi sit ille ignis animarum purgatorius, de eo nihil disputat Alcuinus, sed eum ignem cuius Apostolus meminit primæ Corinthiorum tertio, (quem locum ille retulit ad extremum iudicium) dicit quosdam sanctos qui minora secum peccata detulerunt esse purgaturum, perque eundem ignem & iustos perfectos, sine omni tamen sui læsione transituros. Ignem ergo illum, de quo beatus Apostolus, quia in aëre Alcuinus posuerit, non est consequens quod vsque ad extremum iudicium, aliquem esse in terræ visceribus ignem non putaret quo animæ expiarentur; siue quod perpetuū purga-

purgatorij locū æstimauerit aërem illum sublimiorem. Sic autem scribit Alcuinus libro 3. de Trinitate, capite 21. De igne diei iudicij Apostolus ait; Vniuscuiusque opus quale sit, ignis probabit: de igne purgatorio hoc eum dixisse non est dubitandum: quem ignem aliter impij sentient, aliter sancti, aliter iusti. Impij siquidem de illius ignis cruciatu, ad perpetuas ignium flammæ detrudentur. Sancti verò qui sine omni peccatorum macula in corporibus suis resurgent, qui supra fundamentum quod est Christus, aurum, argentum, & lapides pretiosos ædificauerunt, tanta facilitate illum peruolant ignem, quanta integritate fidei & dilectionis, Christi in hac vita custodierunt præcepta, eritque illis ignis ille diei iudicij, sicut tribus pueris caminus Babylonis fornacis fuerat, qui absque omni flammæ læsione in Domini laudes omnium pulchritudinem creaturarum conuocabant. Sunt ergo quidam iusti minutis quibusdam peccatis obnoxij, qui ædificauerunt supra fundamētum quod est Christus, ligna, fœnum, stipulam, quæ illius ignis ardore purgantur; à quibus mundati æternæ felicitatis digni efficiuntur gloria: illoque transitorio igne, & toto extremi diei iudicio completo, diuidentur duæ congregationes sanctorum & impiorum; vna Christi, altera diaboli; vna bonorum altera malorum, vtræque angelorum & hominum. Ex his Alcuini verbis perspicuum est, nō debuisse illi affingi peculiarem

F de pur-

de purgatorij loco sententiam, cui D. Thomas
 postea repugnarit. Perspicitur hoc etiam quàm
 illa futiliter afferantur de retribus, tanquam ea
 martyribus sanctis Alcuinus tetenderit in aëre.
 Tertia verò opinio quæ Antonino ascribitur,
 qua præter communem locum alia quædam
 agnoscuntur extraordinaria, neque repugnat
 prioribus, & quadam experientia non ineptè,
 quamvis hoc Aretius putet, confirmatur. Si-
 quidem admonitionis nostræ gratia subinde
 fieri, ut animæ quædam post mortem, mira-
 bili dispensatione Dei, suos cruciatus & pœnas
 in terris exhibeant, quamvis solis probaretur
 apparitionibus, tamen eam docendi rationem,
 quæ exemplum habet in Euangelio, ubi Mo-
 sis & Helix apparitio memoratur, contemni
 non oporteret. Ideoque B. Gregorius hoc ge-
 nus apparitionum non modò non reiecit, ve-
 rum etiam ex eo quiddam cœsui dignum quod
 commemoraret in suis Dialogis, de eo qui post
 mortem ad erroris cuiuspiam culpabilis expia-
 tionem, cruciatus est in balneo.

Matth. 17

*1. Th. 4. Di-
 log. cap. 40*

Apparitiones defunctorum fidelium quæ
 apud scriptores catholicos leguntur,
 quam malè generatim repudientur ab
 Aretio. CAP. XI.

Sed hoc apparitionum genus non in ijs so-
 lum quæ passim fieri dicuntur, verum etiam
 in ijs quæ leguntur apud scriptores non con-
 tem-

temnendos, sine discrimine omninoq; generatim damnat Aretius vt fallax & noxium, cuiq; nihil prorsus tribuendum sit. Quod quauis ad probationem necessarium nobis non est, qui Dei verbo doctrinaq; maiorum nitimur in hoc de purgatione fidelium animarum argumento: tamen libet annotare breuiter, quibus rationibus efficere conetur Aretius, vbi de Spectris agit, vt totum hoc repudiandum esse credatur.

Primum (inquit) si defunctorum anime sunt qua offerunt sese hominibus, facient id vel priuata auctoritate, vel Dei iussu. Priuata auctoritate eas id facere credi non potest. Sed nos Dei iussu hoc faciunt: nam consulere mortuos prohibuit Deus, ergo mortuos nō mittit ad viuētes ipse Deus. Id vel vnius Lazari historia testatur Luca 16. Adde quod nunquam prodant sacra litera veritatem per defunctos fuisse à Deo patefactam.

Hic Areti de tua illa disiunctione; Aut priuata auctoritate, aut Dei iussu, quid tibi dare debeamus non admodum obscurum est. Dei enim nutu ac dispensatione speciali, id cum fit, non iure priuato seu ordinario rerum humanarum cursu fieri concedendum est. Idcirco beatus Augustinus, lib. de cura pro mortuis, cum dixisset, non solis beneficiorum effectibus, verumetiam ipsis hominum aspectibus, cōfessorē apparuisse Felicem, cum à barbaris Nola oppugnaretur, idq; non incertis rumoribus, sed certis testibus cognitū, subiunxit ista diuinitus

exhiberi, longè aliter quam se habet vñtatus ordo singulis creaturarum generibus attributus, aliòsque esse humanarum rerum limites, alia diuinarum signa virtutum; & alia quæ naturaliter, alia quæ mirabiliter eueniant. Sed nec iussu Dei quidem hoc vnquã fieri, si benè probatum putes, quia prohibuerit Deus consuli mortuos, non leuiter hallucinaris. Non enim recens aut huius duntaxat temporis illa prohibitio est, ne mortui consulantur: sed Euangelio multò antiquior: Qua tamen nihil obstante postea Moses & Helias in monte Thabor apparuere Christo. Quæ si apparitio legi contraria non fuit, cur esse debuit legi aduersa si qua postea eiusdem Dei iussu contigisse narretur? An statuendum est nullam posse fieri mortuorum exhibitione Dei nutu, nisi vt ab ijs qui supersunt consulantur, aut occultæ cuiuspiam rei veritas exquiratur? quis id cõcesserit? quis non hoc in apparitione Felicis perspiciat falsum? Quod etsi concederetur, nõdum tamen peccaretur in illam Dei legem quæ Necromantiam & malas artes prohibet, quibus homines prophani mortuos excitare se putant posse, à quibus diuinationem accipiant. Quid autem est quod Lazari restatur historia? An quod ad amicos epulonis nemo mortuorum missus est, efficit nunquam id aliàs factum; nunquam futurum, vt ad viuentes mortui mitterentur? aut ea sola mittendi ratio subesse potest, vt hi qui viuunt moneantur, quemadmodũ amicos suos epulo

*Aug lib. 7.
de ciuit.
cap. 35.*

epulo moneri volebat, caueant sibi ne detrudi
mercantur in gehennā? aut quia tunc impij &
damnati hominis desiderio nihil tributum est
in fauorem fratrum eius, simili impietate labo-
rantium; consequens est vt nihil vnquam pio-
rum votis propter aliqua piorū vel excitementa
vel solatia tribuatur? Denique quoniam asseris
nunquam prodere sacras literas, veritatem per
defunctos fuisse à Deo patefactā, quoniam per-
tinuit Moysi & Heliæ præsentia in monte Tha-
bor, nisi vt ea manifestāde veritati subseruiret,
instruerenturque hoc modo & discipuli qui vi-
derunt & alij qui id audituri fuerant, Christum
habere testimonium à lege & prophetis?

*Respo quidem hoc (inquis) manifestare potu-
erunt, at nihil verbis eloquenti, neque cuiusquam
rei veritatem sermone prodiderunt.* Hoc Areti, si
putes, videris sane quemadmodum cum Lucæ
narratione tua consentire possit opinio. Dice- *Lucæ 9.*
bant enim (inquit) Moyses & Helias excessum
eius, quem completurus erat in Ierusalem.

Quod addis, *Animas fidelium beatas de feli-
ciori statu suo in deteriozem nolle descendere: eas
verò quæ in pœnis sint, etsi velint, non posse ascen-
dere:* id priore quidem sui parte, errorem habet
quo putetur beatas animas huc ad nos Dei ius-
su venire non posse, nisi beatiore suo statu reli-
cto, in deteriozem incidant; cum angelos con-
stet huc ad nos mitti & cum electis versari, sine
villo detrimento suæ felicitatis. Nam & angeli *Matth. 18*
eorum, ait Christus, vident faciem patris qui

F iij in cæ-

in cælis est. Posteriori verò id solum conuincit, suo quidem iure proq; suo arbitrio venire non posse, non autem ne tum quidem si Deus iusserit. Quod Chrysostomum obijcis, qui in caput 8. Matthæi scribens, diserte neget animas defunctorum hic oberrare, quis non illam eius doctrinam vt salutare complectatur? hanc prorsus commendatam esse doctrinam volo fidelibus, quorum per simplicitatem multi quicquid passim, vel puerorum, vel muliercularum oculis per quietem aut alias sese ingerit, defunctorum animas esse putant. Verum aliud est oberrare hic passim defunctorum animas, aliud interdū mitti & apparere singulari dispensatione eius, cuius in manu esse creduntur. Quod si nunquam contigisse post illam in monte Thabor apparitionem existimandum est, totumque reiiciendum sit ad phantastica vel sathanica ludibria, quemadmodum persuadere niteris, quia nihil tale scriptum in diuinis literis inueniatur, tam multa quoque miracula, quæ post Apostolos in Ecclesia Dei facta sunt, ad imposturas reiicere debebimus, quoniam in Evangelio commemorata non leguntur.

At produnt se, inquis, illi spiritus quales sint sua confessione. Nam in eo Sathan nō est satis cautus, cum plerunque petunt pugnare cum verbo Dei, aut idem corrumpant aliquo pacto: vt cum alienos Dei cultus approbant, sanctis auctoritatem intercedendi arrogant, merita erogationis & supererogationis confirmant, postulant cultum aliquem, missas,

missas, altaria, sacella, in quibus vel ipsi vel alij defuncti honorantur: cum scriptura vnius Dei adorationem & cultum nobis proponat, vnius esse Christi meritum & intercessionem cōmendet.

Hoc nimirum illud est Areti, propter quod vniuersim apparitiones damnandas esse putasti, ne qua hinc vel cultus sanctorū, vel missarum, vel orationum pro defunctis peti posset confirmatio. Et hic quidem Sathanam vt simplicem & nō satis cautum repræhendis, qui tamen, si bonè attendas, in eo ipso te decipit. Lucē enim veritatis, illo procul dubio authore ac duce persequeris, propterea quod eius specie suas ille occulrat insidias; tanquam si ouibus sua coneris vellera detrahare, quia lupina interdum feritas sub illo tegumento delitescit. At nos, quamuis illa interdum diabolus postulet sub prætextu mortuorum, quorum sibi & nomina & formas affingit studio fallendi; non tamen ipsa quæ petuntur damnamus vt impia, sed in his tanquam sub lucis specie, cauendam admonemus Sathanæ malevolentiam; qui propterea aliena ingerit, vt incautos ad ea quæ ipsius propria sunt, pertrahat. Nō enim Christus propterea Dei filius & Christus non erat, aut eius discipuli non ideo filij non erant Dei excelsi, quia de illis hoc diabolus prædicabat: sed tamen credi hæc diabolo tanquam vera dicenti, noluerunt Christus & Paulus, ne noxia induceretur ei credendi consuetudo; aut in assertionem quamlibet salutiferæ veritatis, aliquid tri-

bueretur auctori & patri nocētissimæ falsitatis.

- 1. Reg. 28.** Quod autem pertinet ad exemplum Samue-
lis, à muliere excitati vt Saül Regi respōderet,
quod illustre haberi dicis apparitionum exem-
plum, ex eo quidem fateor non certissimum ar-
gumentum duci, propter interpretationum di-
uersitatem, & opinionem Augustini quam ex-
pressam reliquit breuiter libro 2. de doctrina
Christiana, cap. 23. Sed tamen quia non pœ-
nitendis rationibus te putas effecisse non Sa-
muelem fuisse verum, sed ludibrium Sathanæ,
paucis videro quantum debeas de tuarum ra-
tionum firmitate gloriari. *Primum.* (inquis)
*sermo illius, Regem ducit ad desperationem, quo
se declarat spiritus ille quod interitum hominis de-
lectetur.* Hic te, Areti, interrogo quam despe-
rationem afferri Regi intelligas responso Sa-
muelis? Num veniæ & æternæ salutis? At eius
desperationis nulla prorsus in verbis significa-
tio est: nec interclusus est Regi aut filijs ad sa-
lutem aditus, nec pœnitendi tempus subtractū,
nec tanti mali hic vllas reperiēs minas. An vi-
tæ longiosis, & recuperandi regni successionis-
que filiorum in regno iniecta desperatio est? Sit
ita planè. Sed cur eam desperationem Dei spi-
ritus facere nō potuit? Nōne & per Isaiam di-
ctum est Ezechia Regi; Dispone domui tuæ;
moriēris enim & non viues? Nōne & alius
Isaie 38. Propheta prohibetur orare pro populo, quo-
Ierem. 1. niam certissimè Dominus populum esset in in-
teritum & captiuitatem abduclurus? Nōne
Aaroni

Aaroni denuntiari voluit, non esse eum progressurū longius, sed in monte moriturū? Quid alienum rogo te à iustitia Dei, si homini desperationem faciat vitæ inter mortales productio-
 nis interitu delectetur; esset enim hoc crudelitatis: sed planè delectatur Dominus sua iustitia, cuius seueritatem in Saulem, denuntiata illi maturè voluit, vt vel sic prouiso temporali suo per mortis celeritatem excessu, per seriam resipiscentiā saltem aterū vitaret interitum. Nihil ergo adhuc habes indignum spiritu Samuelis, nihil abhorrens à spiritu Prophetico & diuino. *Deinde (inquis) addit: Cras mecum eris. Sed rex impius non poterat cum pio Samuele copulari: Superest igitur illum cum impijs colligi: Non fuit igitur ille loquens Samuel, sed Saibani.* Non possum hic, Areti, quin tibi in memoriam reuocem, id quod scribis in eo loco qui est apud te de Limbo patrum. Cum enim proposuisses tibi argumētum tanquā à nostris profectum partibus, ex Genesicap. 49. petitum: Collectus est ad populos suos; & ex eo quod aliàs quoque Sancti homines dormire dicuntur cum patribus suis, eāque etiam à Diuo Hieronymo referri dixisses ad Limbum, subiungis continuò, rem alium multò sensum habere; phrasim esse linguæ Hebrææ, qua is qui dicatur esse collectus ad patres suos vel ad populos suos, per id significetur esse mortuus & sepultus cum suis maioribus; eoque fieri addis

ut phrasis illa non pijs solum, verum etiam impijs tributa legatur, quemadmodum videre liceat in historijs regum impiorum. Hunc igitur phrasis illius sensum cum teneas, cur non in mentem venit, similem commentarium & hic usus esse potuisse? ut nimirum dixerit Samuel; Hodie mecum eris, id est, ad me ceterosque mortuos colligeris; desines inter viuos mortalem vitam agere, & ad numerum mortuorum aggregaberis. Nam & Christus Dominus propterea post resurrectionem suam ita locutus est, ac si cum discipulis suis iam non esset; quos tamen præsens alloquebatur, quia iam mortalis vitae conditionem reliquerat: Hæc (inquit) sunt verba quæ locutus sum vobis cum adhuc essem vobiscum. Hoc quidem sensu nec te puto, Areti, offendi posse, quem ad eum suscipiendum habeamus adiutorem; nec tergiuersaberis opinor, quia non dixerit: Hodie cum mortuis eris, sed, hodie mecum eris. Nam neque illic dictum est, appositus est, vel collectus ad mortuos, generatim; sed collectus est ad patres, ad populos suos.

Quod tertio loco adiungis; *Non patet esse Deum unquam per mortuos; sed per viuos homines admonet de sua voluntate: ergo nec his idem fecit.* Id perfacile est animadvertere manifestam habere principij petitionem. Hoc ipsum enim in istius exempli tractatione quaeritur; An non Sauli Deus per Samuelis spiritum suam patefecerit voluntatem.

Sed

Sed neque id concludit quod quarto loco ponitur; *Accedit (inquis) quod Deus Sauli noluerit respondere, neque per Urim neque per Thummim, nec per visiones noctis, nec per prophetas; ergo nec per mortuos, quod illi insuetum est.*

Nam præter vñtatas atque ordinarias agendi vias, cum tam sæpe Deus circa homines, vel propter homines aliquid mirabiliter egerit, quis prohibuisset ne cor Regis superbia durû, & iam prioribus atque vñtatis prophetiæ modis indignum, noua hac denuntiandæ voluntatis suæ ratione concuteret?

Quinto, ais, Diabolus nullam habet potestatem in sanctos dum hic viuunt; ergo multò minù aliquid iuris habet in eos post mortem. Diabolum autem hic egisse constat indè, quia pythonissa illum vetitis artibus excitat. Quare non putandum est Samuelem verum reuocatum esse. Atque hoc inter cætera facilè præcipuum est argumentum. Sed vt magis obuium dissoluitur à pluribus; Idque in primis ab ipso Augustino lib.2. ad Simplicianum quæstione tertia, vbi docet non absurdum esse credere ex aliqua dispensatione diuinæ voluntatis permissum fuisse, vt non inuitus nec dominante aut subiugante, magica potentia, sed volens atque obtemperans occultæ dispensationi Dei, quæ & pythonissam illam & Saulem latebat, consentiret spiritus prophetæ sancti se ostendi aspectibus Regis, diuina eum sententia percussurus. Hinc ergo tibi Areti respõdebitur; Diabolum

holum nihil hic iuris in Samuelem aut vſur-
paſſe aut exercuiſſe; ſed neq; à pythoniſſa illum
vetitis artibus excitatum, ſed à Deo iuſſum ad
Regem aſcendere, terribilem ac tritem ei nū-
rium futurum, quoniā id ille merebatur. Neq;
hanc Samuelis reuocationem Deus Magiæ de-
dit, ſed Regis votis, quorum magnitudinem ex-
audiuit iratus. Suis enim Deus quædam negat
propitius; reprobos autem interdum exaudit
iratus.

Hinc iam perſpicias quas habeat vires quod
ſexto loco poſitum eſt. *Excitare verè mortuos
ſolius eſt Dei opus, quo inuito ne vini quidem ali-
quid poſſunt, ne dicam mortui; ergo hic non fuit
vera mortui excitatio, ſed ludibrium Sathana.*

Matth. 4.

Solius enim Dei potentia & nutu, Samuelis a-
nimam ab inferis excitatam dicimus, quam
eſſi quis adductam fuiſſe Diaboli opera ſta-
tueret: (Nam & Chriſtum diabolus tranſtu-
lit in ſanctam ciuitatem, & ſuper templi pin-
naculum collocauit) non tamen neceſſe habe-
ret fateri id inuito Deo factum: ſed inter tot
ſanctorum angelorum myriades miniſtri luci-
diores quam Sathan eſt, omnipotenti omnium
Domino deeſſe minimè potuerunt.

Vt autem ſeptimo loco diceres, *pa: ère ex hi-
ſtoria Luca 16. mortuis ſimpliciter negari reditū
in hanc vitam vſque ad diem iudicij*, prorsus non
video quæ te tam clara eius loci verba in eum
ſenſum adduxerint. Quin perſpicuū eſt, Arreti,
hoc te ex Lucæ verbis non poſſe conuincere,
vbi

vbi nihil aliud expressum habes, quam mortuorum missionem epulonis fratribus esse negatam, idque ob id quod non necessaria esset ad illorum instructionem, quibus ad id Moyses & prophetae abundè sufficerent; imò verò quia etiam superuacanea & nihil pro futura fuisset, propterea quod illi credituri non erant, qui Mosi & prophetis non credebant. Possem & hoc tibi respondere, quod olim Diuus Hieronymus Vigilantio, cuius abs te modò sententia defenditur; Tu Deo leges ponis? Tu Apostolis vincula inijcies, vt vsq; ad diē iudicij teneantur custodia, nec sint cum Domino suo, de quibus scriptū est; Sequuntur agnum quocunq; ierit? *Apoca. 14.*

Quod octauo loco, *De consensu Patrum*, ad argumentorum magis copiam, quam quo te id moueat, addidisti; vellem mihi hunc consensum Patrum demonstrasses, cū & pauci admodum locum hunc attigerint Patres, & ipse Augustinus, qui eum ex professō tractauit in quæstionibus ad Simplicianum, vtramque sententiam defendi posse monstrauerit. *Quæst. 3.*

Sed nec video quid premat, quod postremo loco subnectis, de Pontificum approbatione, homo scilicet valde pontificius. Ais enim, *rationibus adductos arbitrari te pontifices, vt in Decretis hunc sensum & explicationem historia approbarent.* *26. quæst.* Decretorum librum, Areti, Gratianus conflauit ex Patrum libris, cuius omnes diligentiam approbamus, quamuis accuratior in citandis patrum sententijs esse potuisset.

tuisset. Namque eo ipso loco quem designas, sub Diui Augustini titulo verba proferuntur ex quæstionibus vtriusque testamenti, quas Augustini non esse certis ostendi potest indiciis: quemadmodum nec ille dignus Augustino liber est, qui inscribitur de Mirabilibus scripturæ sacræ, in quo hæc eadem de simulato Samuele sententia repetitur. Vtroque certè loco, id est, quæstione 27. ex Veteri testamento, & cap. 11. lib. 2. de Mirabilibus sacræ scripturæ, valdè hoc virgetur argumentum, quod tu quoque paulò ante inuictum esse putauisti; quomodo videlicet homo Dei qui cum Abraham in refrigerio erat, dixerit ad virum pestilentia, dignumque ardore gehennæ, Cras mecum eris. Nec dubitat quin hic Sathan improuidus, subtilitatē fallaciæ suæ prodiderit, in eoq;, Areti, tecum planissimè facit. At vide quantò fuerit Augustinus circumspectior. Cùm enim hoc idem proposuisset argumentum, & hoc quod tu vis intelligi ipse significari non certè, sed fortè dixisset, continuò vir acutissimus alium illius loci sensum reddi posse perspexit; vt nimirù illud, Cras mecum eris, non ad æqualitatem felicitatis, sed ad patem conditionem mortis referretur; adeoque hoc non contemnendum esse iudicauit, vt propterea & ante Simplicium & postea Dulcitium, ad quem verbis iisdem quæstionem de Samuele propositam explicauit, animadvertere posse dixerit secundum vtrumq; intellectum habere exitum illam lectionem.

Quæst. 8.

Minus

Minus certè multò mouisset eum quòd illum mouit è veteri testamento quæstionariū, quod à Saïle se adorari Samuel passus sit. Neq; enim tam puer erat Augustinus in sacris literis interpretandis, vt nesciret quid frequenter admodū illo adorādi verbo signaretur. Quid? quod ipse Isidorus Augustini proculdubio fluctuatione permotus, rem hanc videtur in ambiguo reliquisse. Sed ea verba Gratianus consultò sibi prætereunda putauit (qui tamen superiora ex Isidoro desumpserat) propterea quod (vt arbitror) cum verbis quæstionis è veteri testamento, quæ postea contexit, non satis congruere viderentur. Vnum illud addam coniecturæ meæ: Si Diuus Augustinus cū hanc de Samuele quæstionem tractaret Simpliciano respondens, tam Ecclesiastici locum præ oculis habuisset, cap. 46 cuius nullam mentionem facit, quam eum qui Regum continetur historia, in alteram sententiam fortasse procliuius fuisse descensurū. Nec tamen illum de ficto Samuele sensum dicit sibi solidiorem videri, sed in eo faciliorem quæstionis exitum & expeditiorem intellectum. Potest autē expeditior intellectus esse, qui non sit propterea solidior ac verior. Quod si Ecclesiastici cap. 46 locum cum historia ipsa contulisset, idque vt faceret in mentē venisset, raptim atque ex tempore de proposita sibi quæstione dictanti, non ei tum (quātam existimo) suffecisset quod ait, propterea phantasma illud arte dæmonis excitatum nomine Samuelis appellatum esse, quia soleant

soleant imagines earum rerum nominibus appellari quarum imagines sunt. Etenim animaduertisset inter clarorum virorum laudes, hanc Samuelis laudem poni, quod & postquam dormiuit, ostenderit Regi finem vitæ suæ. Quid autem ad hoc Samuelis encomium pertinebat, quod eius imagine fallaci dæmon est abusus? Aut quid in illo laudis argumento commemorari attinebat sub nomine Samuelis, quod à sancto viro tam erat alienum? Denique, quid hoc ad Samuelem verum, si fictitius quoque Samuel vates est, nisi hic, id est, Diabolus, à Samuelis spiritu fingatur edoctus, eiusque simul (quod absurdum est) gessisse personam? Nec verò conatus esset Augustinus elabi ea via quam iam vobis tritam effecistis, ut diceret librum Ecclesiastici non esse in canone: Sciebat enim Augustinus librum Ecclesiastici in canonem Ecclesiæ recipi, quamuis non esset in canone Hebræorum. Quam enim hos canones librorum distinxerit (quamuis id tibi faciendum non putaris) declarat in libris de ciuitate Dei, cum ait; Machabæorum libros non Iudæos quidem, sed Ecclesiam pro Canonicis habere. Et hætenus de apparitionibus dictum sit animarum defunctorum; non ut hæc vulgares, & quotidiana propè muliercularum spectra probaremus, sed ne totum hoc genus, qua parte in scripturis canonicis comprehensum non est, improbandum esse crederetur; nève Diuus Gregorius, aliique patres qui ex hoc genere quædam com-

me-

28. 18.

cap. 36.

memoratu digna putauêre, risus eorum & cachinnos incurrerêt, qui sibi nihil tale fieri posse persuasissent.

Quæ scripturæ vim habeant ad probandum Purgatorium : ac primum de illo scripturæ loco : Non exhibis indè donæc vltimum etiam minutum reddas.

CAP. XII.

Reliquum est, inquit, vs expendamus loca scriptura, ex quibus id esse confirmant. Primum, Luca verba proserapiunt. Da operam vt libereris ab aduersario tuo in via: ne protrahat te ad iudicem; & iudex tradat te exactori; exactor conijcias te in carcerem. Dico tibi, non exhibis inde, donec etiam minutum reddas. Primum, inquit, verba per se nullam faciunt mentionem Purgatorij, neque etiam ignis, nec Purgatorij hic vllam audis mentionem, sed de studio impendendo vt libereris ab aduersario in via, priusquam ad iudicem sit deuentum: ac proponit grauissima pericula, qua metuenda sunt iuris aleam subituro. Ex quo nihil aliud sequitur, quam oportere concordia esse studiosos & pacis, & reconciliationis amantes. Quod sanè studium eò magis à pijs requiritur, cum id sit necessarium & civilibus causis. Dubia enim est iuris alea, vt belli: bona causa sapius opprimitur, contrahes infamiam, dolores, amittes sortem & multam, & alia multa, qua poteras in via cum aduersario

Cap. 12. &
Matth. 5.

G

com-

componere; mitius potest is de sorte & summa aliquid condonare, quod iudex non faciet. Vt tibi multam & carceres, quæ irrogantur victo: da ergo operam, ut amicè transigas. Hic genuinus & literalis sensus, nihil ad Purgatorium facit.

Haftenus Aretius. Vbi vehementer cauet, ne quid pertineat ad sæculum futurum in commemoratis Euangelij verbis, ideoque in manus iudicis traditio, minister, carcer, ad huius sæculi molestiam referuntur, putaturque hic esse genuinus & literalis sensus, quasi hic Christus humanam duntaxat prudentiam docuerit, qua sibi vel alijs & gentilis homo providè novit consulere: Quasi cum paulò antè secundum Matthæi Euangelium capite 5. ab iniurijs dehortans, ea quæ metuenda essent in futuro sæculo proposuisset, iudicium, consilium, gehennam ignis, continuò post tanquam oblitus sui ad sæculi iudicium, & temporaria incommoda & carceres delapsus sit. Qui prius conuitiatorem terruerat futuri iudicij & supplicij minis, quomodo consequens est, ut concordiam cum aduersario suaserit tātum ne molestia premeret temporalis? Ergo illud, Ne aduersarius tradat te iudici, & iudex ministro, & non exhibis indè donec soluas nouissimum quadrantem, in futuro sæculo fieri intelligendum est. Quomodo intèllexit beatus Hilarinus sensum literalè accuratè conatus exprimere, cum ita scribit in Matthæum: In præceptis Dominiæ orationis, remitti nobis peccata nostra

ora-

*Canone. 4.
in Matth.*

oramus exemplo; & data aduersarijs conditione veniæ, ipsi veniam deprecamur. Hæc itaque negabitur nobis, si alijs negetur à nobis, nostroque ipsi iudicio rei sumus, si in iudicij tempus non remissis simultatibus transeamus, aduersario tradente nos iudici, quia manens in eum simultatis nostræ ira nos arguit. Sic Hilarius. D. quoque Hieronymus futuri sæculi iudictum se accepisse satis ostendit, cum interpretatur cohortari Dominum ad concordiam cum aduersario ineundam, quamdiu in huius sæculi via currimus, ne videlicet postquam huius viæ cursus morte abruptus sit, nos aduersarius iudici tradat. Eodemque modo B. Augustinus; Nescitis, inquit, quando via finiatur: cum via finita fuerit, iudex restat, & minister, & carcer. Ex his quantum arbitror satis elucet eaquæ Aretius ad huius sæculi molestias refert, ad futurum sæculum esse referenda, quando huius vitæ via transierit. Sed verbis consequentibus in hoc totus incumbit Aretius, vt allegoriam & figuram remoueat, ab horû interpretatione verborum. *Excipiunt*, inquit, *per Allegoriam accipienda esse de Purgatorio. Consideremus igitur an possint ἀλληγορικῶς sic intelligi. Primū, Christus hic non per parabolas loquitur, sed aperto dicendi genere hortatur suos ad studium reconciliationis. Deindè si nobis placeat assignere allegoriam, oportet illam esse perspicuam, & cum verbis Christi minimè pugnare. Esto enim, aduersarius sit Sathan, carcer sit Pur-*

*Serm. 1. de
verbis Do-
mini.*

cap. 3.

gatorium, minutum vltimum sit Satisfactio; unde quam malè cohæreant. Christus iubet operam dare ut liberemur hic ab aduersario, hoc est, Sathana. Et apud Mattheum iubet ut simus ei benenoli. Oportebit enim benuenolos esse Sathane, & sic liberabimur ab eo in via, hoc est, in præsentis vita? Et quis vnquam reconciliationem cum Sathana docuit? Nulla enim cognatio Christo cum Belial. Deinde, cum peruentum est in carcerem, nō exhibis donec soluas τὸ λεπίον τὸ ὀχλατόν. Postulat solutionē à quouis sui debiti; non admittit alterius satisfactionem: non ergo de Purgatorio intelligi commodè possunt. Terrio, abutuntur phrasi scriptura in hac allegoria. Nam cum præscindas omnem venia spem; Non exhibis ināc donec solueris, inferunt: ergo solui potest & egressus est sperandum: cum potius concludat; non solui potest, nec patet egressus, quia semper soluendum est, & nunquā solui potest. Apud Matth. dicebatur: Ea non cognouit eam donec peperit filium suū primogenitum. Heluidius inferebat: Ergo postea cognouit eam: ita hi inferunt: Ergo postea solutio erit & egressus: sed falluntur. Ut enim illic perpetua Maria virginitas manet integra; ita hic perpetua manet debiti solutio sine spe egrediendi. Frustra igitur hinc construunt Purgatorium. Hactenus ille.

Primum Areti, si quid pertinet locus ille ad incutiendum futuri sæculi metum, ut eo extimulante operam demus concordia, nōne tu ipse per allegoriam, aut tropū alium, iudicium,

tor-

tortorem, carcerem, quadrantem interpreta-
beris? Aut enim sensu literali per metaphoram
hæc ita dicta sunt de futuri sæculi districto iu-
dicio; aut per Allegoriam eò sunt referenda,
aut nullus omnino hic nobis commendatur
Dei metus, sed tantummodo sæculi: quod à
Christiana cohortatione alienissimū est. Cum
ergo ex hisce tribus aliquid tibi sit eligendum,
neque postremum sine singularis absurditatis
mercede possis amplecti, superest si tibi con-
stare velis, vt ad tropum confugas, quem tan-
topere damnas in nostris authoribus. Et vide
in quibus. Neotericos forsitan aliquos, & huius
scriptores ætatis putas abs te in hac re esse re-
prehensos: sed grauius impingis. Nam vt
Theophylactum præteream, damnas D. Am- *Libro 7. in*
brosij commentationes, qui & Matthæi hunc *Luc. 6. 59*
locum, & Lucæ illi simillimum per tropum est
interpretatus. Diabolum enim intelligit no-
strum aduersarium, qui circuit vnumquemque *1. Petri 5.*
nostrum, quærēs quem deuoret: à quo secun-
dum Lucam liberari, & cui iuxta Matthæum,
consentire, siue vt græcè est expressius, in quem
beneuoli esse debeamus. Si enim, inquit, dum
sumus in hac vita exoluamus nos à vinculis Di-
aboli, nec ille propter nos damnabitur, & nos
à vinculis eius erimus alieni. Hanc ipsam D.
Hieronymus expositionem adiunxit suæ, neq;
pro coacta aut improbabili habuit. Sed & illam
D. Ambrosius prosequitur per quam aduersa-
rius noster sit Apostolicus & propheticus ser-

mo, qui nos ad asperiora præcepta & durioris vitæ documenta constringit; cui nos secundum Matthæum consentire conuenit, ut eum operibus æmulemur, ne aliqua nostri contumacia ab eo desciuisse prodamur. Per similis est. ^a Augustini & ^b Fulgentij & ^c Gregorij magni commentarius, ut nomine aduersarij, sermo seu lex ipsa significata sit, quæ aduersatur peccatori, quoniam eum accusat, & pœna dignum violata conuincit (nam dictio Græca *ἀντιδωας*, aduersarium causæ & litis significat; actorem videlicet ipsum, qui reum facit & in ius trahit) nec euadendi ratio est, nisi illi consentiatur. Sicut enim damnat ipsa à lege discordia, ita consensus concordiaque iustificat. En habes Areti perspicuum tropum, Christi verbis minimè repugnantem, & grauissimorum authorum literis commendatum. Habes aduersarium à quo debeamus liberari, & cui tamen sit consentiendum. Qua enim ratione lex damnat & reum agit peccatorem, ea ratione ab ea liberari debemus. Liberamur si consentimus atque concordamus. Cuius quidem concordia partes duæ sunt: altera ut obseruemus legem, faciamusque quod præcipit; altera ut pro delictis præteritis quibus violata lex est, nosmetipsos puniendo satisfaciamus. Nam sicuti lex primum requirit obseruationem sui; deinde pœnam, si quis non obseruet: ita consentitur ei prius quidem obseruando, vitamque exigendo ad eius normam, tum deinde pœnam subeun-

do vl-

a *serm. 1. de
uer. domini.
& in fine ser
mon. secundi
de duabus pi
scationibus
qui quintus
est sermo in
seorsim ex
cusis.*

b *Libr. 2. de
pecc. remis.
cap 4.*

c *Hom. 39.
super Euan
gelia.*

do vltroneam, ne ob contractas offensas damnatio legis incurratur. Itaque aduersario isti consentire vtraque ratione debemus in hac vita; non solum viuendo secundum legem, sed etiam opera misericordiae faciendo, quibus misericordiam nobis concilemus, delictaque vitae antea redimamus. Idcirco B. Hilarius *Canon. 4.º in Matth.* hanc concordiae rationem insinuans dicit in commentario supra memorato: Quia charitas plurimum peccatorum tegit, & errorum nostrorum ambitiosa ad Deum patrona est, nouissimum poenae quadrantem soluemus, nisi pretio ipsius aliquantum criminum culpa redimatur. Et ad similem modum Ambrosius; *Libro 7. in Luc. ca. 59* Sicut, inquit, qui pecuniam solunt, debitum reddunt, nec prius euacuatur scenoris nomen, quam totius sortis ad nummũ usque quocunque solutionis genere quantitas vniuersa solvatur: sic compensatione charitatis, actuumque reliquorum, vel satisfactione quacunque, peccati poena dissoluitur. Et alia quę sequuntur eodem pertinentia. Ergo illi veteres hanc concordiae satisfactionisque rationem ostendunt, qua vti debet in hac vita, qui prouidẽ sibi consultum velint in futurum: alioqui manet eos seuerum iudicium post mortem; manet carcer, vnde non exeant, donec soluerint nouissimum quadrantem.

Ac de his iam verbis videamus, utrũ aspernentur sensum eum qui sit de Purgatorio. Id enim persuadere conatur Aretius: *Nam cum*

G iiii per-

peruenitum est in carcerem, inquit, *non exhibis donec soluas*, τὸ λατὶὸν τὸ ἔσχατον. Postulat solutionem à quouis sui debiti; non admittit alterius satisfactionem; non ergo de Purgatorio intelligi commodè possunt. Quæ hæc Areti collectio est? cum sit Purgatorij pœna secundum Dei iustitiam temporaria, non æterna; qui hanc totam subierit, nonne tandem exiturus est? Proxus exiturus: Esset enim æternum alioqui supplicium, quod iusto homini & Dei filio deberi non potest: Exhibet ergo, sed posteaquam sua pœna diuinæ iustitiæ accuratè satisfecerit, quod est nouissimum soluere quadrantem. Et pro quibusdam aliena quidem recipitur satisfactio ut citius liberentur, sed pro his, qui huius misericordiæ meritum sibi in hac vita charitatis & misericordiæ operibus comparârunt, in eoque concordârunt cum aduersario suo in via. Etenim vsque ad nouissimum quadrantem is significatur redditurus, qui hîc non concordârit per aliquam satisfactionem cum aduersario suo. Ex quo colligitur, quantum quisque concordauerit, tanto minus seueram debiti supplicij exactionem in futuro sæculo fore. Idcirco D. Cyprianus ad illos peccatores, qui suis in flagitijs ad extremum vitæ tempus perdurârunt, & in fine conuersi nulla peracta satisfactione ex hac vita migrauerint, nullis hic misericordiæ præstitis operibus, quibus leuari post morrem possent; Ad tales igitur pœnitentes applicat hoc ipsum quod scriptum hic est: Non exhibis inde, donec

Lib. 4. epist.
epist. 2. ad
antonianum

donec reddas nouissimum quadrantem. Aliud est, inquit, ad veniam stare, aliud ad gloriam peruenire: aliud missum in carcerem non exire inde, donec soluat nouissimum quadrantem; aliud statim fidei & virtutis accipere mercedē: aliud pro peccatis longo dolore cruciatū emendari & purgari diu igni; aliud peccata omnia passione purgasse: aliud denique pendere in die iudicij ad sententiam Domini; aliud statim à Domino coronari: Sic D. Cyprianus. Cui & Emissenum adiungam Eusebium homilia 3. de Epiphania: Hæc pœna infernalis, inquit, illos manebit, qui admissio & non seruato baptismo in æternum peribunt, ad quos dicitur, vt eant in ignem æternum, qui paratus est diabolo & angelis eius. Hi verò qui temporalibus pœnis digna gesserunt, ad quos sermo dirigitur, quod non exeunt inde, donec reddant nouissimum quadrantem, per fluuium igneum, de quo propheticus sermo commemorat: Et fluuius rapidus qui currebat ante ipsum, per vada feruentibus globis horrenda transibunt; quanta fuerit peccati materia, tanta erit transeundi mora. Sic Emissenus. Perspicias ne Areti non esse, quod vis, consequens, vt de Purgatorio locus ille accipi non possit, quia dictum sit, exigendum ab illo vsque ad nouissimum quadrantem? Quoniam autem modo ita es oblitus tui, vt cum ad temporis huius molestias quæ per iudicium sæculi subeuntur à reis, verba illa referenda putes, non cogitâris etiam de illo carcere hoc esse

Matth. 25.

Daniel. 7.

verum, qui aliquando finitur? Nam si quis urgente accusatore propter iniuriam comprehensus vnus tantum anni carcerem meruisset, neque plus exigi ab aduersario posset, is post illius temporis vincula & squalorem exiret poscente iustitiæ ratione, & tamen nouissimum exoluisset quadrantem, nulliusque pro eo esset recepta satisfactio. Sed adiungis abuti nos scripturæ phrasi, propterea quod sermo eiusmodi; Non exhibis donec reddas, spem omnem veniæ, egressionis per solutionisque præscindat, potiusque ex eo concludendum; ergo non solui potest, non patet egressus. Hoc quam verè dicas Areti, quamque benè phrasim hanc, quæ scripturæ familiaris est, expendaris, ex consimilibus intelliges: Qualia sunt; Oportet illum regnare, donec ponat omnes inimicos sub pedibus suis; Iota vnum & vnus apex non transibit donec omnia fiant; Non contendet, neque clamabit, & linum fumigans non extinguet, donec eijciat ad victoriâ iudicium; Acceptum fermentum mulier abscondit in farinæ satis tribus, donec fermentatum est totum; Amen dico vobis sunt quidam de hic stantibus, qui non gustabunt mortem, donec videant filium hominis venientem in regno suo; Non me videbitis amodò donec dicatis, Benedictus qui venit in nomine Domini; Homo cum dormierit non consurget, donec atteratur cælum. His ergo locis, dic mihi, sensusne sit; Nunquam ponet omnes inimicos sub pedibus suis; Nunquā omnia

omnia complebuntur; Nunquam eijciet ad victoriam iudicium; Nunquam fermentatum est totum; Nunquam gustabunt mortem; Nunquam videbunt filium hominis; Non me videbitis; Nunquam dicetis, Benedictus qui venit in nomine Domini; Homo cum dormierit nunquam resurget; nunquam atteretur cælum? En Areti phrasis scripturæ, quæ tuam tamen expositionem non recipit. Neque enim aliud significat his locis, donec, quàm vsque dum: Verbi gratia, Oportet illum regnare vsque dum ponat omnes inimicos &c. Abscondit fermentum in farinæ satis tribus, vsque dum fermentatum est totum, vnde & hoc interdum posuit interpres pro, donec; velut Matthæi 2. Fuge in Ægyptum, & esto ibi, vsque dum dicam tibi; dicere potuisset, donec dicam tibi: neque tamen opinor significasset, nunquam dicturum, nunquam egressurum ex Ægypto: Ita planè hoc loco, Non exhibis donec reddas, significatur, vsque dum reddas nouissimum quadrantem: Ex quo colligitur id quidem, non exiturum antequam reddat, sed minime significatur eum nunquam egressurum, quia nec dicitur eum nunquam esse redditurum: Nam & hoc de seruo dicitur sui conserui oppressore: Abijt & misit eum in carcerem, donec redderet debitum: Vbi sensus non est, coniecit in perpetuum carcerem, vnde non esset egressurus, quia nunquam debitum redditurus: sed misit in carcerem, vsque dum redderet. Ac patitur

Matth. 18.

ritur quidem ea phrasis, ut nunquam reddat, & ideo nunquam egrediatur: sed aliud est, quid cum ea phrasi consistat, dicere; aliud quid ipsa significet, quidque ex ea sit colligendum. Tu concludis: Non exibat donec soluat; nunquam ergo exibat, nunquam soluet. Ego vero colligo, sicut & tu debueras: Potest ergo fieri ut nunquam exeat, si videlicet nunquam reddat nouissimum quadrantem. Sed si reddat, (id quod phrasis illa non negat futurum) satis insinuat eum egressurum esse. Quamquam & hoc interdum ita se habeat, interdum aliter. Cum

Matth. 11. enim dicitur, Linum fumigans non exstinguet, donec eiciat ad victoriam iudicium, non significatur quod post victoriam linum fumigans

Matth. 1. sit extincturus: Item cum dicitur, Non cognouit eam, donec peperit filium suum primogenitum; non est intelligendum, quod postea cognouerit: Non enim sequitur; Non cognouit eam usque ad partum, ergo cognouit post partum.

Luce 9. Attamen cum dicitur; Non gustabunt mortem, donec videant filium hominis, intelligendum est, quod posteaquam id viderunt, sicuti in transfiguratione factum postea memoratur, gustarint illi mortem. Item, Non resurget, donec atteratur cælum, ita hoc significat ante non esse resurrecturum, ut tamen intelligi patiatur, quod tum saltem resurget. At-

Iob 14. terendum enim cælum, quia transibunt cæli, sicut habet Euangelium, ac tunc communis omnium resurrectio futura est. Idcirco id quod

Luce 21. legi-

legitur apud Isaiam; Non dimittetur vobis hæc *cap 12.*
 iniquitas, donec moriamini, quamvis colligen-
 dum quis putauerit Aretio similis, Nunquam
 ergo remitteretur (vbi non audeo adiungere, quod
 Aretiana interpretandi ratio postulabat, quia
 nunquam moriemini) Ea tamen phrasis ita si-
 gnificat, non remittendum eis antè mortem,
 sed iram Domini vsque ad mortem esse dura-
 turam in plagis temporalibus, vt tamen incer-
 tum relictum sit, num aliquibus illa in morte
 remissa sit iniquitas, ne pœnas sempiternas pa-
 terentur. Quapropter D. Hieronymus, quem
 phrasim hanc non ignorasse testari posset Hel-
 uidius, non dubitauit interpretari sic: Non di-
 mittetur hæc iniquitas vobis, donec moriamini *In epist ad*
 peccato, vt nimirum intelligeremus, tum de- *Sabinianæ*
 mum esse dimittendam, cum essent peccato *diaconum.*
 mortui. Ex quibus colligitur phrasim quidem
 ipsam vtrumuis indifferenter admittere, vt vi-
 delicet postea dimittatur, vel non dimittatur;
 sed ex re ipsa horum alterũ intelligi: quia crimi-
 morimur peccato ad hoc, vt eius fiat remissio;
 sequebatur ex re, nō ex phrasi; si non dimittere-
 tur donec peccato morerentur, dimitteretur er-
 go si morerentur peccato. Ita hic quoque cum
 dicitur; Non exhibis donec reddas, ex vi quidem
 phrasis non rectè colligas, ergo exhibis postquam
 reddideris. Simile enim esset; Non cognouit
 donec peperit, ergo postquam peperit, cognou-
 uit. Sed quod ex phrasi non colligitur, quæ est
 ad vtrumuis indifferens, id ex rei natura colli-
 gen-

gendum relinquitur. Habet autem ratio & natura iustitiæ, ut postquam quis plene reddiderit quod exigebatur, tum liber etiâ dat: sed non id exigebat rei natura, ut postquam Maria peperisset, tum cognosceretur à Iosepho. Configitur illis verbis, Non exhibis inde donec soluas nouissimum minutum, neq; significetur quod non sit persoluturus, & ex rei natura intelligendum relinquatur quod sit exiturus si persoluat, perspicuum fit, nihil impedire quo minus ad Purgatorium quoq; hoc ipsum accommodetur, ubi sunt animæ quæ solvunt in pœnis quadrantem nouissimum; & quia persoluant (neque enim damnatæ sunt nisi ad pœnam finiendam) profectò sunt aliquândo egresstæ. Ac reuera si attendimus, tale quiddam reperiemus hic concepisse D. Ambrosiû, nempe exitum esse & liberationem persoluto quadrante, sic enim ait: Quadrantem autem in balneis dari solere reminiscimur, cuius oblatione ut illic unusquisque lauandi accipit facultatem, ita hic accipit eluendi; quia vniuscuiusque peccatum superscriptæ genere conditionis oluitur, cum tamdiu exercetur noxius pœnis, ut commissi supplicia erroris expendat. Sic Ambrosius in Lucam, declarans & quadrantem solui posse, & eius oblatione peccatum elui atque purgari. Quid igitur est Areti quod loqueris & non intelligis? *Ut illic perpetua manet virginitas integra, ita hic perpetua manet debiti solutio, sine spe egrediendi.* Vellem explicares quid

quid sit illud tuum [Manere] Si enim intelligis manere virginitatem Mariæ perpetuam, quia benè consistat cum illo scripturæ loco quem proferebat Heluidius, neque possit inde concludi quod eam maritus cognouerit posteaquâ peperit, iam tibi ostendi locorum istorum differentiam non ortam ex phrasi, sed ex ipsa natura rerum. Quamuis enim benè cōsistat cum illo loco, vt Ioseph non cognouerit Mariam posteaquam peperit, quia nulla est rerum consequentia necessarium, vt cognoscatur vxor post partum, tamen cum hoc loco non consistit, vt persoluat reus nouissimum quadrantem, & tamen non liber abire sinatur. Si autem intelligis, manere, quia inde statuatur atq; concludatur, falleris in vtroque loco; quia neque ex priore potest concludi perpetua Mariæ virginitas, satisque nobis est, si inde non possit expugnari; neque ex posteriore similiter concludi potest, quod vis, esse perpetuam debiti solutionem sine spe egrediendi.

Pergis tuam munire causam, & addis Christum expressè hic loqui de culpa, atque hoc vt probes, subiungis. *Nam qui in causa succumbit, & est inferior, is solet mancipari carceribus.* Neque tamen ignoras subindè à principe etiam castigari filium carcere, quem nolit exheredare. Succumbit quidem in causa, & idèd propter offensam contractam dignus supplicio est: sed nunquid hinc consequens est carcerem esse debere perpetuum sine vlla spe egressionis?

Non

Non ergo euincis, Areti, Christum hic de culpa, siue de sempiternæ damnationis reatu loqui : qui & si solutus sit, tamen restat adhuc vbi succumbamus necesse est, si volumus iudiciū experiri ; restat omnino, vnde sit actoris nostri, hoc est, legis accusatio metuenda, nisi studiosè satisfaciendo cum ea concordemus. Quod qui prætermittunt in hac vita, ij post mortem iudicium subeunt, & in carcerem rapiuntur, conclusique & constrikti tenentur donec persoluerint. Ac spem quidem habent salutis & hæreditatis, quia filij sunt ; & tamen adhuc puniuntur, quia seipsos in hac vita legi concordando minimè punierunt. Hæc abste animaduersa esse Areti, potius oportuit, quàm ea proferri figmenta tua, quæ etiam Augustinum, si superis placet, animaduertisse subiungis. *Hæc animaduertens*, inquis, *Augustinus, interpretatur hunc locum, Donec solueris, eodem pacto, ut illud Matthæi 1. Donec peperit. Quem Augustini dicas locum nescio. Certè vbi ex profelsò interpretatur ista Domini verba, hanc loci illius similitudinem non adhibet ; quam etsi adhiberet, non tamen sensus esset quem tu imperitè prætendis, Donec solueris, Donec peperit, id est, nunquam. Neque enim, quod iam dictum est, locus ille probat perpetuam Deiparæ virginitatem, sed tantum huic non aduersatur, quod falsò Heluidius sibi persuadebat. Neque enim aliud dicitur, quam non cognouit eam vsque dum pareret suum primogenitum; vnde*

non

*Libro 1 de
verb. Dñi.*

non sequitur, ergo post cognouit. Ais quod de
pœnis æternis loqui affirmat Augustinus Chri-
stum: Ne id quidem sic expressit loco memora- *Cap. 64.*
te: sed in eo libro qui scriptus est de salutaribus *in fine.*

documentis, quem neque esse Augustini, ne-
que eo dignum, qui mediocriter est in illius
viri libris versatus, intelligit, hic tuus, Areti,
commentarius reperitur. Nec verum est D.
Hieronymum, quod etiam imprudenter attexis,
allegoricum hic sensum repudiare: Eum enim
qui de diabolo apud Ambrosium est, non repu-
diat, sed eum improbat, quem multorum esse
dicit de carne & anima, vel de anima & spiritu.
Non diffiteor interim esse qui de gehenna in-
terpretentur. Sic enim Fulgentius: Aduersa- *Libro 2. de*
rium, inquit, homo sibi facit Dei verbū, quam- *peccatorū*
diu illa facit, quæ diuinus sermo prohibet; cui *remiss. c. 4.*
dicitur in psalmo: Tu verò odisti disciplinam, *Psal. 49.*
& proiecisti sermones meos post te. Huic ser-
moni diuino si quis in via, hoc est, si quis in hac
vita citò consentiens non fuerit, missus in car-
cerem ignis æterni, vltra requiem non habebit.

Sic igitur ille: sic & Theophylactus & alij non- *In Luca*
nulli. Ex quo si quid effici potest, illud erit, lo- *caput 12.*
cum citatū non conuincere de Purgatorio;
sed aliud est quid dicas non conuincere, quo-
niam aliter accipi possit; aliud quid dicas non
posse sic exponi: hoc enim tu contendis ad Pur-
gatorium referri non posse; Nos ostendimus
tuarum rationum nullam impedire, quo mi-
nus id fiat; quin si diligenter attendimus, non

H diuersa

diuersa illa expositio est quæ gehennæ mentionem facit, sed loci huius sensus quidam partialis seu dimidiatus : vtrumque enim comprehendit vocabulum carceris, videlicet purgatorium, & infernum, hoc est, & carcerem perpetuum, & temporaneum. Si quis enim non concordauit in via cum aduersario, id est, cum verbo, legem implendo, vitæque deprauatos mores corrigendo, is mittetur in carcerem, quem sit perpetuum habiturus; Qui verò vitam quidem iam melius viuendo correxerit, sed tamen pro admissis non se castigauerit, neque ex ea parte concordarit cum aduersario, carcerem quidem & ipse est habiturus, sed temporaneum. Atque de vtroque verè dixeris, quod inde non exibat, donec soluerit nouissimum quadratè: sed hoc est discriminis, quod is qui carcerem habet perpetuum, non persoluet, ideoque nunquam exibat; qui verò carceri addictus est temporaneo, non exibat quidem nisi soluerit, sed quoniam persoluet per seipsum patièdo, aut etiam per alios, quorum hic satisfactionū auxilia meruerat, idcirco exitum aliquando est habiturus.

Capite 4.

Addere te dicis colophonis loco, allegoriam etiam perspicuam nihil probare : quod miror ubi didiceris, cum Apostolum cōstet in epistola ad Galathas argumento vti ab allegoria petito, aduersus eos qui sub lege esse volebant; Dicite, inquit, mihi, qui sub lege vultis esse, legem non legistis? Scriptum est enim, quoniam Abraham duos

duos filios habuit, vnum de ancilla, & vnum de libera. Et mox: Quæ sunt, inquit, per allegoriam dicta: hæc enim sunt duo testamenta. Ac deinde subsumit; Nos autem secundum Isaac promissionis filij sumus: Et postremo concludit; Non ergo debemus esse serui sub lege. Valet igitur ad aliquid concludendum perspicua & probata allegoria: quod nisi vos quoque persuasum habuissetis, non vobis tam aptè seruissent pelles Esau, quibus Iacob indutus est, ad externam illam & imputatitiam iustitiæ rationem constituendam. Possumus & hoc dicere, Veteres eos, qui sic interpretati sunt, vt ad legē aut diabolum sermo pertinuerit, nō allegoriam tradere, sed literalem sensum, metaphoricum tamen voluisse exprimere: cuiusmodi sensum, grauissimorum præsertim authorum iudicio & vsu probatum, dici non potest, vim nullam habere probandi. Sed tempus est, vt ad scripturam aliam veniamus, videamusque illam nobis ytrum Aretius extorqueat.

Satisne magnam vim habeat ad Purgatorium probandum locus Matthæi 12. & Lucæ 12, de peccato in Spiritū sanctum, quod dicatur non remittendum in hoc sæculo neque in futuro.

CAPVT XIII.

Matthæi, inquit, 12. & Lucæ 12. *Christus agens de peccato in spiritum sanctum, irremissibile.*

H ij

remissibile illud facit in hoc & futuro seculo. Ex eo concludunt; Sunt ergo alia peccata remissibilia hîc, & in futuro seculo. Sed quam malè id sequatur, perspicui potest ita: Est quoddam peccatum hîc, & illic irremissibile, ergo est etiam quoddam hîc & illic remissibile. Consequens quia nulla connexionione necessario coheret, & conuersio etiam mala cum sit, nihil faciunt. Sed locus apud Lucam simpliciter sine distributione habet: Non remittetur ei. Quae verba αὐτῆς τῶς Matthaeus explicuit distributione facta; Neque hîc neque in futuro seculo; Quasi dicat; alia peccata remittuntur hîc, vt peccatum in filium hominis: At illud ne hîc quidem, Consequens ergo est, nec in futuro remitti. Si enim leuiora hîc remitterentur, grauiora autem illic possent remitti, superesset aliqua spes malis. At contra sequitur, hîc solum alia remittuntur peccata, illud autem grauissimum peccatum in spiritum sanctum, non solum hîc non remittitur, sed nec illic quidem, ergo caueri eò diligentius debet. Hæc ille.

Facilè vincis, Areti, cum hostem armas ipse pro tuo arbitrio. Si enim argumentum hoc nostrum est, quo nos vti dicis: Est quoddam peccatum hîc & illic irremissibile, est ergo etiam quoddam hîc & illic remissibile, haud ægrè patior vt id concludere neges. Nam quid si solum esset peccatum in spiritum sanctum? Habere-mus antecedens verum, falso consequente: Eset enim quoddam irremissibile in hoc & in futuro, & nullum esset remissibile in vtroque. Non ergo

ergo nostrum hoc argumentum est : sed dicimus Christum non leuiter, non ridiculè, nō sine ratione graui, distributione illa vsum, neq; in hoc sæculo, neq; in futuro peccatum remissum iri. Sicut autem ridiculè & sine ratione ac pondere dictum esset, neque in hoc sæculo, neque in futuro, si nullum esset futurum sæculum, sed prætereunte figura mūdi huius, omnia prorsus interirent : ita sine ratione & superfluo dictum à Christo esset, neque in hoc sæculo, neque in futuro, esse remittendum, nisi aliqua peccata in futuro sæculo remitterentur. Duplex quippe in illis verbis facta distributio est ; vna sæculorum præsentis & futuri ; alia remissionum quarum altera hic fiat, altera in futuro. Sicut igitur prior nullam esset habitura locum, si nullum esset sæculum futurum : ita neque posterior, si nulla fieri possit delicti remissio nisi in hoc sæculo. Qui ergo sic loquitur non inconsideratè & leuiter, sed seriò prorsus & grauiter, vt dicat esse peccatum, quod neque hīc, neque in futuro sæculo remittatur, is profectò sicut aliquod sæculum futurum, sic aliqua significat remitti peccata in futuro. Ideoq; D. Augustinus non dubitauit ita scribere: Neque enim de quibusdam veraciter diceretur quod non eis remittatur, neque in hoc sæculo, neque in futuro, nisi essent quibus etsi non in isto, tamen remitteretur in futuro. Cur autem non veraciter ita diceretur, nisi quia non subesset sermoni, quod ipse tamen præ se ferret? Ac ne eam co-

D. Aug. lib. 21. de ciuita. Dei cap. 24.

gitationem semel duntaxat Augustino venisse in mentem arbitreris, legis & hoc apud eundem lib.6. contra Iul. c. 5. Peccata quidem nulla remittuntur in regno, sed si nulla remitterentur in iudicio illo nouissimo, puto quod Dominus non dixisset de quodam peccato; Non remittetur neque in hoc sæculo neque in futuro. Sic Augustinus. Cui & Archiepiscopus Hispalensis Isidorus consentiens sic ait; Cum Dominus dicit: Qui peccauerit in Spiritum sanctum non remittetur ei neque in hoc sæculo neque in futuro, demonstrat quibusdam illic dimittenda peccata, & quodam purgatorio igne purganda. Hæc Isidorus. Præterea dicitur hoc à Christo Domino, ut exprimeret nobis singularem eius peccati perniciem atque gravitatem, qua differat ab alijs, quæ peccata esse dicuntur in filium hominis. Si igitur eo differre voluit peccatum in Spiritum sanctum tanquam perniciosius ac gravius ab reliquis peccatis, quod illud neque remittatur in hoc sæculo, neque in futuro, nonne consequens est, ut intelligi debeat de cæteris quæ minora sunt, remissionem obtineri posse in futuro? Alioqui paria in hoc sunt omnia, quod in futuro remitti non possint, nec vlla relictæ est alia differētia quàm quod illud in spiritum sanctum non remittatur in hoc sæculo, alia in hoc sæculo remitti possint. Ut quid igitur additum: Neque in futuro? quid id pertinebat ad rem, si nihil omnino ad discrimen faciebat? Hoc spectans B. Gregorius: In hac, inquit, sententia

*Libro 1. de
Eccles. offi-
cijs cap. 18*

*Lib. 4. Mo-
ral. cap. 39*

sentia datur intelligi, quasdam culpas in hoc sæculo, quasdam verò in futuro posse relaxari. Quod enim de vno negatur, consequens intellectus patet, quia de quibusdam conceditur. Sed tamen vt prædixi, inquit, hoc de paruis minimisque peccatis fieri posse credendum est. Beda quoque Venerabilis, cum in Marci caput tertium cõmentatur, quamuis nõ nesciret eandem esse Marci & Matthæi sententiam de non remittendo eo peccato quod in Spiritum sanctum admissum est, tamen quam haberet Matthæi verba vim peculiarem propter distributione, ipsissimis quæ ante posita sunt Gregorij verbis diligenter expressit. Hoc idem & Philippus presbyter intelligens Dominicis verbis, quemadmodum à sancto Matthæo referuntur, significatum esse, sic planissimè cõmentatus est lib. i in Iob, ad caput 12: Inter hos, inquit, conflictus subtilissimis insidijs in homine dimicantes, quæ insidiæ ita aliquoties quasi sub specie boni obductæ sunt, vt fortassis discerni vix possint, vbi & ipsa ignorantia peccatum habetur, potest fieri, vt aliquis sanctorum hinc ita subito exeat, vt minus purgatus à talibus, id est, à minimis delictis velut imparatus abscedat, quæ illi ibidem à misericordissimo Domino concedantur. Quod autem in illo iudicio quædam peccata donentur, ipsius Domini indicare videtur authoritas in Euangelio, vbi ait: Qui autem blasphemauerit in spiritum sanctum, non remittetur ei, neque in hoc sæculo neque in futuro:

H iij

Vbi

Vbi hoc intelligendum, quod aliqua exigua prævalentibus magnis operibus, vel sanctorum intercessionibus remittantur: Secundum hoc ergo Domini dictum sunt debita quæ illic donanda sunt, vbi peccatum blasphemie spiritus non memoratur: Non enim diceret Dominus, hoc peccatum non remittetur, si alia peccata illic non remitterentur. Quæ sint autem illa peccata, vel cuiusmodi sint, solus Deus nouit, qui ea remissurum se esse promittit. Secundum hunc sensum est & illud, quod Apostolus de

2. Tim. 1. Onesiphoro ait: Det illi Dominus inuenire misericordiam à Deo in illo die. Sic ille de Euangelij loco. Sensum eundem D. etiam Bernardus concepit ex iisdem Euangelij verbis: Nam si non credunt, inquit, ignem purgatorii restare post mortem, quærant ab eo qui dixit quoddam peccatum esse, quod neque in hoc sæculo, neque in futuro remittitur; cur hoc dixerit, si nulla manet in futuro remissio purificatione peccati? Videtne quemadmodum hanc illi distributionem expèderint? Nimirum hoc statuètes pro certo noluisse nobis illudere Christum, ut significatione daret non solum alterius sæculi, verum etiam remissionis in altero sæculo, cum tamè nihil tale subesset. Idcirco & Petrus Venerabilis, ipsis Bernardi temporibus, pius Abbas & vir eruditus, aduersus errores dissestis cuiusdam Petri de Bruis negantis viuorum suffragia defunctis prodesse, hoc eodè usus est argumento: Quàdo enim, inquit, de blasphemia spiritus loquens

2. Tim. 1.

*Serm. 66.
in Cantica.*

loquens ait : Qui dixerit verbum contra spiritum sanctum , non remitteretur ei , &c. ostendit veniam quidem peccatorum in hoc sæculo semper dignis cōcedi , remissionem tamen poenarum quas peccata exigunt , in futurum sæculum aliquando differri. Est hoc ipsum , quod supra D. Fulgentium in ijsdem Euāgelij verbis intellexisse monstrauimus ; nō aliqua videlicet mortalia in futuro remitti , quæ hic remissa non sint , sed quæ hic fuerint cōdonata quoad culpā siue quoad reatum damnationis æternæ , posse remitti in futuro sæculo , secundum restantes poenas . Itaque in futuro sæculo leuia quidem minimaque peccata remitti possunt , velut sermo assidue otiosus , immoderatus risus , peccatum curæ rei familiaris , sicut intellexit D. Gregorius , & peccata etiam grauiora hic secūdam culpam remissa , illic possunt secūdam poenam , quæ reliqua erat , plenius aboleri , quemadmodū D. Fulgentius significauit . Quæ quidem peccata quamuis mortalia sunt , quia tamen de poena eis debita quod superest , temporaneum est ac leue , si cum æternitate supplicij conferatur , ideo sub minimis ac leuioribus peccatis ab alijs sunt comprehensa , quod pro talibus habeantur ea ; quæ supplicio duntaxat temporario digna iudicantur . Habes igitur Areti grauissimos aucthores non paucos , quibus aliqua fuit occasio distributionis huius attingendæ , in eo intellectu & verborum dominicorum sensu conformes , vt aliquam fieri conceperint peccato-

H v rum

rum remissionem in sæculo futuro . Neque verò quod apud Lucam simpliciter ac sine distributione dictum sit [Non remittetur ei] tibi profuerit, vt vim distributionis eius quæ apud Matthæum expressa est, effugias. Quamuis enim idem sit reipsa dictum ab utroque , multum tamen interest, quo modo & quibus verbis expressum sit. Qui dicit Chimærā neque in cælo esse neque in terra, neque alio vllō elemento, is idem dicit quod alius, qui diceret nusquam esse, & tamen suæ ille distributionis ita debet reddere rationem, vt non frustra dixisse videatur, Neque in alio vllō elemento: quod profectò frustra & ineptè additum esset, si palàm esset nullum extare aliud elementum. Atq; vt causæ huic affinius de scriptura diuina promatur exemplū, eadem reipsa sententia est, si dixeris breuiter : Nullus poterat aperire librum & soluere signacula eius, cum ea quæ expressa est Apocalyp. capite 5: Nemo poterat neque in cælo neque in terra neque subtus terram : sed si subtus terram nullus esset aut fuisset vnquam spiritus à quo tale quiddam non absurdissimè expectari potuisset, quis in ea distributione tertij membri additionem non protinus esse diceret otiosam ? Neque ergo quicquam profuerit quod adiungitur, voluisse hoc idem Matthæum ἀνέκτιστος facta distributione explicare. Nam etsi homines interdum pro sua vanitate faciant ἀνέκτιστος vsque ad mendacia, vel certè cum ridicula quadam ineptia, tamen à Domini

mini & Evangelij verbis longè id. alienum esse credendum est. Atqui non veraciter, vt Augustinus ait, dicturus erat Dominus; Neque in hoc sæculo neque in futuro, nisi aliqua futura esset post mortem peccatorum remissio. Vt ergo donemus isti, Christum per auxesin distributione vsum esse, cùm diceret, Neque in hoc sæculo neque in futuro, tamen ea necesse est grauis & apta sit, cuiusq; ex omni parte ratio reddi possit, maximè vero talis, vt in ea nulla insit falsi significatio. Si quis interrogatus, num quem vidisset Pigmæum cum grue pugnantem, responderet per auxesin, neque sub cælo neque supra cælum quenquam talem vidisse; quam, rogo te, satis aptam rationem redderet, cur supra cælum neminem se vidisse dixisset, cum illic neque esse, neque videri à mortalibus tale quicquam possit? Sed laborat Aretius, vt suam auxesin liberet à mendacio. Ita enim expressit eam quasi diceretur; Alia peccata remittuntur hic; at illud, ne hic quidem: Et tamen qui sic loquitur *αὐξήσις*, vt dicat, peccata distinguens, aliquod esse quod ne hic quidem remitti possit, nonne tibi significare videtur alibi quoque quam hic, fieri posse peccati remissionem? Quid enim est [ne hic quidem] nisi non solū non in altero sæculo, sed ne in isto quidem? Quemadmodū qui dicit, Vir iste sic est oppressus languore, vt nec medicinam quidem ipsam admittat, is significat non solum cibum ab eo non admitti, sed ne medicinam quidem qua

curari

curari possit. Id quod distributionem haberet ridiculam & otiosam, si nihil præter medicinam recipi à quoquam posset. Sic & iste sermo; ne hic quidem remittitur illud peccatum, distributionem insinuat otiosam & ineptam, si alibi nulla potest fieri peccatorum remissio. Quod si nihil aliud tuum illud (Ne hic quidem) significet, quam (Non hio) ut dictum sit alia peccata hic remitti, illud verò hic non posse; tum neque distributio, neque *αὐξήσις* est, cum sit vehementius illud apud Lucam: Non remitteretur ei: & apud Marcum; Non remitteretur in æternum, quam istud; Non remitteretur hic. Quod verò addis colligendo; Nec ergo in futuro sæculo, id neque auxesin habet; quoniam maius est, hic non posse remitti, ubi propriè tempus est remissionis quam illic, ubi nulla solet dari remissio. Sicut auxesin nullam haberet quod diceret aliquis, vna Renesia neque in Germania esse, neque in Brabantia: hoc sensu: Non in Germania, neq; ergo in Brabantia, cum nihil mirū sit in Brabantia nō esse, si in Germania non fuerint. Sed neque explicat hoc distributionem, quia distributio non est ratiocinatio. Nec enim Christus argumentatur, & aliud ex alio colligit, cūm dicit; Neque in hoc sæculo, neque in futuro, non plus omnino, quam si quis dicat, Neque in cælo, neque in terra plures esse deos. Rursum, si tuum illud [Ne hic quidem] id significat quod debet, hoc est, non solum non alibi, sed ne hic quidem; non solum

solum non in futuro sæculo, sed nec in isto, videlicetne quam nugatoriè colligas illud; ne hic quidem remittitur, ergo nec in futuro? Est enim perindè atque si dicas planius, Non solum non remittitur in futuro, sed nec in isto quidem, ergo nec in futuro. At si per nullam auxesin dici voluisti [Ne hic quidem] sed tātum non esse hic remittendum; qua cohærentia, & quo nexu propositionum consequens est, Non hic, ergo non in futuro? Simile enim est hoc, quod scis vitiosissimè dici: Non est hic regnum beatum, ergo nec in futuro sæculo: Non est hic anima Petri, ergo nec in cælo. Iam ea rogo, quæ consequenter adiungis, expende mecum & vide, vt in diuersum tua iactetur oratio, quia relicto sensu verborum plano & obuio, certi nihil habet quod sequatur. *Contrà, inquis, sequitur: Hic solum alia remittuntur peccata; illud autem grauissimum peccatum in spiritum sanctum non solum hic non remittitur, sed nec illic quidem, ergo caueri eo diligentius debet.* Prius auxesin tuam in illo posueras [Ne hic quidem] nunc exprimis eandem per [ne illic quidem] indeque colligis, caueri ergo diligentius oportere. Cur debet caueri præ alijs diligentius, quia nec in futuro quidem sæculo remittitur? An vllum est ergo aliud quod possit in futuro sæculo remitti, sed istud non possit? Si enim nullum est peccatum quod possit remitti in futuro sæculo, ex ea ratione omne peccatum æquè atque istud caueri debebit. Laqueos veritatis Areti laboriosissimè

fissimè fugis, & tamen incurris in eos, velis nolis, nec te ijs, quæ tua est infelicitas, capi sinis. Quid enim aliud tua ista significat explicatio, quam aliquam fieri posse quidem remissionem in futuro, sed huius peccati in Spiritum sanctū tantam esse perniciem, ut nec illic sperari eius remissio possit? Consequimur ergo quod volumus te iudice, nec video cuius gladio certius vinci quam tuo potueris. Expeditior & minus implicatus videri poterat aliorum commentarius, ut dictum sit: Non remittetur neque hic, neque in futuro sæculo, hoc est, punietur & hic & in futuro, cum videlicet cætera quæ tam graua non sint sæpenumero hic non puniatur, sed eorum per Dei patientiam, usque ad futurum sæculum pœna differatur. Verum absurdè omninò statuitur iuxta hanc commētandi rationē, remittere peccatum valere idem quod non punire, in hoc sæculo præsertim. Quis enim dicat remitti peccata ijs hominibus qui in ipsis permaneant? Et vbi alias sic accipitur remittendi verbum? an, quod Apostolis dicitur, Quorum remiseritis, id est, quos non punieritis? Et quod dicit Christus paralytico, Remittuntur tibi peccata tua, idem erit, quod non puniuntur, cum adhuc ipsa paralyti punirentur? Multi præterea blasphemi, & suis blasphemijs peccantes in Spiritum sanctum, quales erant Pharisei, non puniuntur in hoc sæculo, sed opibus & bonis omnibus florent usque ad mortem: & ediuerso multa sunt alia peccata, quæ & hic vindicantur

& in

& in futuro sæculo; cum tamen hoc de peccato in spiritum sanctum peculiariter dictū sit quod neque hic remitteretur, neque in futuro. Sed isti commentario fauere Chrysostomus credi possit, cuius propè talis esse videatur explanatio. Verum cum dicat inter cætera Chrysostomus Christi verba interpretans: *Quæ omnia si pœnitentiam gesseritis penitus dimitto*, satis ijs verbis declarat, se remissionem intelligere, qua reatus peccati dissoluitur per pœnitentiam, non qua in peccato manētibus temporaliter duntaxat parcitur. Cum teneamus igitur firmissimo scripturę testimonio, vnde ridiculisti tantum conatibus sese aduersarius expedire nititur, remissionem aliquam peccatorum ad futurum quoque sæculum pertinere, quæro iam vbi illa futura remissio est? in inferno reproborum? sed ibi nulla vnquam est speranda redemptio. In cælo & regno illo beato? sed eo nihil coinquinatum introibit; nihil ergo non purgatū prius. Restat igitur vt purgatorius aliquis constituatur locus vbi fiat hæc remissio peccatorū. Et hætenus quidem de illo scripturæ loco dictum sit.

**Pertineátne quicquam ad Purgatorium
construendum, quod scriptum est de
Lazaro & diuite. CAP. XIII.**

L *Uce, inquis, 16. de Lazaro & diuite historia est, ex qua Purgatorium construunt. Verum aperte illud tollit: nam duo tantum agnoscis*

nescit loca, finem *Abraham* in quo *Lazarus* est, &
 infernum in quo diues torquetur. Nullus est me-
 dius locus, nisi chaos quoddam in quo nulla sunt
 anima. Inane igitur erit Purgatorium. Deinde,
 diuiti negatur omnis expiatio, omne auxilium ab
Abrahamo & *Lazaro*. Præterea diues pro se aut
 mortuis nulla petit officia, sed pro viuis solum est
 sollicitus, quæ omnia Purgatorio repugnant. Adde
 quod solum parabolica sit narratio, non historia.
 Sed etiam si des historiam esse, nihil inuenit Pur-
 gatorium. *Diuus Iustinus* martyr questione 66.
 ex historia illa *Luca* 16. colligit doctrinam Pur-
 gatorio planè repugnantem, quæ videlicet homi-
 nibus non sit speranda redemptio postquam semel
 hinc emigrauerint. Hæc ille. Eum *Luca* locum
Areti, an quisquam trahat ad Purgatorium cõ-
 struendum, nescio. Sed si quisquam hoc face-
 ret imprudentius, nihil id causæ nostræ præiu-
 dicaret, ut propterea deberet infirma videri,
 quod ab aliquibus non benè defenditur. Bonas
 enim causas malè quidam agunt, neque hoc
 tamen æquitati præiudicat. De *Pompeio* di-
 ctum est à *Cicerone* quod malas causas sem-
 per obtinuit, in optima concidit. Sunt au-
 tem nonnulli qui dum in assertionis suæ con-
 firmationem incumbunt, vndecunque con-
 gerunt omnia, quæ ad rei propositæ probatio-
 nem facere posse videantur. Quo in studio fa-
 cile accidit, ut firmis infirma, & probabilibus
 minus interdum probabilia permisceant. Vbi
 si de causâ iudicare quis velit, non hæc illi erit
 æsti-

æstimāda ex singulis, sed ex potioribus ac pluribus: Quin & si in vnum quempiam incidere, qui nihil idoneum, nihil validum satis proferret, ne tum quidem esset ei caussa damnāda. Quis enim malè pugnatum in acie dicat, propterea quod vnus atque alterius fortè militis depræhenderit ignauiam? At si neminem ex omnibus quos vel legerit vel audierit stare pro caussa de qua agitur satis fortiter animaduertit, si tum incipiat caussæ etiam bonæ diffidere, potest is venia dignus iudicari. Sed cum non ignorent isti firmissima Catholicorum argumenta, quæ nequeant, vtcunque se torqueant, dissoluere, ramen studiosè frigida quædam, aut etiam quæ sint nullarum virium eligunt; quorum vbi traduxerint imbecillitatem, sperant effecturos se apud rudiores quosque vt cætera eiusdem farinae credantur. Hac vñs praxi Benedictus Arerius in eo elaborat, vt id quod scriptum est de diuite epulone ostendat ad Purgatorium nihil pertinere. At non necesse est vt in eo laboret. Scimus ipsi diuitem illum quoniam misericordiam non fecerit, sine misericordia iudicatum, nec in Purgatorio, sed in gehennæ sempiternæ loco sepultum. Medium quoque illud chaos & impenetrabile seu potius insuperabilem hiatum atque voraginem, nihil significare nisi immobile Dei decretum, quo electi à reprobis perpetua sunt segregatione separati, & ideo sudandum non esse vt in eo chasmate aliqua animæ reperiantur. Nec tamen veram ne-

I

gamus

gamus esse historiam quam Diuus Ambrosius narrationē magis quam parabolam videri scribit, propterea quod Lazari etiam nomen exprimitur: sed quod in historijs explicandis frequens est vt metaphoricis locutionibus quædam expressa misceantur, id quoque hic agnoscimus factū esse, non modò in vocabulo chasmat, verum etiam in vocabulo Sinus, quo per tropum secreta quædam significata quies rectissimè cogitur. Si qui tamen per Sinum Abrahamæ proprium quoddam & extremum inferorum receptaculum, tãquam in suprema parte situm (quomodo Tertullianus cōcepisse videtur libro contra Marcionem quarto) atque inter ipsum illum Sinum & Gehennæ locum mediam profunditatem & voraginem quãdam veram, in qua purgandæ animæ tenerentur, intelligant, non eis resisto, modò ne hac non certissima imaginatione rem fidei probare nitantur. Quod autem addis Iustinum martyrem indè colligere doctrinam Purgatorio planè repugnantem, quia doceat hominibus nullam esse redemptionē sperandam posteaquam hinc emigrauerint, hoc aut nescire te quæ sit catholica doctrina demonstrat, aut certè id fingere. Quis enim dicit catholicus ei qui redemptus hic non fuerit, sperandam esse aliquam redemptionem cum hinc migrauerit? Tunc enim propriè quisque redimitur, cum ei ad ipsius iustificationem, pretium applicatur Dominicæ mortis, cum ex eo princeps mundi huius eijci-

tur

tur foras vt captiuum non teneat, qui translatus sit de tenebris in lucem, de statu iniquitatis in statum iustitiæ, de morte in vitam. Id quod si in hac mortali vita præstitum non sit, non est quod post mortem expectetur. Plenior autem liberatio siue redemptio si speranda post hanc vitam non esset, non diceret beatus Apostolus, Sed & nos ipsi primitias spiritus habentes intra nos gemimus adoptionem filiorum Dei expectantes redemptionem corporis nostri: Spe enim salui facti sumus. Est igitur in hac vita quædam iustorum redemptio, de qua scriptum est; In quo signati estis in die redemptionis vestræ. Et apud Petrum; Redempti præioso sanguine agni immaculati de vana conuersatione paternæ traditionis: quæ redemptio si hic non contigit, nulla postmodum erit; eius verò perfectio datur post hanc vitam, siue cum plenius liberamur à pœnis antè magnum illud extremumq; iudicium, siue etiam cum corpus corruptioni datum ad beatam immortalitatem recipimus. Quantum enim quisque à peccato & malo liberatur, tantum redimi dici potest: Vnde & illud scriptum est in Psalmis: Qui redimit de interitu vitam tuam. Et apud Diuum Ambrosium cap. 24. libri de fide Resurrectionis; Descendebat in infernum Christus alios redempturus.

*Rom. 8.**Ephes. 4.**1. Petri 1.**Psal. 102.*

I ij Locus

Locus Apostoli de quorūdam per ignem probatione & salute, quomodo accipiendus sit. CAP. XV.

Sequitur, inquit, Locus prima Corinthiorum tertio, Si cuius opus exustum fuerit damnum patietur: ipse saluus fiet sed tanquam per ignem. Ad hunc ergo locum respōdens. Certum est, inquit, allegoricè hic ignem poni, cum prius de doctrina ministrorum esset locutus, per allegoriam adificantium & superstruentium aurum, argentum, pretiosos lapides; lignum, stipulam, quæ omnia ad diuersas doctrinas retulit: quare examen & probatio doctrinarum hic ignis erit; Restat igitur nihil hinc inferri posse pro Purgatorio constituendo. Ac quod pertinet ad interpretationem loci illius, verum quidem est alios alium intelligere ignem, tamen sensum litera vident esse de examine doctrinarum. q. d. non satis esse, nobis placere nostra dogmata, aut etiam hominibus arridere, sed esse necessum ut etiam censuram diuini iudicii ferre possint. At certum est quod dicit Aug. hūc ignem communem esse debere & bonis & malis, ideoq; Purgatorius esse non potest: Minus gehenna ignis, ut vult Chrysost. nam dura est & coacta interpretatio; Ipse autem saluus erit, hoc est, in gehenna tormentis non consumetur, sed manet saluus quoad esse, sed pœnis semper cruciatur. Apostolus enim vult dicere, quosdam superstruere fundamento posito quod est Christus, paleas & stipulas, hoc est, aliena à veritate, quæ censuram indi-

iudicij non possunt ferre, idcircoque illa exurentur per ignem illum diuini iudicij. Ipse autem minister aut doctor non damnabitur, propterea quia mansit in fundamento Christo. Opus autem suum videbit exuri, quia humanitus quadam affinxit, & saluabitur quasi per ignem, hoc est, pudorem iustum, quod videt damnari, & errore seductum alios eadem docuisse. Augustinus lib. 21. de ciuit. Dei, cap. 26. affert huius loci quadruplicem explicationem. Primum, per ignem hunc intelligi posse presentes afflictiones & dolores quos capiunt homines ex amissione bonorum, qua tamen nomine Christi deserunt, licet dolenter, qui dolor non malè dicitur ignis. Secundo, de igni diei Domini, qui per ignem reuelabitur, in quo boni persistent, videbunt autem multa exuri & damnari qua approbarant. Tertio, de intermedio tempore à morte vsque ad nouissimum iudicium, quo tempore quadam delicta puniantur. Sed dubitanter eam proponit, inquit. Non redarguo, quia forsàn verum est. Quarto, de Antichristi tribulationibus, cuius tempora bonos probabunt tãquam ignis ardentissimus. In hac opinionum varietate hoc seruandum iubet, vt ignem intelligamus hic bonis & malis communem, qui est (vt diximus) censura diuini examinis quo doctrina ministrorum aut probatur aut damnatur. Hactenus ille.

Quo primum in loco nouitij istius commentarij ostendenda vanitas est, vt deindè Catholicę explicationi commodior esse locus possit. Id autem statuunt ferè nostrę ætatis secta-

I iij rij, ad

rij, ad ministros hæc pertinere solos, neque alios esse qui superædificent super fundamēto Christo, neque aliud intelligendum superædificari quam doctrinam, cuius quidem doctrinæ varietas significata sit nominibus auri, argenti, lapidum prætiosorum; ligni, fœni, stipulæ. Ac de ministris quidem non multò ante-constat esse sermonem, de quibus expressè dicitur; Quid igitur est Apollo, quid verò Paulus? Ministri eius cui credidistis. Sed sicuti principio capitis illius tertij, ab ijs quæ populi communia erant & ad omnes pertinebant, transit ad ministros, ita post à ministris ad id redit quod commune erat Ecclesiæ; Dei, inquit, agricultura estis, Dei ædificatio estis: atque inde proximè illa contextuntur quæ scripta sunt de ijs qui superædificant; vt vel hinc quiuis intelligat, ab eo primum istos esse depulso quod aiunt; Antecedentia propriè pertinent ad ministros, ergo & hæc quæ de superædificando subiunguntur. Non enim quæ proximè præcedunt ministro- rum sunt propria, sed pijs omnibus, bonisque Christianis communia; nempe esse Dei agriculturam, & Dei ædificationem. Deindè videndum est, cur pius quisque & ipsa Ecclesia sanctorum sit ædificatio Dei, & quam ratione in hoc ædificio Christus sit fundamen- tum; indè enim perspicietur quorum sit super- ædificare. Est igitur & Ecclesia sancta & homo iustus ædificium Dei atque domus, de qua *Psal. 126.* scriptum est in Psalmis: Nisi Dominus ædifi-
cauc-

cauerit domum, in vanū laborauerunt qui ædificanteam. Ædificatur autem hæc in nobis domus non solum perceptione doctrinæ salutaris per fidem, verumetiam per charitatem studio bonorum operum, proficiendoq; de virtute in virtutem. Atque in hoc ædificio, vt firmum & stabile sit, necesse est Christum fundamenti esse loco. Idcirco enim comparatur iustus viro sapienti qui ædificauit domum suam super petram, hoc est, Christum. Porro Christus in fundamento est, non cum mortua tenetur fide, sed ea quæ per dilectionem operatur, siue cum in corde est, non per solam doctrinæ perceptionem, verumetiam per charitatis infusionem qua ille omnibus alijs antepositur rebus. Iam collocatiōni fundamenti reliqua debet structura respondere, vt si Christus in fundamento sit per fidem & dilectionē, ipsa superædificatio non solum fiat cognitione crescendo, verumetiam recta operatione proficiendo. Ex quo illud conficitur, iacto ad prædicationem Apostolicæ doctrinæ fidei operatricis fundamento, non docendo modò, verumetiam operando superædificari, vt ad omnes omninò pertineat cura superædificandi, quorum est ædificationem esse Dei, sitq; eorundem augere in seipsis ædificium, quorum est suscipere fundamentum. Vnde posteaquam dixisset Apostolus se vt sapientem architectum fundamenta iecisse prædicando, non subiunxit, Viderint ministri cæteri quomodo superædificent, sed generatim

I iij. com-

complexus omnes, Vnusquisque, inquit, videat quomodo superædificet. Neque enim agebat Apostolus de doctrinæ structura aut ædificio quodam, quale in libro aut prædicatione cognoscitur, vbi fundamentum est doctrina Apostolica & fides de Christo; sed de iustitiæ & pietatis ædificio quod construitur paulatim in Christianis hominibus, ratione cuius ædificationis Ecclesia domus est Dei. Vnde neque ait, Vos habetis ædificationem Dei in doctrina vobis tradita, vbi à me positum est fundamentum; sed, vosipsi vestrumque singuli estis ædificatio Dei, & agricultura eius. Non igitur monebat Apostolus, viderent Corinthij quæ doctrina super fundamento suæ doctrinæ superædificaretur; sed qui affectus, qui mores, quæ studia, quæ cogitationes, quæ facta & occupationes. Vbi propriè elucet illa auri, argenti, lapidum pretiosorum, ligni, fœni, stipularumque differentia. Ob eam rem id quod superædificatur, vocat Apostolus opus vniuscuiusque seu hominis opus, propterea quod ab homine sit per liberum eius arbitrium, quamuis non sine gratia, si opus est bonum. Doctrina verò si sancta est & salutaris, & digna quæ auri vel argenti vel prætiosi lapidis metaphora designetur, non opus est hominis sed Dei. Quippè doctrina sana verbum Dei est non hominis, neque libero hominis arbitrio subiecta res est, sed Dei cuius est verbum. Est quidem ipse prædicandi verbi labor & studium, hominis opus, quod à quibus-

quibusdam superædificatur super fundamento Christo; at ipsam quod prædicatur verbum, seu doctrina salutaris, Dei opus est, non hominis. Neque proinde ipsa doctrina est quæ mercedem accipit aut meretur, sed labor ipse quo doctrina traditur hominibus, eiusque illustrandæ studium. Atqui beatus Apostolus dicit: Si cuius opus mâserit, quod superædificauit mercedem accipiet. Non ergo doctrina est seu verbum prædicationis (quod non hominis sed Dei verbû esse debet) id quod superædificatur, sed hominis operatio & affectus, siue hoc in prædicando verbo consistat, siue in audiendo vel legendo, siue etiã in alijs studiorum versetur generibus. Cum etiam ad fundamentû addat aliquid is qui superædificat, ipsumque fundamentum quod beatus Apostolus posuit sit Dei verbum, nunquid existimandum est, vllam doctrinam voluisse verbo Dei superaddi? Nõne quicquid additur verbo Dei, hoc & vos damnare soletis vt humanum commentum, & plantationem quam non plantauit pater cælestis? Vbi ergo iam erit aurum & argentum & lapis præciosus qui superædificabitur, cum nulla doctrina superaddita verbo Dei possit ad eum modum commendari, sed omnis reiijcienda sit ad ligna fœnum & stipulam? Doctrinam sanam & eam quæ secundum pietatem est, siue ipsum Dei verbum, explicare populis & manifestare licet; augere superædificando non licet. Auget autem ædificium quisquis superædificat &

I v

addit

addit ad fundamentum. Denique ut ostenderet non ad solos doctrinæ ministros pertinere superædificandi curam & delectum, sed ad omnes omninò Christianos, adiungit quod est omnium. Nescitis quia templum Dei estis, & spiritus Dei habitat in vobis? Tanquam profectò diceret; Magna vobis cura prouidendum est, quid in hoc ædificio superaddatis, quidque superædificetis: non enim vulgare hoc in vobis ædificium est, non vile & abiectum, sed templum est Dei in quo eius spiritus inhabitat, ideoque decet illic prætiosissima quæque superædificari. Et tolerabile quidem si ligna, si fœnum, si stipula superaddantur, quamuis parum est ea decora & malè cohærens superædificatio: Sed si quis violauerit templum Dei grauiora committendo, disperdet illum Deus. Et hæctenus quidem dictum sit de superædificantibus, qui sint, & quid sit quod intelligendum sit superædificari. Quamuis de ea parte loci huius non præcipuè contendimus, qui non ignoremus illum sub Ambrosij titulo commentarium, minus certè tamen probabilem, cuiusque magis pondere premeremur, si Ambrosij esset illius Mediolanensis. Ideoque Diuus Anselmus cum hunc non omisisset, illum tamen quem prosequuti sumus, tanquam veriorè anteponendum esse putauit. Nunc reliqua expendenda sunt, videlicet de die Domini, de igne, de probatione, & salute per ignem. Vniuscuiusque opus, ait Apostolus, id est, vniuscuiusque ministri

nistri doctrina, iuxta hos interpretes, manifesta erit, videlicet an sit aurum, an argentum, an lapis prætiolosus; an lignum, an fœnum, an stipula. Omnis enim hæc differentia & proprius cuiusque gradus erit manifestus. Quando, inquis? Dies enim Domini, inquit Apostolus, declarabit. Quid autem esset dies Domini non satis expressit Aretius, tamen cum de igne loquitur, satis ostendit diem Domini intelligere se in hac vita. Vnde suspicor eum accipere diem Domini, quomodo Robertus Stephanus & alij Erasmmum Rotterodamum secuti, propter perspicuam operis inspectionem. Sed quæ rogo hic Areti doctrinæ cuiusque tanta manifestatio? Quæ inspectio tam perspicua, ut palam sit omnibus quo quæque præstantiæ gradu sit, aut vanitatis? Si enim quæ aurum est multis videtur lignum, & quæ lapis prætiolosus à plurimis adhuc abiicitur vel etiam conculcatur ut stipula; quomodo illud perspicuè apparet quæ digna sit auri nomine, quæque argenti, aut quæ mereatur ligno vel stipulæ comparari? Quomodo ergo hic vniuscuiusque doctrina est manifesta? Quæ Domini dies declarat qualis & quo quæque loco habenda sit, cum in tantis errorum tenebris hoc sæculo plerique versentur? Vnde etiam de omni ferè articulo doctrinæ Christianæ tot tantæque lites, si manifesta est cuiusque doctrina? An sibi forsitan solis dicent fieri id manifestum? Dies ergo Domini solis ipsis illucescet, solisque ipsis hanc præbebit
decla-

declarationem. At non dicit Apostolus, Vniuscuiusque opus manifestum erit quibusdam, & dies Domini quibusdam tantummodò declarabit; sed, manifestum, inquit, erit cuiusque opus, & dies Domini declarabit: Vt taceam quod diem non faciat paucorum inspectio ad lucernulas, sed clara lux & vbique refulgens, Quantam lucem doctrinam cuiusque manifestantem omnibus, verumque à falso per omnia discernentem, cum per absurdum sit huic vitæ tribuere, tum id scriptura non patitur, quæ

2. Petri 1. monet attendere prophetico sermoni tanquam lucernæ lucenti in caliginoso loco, donec illucescat dies & lucifer oriatur in cordibus nostris; quæ etiā vetat iudicare ante tempus, quoadvsque veniat Dominus qui & illuminabit abscondita tenebrarum & manifestabit consilia cordium, & tunc laus erit vnicuique à Deo. Vnde intelligimus non in factis modò, verum etiam in dictis & assertis esse nonnulla sic latentia in abstruso, vt in ijs neminem hic iudicare debeamus. Et quia dicit Apostolus diem Domini reuelādam in igne, istoque modo manifestaturam cuiusque opus, videndum quem hic sui commentarij folle nobis ignem excitet. Vbi planè Aretius sibi non constat, sed modò hoc, modò illud, etiam intra paucas lineas. Semel enim censuram & iudicium Dei; semel atque id quidem paulò post, iustum quendam pudorem significatum annotauit. Erasmus autem & Robertus Stephanus afflictionem vitæ huius

huius. Verum neque iudicium Dei in hac vita, cuiusque ministri doctrinam quamcūque manifestat, quia de multis etiam Catholicorum assertionibus quæ fidei nō sunt, incertum quid iudicet : neque pudor, quia multi impudenter & sine omni rubore grauissimos sequuntur & spargunt errores : neq; denique ipsa persecutio & afflictio vitæ huius, quandoquidem assertores erroris vsque ad cruciatus acerbos, mortemque ipsam violentam pro suis sententijs decertent, mirabili sæpè fortitudinis specie, & ideo cum miserabili deceptione multorum. Præterea dicit Apostolus quod per ignem, cuiusque opus, hoc est (vt volunt) doctrina probabitur, sic vt quæ bona sit, nihil accipiat detrimenti, quæ falsa & mala exuratur, diuini iudicij censuram tāquam ignem ferre non sustinens. Sed hoc rursus in hac vita impleri, nimia profectò absurditate statuitur, vbi non minus pro veritate, magna commodorum temporalium detrimenta perpetienda sunt bonis ministris, quam pro errore pseudoprophetis. Aut quænam illa hic doctrinæ cuiuslibet vitiolæ exustio? quod detrimentum? an quod accusetur & improbetur à doctioribus, errorisque damnata repudietur? At catholicam veritatem ipsumque Dei verbum multi tanquam doctiores reprehendunt & accusant, suumque examen quod diuinum esse prædicant sustinere negant posse. Quæ autem multa alia sunt, quæ examinata cuiusmodi sint, certa & non dubia

dubia definitione iudicari in hanc aut illam partem ne à doctissimis quidem possint. Atqui B. Apostolus dicit ; Vniuscuiusque opus quale sit, ignis probabit, suaque illa probatione manifestum efficiet, non solum quid aurum, quid stipula, sed etiam quid aurum, quid argentum, quid fœnum, quid stipula. Iam verò is cuius doctrina, quoniam vana & aliena à vero, ferre non poterit examen hoc diuinum, quomodo saluus sit futurus quasi per ignem, id crudum satis & inexplicatum ac dubium, ab Aretio relinquitur. Etenim quid si laboret minister aliquis, crassa & inexcusabili ignorantia rerum ad religionem pertinētium, ex eaque & erret ipse, & temerarius doctor alios secum in errorem abducatur? nōne crimen hoc erit & mortale delictum, supplicioque, nisi ille resipiscat, puniendum æterno? Quonam ergo modo iste, non fœnum, non stipulam quæ leuior est, non ligna quæ exuri possunt; sed æs ferrumq; seductoriæ doctrinæ superstruens, saluus erit quasi per ignem, qui saluus non sit futurus? Nam & si teneat de Christo fidem, quem esse mediatorem Dei & hominum credit, tamen alia quædam ad Christum seu corpus eius pertinentia non credit, ideoque excidit ab ipso fundamento, cuius non sit de Christo fides integra. Sit, exempli gratia, Donatista, sit Nouatianus, sit Pelagianus, aut si id malit, Anabaptista vel Calvinista quispiam qui Christum agnoscit & prædicat. Is si habet in fundamento Chri-

stum

stum, saluus erit non obstante hæresi sua. Si autem is solus habet Christum in fundamento qui integram de Christo retinet fidem, sed errores interim in leuioribus & ijs quæ præter fidem ac pietatem sunt imprudens serit, patior id quidem vt hic saluus dicatur fore; sed cur per ignem pudoris iusti, qui bona fide tantaque quanta esse humana potuerit diligetia, tradiderit doctrinam minimè noxiam imò vtiliter etiam adhortantem? Ac si quis erit qui in hoc leuiorum erratorum genere quippiam venialis culpæ contraxerit (quod perpauci effugiunt, catholici alioqui doctores, & eruditi) nec hunc tamen spectasse videtur, qui & pudoris iusti & seductionis meminerit, quæ non nisi in grauioribus doctrinæ lapsibus commodè intelligatur. Denique vt sit cuiuspiam planè præstans & aurea singularisque doctrina, sed eius vita non sit inculcata, multumque hæreat in moribus vanitatis & flamma dignæ materiæ, hiccine propter solam doctrinam sine detrimento saluus erit? Soliusne rationem habet doctrinæ censura diuina? Interpretaris deindè esse hunc ignem pudoris iusti; sed quam multi sunt qui de falso dogmate nunquam erubescunt in hac vita? Non enim pudet sic docuisse, non rubore suffusi conticescunt, cum se putent certissimam tenere veritatem. Atqui generatim pronunciat Apostolus quod quisquis ædificauerit ligna, fœnum, stipulam, passurus in igne sit exustionem operis sui, sed tamen per ignem ipsum, sal-

saluus futurus. Addis etiam, quo teipsum tecum pugnare demonstras, ignem cuius Apostolus meminit debere intelligi communem bonis & malis. Nunquid ergo vis ut boni etiam ministri, iustum patiantur de sua doctrina pudorem per quem salui euadant? At commune, inquis, ignem intelligo censuram diuini iudicii: Quid intelligas Areti non video, quid dicas & scribas lego. Ignem fingis iusti pudoris, qui prauè doctentium sit proprius, cum tamē (si tibi constare volebas) eundem, hic, quem prius, ignem oportuerit intelligi; ut esset ignis communis bonis & malis, bonis quidem ad laudem, malis ad purgationem. Sed video quis hunc tibi ignem in tuo commentario accenderit: Erasmus Rotterodamus sic est interpretatus hunc locum in suis Annotationibus: atque hic ipse Ambrosiano commentario sese niti significat. Quasi verò futuri sæculi quendam ignem commentator ille nō se intellexisse delectaret, cum interpretatur illa verba, Dies enim Domini declarabit, quia in igne reuelabitur; hoc est, inquit, mala doctrina in igne omnibus apparebit; nunc enim quosdam fallit. Quid est quod ait: Nunc enim quosdam fallit? nisi quia velit intelligi nō esse in hac vita cuiusque doctrinam manifestam, sed in futuro sæculo per ignem manifestandam? An forte per ignem in futuro sæculo, sed pudoris ignem & confusionis? Sit hoc ita sanè (magnus enim cuique in sua pœna pudor est, cum ea præsertim fuerit manifesta) id saltem

confe-

consequor, si illum sequeris commentarium, ut fateri debeas aliquos fore saluos qui in futuro sæculo pœna pudoris afficiantur, priusquam recipiantur in beatum illud regnum. Quod quam tuo aduersetur instituto, protinus opinor aduertis. Sic & is commentarius qui est sub nomine D. Hieronymi inter eius opera, cum verius existimetur esse Pelagij, quamuis superædificare interpretetur doctores ipsos super fundamento Christo, tamen neque doctrinam intelligit superædificari sed homines bonos aut malos, & in his tãquam discipulis manifestandam esse cuiusque doctrinam; sed in die iudicij, non in hac vita, ignemque (sicut ille commentarius Ambrosianus) nõ in sæculo hoc intelligit, sed in futuro. Diuus etiam Chrysost. quãquam sicuti ipse annotasti, coactiore uti videatur expositione in verbo [saluus erit] tamen & manifestationem & ignem, per eumque probationem, ad futurum sæculum referenda esse non dubitat. Ædificationes verò rectissimè ei visæ sunt esse operationes, illumque cõmentarium Pelagij, ut ædificâtes sint magistri, opera verò discipuli & auditores, ut improbabilem iure refellit. Quo pacto enim, inquit, opus peribit, architectus autem saluus erit? Quid cæteros commemorem Græcos & Latinos, qui de eo quod post mortem est iudicio, Pauli locum magno consensu interpretati sunt? Nimirum animaduertebant id totum quod B. Apostolus dicit de manifestatione operis cuiusque, &

K

pro-

probatione, & diei illius declaratione absurdè in hac vita intelligi. Et quicquid ipse tandem Erasmus annotauerit, qui ad hanc interpretandi licentiam suis annotationibus magnam fenestram patefecit, tamè ingenuè post omnia confitetur, Græcum articulum vocabulo diei præpositum, efficere propemodum ut de cerro die accipi debeat: Quasi dicas, Nam ille dies Domini declarabit. Quis autem ille est tam singularis dies, nisi supremi iudicij? Vita enim hæc propè tota quid nisi afflictio, & persecutio & tentatio est? Multi ergo, imò omnes ferè dies superædificata aliquorum ministrorum opera patefaciunt, quantum quidem manifestari in hac vita possunt. At vnum aliquem singularem scriptura diem significat, quo non vnus, aut plurium, sed vniuscuiusque manifestandum sit opus. Ut igitur de superædificantibus qui sint, & quid illud quod superædificent, ut de proprietate ignis tecum Areti non valdè contendam, fatendum tamen est in illo iudicio non in hac vita vniuscuiusque probandum & manifestandum opus quale sit, in eaque probatione quosdam propter ea quæ superædificauerint, detrimentum seu damnum passuros: sed tamen saluos futuros.

Quid sentiendum sit de Augustini dubitatione circa memoratum scripturæ locum. CAP. XVI.

Vnum

VNum hoc loco Augustinum obijciēdum nobis putauit Aretius, tanquam varia loci interpretatione fluctuantem, & incertum quo maximè modo accipi oporteret. Cuius tamen dubitatio etiam si de eo foret, vtrum ad futurum sæculum referendum sit quod dicitur de vniuscuiusque operis probatione & manifestatione, tamen nihil præiudicaret plurimorum & grauissimorum authorum tantæ in eo ipso intellectu consensio. Habet enim hoc in scripturis interpretandis regula Ecclesiæ, vt cōmunem magisq; receptum, & probatum pluribus scripturæ sensum recipiat, in his præsertim locis quæ aliquam fidei continent quæstionem: Eo enim fit vt nec Chrysostomū hic sequatur in eo quod ignem interpretetur æternum, per quem salui futuri dicātur, qui superstruunt ligna, fœnum, stipulam, quia non sint igne quamuis perpetuo dissoluendi. Sed in eo propriè sita non est Augustini dubitatio, qui in id incūbit vt explanet; Primū quinam censendi sint habere Christum in fundamento; Deinde quid sit ignis vocabulo accipiendum; Tertio quo modo per hunc ignem quisque probatus saluus tandem euadat: Propterea quod essent id temporis, qui ipsum gehennæ ignem intelligerent, per quem dicerent saluos futuros etiam illos qui crimina secum hinc detulissent. Tametsi enim faterentur ignem illum esse perpetuum, ambustionem tamen eius negabant omnibus perpetuam fore. Quonam autem modo sensisset Augustinus

vnūquemque superædificantium super fundamento Christo, ex tribulationum igne hac in vita probandum esse, vnde vel ipsi esset manifestum quid superstruxisset quantumque bona pereuntia dilexisset, cum non nesciret esse plurimos qui vsque ad extremum ipsum mortis ictum nihil aduersi subirent, vnde id possent de seipsis habere exploratum? Talem igitur probationem, manifestationemque superstructi operis, intelligit. partim hic, partim in futuro fieri; sed quod hic ita fieret in quibusdam aliquo dolore tanquam igne ipsos vrente examissione bonorum quæ dilexerant, id pro certo habuit. In futuro verò sæculo vtrum tale quid esset, id non putauit definiendum, sed siue hoc modo, siue alio quopiam id fieret, vt igne superædificantium opera probarentur, non dubitauit tamē quod Apostolus dicit, Vniuscuiusque opus ignem esse probaturum, & diem Domini declaraturum quale esset, id plenè in futuro sæculo esse complendum. Ideoque in Psalmos scribens, & eundem Apostoli locum attingens, sine cūctatione declarat, ignem futuri sæculi purgatorium Apostoli verbis significatum esse. Quia dicitur, inquit, saluus erit, contemnitur ille ignis: grauius id tamē erit quam quicquid in hac vita quisque pati possit. Et iterum, Domine (inquit) in hac vita purges me, & talem me reddas, cui emendatorio igne non sit opus, propter illos qui salui erunt, sic tamen quasi per ignem. Et rursum hom. 16. libri 50. homi-

*In Psal. 37
Domine ne
in furore.*

homiliarum; Qui, inquit, temporalibus pœnis digna gesserunt, de quibus Apostolus dicit: Si cuius opus arserit, detrimentum patietur; ipse autem saluus erit, sic tamen quasi per ignem, per fluuium igneum de quo propheticus sermo commemorat; Et fluuius igneus currebat ante *Daniel. 7.* eum, & per fluuium igneum, & vada feruentibus globis horrenda transibunt. Quanta fuerit peccati materia, tanta & pertranseundi mora. Quantum exegerit culpa, tantum sibi ex homine vindicabit quædam flammæ rationalis disciplina; & quântum stulta iniquitas suggesserit, tantum sapiēs pœna desæuiet. Et quia sermo diuinus quodam loco æneæ ollę animam peccatricem comparat, dicens: Pone illam super prunas vacuum, donec concalescat æ eius, & omne stannum eius defluat; illic sermones otiosi, & cogitationes iniquæ vel sordidæ; illic multitudo leuium peccatorum, quæ puritatem nobilis naturæ infecerant, exudabunt: illic stannum vel plumbum diuersorum subrepentium delictorum, quæ diuinam imaginem obscurauerant, consummentur: quæ omnia hic ab anima separari per eleemosynas & lachrymas, compendiosa transactione potuissent. Ex his vides, si tamen verum videre liber, vt non dubitarit Augustinus in futuro sæculo intelligendum quod dicitur, Saluus erit sic tamen quasi per ignem. Non enim eam rem sic inculcasset populari sermone, idq; ex autoritate Apostolicæ prædicationis, si pro incerta habuisset.

K iij

Voluit

Voluit igitur indubiè tribulationis, & eius quidem grauissimæ, quendam ignem in futuro intelligi, per quem tum demum cuiusque, sicut Apostoli verba continent, probaretur & manifestaretur opus, cum ipsi cuius esset opus, tum alijs quoque hominibus. Sed vtrum illa tribulatio tunc vreret dolore quodam amissorum huius vitæ cōmodorum, qui dolor index esset inhærentis sæculi amoris, à quo deberent ipsa tribulatione repurgari (id quod in hac vita cōtingere multis non dubitabat) Hoc igitur num similiter in altero sæculo eueniret, id (sicut dictum est) pro incerto habuit Augustinus. Sint ergo, si placet, ij qui superstruunt ministri verbi; sit ignis, aut tribulatio aut iudicium Dei; sit dies Domini dies iræ & ultionis; denique & hic per tribulationes, amissionesque bonorum vitæ huius probentur quidam, & quid vel docuerint vel amauerint, & ipsis & alijs quibusdā fiat manifestum, nunquam tamen quisquam perficiet vt possit in hac vita intelligi quod Apostolus dicit, Vniuscuiusque videlicet superstruentium opus ignis probabit, & vniuscuiusque opus manifestum erit, & dies Domini declarabit, quia in igne reuelabitur. Ex quo efficitur vtcunque se res habeat in hac vita, in sæculo futuro quosdam igne probari, & eorum opera manifestari qualia sint: & alios quidem statim mercedē accipere, alios verò quia ligna, fœnum & stipulam superaddiderint, detrimentum & damnum pati, sed consequi tamen salu-

salutem tanquam per ignem . Ex quo rursus manifestè colligitur metuendum esse futuri post hanc vitam extremi iudicii quendam ignem; perfectis quidem imperfectisq; communem, sed per quem perfecti transcant illæsi, imperfecti accepto detrimento purgantur . Ac si tale quid futurum est in extremo iudicio, circa hominem totum , constantem iam animo & corpore, in quo adhuc purgandum , consumendumque aliquid reperietur , indicio id est profectò post mortem ad similem modum cum ipsis animabus agi, quæ eadem ædificij sui imperfectione laborent , donec plenè absumptis ijs quæ vitiosè cohærebant, liberæ prorsus purgatæque ad Dei conspectum , ex suis pœnis emigrent .

Non benè colligi ignem cuius meminit
Apostolus non esse Purgatorium, quia
significetur bonis & malis esse com-
munis. CAP. XVII.

Falleris igitur Areti, si colligis ignem quendam purgatorium intelligi non posse , quia dicat Augustinus, igne illum, cuius Apostolus meminit, bonis malisque debere esse communem, aut saltem (quod magis abs te dici conueniebat) communem superædificantibus aurum, argentum , & superædificantibus ligna, fœnum & stipulam , qui non mali, sed boni omnes & iusti sanctique sunt propter funda-
K iiij men-

mentum Christum, id est, fidem quæ per dilectionem operatur: sed alij alijs perfectiores præstantioresque iustitia. Falleris, inquam, sic colligens: Ignis ille perfectis imperfectisque communis est, ergo purgatorius esse non potest. Vnus enim atque idem ignis, per quem illi omnes transaturi sunt, quos adhuc impuros inueniet purgabit; quos verò reperiet antè purgatos, hos inoffensos, & sine omni detrimento, damnoque transmittet. Neque enim ignis propterea non est purgatorius, quia non omnes est purgaturus. Quomodo nec propitiatorium apud Iudæos propterea non erat, quia non omnes propitiabat: aut rei cuiuspiam vires calfactoriæ esse negandæ sunt, quia non quidlibet excalfaciunt. At hoc, Areti, vt alicuius momenti esse putares, quis tibi fuerit author propè me diuinare posse existimo. Suggesterat hoc Erasmus antea eiusmodi verbis; Si quis vrgeat per ignem intelligendum pœnas gehennæ aut purgatorium, quomodo qui superstruxerunt aurum, argentum & lapides prætiosos æquè examinari dici possunt atque alij? hoc ille mouet, perindè atque si omnes ita essent rudes rerum, vt nescirèt etiam aurum præstantissimum igne examinari & probari, vt de eius cõstet puritate. Ex quo etiã illa vox est; Igne me examinasti, & non est inuēta in me iniquitas: & apud Lactantium legitur lib. 7. cap. 21. Iustos quoque cum iudicabit Deus examinandos igni, ac tum quorum peccata vel pōdere vel numero præualuerint,

rint, perstringendos igni atq; amburédos; quos autem plena iustitia & maturitas virtutis incoxerit, ignem illum non sensuros: habere enim aliquid in se Dei, quod vim flammæ repellat atque reijciat. Et Diuus Ambr. serm. 20. in Psal. 118. Petrum quoque & Ioannem, in quibus si quid vitij fuit, charitas diuina decoxerat, examinādos nihilominus igne, per flammāsq; transituos asseuerat. Ergo & Lactantius & Ambrosius, examinandos scribunt igne illo cōmuni, iustos, & eos quidem iustos quibus nō reperias iustiores. Neq; enim idem est examinari seu probari, & purgari: nam & docti pariter examinantur & indocti; illi vt eorum manifestetur eruditio, isti vt ab ignoratione & errore purgentur. Leuiter etiam illud & inconsideratē admonetur Ambrosium annotasse, propterea dici [quasi per ignem] vt similitudinē, nō rem intelligeremus: vndē colligitur de igne purgatorio non posse Apostoli locum explicari. Non enim id habet ille Ambrosij commentarius, sed id potius, quamuis obscurē significat, ideo non dictum; Per ignem saluus erit, sed, quasi per ignem: ne intelligeretur eum in igne fore saluum; id est, illæsum & incombustum futurum suo merito, sed salutem consecuturum quidem, at non sine pœna ignis. Non dixit, inquit, saluus erit per ignem, vt merito suo ab igni non combustus saluus fiat examinatus per ignem: sed cū dicit; Sic tamen quasi per ignem, ostendit saluum illum quidem

K v

futu-

futurū, sed pœnas ignis passurum, vt per ignem purgatus fiat saluus, & non sicut perfidi ætérno igne in perpetuum torqueatur. Nec verum est quod præsupponitur, vocolam [quasi] semper significare similitudinem solam, cum ipsam aliquando exprimat veritatem: velut cum de quopiam dicitur; Gubernat quasi tyrannus, id est, more tyrannorum, & ita vt se tyrannū verè exhibeat; Extorsit pecuniā quasi raptor; Sæuije quasi iratus, aliaque permulta, quæ similem in modum dicuntur. Quale & illud est in epistola ad Galat. cap. 3. Non dicit, Et seminibus, quasi in multis, sed quasi in vno, Et semini tuo qui est Christus. Si ergo non verus ignis, quia dicitur Quasi per ignem, nec verè vnum ergo semen Christus, sed simile quiddam. Neque similitudinem opinor ibi significat, vbi scriptum est ad Corinthios: Non sumus idonei cogitare aliquid ex nobis quasi ex nobis. Neque veritas exclusa est vbi dicitur eodem capite; Non potui vobis loqui quasi spiritualibus, sed quasi carnalibus: aut in Euangelio Ioannis capite primo; Vidimus gloriam eius, gloriam quasi vnigeniti à patre. Sunt alia innumera quæ de politiori etiam literatura proferri possunt, vnde constet illud [quasi] sæpenumero ipsam exprimere veritatem: Non me, inquit ille, pater amas quasi filium; aut certè aliud quid proprium significare. Sed nec quia metaphora est in auro, argento, lapide pretioso; ligno, fœno, stipula, consequens videri debet, vt in igne quoque non

*Quasi in-
terdum rei
modū aut
qualitatē
declarat.*

non proprietas seruata sit, sed tropus agnoscendus (quamuis id Calvinus & Aretius videri velint.) Possit enim & alius similiter colligere, nec in mercedis aut detrimenti vocabulo proprietatem seruata esse, nec mercedis aut salutis veritatem, sed similitudinem duntaxat agnoscendam. Aut quia dicitur in Euangelio, *Ioann. 15.* is qui in Christo fructum non fert, per metaphoram palmes, & per metaphoram amputari & arescere & colligi, cōcludere possit in ignem etiam non verum, sed metaphoricum mittendum esse, & metaphoricè non verè arsurum. Imò verò quia verum & fulgentissimum quendam ignem, idoneum prorsus per quem dies Domini magnus cunctis patefieret, beatus Apostolus intelligi voluerat, idcirco & alia illa per eiusmodi metaphoram exprimenda putauit: quia si dixisset simplicius, vitam & mores vniuscuiusque per ignem probandos; & quosdam quidem illo puniendos igne atque purgandos; alios sine læsione & afflictione transiuros, eandem quidem retineret sententia veritatem, sed minus multò gratiæ habitura fuisset oratio. Saluum igitur fore pronunciat Apostolus superædificantem ligna, fœnum & stipulam, sed sic tamen atque ea lege, vt illi sit accipiendum ab igne detrimentum, pœnaque ignis temporaria perferenda, atque hoc in extremo iudicio fiet. Quæ autem vel hic satisfactione, vel post hanc vitam ante illud tamen extremum iudicium, repurgata & expiata fuerint,

rint, non illic per ignem absumi necesse erit, sed quid factum sit, tunc etiam dies ille probatorio quodam igne manifestabit. Iudicij certe supremi diem familiare est Apostolo hunc in modum designare: vt priore ad Corinthios capite primo, Conseruabit vos in diem Domini sine crimine: Et cap. 5. Vt spiritus saluus sit in die Domini: Sic & ad Philip. Vsq̃ue in diem Iesu: Et in posteriore ad Timot. capite 2. Quam mihi reddet iustus iudex in illa die: Et ad Hebræos 5. Quanto magis videritis appropinquātem diem. Quomodo & apud Lucam Pauli imitatore scriptum est; Remissius erit Sodomis in illa die. Quanquam & eodem conferat quod dicitur, Mercedem accipiet; est enim futuri sæculi propria bonorum operum retributio: Quia verò mercedi opponit detrimentum, intelligendum est proculdubio hoc quoque accipi in supremi iudicij die. Nec dicit Apostolus quod ignis diem ipsum efficiet, id est, vt quidam volunt, claram inspectionem: sed dies, inquit, Domini reuelabitur in igne, hoc est, per ignem supra modum admirabilem quod dies Domini sit quo iudicare statuerit, patefiet; eoque ipso igne vt diuinæ iustitiæ instrumento iudicium ipsum palam in omnes exercebitur, alijs quidem purgandis, alijs de sua puritate illustrandis, alijs damnandis atque perdendis. Hoc enim & antiquissimis Ecclesiæ cæremonijs, quæ in baptismo seu exorcismis adhibentur consentaneum est, & per-
celebri

celebri illi voci, quæ passim in Ecclesia Christi resonat; [Qui venturus est iudicare viuos & mortuos, & sæculum per ignem.] Quod ipsum & B. Petrus Apostolus in epistola secunda satis insinuat, cùm ait: Veniet dies Domini sicut fur, 2. Petri 3. in quo cæli magno impetu transient, elementa verò calore soluentur, terra autè & quæ in ipsa sunt opera exurentur. Vnde colligit, quia sunt hæc dissoluenda & purganda, magnam operam dandam esse Christianis, vt immaculati inueniantur in eo die, ne videlicet per ignem illum iudicati & afflicti detrimentum accipiant, aut eodẽm si expertes iustitiæ sint, ad interitum inuoluantur sempiternum. Neque verò id ipsum beatus Paulus in secunda ad Theff. capite 2. tacuit, cùm ait venturum Christum in flamma ignis, quo vindicta de impijs sumatur. Sed & à Malachia Propheta, eiusmodi quiddam expressum est, de igne quo purgentur filij Leui: Ecce enim inquit, capite 3: venit, & quis poterit cogitare diem aduentus eius, & quis stabit ad videndum eum? Ipse enim quasi ignis conflans, & quasi herba fullonum, & sedebit conflans & emundans argentum, & purgabit filios Leui, & colabit eos quasi aurum & quasi argentum, & erunt Domino offerentes sacrificia in iustitia. Ex quibus verbis videtur (inquit Augustinus) euidentius apparere, in illo iudicio, quasdam quorundam purgatorias pœnas futuras. Quamobrem id omninò persuasum Lib. 20. de ciuita. Dei cap. 25. haberi debet beatum Apostolum, siue cum ait:

Et

Et vniuscuiusque opus quale sit ignis probabit, siue cum mox adiungit; Ipse autem saluus erit, quasi per ignem, de eodem prorsus igne loquutum, qui purgatorius his quidem qui purgatione adhuc indigebunt, omnibus autem probatorius futurus est. Per eum enim ignem sunt omnes iudicandi ab eo qui venturus est iudicare viuos & mortuos, & sæculum per ignem. Quod tamen quidam scriptor catholicus ne sit odiosum veretur: si videlicet asseramus sanctos homines nullo iam vitiorum inquinamento pollutos, per eum ipsum ignem qui impios est perditurus, esse transituros, quamuis citra omnem vel minimę læsionis noxam: vt sit ignis ille purgatissimis quibusque hominibus, quod tribus pueris caminus ille fuit Babylonicę fornacis: hoc (inquam) ne pias offendat aures, metuit: ideoque ab Alcuini commentario, qui hūc ei sensum exprimere visus est, non nihil sibi recedendum esse putauit. At quid hic, vir bone, reformidas? Sanctisne indignum censes si clarissimo hoc discrimine puritas eorum singularis ab aliorū impuritate discernatur? si in igne communi alijs detrimētum accipientibus, ipsi Deo pleni vim omnē elementi vrentis euincāt? Sed dicito quid præponas: Nempe vt ignis de quo dicitur, [Vniuscuiusq; opus quale sit ignis probabit] sit ignis ille spiritualis diuini interni-que iudicij; materialis autem cum post additur, [Saluus erit quasi per ignē.] Quæro quis ergo ignis ille de quo dicitur; Dies enim Domini in igne

vide supra
cap. 10.

igne reuelabitur, nisi materialis ille atque conspicuus? Nam & ipsa Dei circa quemque censura per seipsam inuisibilis, suis effectis in hoc igne manifestabitur. Hic igitur ignis est, de quo vno eodemque contextu subiungit; Et vniuscuiusque opus quale sit ignis probabit. Hunc & Latini patres in Florentina Synodo significatū esse, non dubia interpretatione acceperunt. Qui enim (aiunt) confessi, sacratissimum Christi corpus, absque tamen pœnæ præuia satisfactione sumunt continuoque moriuntur, hi dubio procul in supradicto igne quod purgatorium appellari solet, purgantur. De quo quidem igne Paulus ad Corinthios scribit; Vniuscuiusque opus quale sit ignis probabit. & paulò infra; Ipse autem saluabitur sic tamen quasi per ignem. Et ad hunc quidē modum illi. Atq; vt Diuum Augustinum præteream, cuius clara sententia est Enchiridij 68. talem ignem intelligi debere, per quem ambo transeant superædificantes, ^a Ambrosius ipse qui Diuū ^b Basilium & ^c Hilarium in eo sequutus est, cum interpretantur illud, [Ipse vos baptizabit in spiritu sancto & igni] intelligit ignem futuri iudicii per quē exuretur iniquitas, quiq; paleis futurus est inextinguibilis, perque hūc ipsum ignem optimos quosque transituros docet. Nam & si aliquis (inquit) vt Petrus sit, vt Ioannes, baptizatur hoc igni. Paulò quoque antè ex eodem Ambrosio & Lactantio protulimus quod eodem pertineret, pluresque proferre possemus, si esset necesse. Hæc autem

a Ser. 3. in
psal. 118.
b Ca. 1. 12.
de Spiritu
sancto, &
in ca. 4. &
9. 1. aia.
c In cap. 3.
Matthæi.

ante obiter insinuanda putauimus, ne dum in breuissimo illo verborum Pauli contextu, citra ullam grauem satis causam ignem alium atque alium commentamur, hæreticorum fortè partes per imprudentiam adiuuemus.

De loco Apocalyp. Beati mortui qui in Domino moriuntur. CAP. XVIII.

Apocalypsis, inquit, 14. *Beati mortui qui in Domino moriuntur nunc; & iam dicit spiritus ut requiescant à laboribus suis, opera autem illorum sequuntur eos. Locus hic totus de felicitate piorum loquitur qui in Domino moriuntur. Sed quid hinc ad purgationem faciet? Excipiunt, quia opera illorum sequuntur illos; hoc est, quæ alij pro illis faciunt, quasi hoc sit sequi opera illorum. Bonos sua sequuntur opera, dum obtinent quod sperarunt, & assequuntur pro quo tot ærumnas periculare, quales sunt pij martyres qui sanguinem pro Christo effudere. Hos sequuntur sua opera, hoc est, non frustra laborarunt, non in vanum cucurrerunt.*

Rursum hic, Areti, nodum pro tuo arbitrio facis quem resoluas. Quis enim est nostrum qui istiusmodi argumento vel somniarit statui purgatorium posse? Prorsus ut dicis, locus ille totus de piorum felicitate loquitur, nisi quod ita latè pateat, ut illos etiam spiritus, quos purgatoria quædam receptracula detinèt, comprehendat. Nam & illos quamuis sunt in pœnis, beatos

beatōs magna ex parte tranquilla quædam securitas facit, sicut ante docuimus. Sed vt purgatorio locus ille neutiquam aduersatur, ita neque ipsum probat, neque quicquam expressum habet quod vllō modo faciat ad purgationem. Quid autem impudentius, quam vt interpretari nos singas, Opera illorum sequuntur illos, id est, quæ alij pro ipsis faciunt? Nam & si iuantur animæ illæ bonis viuientium operibus, tamen in eo ipso sequuntur illas propria ipsarum opera, quæ suis in corporibus peregerunt. Siquidem & sibi cum hic agerent compararunt ea merita quibus alienis auxilijs atque officijs dignæ redderentur. Id quod ille significat Euangelij locus, vbi dominica admonitio est ad bonum diuitiarum vsum & misericordiam, Facite vobis amicos de mammona iniquitatis, vt cum defeceritis, recipiant vos in æterna tabernacula. *Luce 16.* Quid enim est facere sibi amicos de mammona iniquitatis, nisi largo & liberali pioque facultatum vſu, conciliare sibi salutis adiutores, qui suis precibus atque officijs nostræ vitæ quasi defectus suppleant? Quid recipi ab illis in æterna tabernacula, nisi ad ingressum beati illius regni tanquam opitulatrice porrecta manu adiuuari? Cùm ergo adiuuantur ac recipiuntur amicorum auxilijs, in eo ipso sequuntur illos opera ipsorum, quibus de mammona iniquitatis amicos sibi conciliauerunt. Sequuntur proinde illos opera ipsorum propria, non solum ad regni consecutionem, verumetiā

L ad ob-

Lib. 21. de
ciuit. Dei,
cap. 7.

ad obtinendam illam in iudicio misericordiam, qua remota si iudicarentur, peccatis quibusdā impediētibz, admitti non possent ad iustitiæ suæ premium accipiendum. Quam rem mirari se dicit Augustinus solēre, etiā ab Ethnico Poēta disertis adēo verbis expressam. Nam cum Elysios (ait) campos Poēta ille describeret vbi putant habitare animas beatorum: non solum ibi posuit eos, qui proprijs meritis ad illas sedes peruenire potuerunt, sed adiecit atque ait;

Quiq; sui memores alios fecere merendo:

id est, Qui promeruerunt alios, eosque sui memores promerendo fecerunt. Prorsus tanquam eis diceret, quod frequentatur ore Christiano, cum se cuique sanctorum humilis quisque commendat & dicit: Memor esto mei, atque vt id esse possit, promerendo efficit. Hactenus Augustinus. Ac verē tu quidem dicis, *Bonos sua sequi opera, dum obtinent quod sperarunt, &c.* sed diligenter caues ne vim & fructum exprimas meritorum, propter quem tamen dictum est opera sequi. Quomodo enim sequuntur opera, si non propter ipsa remunratio fiat? si nihil eorum intuitu, & quia accepta ipsa grataq; sint reponatur? quomodo sequuntur si nāuo peccati omnia sint deformata, odioque digna magis quam mercede? Quanquam igitur beatum regnum assequantur martyres, quia tamen ille fructus operum non est, neque laborum merces, secundum vestrum nouum Euan-

Euangelium, profectò frustra laborarunt & in vanum cucurrerunt. Frustra enim fit cuius effectus est nullus: nam si cui ægro porrecta medicina sit, quam constet ad sanitatem recuperandam fuisse inutilem; quamuis ille alia quadam ratione & causa cōcurrente, sanitatem recuperet; medicinam tamen illam inutilem, frustra que porrectam omnes iudicabunt. Quid autem est quod inculcatis magis, quàm inutiles esse nos, etiam post sanctificationem? & opera etiam illa in quibus creauit nos Deus vt in illis ambulemus, ad vitæ beatæ comparationem nihil conducere? Sed quoniam hoc leuiter attigisse isto in loco sufficit, ad ea quæ subiungis transeundum est. 2. Timo. 2.
Ephes. 2.

Quid de loco scripturæ ad Philip. cap. 2.

In nomine Iesu omne genu flectetur, &c. sentiendum sit, in causâ confirmandi Purgatorij. CAP. XIX.

Philippensum 2. inquit, *In nomine Iesu omne genu se flectat; celestium, terrestrium, ac infernorum. Quasi hic ternarius flectentium genera non possit subsistere, nisi detur Purgatorium. Flectunt genera celestes spiritus & sancti in vita aterna: Idem faciunt pij in terra adorantes Christum: Idem faciunt Sathan & damnati spiritus cum impiis omnibus in nouissimo iudicio; non quidem adorantes Christum, sed agnoscetes iudicem. Credunt enim & contremiscunt; hoc est, non*

L ij columnæ

colunt Christum, quem tunc cognoscitur fateri filium Dei, & iudicem suum.

Et hic locus Areti magis ad quandam pertinet probationis copiam, qua nonnullis forsitan uti libuit, quoniam sic accipi posse putarunt, quàm concludendi vim habet ex eo quod aliter intelligi non debeat. Scio enim esse Catholicos interpretes, qui eum sensum quem sequeris, suis commentationibus expresse-
rint. Quid autem Catholicos interpretes dico? cum Apostolum cōstet capite 14. epistolæ ad Romanos, ad extremū referre iudicium, in quo omnes boni & mali ante iudicem curuandi sunt; illi amore, isti metu? Omnes, inquit, stabimus ante tribunal Christi. Scriptum enim est, Viuo ego dicit Dominus, quoniam mihi flectetur omne genu, & omnis lingua confitebitur Deo.

Reliqua, inquis, novi testamenti loca eadem facilitate explicari possunt, ut planè perspicuum sit nihil praesidij hinc redire ad defensores Purgatorij. Reliqua dicis loca; sed quæ sint, non designas. Neq; dubiū est quin ea quoque sint selecta pro arbitrio tuo, quibus fingimur astruere purgatorium. Nam quod scriptum est Apoc. 5. Audiui omnem creaturam quæ in cælo est, & super terram & sub terra dicentem sedenti in throno, & agno; Benedictio, & honor, & gloria, & potestas in sæcula sæculorum: Item, Quid faciunt qui baptizantur (seu affligūt se) pro mortuis, si omnino mortui non resurgūt? Sic enim & Christus dicit, Marci 10. Potestis baptismo quo

1. Cor. 15.

quo ego baptizor baptizari? Et Lucæ 12. Baptismo habeo baptizari, & quomodo coarctor donec perficiatur? Item: Est peccatum ad mortem, non pro eo dico vt roget quis: vbi significatum videtur orandum esse pro ijs, qui rectè præsumantur in peccatis non perseuerasse vsque ad mortem. Rursum illud in Actis de Christo, Quem suscitauit solutis doloribus inferni, iuxta quod impossibile erat teneri illum ab eo. 1. Ioan. 5.

Hæc igitur quæ à nonnullis non contemnendis authoribus pro Purgatorij assertionem proferruntur, vellem illa tua facilitate nobis explicata reliquisses. De postremo certè loco Diuus Augustinus hunc in modum scripsit lib. 12. de Genesi ad literam ca. 33. Christi quidem animam venisse vsque ad ea loca, in quibus peccatores cruciantur, vt eos solueret à tormētis, quos esse soluendos occulta nobis sua iustitia iudicabat, non immerito creditur. Quomodo enim aliter accipiendum sit, quod dictum est, Quem Deus suscitauit ex mortuis, solutis doloribus inferorum, quia non poterat teneri ab eis, non video; nisi vt quorundam dolores apud inferos eum soluisse accipiamus. Locum autem Apocalypsis 5. valde conatur Calvinus extorquere nobis è manibus: *Quales enim (inquit) hic creaturæ recenseri putant? Certo enim certius est & ratione carentes & inanimatas comprehendere.*

Quo non aliud affirmatur, quam singulas orbis partes à summo calorem vertice ad vsque terræ centrum, suo modo creatoris gloriam enarrare.

Marci vii.

Sed Agnum (ô Caluine) relinquis, cui quoniam modo omnia dicunt elemēta benedictionem & honorem, aut quomodo eius gloriam enarrant? Agni quippe gloria propria ex opere est redemptionis, cuius abditissimi in Dei sapientia consilij, ne vestigium quidem aut per tenue signum reperias in rebus inanimatis omnibus. Nam inuisibilia quidem Dei; vt bonitatem, sapientiam, potentiam, aliaque multa quæ sunt creatoris, vniuersæ res creatæ loquuntur: sed quid est in opere creationis quod prædicat lapsi hominū generis reparationem? quibus id signis atque vestigijs, è terra, è stellis, ex igne & aqua futurum fuisse colligas? Quod autem certo certius esse dicis, nomine omnis creaturæ etiam inanimata comprehendi, non id tam audacter diceres, si in mentem veniret Euangelij locus vbi scriptum est; *Ite prædicate Euangelium omni creaturæ.* vbi proculdubio Omnis creaturæ nomine, non elementa muta comprehensa sunt, sed homines soli quibus Euangelium prædicari volebat: Quod si dixeris, omnem creaturam debere illic intelligi, prout circumstantia postulat Euangelij prædicandi: scito hoc idem in Apocalypsi fieri oportere; vt sola intelligatur ratione prædita creatura, quoniā ea sola sit quæ beneficio reparationis agnito, illum qui mundi peccata sustulit agnum, prædicare & glorificare possit. Vnde non ait Ioannes, se audisse cælum & terram & mare, cum dicerent *Agno benedictionem; sed creaturam* quæ

quæ in cælo habitat, & eam quæ super terram degit, & eam quæ sub terra quæque in mari verlatur. Idcirco & antea dixerat in eodem capite; Et nemo poterat neque in cælo neque in terra neque subtus terram aperire librum, neque respicere illum. Neque enim hoc propter dæmones aut damnatos spiritus dictum est, à quibus absurdum fuerat tale quiddā expectare, sed propter spiritus iustorum. In quibus etsi tanta quorundam excellentia fuerit sanctitatis ac vitæ meritorum, vt de ijs aliqua concipi posset expectatio, nullus tamen ad libri resoluenda signacula, satis idoneus repertus est. Quocirca eiusmodi aliquos iustorum spiritus subtus terram fuisse hæc scriptura significat; qui tamen quoniam & ipsi liberatoris ope indigebant, non potuere humanę captiuitatis vincula soluere, quam peccata multa & manifesta tãquam scripta foris, & occulta vt si intus scripta essent, faciebant. Sed ad te Areti redeamus.

Faciátne pro Purgatorio locus Psalmi
66. Transiuimus per ignem & aquam,

CAPVT XX.

V *Ideamus, inquis, si quid ex Veteri testamento praesidij habeant. Primum vt ex nouo testamento accommodant, quæ speciem habent aliquã, sic veteris test. praesidio aperto destituri, applicant quæ utcumq, speciem aliquam habere videntur. Primo, Psalmo 66. Per ignem & aquam*

L. iiij

aquam

aquam transuimus. Loquitur Psalmus de afflictionibus populi Dei, ex quibus tandem eos liberavit & in terram sanctam duxit, qua afflictiones etiam de Ecclesia & omnibus pijs possunt intelligi. Sed qua est necessitas, ignem & aquam, hic de Purgatorio intelligere. Certè, res sunt pugnautes, ignis & aqua, ideoq; de eodem subiecto intelligi non possunt. Præterea, ignis est afflictionum in hac terra: nihil ergo ad Purgatorium.

*August. in
Psalm. 65.*

Accedis ad ea quæ proferuntur è veteri testamento, & ne sis tui dissimilis eadem vteris industria, eligendis ijs argumentis quæ facillimè tibi dissolvere potuisse videaris. Nihil enim esse in illis Psalmi verbis quæ proferes, quod satis magnam vim haberet, ad concludendum aliquid de Purgatorio Christianarum post mortem animarum, cum ex contextu ipso, tum ex luculentissimo D. Augustini commentario discere potuimus, quem sic explicatum reliquit: Ignis & aqua, inquit, utrūque periculosum est. In hac certè vita videtur aqua ignem extinguere, & ignis videtur aquam siccare. Ita & ipsæ tètationes sunt quibus abúdat hæc vita. Ignis vrit, aqua corrumpit; utrumque metuendum, & vstio tribulationis & aqua corruptionis. Quando sunt res angustæ, & aliquæ infelicitates sunt in hoc mundo, quasi ignis est. Quando sunt res prosperæ, & abundantia sæculi circumfluit, quasi aqua est. Vide ne te ignis exurat, ne aqua corrumpat. Firmus esto aduersus ignem, coqui te oportet, tanquam vas fictum mitteris in caminū ignis,

vtfir-

vt firmetur quod formatum est. Vas ergo quod in igne firmatum est, aquam non timet; si autem solidatum igne non fuerit, tanquam lutum aqua soluetur. Noli festinare ad aquam, per ignem transi ad aquam, vt transeas & aquam. Propterea & in sacramentis, & in catechizando & in exorcizando adhibetur prius ignis. Nam vnde plerunque immundi spiritus clamant, Ardeo, si ille ignis non est? Post ignem autem exorcismi venit ad baptismum, vt ab igne ad aquam, ab aqua in refrigerium. Quod autem in sacramentis aqua baptismi, hoc etiam in tentationibus huius sæculi angustia timoris. Accedit prima vice ignis, postea ablato timore metuendum est. ne felicitas mundana corrumpat. Cum autem te ignis crepare non suffecerit, & in aquam non meriseris, sed enataueris, per disciplinam transis ad requiem, & transiens per ignem & aquam educeris in refrigerium. Quarum enim rerum signa sunt in sacramentis, ipsæ res sunt in illa perfectione vitæ æternæ. Hæc Augustinus: in quibus nulla de Purgatorio significatio est. Sed tamē bella, tu quidem Areti, ratione probas de purgatorio non posse intelligi, quod pugnares sint res, ignis & aqua; ideoque de eodem subiecto intelligi non possint: quasi ignis & aqua de eo sint genere rerum quæ in subiectis inesse dicuntur. Nam substantiæ quidem contrariæ si eodem aliquo loco non possent contineri, quomodo, vt cætera taceam, mundus hic ele-

L v menta

menta continere posset inter se contraria? Sin ad qualitates respicitur inter se repugnantes, puto nō nascire Benedictum quemadmodum nostrorum corporum ex illarum pugna qualitatum, subindē valetudo turbetur. Si ergo in eodem corpore, eodem prorsus tempore, frigus pugnant & calor, magnumque hoc sēp numero in ista miseriarum valle purgatorium est, quanto facilius fuerit, ut quod in febribus conspicitur, eodem in corpore frigus æstusque succedant? Neque enim quia dictum est, Transivimus per ignem & aquam, simul vtrumque fieri significatum est. Ideoque si qua talis post hanc vitam, ex illorum vicissitudine tormentorum futura cogitetur afflictio, quoniam in hac vita sancti etiam homines per illam exercentur atque purgantur, nihil id erit alienum à scriptura djuina, quę dicit sanctos persecutiones hic pati in exemplum iusti iudicii Dei; hoc est, ut declaretur, & tanquam exemplo demonstraretur subijciaturque oculis illa diuini iudicii severitas, quę post hanc vitā (vbi propriè tempus iudicii est) acuitur in eos qui secum aliquid flagellis deferūt dignum. Quocirca si qui sunt, (in quibus esse video Antoninum) qui ad Purgatorium accommodauerint Psalmi verba, ut id non ineprè fecerūt, ita traducendi non sunt, tanquam qui firmo argumento sic elici posse putauerint, Catholicam de animarum purgatione doctrinam.

Quo-

2. Theff. 1.

Quónam modo intelligendus sit locus
Zachariæ 9. de lacu in quo non est
aqua

CAP. XXI.

Zacharia nono, inquis, mentio fit putei in quo non sit aqua, siue lacus sine aqua. Lacus iste quibusdam est infernus, ex quo sumus sanguine Christi redempti. Qui Purgatorio fauent de Limbopatrum intelligunt, in quo etiam fuerit diues ille cum Abrahamo colloquens Luca 16. Verba Zacharia sunt. Etiam tu in sanguine testamenti tui dimisisti vinctos tuos de lacu, in quo non est aqua. Iudai quidem sanguinem testamenti intelligunt, sanguinem circumcisionis. Alij fœdus in monte Sina initum & confirmatum sanguine animalium. Ita dimisit vinctos suos, id est, Iudeos ex Ægypto, qua lacus est in quo non erat aqua. Verum quia cum Christianis nobis res est sanguinem testamenti, ut opinor, non intelligent alium quam Christi sanguinem, quem effudit in salutem omnium credentium. Nam aperta prophetia de Christo, In hoc sanguine dimisit vinctos suos, hoc est, electos, de lacu in quo non erat aqua, hoc est, de potestate Sathana. Nam statum mortalium afflictum per similitudinem explicat. Qui in orientalibus regionibus fuere, testantur adhuc foveas haberi & cisternas aridas, quibus detinentur captivi. Dicit ergo nos calamitosos fuisse & miseros seruos diaboli, qui nos mancipia habuerit, non aliter ac si quis in lacu detineat captivos, & ex tyrannide nos liberavit suo sanguine filius Dei

Dei. Magna autem impietas est, hanc gloriam redemptionis à Christo ad Purgatorium transferre, ex quo non sanguine Christi, sed satisfactionibus hominum anima finguntur liberari.

Sic ille.

In huius loci explicatione vnum est Areti, de quo inter nos conuenit, sanguinem testamenti non alium hic intelligi debere, quam sanguinem mediatoris Dei & hominum; cuius fit verbis antecedētibus certa mētio, cūm dicitur; *Zachar. 9.* Ecce rex tuus veniet tibi iustus & saluator: ipse pauper & ascendens super asinam, & super pullum filium asinæ. Hic ipse suum sanguinem, in Euangelio, noui testamenti sanguinem appellat; Hic, inquit, sanguis noui testamenti, seu calix nouum testamentū in meo sanguine. Etenim per hunc sanguinem implentur & præstantur ea nobis, quæ nouo testamēto promissa sunt, quæ spectant ad liberationem captiuorum. Itaque citra controuersiam, sanguis ille pretiosus, is ipse est in quo emisit Deus victos suos de lacu, in quo non erat aqua. Quis autem hic sit lacus de eo propria loci huius quæstio est, possuntq; de eo (inquit Augustinus) diuersa sentiri, etiam secūdum rectam fidem. Eò fit vt non vrgentissimum esse fatear quod hinc conficitur argumentum. Et Augustino quidem visum est nihil eo significari melius, nisi humanæ miseriæ siccam profunditatem quodammodo & sterilem, vbi non sunt fluentia iustitiæ sed iniquitatis lutum. De quo lacu etiam in
Psal-

Psalmo dicatur; Et eduxisti me de lacu miserie, *Psalm. 39.*
 & de luto facis. Hunc Augustini sensum repe-
 ries lib. decimo octauo de ciuitate Dei, cap. 35.
 Tu quoque instituti tui memor lacum hunc
 vis in hac vita intelligi, nimirum Sathanæ po-
 testatem: *Quam statum, inquis, mortalem*
afflictum, per similitudinem explicat. Sed pri-
 mum si tibi demonstraui ipsum Satanam in
 lacum esse deiectum, quam alterius Satha-
 næ mihi potestatem intelliges, quæ significata
 sit nomine laci? Hoc enim illi dicitur apud
 Isaiam, Verûtamen ad infernum detraheris, in *cap. 14.*
 profundum laci. Si ergo & ipse Sathanas in
 lacu est, non est nomine laci eius accipienda
 potestas seu tyrannis. Deinde quid aptius aqua
 significat quam refrigerium? videlicet vt lacus
 in quo non sit aqua, is sit status in quo non queat
 refrigerium inueniri, non aliqua redemptio
 comparari. Atqui dum hic vitam agunt electi,
 quamuis sub potestate Sathanæ afflictissimi
 sint durissimaque pressi tyrannide, tamen ab
 ijs refrigerium inueniri & redemptio per Chri-
 stum potest. Hoc enim tempus gratiæ & mise-
 ricordia est; hoc tempus in quo licet operari,
 quoniam diei non noctis est; hic inueniri potest
 cibus, qui apud inferos nullus est; hic præstoe est
 aqua de qua dicitur; Omnes sitientes venite ad *Isaia 55.*
 aquas; hic assidue proponitur illud; Consurge, *Isaia 52.*
 consurge, excutere de puluere; dissolue vin-
 cula colli tui captiua filia Sion. Quæ non nunc
 prædicarentur in Ecclesia, si hic esset lacus, in
 quo

quo non esset aqua. Vincitos præterea qui educuntur è lacu, interpretaris electos; cùm è potestate Sathanæ liberentur etiam non electi cõplures; qui liberati semel & iustificati in eandem post captiuitatem sua recidunt voluntate: quales dicit scriptura prolapsos postquam sunt illuminati & participes facti gratiæ spiritus sancti; quales dicit Euāgelium ad tempus credere, & in tempore tētationis recedere, persecutioni videlicet quæ propter iustitiam fit succumbētes. Cùm igitur hæc tuæ interpretationis sentias incommoda, cur non potius, Areti, infernum intelligas nomine laci, in quo nō est aqua? Hoc enim & ille supra citatus Isaię locus exigit, Veruntamen in infernum detraheris, in profundum laci, hoc est, detraheris, inquit, in inferni ipsius profundissimas partes. Infernus enim, sicuti antea notauimus, generatim eum statum & locum designat, qui cælo opponitur, hoc est, qui sit infimus, vt ille supremus; qui sit tenebricosus, vt ille lucidus, & illustris; qui sit mœstus & horridus, vt ille iucundus & amœnus. In hoc & Patres ante Christum fuere, sicuti locis varijs scriptura significat, & modo sanctæ quædam animæ detinentur ad tempus, & impij perpetuum habituri sunt domicilium. Latissimè ergo patet infernus iuxta scripturarum consuetudinem, magnæque illic conditionum & statuum differentia est: sed hoc generaliter proprium habet, quod in eo non sit aquam seu refrigerium comparare, si-

Hebr. 6.

[Lucæ 8.

*Infernus in
scriptura
pro statu
vel loco
mortuorū
accipitur.*

re, sicut nec inuenire cibum. Idcirco quicunque inde aliquando educti sunt vel educentur, eius sibi meritum in hac vita compararant; quippe illic nullus est eiusmodi merito locus, nec ibi redemptio seu iustificatio quæ hic neglecta fuerit reperietur: id quod est nec cibum nec aquam apud inferos posse reperire. Igitur qui infernum intelligunt, non est consequens Areti, vt Limbum Patrum excludant, in quo fingis dici à quibusdam diuitem epulonē cum Abrahamo collocutum: Pars enim inferni limbus erat. Itaque ne quisquam hoc sic accipi posse neget, Diuum Hieronymū & Venerabilem Bedam in 22. Lucæ caput Haymo sequutus, sic locum illum enarrauit, vt & infernum intelligeret nomine laci, & tamen sanctos ex eo interpretaretur eductos, eam videlicet inferni partem attendens quæ limbus patrum vſitatus appellatur. Tu, inquit, eduxisti vinctos tuos, id est, sanctos qui in vinculis tenebantur, de lacu in quo non est aqua, hoc est, liberaſti eos de inferno in quo nulla est misericordia. Denique in resurrectione Domini multi sanctorum qui in inferno vinculis originalis peccati tenebantur, surrexerunt cum eo, & venerūt in sanctam ciuitatem, & apparuerunt multis. Sic ille; qui in inferno dicit nullam esse misericordiā, non quod ibi nulla detur ex aliqua parte, sed quod illic nemo eam mereatur aut impetret. Quo modo etiam rectè accipitur dictum, quod in inferno nulla sit redemptio, quemadmodum prius

prius ostendimus ; iuxta illam Augustini sententiam, Hic omne meritum comparatur, quo possit quisque post hanc vitam, aut grauari, aut leuari. Quanquam autem ex inferno reprobatorum, ubi est ignis ille pręparatus diabolo & angelis eius, intelligi queant electi esse liberati & educti, non quod in eum iam incidissent, sed quod nisi subuenisset gratia redemptoris, in eum casuri essent certissimè (quomodo Diuus August. declarat, accipi posse quod scriptum est Psalm. 85. Eruisti animam meam ex inferno inferiore, quia nimirum liberarit eum qui hoc dicit ab eiusmodi peccatis, per quę deduci posset ad tormenta inferni inferioris) tamen propriè illi educti sunt, qui iam inferni claustris conclusi tenebantur, illi videlicet Patres quos habebat Limbus, aut quos adhuc carcer quidam purgatorius detinebat; vsque adeo, vt secūdam proprietatem educationis è lacu in quo non erat aqua, referendus sit locus ad eos quibus post mortem, hoc liberationis beneficium, misericordia Dei pręstitum est, quam sibi hic benè sancteq; viuendo conciliauerant. At exurgit hic Aretius, & magnam esse cōqueritur impietatem, hanc gloriam redemptionis à Christo ad Purgatorium transferre. Sempérne Areti ad idem saxum impinges? atqui turpe scis illud esse: Bis ad eundem; tametsi hunc de via tua, quantum potuimus, remouimus, & nunc id ipsum haud grauatim faciemus. Redemptionem illam, Areti, de qua ipse loqueris, qua

qua ex mancipijs diaboli seruisque miserrimis efficimur liberi, non transferimus ad purgatorium, sed hac duntaxat in vita fieri dicimus: deinde illam ipsam quam ibi ponimus liberationem, sanguini Christi minimè detrahimus, sed hanc illi ferimus acceptam, ceu fonti ipsi & pretio, vnde omnis nostra purgatio & libertas emanat. Tametsi enim in ijs satisfactionibus, quæ hic pro illis suscipiuntur, aliquam inueniunt à temporaria pœna redemptionem, tamen vnde illarum satisfactionum vis, nisi à Christi sanguine deriuata est? Potuisses hoc idem & prophetæ dicere, quod magna impietate redemptionis gloriam transtulisset ad eleemosynas, quia dixerit benè Regi cōsulens, *Pec-* *Daniel. 4.*
cata tua eleemosynis redime. Nec modò pro illis animabus orare, aut eleemosynas hic largiri non licebit, sed ne pro nobis quidem, aut alijs mortalem adhuc agentibus vitam, ne videlicet gloriam redèptionis & orationis Christi, ad hominum orationes transferamus. Quid ergo hic est præter illum inanem fucum, quem de malè intellecta Christi gratia & redemptione componitis, quoq; hominibus miseris, & dilectionem veritatis non habentibus imponitis?

Quid sibi velit apud Tobiam locus, Panem tuum & vinum tuum super sepulturam iusti constitue. CAP. XXII.

Tertium est, inquit, ex Tobia quarto; *Panem tuum & vinum tuum super sepul-*
M
ram

ram iusti constitue, ut scilicet pauperes inde refecti, pro defuncti salute Deum deprecantur. Poterat simpliciter argumentum rejici, quia sumitur ex libro extra canonem. Notum autem est oportere ex canonica scriptura peti testimonia ad probandum aut confutandum aliquod dogma religionis. Tamen hoc omisso videbimus quam malè eo testimonio utantur. Primum, Tobias pater, vir sanctus instruit filiū in pietate quam à patribus hauserat, & nusquam reperiuntur patres veteris test. meminisse purgatorij in funeribus aut luctu pro mortuis: non potuit igitur de eo filium suum hic instituere. Deinde verba hoc non sonāt. Textus ita habet: Non sit durum in oculis tuis panem tuum & vinum tuum effundere supra sepulchra iustorum. Quod igitur de suo addūt, ut pauperes inde refecti pro defuncti salute Deum deprecantur, vanum est & alienū à scopo Tobie. Sed hoc vult filium exemplum paternū imitari, non solum in facienda elemosyna, sed in sepeliendis clam occisis bonis viris, quos pater solebat noctu sepelire ipse, vel curare per alios ut suis sumptibus sepelirentur, ut constat ex cap. 1. Effundere igitur panem & vinum super sepulturam iustorū, est sumptus facere ne insepulti maneāt, quod tū fiebat in Ninive. Præterea impij Iudæi hoc ipsum sic interpretabantur ut est cap. 2. Deridebant enim ipsum etiā cognati sui. Iste non sollicitus est pro anima, quia adhuc sepelit mortuos. Contra hanc ignominiam munit filium, ne patiatur sese deterreri vel metu Assyriorum vel subsannatione malorum Iudæorū, sed pergat patris imitari

exem—

exemplum. Ideoq̃, rectè, inquit, Ne tibi durum videatur. Habebat enim periculum & ruborem ex subsannatione suorum aduersa. Et quod ait: Supersepulturam iustorum, notum est Hebrais gnal, significare in gratiam aliquid fieri: ac si dicat, Nō sit tibi durum in gratiā sepultura iustorum sumptus facere, dare panem & vinum vt sepeliantur. Alij iustos intelligūt pauperes viuentes: vt sit sensus; da panem & vinū vt à sepulchro praesernes eos ne fame pereant, nam si non pauperis videberis occidisse. Sed ne sic quicquā hinc purgatorio habebunt patrocinij. Et hanc posteriorem sententiam expressè Græci innuunt: verterunt enim sic, ἐχχεον τοὺς ἀρτοὺς σου ἐπὶ τὸν τόπον τῶν δικαίων, καὶ μὴ δὸς τῆς ἀμαρτωλοῖς. significantes dandam eleemosynam bonis non impijs. Hæc ille.

Cum paulò ante Zachariæ tractares locum, repudiato Iudæorum sensu de sanguine testamenti, cum Christianis tibi negocium esse dicebas, ideoq̃ue Christianum ab ijs sensum & commentarium concedi tibi iure postulabas: Sed cum te quoque vicissim Christianis debeas præbere Christianum, cur vt oppugnes Christianos, in Hebræo sic canone Iudaizas? An nescis in diuinarum scripturarum libris recensendis, non eundem omnino esse Iudæorum & Christianorū canonem? Iste tuus canon in quē Tobix librum recipi negas, Hebræus est non Christianus. Eum enim, inquit Hieron. librū Hebræi de catalogo diuinarum scripturarum secantes, his quæ Hagiographa memorāt, man-

M ij cipa-

ciparunt. Quàm autem hunc canonem, siue quàm Hebræorum ea in parte iudicium non magnificerit Hieronymus, ostēdit consequentibus verbis. Arguunt inquit, nos Hebræorum studia, & imputant nobis contra suum canonem latinis auribus ista transferre: Sed melius esse iudicans Phariseorum displicere iudicio, & Episcoporum iudicijs deseruire, institi ut potui. En D. Hieronymus Phariseorum non veteris Ecclesiæ Iudæorum hoc æstimauit esse iudicium, quo de catalogo diuinarum scripturarum hic Tobia liber eraditur, Christiano certè catalogo compræhendi, ex vetustissimorum testimonijs, Conciliorumque censuris certissimè constat. Neque hunc librum D. Ambrosius dubitauit appellare propheticum, cap. 1. lib. de Tobia, quia reuera illustrem habet de Christo & eius Ecclesia prophetiam, cap. 13. & 14. Nec verò pluribus elaborandum hic est, ut libri huius authoritatem astruamus, quod alij pro sui instituti ratione, diligenter copioseque fecerunt. Sed etsi inter Hagiographa iuxta Hebræorum & hæreticorum canonem esset numerandus, tamen magni deberet esse ponderis, hunc peruetustum librum cum alijs & diuinarum literarum & authorum Ecclesiasticorum testimonijs, habere tam pulchrè consonantem. Verum eo (quoniam omittēdum putas) omisso, videamus num hoc testimonio malè, quemadmodum ais, Catholici quidam vsi sint. *Primum*, inquis, *Tobias pater, &c.* Ego verò sic potius

potius colligendum arbitror : Tobias pater , vir sanctus instruit filium in pietate quam à patribus hauserat; atqui instruit eum de eleemosyna facienda pro mortuis, ergo hoc officij soliti erant patres mortuis exhibere fidelibus, istoque modo suam de Purgatorio fidem protestari, etiamsi nusquam expressam de Purgatorio mentionem fecisse legerentur. Multum enim erras si putas esse consequens, nihil fecisse patres aut dixisse, nisi quod mandatū literis diuinis aut canonicis demonstrare possimus. Quid si primus hic author, qui magnam habet vetustatem, literis id expressisset, nonne vel hoc nobis deberet esse testimonio, quid ab anterioribus ipse didicisset? Deinde quid opus in luctu vel oratione meminisse Purgatorij, cum satis sit orare pro defuncto & lugere? Atqui memoria tenebat Tobias exemplum Iacob patriarchæ, qui pro *Genes. 37.* filio Ioseph quem crediderat mortuum, luctum non mediocrem suscepit. Non autem opinor quod gentilium more, tantum prophetam luxisse filij mortem dicturus sis, aut tanquam perditum, & æternis mancipatum supplicijs deplorasse, quomodo Dauid luxit mortem Absalon; sed planè luxit ut prodesset mortuo, cui nisi prodesse lugendo posset, nulla esset alia ratio cur tantus vir lugeret eius mortem, de quo par erat spem bonam concipere quod præmissus esset non amissus: cuius spei cōtemplatione ab amicis fidelibus, ipse Tobias cum gaudio narratur esse sepultus. Textum autem ipsum si specta-

M iij ueris,

ueris, nihil reperies facilè quod probabilius sonet quam hoc quod volumus. Nimirum vt dictum sit ; Si gratificari iusto sepulto velis , & ei prodesse iam mortuo, effunde panem tuum & vinum largiendo pauperibus , atque id in gratiam eius facito ; hæc enim pro defuncto atque in eius gratiam facta eleemosyna , magnum ei potest afferre leuamen. Nam quod gentiles faciunt , vt collatis cibis epulentur inter se super mortui sepulchro , sperantes hac re defunctis afferre solatium , id vanissimum est . De quo subiungitur : Et noli ex eo manducare & bibere cum peccatoribus ; Noli ergo , inquit , ad istum modum conuiuando nequiter & infideliter profundere tuam substantiam , sed eam misericorditer communicando indigentibus , stude sepulto apud Dominum conciliare misericordiam. Præterquam autem quod & Tertullianus initio libri de Resurrectione carnis, & Diuus Augustinus sermone quodam de Cathedra Petri , gentilis huius consuetudinis facit mentionem , (quam ille quidem sic reprehendit vt dicat, valde esse ridiculum, vt defunctos , quos atrocissimè exurant , eosdem postmodum gulosissimè nutriant) extant eius quibusdam locis hodieque vestigia , vbi cibi & potus super mortui sepulchro ponuntur , & inde sublati dantur pauperibus . Super sepulchro enim ponunt , vt in gratiam mortui largiri se hanc declarent eleemosynam : ita fit ab ijs nunc Christianè atque fideliter quod à gentili-

tilibus stultè & inutiliter seruabatur . Nam & alijs quoque in rebus nonnullæ consuetudines de ipsa gentilitate retentæ , à Christianis in meliores vsus conuersæ sunt . Quod autem velle dicis Tobiam patrem vt cum hac in parte filius imitetur , rogo te quæ conuiuia , aut quos sumptus fecisse legitur Tobias pater , vt pro eo mortui per alios sepelirentur ? Imò vero conuiuio ob aliam instituto causam , id relinquebat , ac per seipsum corpora mortuorum translata domum sepulturæ mandabat : quod autem sumptus fecerit vt sepelirentur per alios cadauera mortuorum , nusquam Areti legis . Certè capite primo libri huius quod designas nulla eius rei significatio est . Fallebat te cum hæc scriberes tua memoria , aut fallere meditabâris eos quos putabas non esse lecturos . Si enim solitus erat sumptum facere aut conuiuio excipere amicos qui ei hac in parte essent adiutores , cur hic de conuiuio solus excessit ? cur non alijs negocium dedit ? Nec pecuniam dicit constituendam super sepultura iusti , quæ tanquam merces detur pro sepeliendi labore , sed panem & vinum , quo magis eleemosyna quam laboris merces significata est : his enim rebus , refici ac recreari pauperes solêt . Taceo quod reliqua patris præcepta generalia sunt , atque omni conuenientia tempori , & necessaria : hoc autè de sepeliendis fratribus , qui ab impijs occidebantur , sæuientis persecutionis tempus specialiter concerne-

M iiii

bat,

bat; eratque perfectionis singularis, non necessaria in proximum charitatis. Ideoque verisimile non est, quod vnum hoc interferere voluerit, tam speciale præceptum cum essent cætera communia. Postremò si, vt dicis, Hebræa vox declarat fieri aliquid in gratiam alterius (in quo tibi lubens assentior) num sepultura est cuius in gratiam faciendum aliquid sit, an verò sepultus ipse, cui sit hoc modo gratificandum? Idcirco enim scriptum est apud sapientem Ecclesiasticum; *Capite 7.* Mortuo ne prohibeas gratiam. Quod si hoc modo volebat filium non sepulturæ, quod absurdum est, sed sepulto gratificari iusto, nulla hic est sumptus significatio, qui fieri pro mortuo sepeliendo iuberetur. Alterum quod adiungis nihilo commodiorem habet sensum. Primum quod hoc sit simplex eleemosynæ præceptum. Datur enim eleemosyna egentibus, vt eorum leuetur necessitas, & à sepulchro, quoad potest, præseruentur. Hoc autem iam superioribus verbis satis inculcauerat. Deinde non fit in gratiam sepulturæ, quod fit vt arceatur sepultura. Atqui verbum Hebræum hoc significare dicis, vt in gratiam fiat sepulturæ. Postremò non iustis modò, verum etiā iniustis & peccatoribus extremè præsertim egentibus, quibusque nisi succurratur sepulchrum metuendum sit, facienda est eleemosyna, falsumque perspicuè quod dicis significatam à Græcis eleemosynam dandam bonis non impijs, cum constet etiam inimicos dili-

diligendos, & benefaciendum ijs qui nos persequuntur, & is qui non pauerit, quod ipse allegas, videatur occidisse. Nisi fortè putes pro tua Christiana charitate, quod impium quidem sic liceat occidere, non iustum. Igitur si eleemosynam pijs dandam, non impijs Græca significant, & hoc intelligi non possit de pijs & impijs viuentibus mortalem hanc vitam, planè cōficitur iuxta Græcæ lectionis, vt tu vis, significationem, iusto defuncto esse dandam eleemosynam, siue in gratiam eius, non autem impij in sua impietate sublatis. Vidēsne Areti, cum retia fugis ea quibus salubriter caperēs, quomodo in ipsa venabula veritatis incurras? Qui etiam si alium quempiam loci sensum non improbabilem protulisses; non esset tamen consequens malè nos illo vsos testimonio, cuius probabilem aliquā sententiam expressissemus: Quam Diuus quidem Ambrosius libro in Lucam septimo sic confirmat, vt etiā maius quiddam altiusque hic nobis commendatum insinuauerit; nempe Sacrificium id quod in Ecclesia Christiana sub panis viniq; specie pro defunctis fidelibus, quibus vita speratur æterna, non pro impijs seu infidelibus offertur, quorum est cum hinc decesserint desperata salus. Est & illa, inquit, prophetia, vt supra sepulturā maiorum quædam ponamus quæ lector agnoscit, infidelis intelligere non debet: non quo ci-bus imperetur aut potus, sed sacre oblationis veneranda communio reueletur. Non ergo in-

M v terdi-

terdictum est muneris, sed religionis mysteriū, communionem nobis cum gentilibus mortuis non futuram. Nam cum sacramenta viuorum sint, non videntur mortui qui habent vitam. Hæc Diuus Ambrosius capite 3. memorati in Lucam libri.

De loco secundi Machabæorum duodecimo. CAPVT XXIII.

Quarto, inquis, superest locus 2. Macha. 12. de Iuda Machabao, qui Hierosolymam misit duodecim milia drachmarum pro defunctorum memoria facienda. Respondemus his quod solent Iurisconsulti dicere: Rerum veritas non debet erroribus gestorum vitari. Et quia hic locus rem commendat quæ cum scriptura pugnat, merito irritus censeri debet. Porro, de resurrectione simpliciter loquitur, quæ res videtur occasionem dedisse missionis illius. Nam apud interfectos reperit argumēta idololatriæ. Quam rem agrè tulit, sed de salute illorum non desperauit. Tamen ut viuos ab illo scelere expiaret, & testaretur displicere illis defunctorum idololatriam, munus illud misisse videtur, quod author historia postea detorsit ad satisfactionem peccati illorum. Verum quia liber est extra canonem, & speciale habet factum cuius non extat exemplum in sacris literis, merito repudiatur.

Familiari nimium vteris petitione principij, quæ valde est apud Dialecticos in disputatione vitiosa. Nam utrū hæc res pugnet cum scriptura, idip-

id ipsum est quod modo queritur: neque tu pugnare hactenus ostendere potuisti; quin ut eas dissolueres scripturas quæ nostram assertionem efficacissimè confirmant, vano te hactenus & frustraneo labore torxisti. Quid igitur est quod tam confidenter loqueris [Quia hic locus rem commendat quæ cum scriptura pugnat, meritò irritus censi debet?] Imò prorsus Areti quia hic locus rem cōmendat quæ scripturæ diuinæ locis alijs, partim necessario, partim probabiliter constituitur, meritò, cum alijs præsertim cōiunctus, magnam vim ad persuadendū habere debet. Ac Iudæ quidem Machabæi factum interpretaris pro tuo arbitrio; sic tamen ut mox oblitus tui nostra magis confirmes, quam infirmes. Dicis resurrectionem mortuorum occasionem dedisse missionis illius. Cur ergo horum defunctorum sperata resurrectio (quoniam de illorum, ais, salute Iudas non desperauerat) occasio fuit mittendi huius muneris Hierosolymam, nisi quod id ageretur apud Dominū ministerio sacerdotum, ut interfecti speratæ resurrectionis efficerentur participes, remissis quæ adhuc impedire potuerant quibusdam illorum peccatis? Namque si munus illud transmissum, nihil ad resurrectionē interfectorum faciebat, non potuit certè eorum resurrectio mittēdi muneris esse occasio. Nihil autem faciebat ad interfectorum resurrectionem, si quod dicis verum est, voluisse illum viuos duntaxat ab idololatriæ scelere expiare, & testari defun-

defunctorum displicere idololatriam. Ideo quæ author historiæ, non quasi violenta interpretatione factum illud detorsit ad satisfactionem peccati illorum, sed tuis quoque verbis suffragantibus secutus est, quo eum aperto gressu ducebat mittendi muneris occasio, hoc est, sperata salus & beata resurrectio defunctorum. Itaque hanc ipsam occasionem sic expressit: Facta colatione duodecim milia dragmas argenti misit Iudas Hierosolymam offerri pro peccatis mortuorum sacrificium, benè & religiosè de resurrectione cogitans. Nisi enim eos qui ceciderant resurrecturos speraret, superfluum videretur & vanum orare pro mortuis: Et quia considerabat quod hi qui cum pietate dormitionem acceperant, optimam haberent repositam gratiam. Sancta ergo & salubris est cogitatio pro defunctis exorare ut à peccatis solvantur. Hactenus libri secundi Machabæorum scriptor. Sed ad asylum confugis commune hæreticorum, quibus cum liberaliquis displicet propter ea quæ vehementer eis aduersantur, id familiare est ut librum eijciant è canone, maluntque tanquam infideles filij, Iudæorum infidelium, in libris diuinis recensendis iudicium sequi, quam Christianorum maiorum suorum, à quorum pietate & religione desciverunt. Esse enim hunc librum in canone Ecclesiastico, Innocentius primus, Gelasius, Synodus Africana, aliaque Patrum concilia definirunt. Nam quod D. Hieronymus & Rufinus in Sym-

in Symboload dogmata Ecclesiæ statuenda valere negant huius auctoritatem libri, id accipiendum est, vt dicant, non valere eo modo quo valent ij libri qui sunt in canone Hebræorum, vt aduersus eos videlicet Christianæ fidei dogmata possint stabiliri. Sic enim D. Hieronymus seipsum explicat in fine libri secundi Apologiæ contra Ruffinum, Quod si Hebræos in hoc de libris canonicis iudicio sequi voluerimus, Christo nobis erit aduersandum, qui Daniele vt prophetam habuit, & Dauidis Psalmos vt propheticos, cum Hebræi & Daniele negent esse prophetam, & Psalmos esse Dauidis. Librum quoque Iob & Hester, non eodem quo cæteros habent loco. Sed Augustinum interim proferunt, cum ille libro 2. de doct. Christiana, capite 8. duos Machabæorum libros inter canonicos manifestè recenscat, atque idem ex secundo memoratum locum producat, ad orationem pro defunctis astruendam, libro de cura pro mortuis cap. primo. Proferunt tamen atque obijciunt, quod idem Augustinus lib. 2. contra epistolam Gaudentij capite 23. hoc præ se ferat, libros illos se pro canonicis non habere. At quibus verbis? an quia dicit, scripturam Machabæorum non habent Hebræi sicut Genesim? sed hoc iam ante diximus, hosce libros pro canonicis, Hebræorum iudicio non haberi. Quod verò adiungit receptos esse ab Ecclesia non inutiliter, sed si sobriè legantur vel audiantur, hoc tantum

tummodo significat ab ijs qui in eorum lectione versentur incautius, occasionem errandi sumi posse, ideoque sobriè & attentè legi oportere. Quod dictum est cōtra Gaudentium, qui Circūcellionum seipsos interficientium furorem defendebat exemplo Razię, qui in ijs libris seipsum interemisse narratur, & sic quidem ut ab imprudenti lectore factum eius videri possit esse laudatum. Ideoque & propter Sampsonis exemplum dici posset librum Iudicum sobriè legendum esse, ne quisquē ex eius lectione ædificetur ad interficiendum semetipsum. Quod rursus obijciunt à Domino dictum esse in Evangelio, oportere impleri quę sunt in lege, & Prophetis, & Psalmis de ipso: unde colligunt Machabæorum librum, quia neque ad legem, neque ad prophetas, neque ad psalmos pertineat, non esse canonicum, tale est ut librum quoque Hester exterminet, quoniā neque ad legem, neque ad prophetas, neque ad psalmos magis pertineat, quam Machabæorum liber. Verūtamen respondemus illis veteribus omnia propemodū in figura contigisse, gesta quę illi libri Hester & Iudith & Machabæorum complexi sunt, reuera fuisse prophetica, eaq; de causa & libros ipsos prophetice annumerandos esse; qui ut prophetici nō essent, id tamen satis esse deberet, quod historiam populi Dei suis caeremonijs ea quę ad Christum pertinebant præfigurantis, usque ad ipsum Christum perduxerint. Nam neque in Regum, aut Paralipomenon libris, quam-

quãuis prophetici sint, necesse est statuere omnia quæ narrantur esse prophetica: sed quemadmodũ in lira & cithara, aut alio quopiam instrumento musico præter cordas sonantes, etiam ligna sunt nihil sonantia quidem, sed necessaria tamen vt inde cordæ religantur atque intendantur, vel remittantur propter harmoniam; sic etiam in libris prophetis & qui ijs annumerantur, nõ necesse est omnia sonare aliquid futurorum mystica prophetiæ harmonia, sed sufficit vt tanquam ligna quædam sint in instrumento musico, quibus ipsa facta prophetica cohæreant, indeque dependeant quodammodo propter pleniorẽ historiæ structuram. Quod item aiunt authorem libri secundi Machabæorum veniã petere, quod minimè faceret si author esset canonicus, propterea faciliè dissoluitur, quia constat scriptorẽ illum nusquam petere veniã si quid falsi dixerit, sed si sermo eius minus fuerit accuratus: ideoque subiungit; alternis vti, delectabile esse; non quia delectabile aut vtile sit, si modò vera, modò falsa, quadam alternatione scribantur, sed quia affectato semper vti sermone minus oblectet, atque interdum expediat pedestri & quotidiana dictione rem explicare. Quocirca non magis fuerit consequens, propterea librum hunc non esse canonicũ, quam Pauli epistolās, in quibus illud habet locum quod ipse ait, *Et si imperitus* 2. Cor. II. sermone, non tamen scientia. Spiritus enim ille diuinus qui canonicos scriptores inspirauit, tam

tam per Amos rusticum locutus est, quam per aulicum Isaïam. Est etiã considerandum, vt sit liber aliquis canonicus, nō id requiri vt scriptor exploratū habuerit diuina se oracula fundere, sed satis est si quis Propheta vel Apostolus, librum lectum atque examinatum approbarit vt diuinum, pronunciaritque oracula sacra contineri. Nam & quod dixit Caiphaz expedire vt homo vnus pro populo moreretur, diuinum oraculum fuit, etiam si hoc ille nescierit. Itaque etsi dicere nō potuerit scriptor ille quod Ioannes Euangelista, Hic est discipulus ille qui scripsit hæc, & scimus quia verum est testimonium eius, non tamen ex eo rectè colligas librum quem scripsit non esse canonicū: quia satis sit si Apostolus hoc pronunciauerit, scire se quia verum sit testimonium eius. Nam neque Lucas, neque Marcus authoritatem habuisset canonicam, nisi Petrus aut alius quispiam Apostolus sua authoritate legendum Ecclesiæ tradidisset. Quod verò scriptor idem ait cap. 2. lib. 2. veritatē de singulis concedere sese authoribus; non significat illum de veritate eorū quæ scriberet dubitasse, sed particularē rerum singularum prosequutionem; & vt Græcè est, diligentem de singulis, hoc est, exactam & accuratam narrationem omnium rerum gestarum, apud ipsos historiographos requirendam, neque id fuisse sui instituti. Quod rursus alij dicunt, Iudæ quidem Machabæi factum, quo pro defunctis sacrificium offerri iusserit, commemorari quidem,

dem, sed non laudari, id quoque perspicuè falsum est; quoniā manifestam facti laudem habet quod dicitur, Iustè & religiosè de resurrectione cogitans: Et quod ita concluditur, Sancta ergo & salubris est cogitatio pro defunctis exorare, vt à peccatis soluantur. At non licuisse pro defunctis offerre sacrificium probant, quia scriptum est Deuteronomij 12. nihil faciendum nisi quod Dominus præceperit, neque quicquam adiiciendum esse ad expressam legem: Nullum autem contineri lege diuina præceptum de offerendo pro mortuis. Quibus respondendum est, reperiri non pauca sanctorum opera collaudata, quæ tamen nusquam eis præcepta fuerint; velut quod Dauid voluerit ædificare templum Domino; quod nec Rechabitz, nec Ioannes Baptista vinum biberint; quod Iudas Machabæus & Salomon nouum dedicationis festum instituerint, quorum nihil erat legis præcepto mandatum. Quod verò lex addere prohibet, eò pertinet (quemadmodum antecedentia significât) ne quid ex earum gentium quarum terras ingrediebantur possidendas, sacris sacrilegis & superstitionibus ac ceremonijs, in Dei cultum Iudæi transferrent; ne quid vt redundans ac superfluum detraherent; ne quid vt prætermissum apponerent. Siquidem ea phrasis allusionē habet ad artifices, qui opera sua imperfecta adhuc absoluentes, addunt aut detrahunt, ne qua sit eorum iusta reprehensio. Quoniam ergo instituta & opera

Dente. 12.
6 14.

N diuina

diuina reprehensione carēt, neque carpi aut vituperari possunt tanquam vitiosa, idcirco dictum est illud, neque addendum quicquam esse neque detrahendum. Vnde & Ecclesiastis cap. 3. de operibus quæ fecit Deus, scriptū est: Non possumus eis quicquā addere aut auferre, quæ fecit Deus vt timeatur: quod quid aliud significat, quam in opera Dei, quæ nostræ utilitatis gratia fecit, nullam cadere iustam reprehensionem? Namque ob noua accepta beneficia, noua etiam commemorationis & gratiarum actionis festa instituere, nihil id esse adijcere ad legem: Hester quoque & Mardochæus probè intellexerunt, qui solēni per annos singulos die celebrari voluerunt, & recoli beneficium, quo fuerat Iudæorum populus ab oppressione præseruatus. Itaque etsi de offerendo pro defunctis sacrificio, nullum omnino in lege præceptū haberetur, non propterea tamen videri deberet vituperādum Iudæ Machabæi factum, tanquam ad legem additum contra legem. Veruntamen offerre iubebat lex pro peccatis etiam absentium, vt in die expiationis pro totius populi delictis. Terque quolibet anno comparere debebat omne masculinum sacrificij causa, vbi & pro absentibus mulieribus, & dispersis Iudæis offerebatur. Cū igitur nō ignari essent veteres illi sancti, eos fideles qui hinc emigrassent, tamen si aliquibus peccatis essent obnoxij, non tamen à populo Dei segregatos esse, propterea quod scirent à lege non decerni separationem,

*Vide sequē
tis libelli
ca. 7. & 8.*

tionem, nisi ob grauissima quædã ; velut si quis Phasæ non fecisset, si quis circumcissus nõ esset, si quis sanguinem comedisset : hos enim atque eiusmodi, statuebat lex de populo suo perituros . Quæ pœna cum esset grauissima, perspiciebant eos non esse à populo suo separatos, qui grauibz illis delictis non fuissent inquinati . Ea de caussa non dubitarunt pro illis offerre sacrificium, qui sic excessissent è vita, vt pro Iudæis absentibus, quia re vera neque interierāt, sed adhuc viuebant, neque erant à societate populi Dei præcisi, sed ad tempus aberant per resurrectionem mortuorum coniungendi, reddendique mutuis aspectibus . Sed argumentari pergunt Lutherus & Brentius . An tale quicquam exercuerunt sancti? Volunt enim hoc Iudæ factum, nouum atque inusitatũ fuisse, quod iste speciale factum vocat, cuius in scripturis non extet exemplum . Idcirco ergo librum hũc à canone refecarunt : quod tantum abest vt propterea faciendum putemus, vt ob id etiam videatur esse canonicus, quia spiritum referat eundem ex quo libri cæteri conscripti sunt, videlicet hãc nobis pro defunctis fidelibus commendans misericordiam, quam alibi sæpius reliqua nobis scriptura commendat . Idcirco enim ieiunauit Dauid super mortuo Saũle & Ionatha . Cur enim sese in eorum gratiam afflixit ieiunio, nisi vt illis misericordiam Domini hac ratione conciliaret? Non enim existimandum est, quod nimio mœrore cibũ capere noluerit,

N ij sicut

sicut ij qui dolent immoderatus; velut Alexander cum Clitum occidisset. Non enim dicitur noluisse aut non potuisse cibū sumere, sed ieiunasse, quod pro illis non fecisset, nisi profuturum sperauisset. Solitum enim ieiunare Dauidem ut aliquid impetraret à Domino ex eo potest intelligi, quod ieiunaret pro filio parvulo cum esset ægrotus; eo vero mortuo ieiunare desierit. Nimirum quia dum vivebat sperauerat ieiunio productionem illi posse vitam impetrari, eo verò extincto cognovit diuinam de morte voluntatem, cui cognitæ acquiescendum esse perspexit. Sic ieiunauerunt viri Iabes Galaad, septem diebus; quod eos Venerabilis Beda interpretatur fecisse pro mortuis ut ad requiem peruenirent. Et hætenus quidem de Machabæorum libro.

2. Reg. 12.
1. Reg. ult.

Præter scripturas, etiam Veterum tractatorum conformi doctrina, Purgatorium animarum comprobari.

CAP. XXIII.

Diximus, inquit, de præcipuis locis quæ ex scriptura solent adducere ad confirmandū Purgatorium. Præter scripturas habent Patres, qui idem concedunt, imò ad credendum urgent: de quibus paucula præsertim de Augustino quæ hic lacerant, de quibus nolo in præsentia quicquam dicere, quam veritati consuetudinem non præiudicare.

Præter

Præter scripturarum diuinarum luculenta testimonia, quæ suarum commentationum nebulis frustra hæretici obscurare conantur, habemus profecto, Areti, Patres (vt dicis) qui idem concedant, imò ad credendum vrgeant; & sic vrgeant, vt qui id non sentiat, is bonæ mentis sensum mihi perdidisse videatur. Vrgent autem partim admirabili illo suo cōsensu Græcis Latinisque doctoribus, & ijs præcipuis ac celebrioribus omniumq; temporum in hoc vnum conuenientibus; partim in hæreseon catalogum reiijciendo assertionem aduersam, in quo se procul dubio Ecclesiæ iudicium, cuius est hæreses condemnare, secutos esse demonstrarunt.

Atque ipsum primo consensum oculis breuiter hoc loco subijciam, quoniam id prolixius antea nonnulli fecerunt. Ac primum erit Tertulliani testimonium scriptoris antiquissimi & grauissimi, planèque idonei testis quid iam tum in Ecclesia fieret, ac fieri etiam debere crederetur. Is in libro de Monogamia: Ipsam, inquit, interrogo fœminam, Dic mihi soror, in pace præmisisti virum tuum? Quid respondebit? an in discordia? Ergo hoc magis euincta est, cum qua habet apud Deum causam: Non discessit quæ tenetur: Sed in pace: ergo perseueret in ea cum illo necesse est, quem iam repudiare nō poterit, nec sic quidem nuptura si repudiare potuisset. Enimuero pro anima eius orat & refrigerium interimat. Postulat enim & in prima resurrectione consortiū, & offert annuis diebus

dormitionis eius. Nam hæc nisi fecerit, verè repudiauit, quātum in ipsa est. Hæc Tertullianus, quibus non solum declarat quid fieret, verumetiam quid fieri deberet à vidua relicta pro defuncto marito, nisi vellet virum penitus repudiassè videri, & ab animo quoque suo reiecissè. Orare ergo solent viduæ pro defunctis viris, nec orare solum, verumetiam offerre sacrificium annuis diebus dormitionis eorū. Et quid orando petere? Refrigerium; ne forte essent in pœnis, & aliquo tormentorum æstu. Quod vsque ad eò facere in virorum gratiam debere existimabantur, vt id nisi facerent, censerentur, quantum in ipsis esset, repudiassè post mortem viros suos. Quod autem dicit [interimat] obscurum & nouum est verbum, quale fortè, sempiternat: nisi legendum sit, quomodo suspicatus est Renatus; Enimvero pro anima eius orat, & refrigerium interim postulat, & in prima resurrectione consortium, & offert annuis diebus dormitionis eius. Scripsit in eandem sententiā Libro de exhortatione ad castitatem: Etiam repete, inquit, apud Deum pro cuius spiritu postules, pro quo oblationes annuas reddas; Et quæ sequuntur. Transeo ad D. Cyprianum, qui non solum offerre pro defuncto, verumetiam deprecari & orare pro eo, rem significat non suo tempore institutam, sed à maioribus acceptam, & ab antecessoribus fieri solitam. Sic enim scribit libro 1. epistolarum epistola 9. Quod Episcopi antecessores nostri
religio-

religiosè considerantes, & salubriter prouident-
tes, censuerunt ne quis frater excedens ad tute-
lam vel curam Clericum nominaret, ac si quis
hoc fecisset, nõ offerretur pro eo, nec sacrificiũ
pro dormitione eius celebraretur. Neque enim
ad altare Dei meretur nominari in sacerdotum
prece, qui ab altari sacerdotes & ministros suos
Leuitas auocare voluit. Et ideò Victor cum
contra formam nuper in Concilio à sacerdoti-
bus datam, Geminium Faustinum presbyte-
rum ausus sic actorem constituere, non est quod
pro dormitione eius apud vos fiat oblatio, aut
deprecatio aliqua nomine eius in Ecclesia fre-
quentetur, vt sacerdotum decretum religiosè
& necessariè factum seruetur à nobis. In his
Cypriani verbis audis oblationem pro defun-
cto, audis & deprecationem quam pro defun-
ctis frequentari mos erat. Quid autem peti
mortuo potuit? an resurrectio beata? sed si
damnatus ille est, frustra petitur; sin clara Dei
visione mox beatus (quemadmodum id habet
de iustorũ omnium spiritibus hæresis ista per-
suasum) quid opus in hoc adiuuari precibus
alienis, quod & perexiguum sit comparatione
eius quod possidet, & ei iam non queat suo tem-
pore denegari? Neque enim illa esset Ecclesiæ
pro defunctis oratio, vt partē beatę resurrectio-
nis obtineant, vitamque æternam habere me-
reantur in cælis; nisi quos illa spiritus adhuc eo
subsidio alieno sciret indigere, quo fieret vt so-
lutaris peccatorum vinculis, speratæ resurrectio-

nis parte nequaquam fraudarentur, Non indigent autem ij qui peccatis plenè iam abolitis Deo clarè viso beati sunt, quibusq; iam adheret nihil quod beatam resurrectionè corporum impediatur aut moretur. His duobus vide vt cæteri consentiant, precesq; comprobent & alia officia iuuandis mortuis destinata. Dionysius Areopagita in eo libro què de Ecclesiastica hierarchia scripsit; Accedens, inquit, antistes precem sacram super mortuum peragit, postq; precem & ipse eum presul salutat, & suo deinceps ordine qui astant omnes. Precatur oratio illa diuinam clemètiā, vt cuncta dimittat per infirmitatem humanam admissa peccata defuncto, eumq; in luce statuatur & regione viuorū, in sinibus Abraham Isaac & Iacob, vnde aufugit dolor & tristitia & gemitus. Neque multo post idem author hoc ipsum ita astruit, vt etiam argumentum quod istis familiare est dissoluatur. Non ignoro, inquit, & ego diuinis eloquijs accedēs, singulis reddendam pro meritis sortem, quia referet vnusquisque ea quæ per corpus gessit, siue bonum siue malum. Quod autem & iustorum preces etiam in vita ista, & nedum post mortem ijs solis prosint qui digni sunt, nos docet sacrosancta traditio. Quid enim Saūli profuit Samuelis oratio? quid Hebræorum iuuit plebem prophetica interpellatio? Hæc ille, multa q; alia eodem pertinentia, declarans videlicet etiam in eo quemque referre prout in corpore gessit, quod prodesse sibi ad refrigerium

rium sentiat sanctorum preces, quibus se vitæ similitudine reddidit dignum. Nihil etiam Chrysostomo illustrius aliquot locis, qui rem hanc ab Apostolis quoque ipsis traditam esse scribit, *serm. 3. in epistolam ad Philip. in hortatione morali*: Non frustra, inquit, ab Apostolis sancitum est, ut in celebratione venerandorum mysteriorum, memoria fiat eorū qui hinc discesserunt. Nouerunt illis multum hinc emolumentum fieri, multū vtilitatis. Stante siquidem vniuerso populo & manus in cælos extēdente, cœtu item sacerdotali, verendōq; posito sacrificio, quomodo Deum non placaremus pro istis orantes? Et infra. Quemadmodum itaque pro viuis istis oramus (inquit) qui tamē nihilo differunt à mortuis, ita & pro mortuis orari potest. Pro liberis suis sacrificabat Iob, & à peccatis suis illos liberabat, &c. Vbi notādum quod ait, pro his qui in fide ex hac vita discesserunt, precibus & sacrificio placari posse Dominū, quod ad eam satisfactionem pertinet, qua viui pro defunctis satisfaciūt, ut ab ijs pœnis quæ adhuc ex ira Dei iusta luendæ supersunt liberentur. Vbi enim placatio est, illic ira & pœna cogitur necesse est. Quare non fuit Chrysostomo dubium, quin is esset post mortem, quarūdam animarum status, in quo pœnis quibusdam penitus expurgandæ tenerentur. Proptereaq; *homil. 32. in Matthæum*, Presbyteros vocari significat à Christianis, cum quempiam è charorum numero amiserint, ut orent pro eo, quo

N v re-

requiem adipiscatur, & propitium iudicem inueniat. Itemque in Acta Apostolorum hom. 21. & in priorem ad Corinthios, hom. 41. per orationes & eleemosynas, quæ pro defunctis fiant, solatium eis aliquod præstari declarat, cum tamen nullus sit locus solatio, vbi nulla premit afflictio. Cui doctrinæ & D. Hieronymus clara & non dubia testificatione subscripsit, cum libro primo contra Pelagianos peccatorē ab impio accuratè distingueret. Si Origenes (inquit) omnes rationales creaturas dicit non esse perendas, & diabolo tribuit pœnitentiam, quid ad nos qui & diabolum, & satellites eius, omnesq; impios & præuaricatores dicimus perire perpetuò, & Christianos si in peccato præuenti fuerint, saluandos esse post pœnas? Eiusdem Hieronymi à nōnullis profertur & illud, quod scribit in fine libri decimioctauī Cōmentariorum in Isaiam: Sicut diaboli & omnium negatorum & impiorum, qui dixerunt in corde suo, Non est Deus, credimus æterna tormenta; sic peccatorum & tamen Christianorum, quorum opera in igne probanda sunt atq; purgāda, moderatam arbitramur & mixtam clementiæ sententiā iudicis. Vbi proculdubio peccatores intelligēdi sunt, qui quamuis totam propè vitam in sceleribus exegerint, tamen vel prius paulò quā ex hac vita migrent, veris gemitibus Christianos se esse meminerunt. Quomodo & apud Theophylactum, cū scribit in caput Lucę 12. non semper qui moriuntur peccatores mitti in gehenn-

*Circa finē
ex persona
Auct. i.*

gehennā, sed esse in potestate Dei, vt etiam dimitti possint. Quod (inquit) dico propter oblationes & distributiones quæ fiunt pro defunctis, quæ non parum conducunt etiam his qui in grauibus peccatis mortui sunt. Non ergo cessemus (ait) per eleemosynas & intercessionem propitium reddere eum, qui potestatem habet mittendi, non semper autem potestate vtentem, sed & valentem remittere quiddam. Laudat etiā Hieronymus Pammachium, quod eleemosynis ossa riget vxoris. Nimirum hoc ipsum ita significans, quod alij refrigerium dicunt, aut certè reliquarum sordium absterzionem. Paulinus item ille Nolanus epistola 1. ad Amandum Episcopum sic loquitur: Vt Deus (inquit) qui facit omnia in cælo & in terra, refrigeret animam eius stillicidijs misericordiarum suarum per orationes vestras. Concilium quoque Carthaginense quartum, canone 79. decreuit eorum pœnitentium, qui attentè leges pœnitentiæ executi essent, si casu in itinere, vel in mari obiissent, memoriam orationibus & oblationibus Domino cōmendari oportere. Quid iam Diuus Ambrosius? Nōne is Theodosio in oratione funebri requiem precatus est? Hoc proculdubio significans, potuisse ei non continuè requiem præberi, quæ tamē desperari non deberet, sed magna esset petenda fiducia: Epistola quoque quæ est scripta ad Faustinum, pro obitu germanæ acerbo dolore merentem, Non tam deplorandam (inquit) quam prosequendam

dam orationibus reor, nec iustificandam lacrymis tuis, sed magis oblationibus animam eius Domino commendandam arbitror. Horum grauissimam auctoritatem alij secuti; ut Boëtius lib.4. de Consolatione; ubi cum ipso interrogasset philosophiam, nullane post defunctum morte corpus supplicia relinqueret? sic eam respondentem introducit. Et magna quidem (inquit) quorum alia pœnali acerbitate, alia vero purgatoria clementia exerceri puto. Sic ille designati libri prosa quarta. Cuius viri etsi non maxima in Ecclesiæ dogmatibus stabiliendis auctoritas est, tamen & nota virtus ac probitas, & illis eius verbis expressa sententia est, quam cum Catholicis cæteris communem sibi esse monstrarit. Est & Damasceni sermo de defunctis, in quo res eadem, & ex Machabæorum libro secundo, & Apostolicæ traditionis auctoritate, & Dionysij Areopagitæ, Gregorij Nazianzeni, Chrysostomi, Gregorij Nisseni testimonijs validissimè confirmatur.

Catholicæ Ecclesiæ Patres non consensu tantum suo, verumetiam interdum ex professo vrgere ad credendum.

C A P. XXV.

Sed Aretius non hunc tantummodo consensum agnoscit Ecclesiæ patrum, verum etiam addit vrgere eos interdum ad credendū. Quod vsque adeò verum est, quamuis ipsa inimici

mici confessione expressum, vt pro hæreticis habuerint eos qui id negarent. Aërium enim & Sanctus Epiphanius, & Diuus Augustinus hæreticorum in numerum propterea retulerunt, quod oblationes negaret pro defunctis esse faciendas. Sic enim Diuus Epiphanius loquentem inducit. Qua ratione post mortem nominatis, inquit, nomina mortuorum? Orat enim viuēs aut dispensationem facit, quid profuerit mortuo? Si verò omnino preces eorum qui hic sunt profunt illis qui istic sunt, igitur nemo sit pius, neque boni quicquam faciat; sed acquirat amicos quosdam per quem vult modum, aut per pecunias persuadens, aut amicis id in obitu demandans, & orent pro ipso, vt ne quid patiatur, neque immedicabilia peccata ab ipso perpetrata requirantur. Hac sua voce declarat hæreticus quæ fuerit Ecclesiæ Catholicæ tum fides; Nimirum excedētes hinc quosdam ob sua peccata aliquid pœnarum in altero sæculo pati, vnde possint liberi euadere precibus amicorū, aut eleemosynis in eorum gratiam dispensatis. Cui fidei quod opponeret non aliud tum Ecclesiæ inimicus habebat, quam quod si ita esset liceret cuique sceleratè viuere, cui præsertim facultas non deesset amicorum sibi beneficia comparandi quæ essent post mortem profutura. Quasi verò preces atque oblationes quæ pro defunctis secundum Ecclesię fidem ac morem fierent, quibuslibet profuturæ dicerentur, & non Christianis solis, atque ijs quidem Chri-

*Epiphan.
hære. 75.*

stianis

stianis qui in gratiæ siue iustitiæ statu ex hoc mundo migrauissent. Si enim in hac vita nulla ad reconciliationem sceleratè uiuentium officia profunt, sed ij duntaxatalienis precibus atque operibus ad impetrandam diuinæ benignitatis gratiam adiuuantur, qui à propria ipsi iniquitate recesso, seque ipsos sic iuuare ceperint: multo magis existimandum est extinctis in iniustitia hominibus, nullum afferri posse leuamen aut solatium quibuscunque operibus, quæ in illorum gratiam suscipiantur. Sed Aërio sic respondit Epiphanius, errorisque absurditatem demonstrauit. De eo verò, inquit, quod proferantur nomina vita defunctorum, quid hoc magis fuerit vtile? quid hoc commodius & magis admiratione dignum? quod credunt præsentibus, quod hi qui decesserunt viuunt, & non sunt nulli, sed sunt & viuunt apud Dominum, Et ut pietissimam prædicationem recenseam, quod spes est orantibus pro fratribus velut qui in peregrinatione sunt. Profunt autem & preces pro ipsis fientes, etiamsi totam culpam non abscindant. Verum enimvero eò quod nos sæpè dum in mundo sumus fallimur, & erramus tum inuiti, tum voluntariè, quod id quod perfectius est significetur, & pro iustis, & pro peccatoribus memoriam facimus, pro peccatoribus quidem misericordiā Dei implorantes, &c. Hactenus sanctus Epiphanius: cui D. Augustinus consentiens eundem Aërium simili de causa retulit in numerum hæreticorum,

eo ipso

eo ipso declarans vrgeri se ad credendum, quia pro hæretico sit habendus qui pertinaci animositate reclamet. Diuus etiam Gregorius lib. 4. Dialog. cap. 39. dicit credendum esse purgatorium ignem ante iudicium illud extremum, propterea quod veritas dicit, esse peccatum in Spiritum sanctum, quod neque in hoc sæculo remittatur, neq; in futuro. Venerabilis Beda ad *Lib. 4. biff. Genes ad- gloriam. cap. 22.* fidem deuotionemque pietatis refert, orare, eleemosynas facere, victimas sacræ oblationis offerre pro creptione eorum qui de hoc sæculo migrauerunt. Atque hanc ipsam fidem per aliquot postea sæcula in Ecclesia Dei continuatam, Sanctus Bernardus ostendit; qui & ipse *Serm 66. in Cantica.* pro hæreticis habuit quosdam sui temporis nouatores, qui (vt ait) Purgatorium ignem non credebant restare post mortem, sed statim animam solutam à corpore, vel ad requiem transire vel ad damnationem.

Quod licet consuetudo non præiudicet veritati, index tamen sit testisque veritatis. CAP. XXVI.

Sed ad ea quæ producuntur ex Veterum scriptorum libris testimonia, vna tibi responsio est, qua dicis veritati consuetudinem non præiudicare. Magis quidem conueniebat vt diceres, cōsensum non præiudicare veritati, quia de consensu testium, non de consuetudine alicuius obseruationis agebatur. Admonuisti tamen
pro

pro nostris partibus vtiliter non solum consensum Patrum hac de re scribentium, verum etiam consuetudinem Ecclesiasticæ seu Christianæ obseruationis à nobis spectari oportere. Ac tametsi nec consuetudo nec consensus, non solum hominum, sed neque Angelorum sanctorum præiudicet veritati, tamē nunquid hoc efficit vt vel consensum Patrum, vel Ecclesiæ totius consuetudinem, tuo more, pro nihilo habere queamus? Audeo dicere non Angelorum tantum beatorum, sed nec trium diuinarum personarum consensum præiudicare veritati, quia nec veritas præiudicare veritati vllō modo potest. An ideo consequens est vt liceat non habere pro certo, id in quod diuinæ personæ consenserint? Nec igitur consuetudo vlla Christiani populi, quantumlibet vetus veritati præiudicat, aut præiudicauit vnquam: & tamē beatus Apostolus contentiosis opponit consuetudinem cū ait: Si quis videtur contentiosus esse, nos talem consuetudinem non habemus, neque Ecclesia Dei. Cui si responsum esset, cōsuetudinem non præiudicare veritati, nunquid ex aduerso præiudicare confirmasset? Nullo modo: & tamen consuetudinis rationem haberi se velle dixisset. Sicut igitur illa consuetudo cuius Apostolus meminit, nō præiudicabat veritati; & tamen seruanda erat, eiūque cedere debebat omnis contentio: ita hæc nostra, imò rotius Ecclesiæ consuetudo qua pro defunctis fidelibus funduntur preces, sine cunctatione sequen-

sequenda est. Non enim aut consuetudo obseruantium, aut consensus affirmantium, præiudicat veritati, sed index est, testisque veritatis. Ac sicuti dubitare non debemus verum esse, quod ab Ecclesiæ Patribus atque pastoribus, & iam & olim consentienter asseritur; ita dubium esse non debet, quin rectum & veritati consentaneum sit, quod veteri & publica perpetuaque Ecclesiæ consuetudine cōformiter obseruatur. Ideoque D. Augustinus hac ipsa in caussa nostra, consuetudinem quanti facere oporteret ostendens, ita scribit capite 1. libri de cura pro mortuis. Poterat inquisitioni tuæ sufficere mea breuis ista responsio; sed quia alia mouent, quibus respondendum existimo, parumper attende. In Machabæorum libro legimus oblatum pro mortuis sacrificium. Sed & si nusquam in scripturis veteribus omnino legeretur, non parua est vniuersæ Ecclesiæ, quæ in hac consuetudine claret autoritas: vbi in precibus sacerdotis quæ Domino Deo ad eius altare funduntur, locum suum habet etiam commendatio mortuorum. Sic eo loco. Generatim verò quantum sit Ecclesiasticæ consuetudini tribuendum, docet in epistola quam scripsit ad Casulanum. In his rebus (inquit) de quibus nihil certi statuit diuina scriptura, mos populi Dei & instituta maiorum pro lege tenenda sunt: & sicut præuaricatores diuinarum legum, ita contemptores ecclesiasticarum consuetudinum coercendi sunt. Hoc eo loco si verè dicit D. Augustinus, quid igitur

Epist. 86.

O

existi-

existimandum erit, vbi ad certam scripturarum doctrinam Ecclesiæ consuetudo accesserit? In epistola verò ad Ianuarium, Ecclesiasticæ consuetudinis tantam vim esse demonstravit ut diceret: quod tota per orbem frequentat Ecclesia dubitare quin ita faciendum sit, insolentissimæ insanix esse. Et hæc atque eiusmodi ille dicit: cuius alio loco illa sententia est. Nemo cōsuetudinem rationi & veritati præponat, quia consuetudinem ratio & veritas semper excludit: qui etiam non ignorabat, quamuis non in bona causa, benè tamen à diuo *Cypriano dictum; Consuetudinem sine veritate, nihil esse aliud quam erroris vetustatem. Num igitur in his secum pugnat Augustinus, qui vno loco dicat cōsuetudinem veritati cedere oportere, alio loco censeat consuetudinis contemptores esse coercendos? Minimè verò: Vtenim si quis mihi consensum generatim obijciat, nec dicat quorum ille sit consensus, non magni pendendum putem; ita consuetudine sine discrimine allegata, nihil me premi arbitrabor. Tārum interest quorum consensus, aut cuius populi dicatur esse consuetudo. Nam & in errorem multorum sæpè consensus est, & consuetudo potest contra veritatem & rationem irreperere. At si consensus consuetudoque Ecclesiæ proferatur, (quod & nos facimus, & cum Apostolo faciebat D. Augustinus) quis non continuò, qui obstinatissimus non sit, contentionis suæ vela deponat?

Dupli-

Dupliciter intelligi posse, afflictionem
Purgatoriam. CAP. XXVII.

Sed de Augustino ita subiungis. *Augustinus quidem aliquoties id affirmat, ut de Genesi contra Manicheos libri 2. capite 20. Et de vera & falsa pœnitentia capite 18. ubi & de gravitate ignis illius differit. Et libri 21. de civitate capite 23. affirmat quosdam pœnas temporales ferre post hanc vitam. Et capite 26. Non redarguo, inquit, quia forsitan verum est. Sed hic locis & similibus opponendos censemus alios ex eodem Augustino, in quibus id ipsum vel negat, vel dubitanter inducit, ut Libro 5. contra Pelagianos: Tertium locum ignoramus, &c. Et in Enchiridio cap. 67. ait eos, qui diuturno non tamen eterno igni puniri tradunt quosdam, falli humana quadam benevolentia: nam Scriptura divina aliud consulta respondet. Et in questionibus utriusque test. non dubitat dicere, in futuro solum esse remunerationem & condemnationem; hic autem aut solvuntur aut ligantur peccata. Sic dubitanter hanc questionem de Purgatorio infert, in Enchiridio cap. 69. Item de fide & operibus cap. 16. Et in questione prima Dulcitij: Tale aliquid post hanc vitam fieri incredibile non est, & utrum ita sit queri potest. Ex quibus perspicere potest dubitasse & ipsum Augustinum: Sed quia recens erat questio, & à multis acriter urgeretur, alias concedit, alias dubitat; interdum causa ita postulante palam negat. Haftenus ille.*

O ij

Igitur

Igitur vnum è Veteribus dubitasse interdum videri vis Augustinum, sed perspicuè demonstrari oportebat abs te quid id sit de quo dubitavit. Dicis enim eum de Purgatorio dubitasse, neque vlla eius verba profers quę hanc dubitationē expresserint. Potest esse aliqua res dubia & incerta de Purgatorio, quamvis dubium non sit Purgatorium existere. Certè pro defunctis adiuuandis atque leuandis, orationes rectè fundi oblationesque fieri, nusquam dubitat Augustinus: atque vsque aded tenuit hoc rectè fieri, quoniam id tota per orbem Ecclesia frequentaret, vt sciret dubitare quin ita faciendum esset ad insolentissimam insaniam pertinere. Dubitat igitur Augustinus, suamque dubitationem tribus maximè locis explicauit, Enchiridij cap. 69. De fide & operibus cap. 16. Et libro 21. de Ciuitat. capite 26. Sed non de eo quod tu existimas dubitauit. Quod vt intelligatur plenius notandum est, cum omnis repurgatio à maculis & sordibus sit, bifariam posse hominem inquinatum & deformem intelligi, seu turpem: videlicet à culpæ macula, vitiosarumque affectionum & cupiditatum sordibus; aut à reatu pœnæ, siue turpitudine supplicij quod ex peccato incurritur, cuiusmodi est, in patibulum agi, aut carceris squalorem perpeti. Propter hoc enim sordium genus, quod in peccatorum pœnis & vili abiectiōne constitutum est, dicit Christus per Isaiam *Isaia 63.* se inquinasse vestimenta sua: Et in prophætia Zacha-

Zachariæ, Iosedech, qui Christi typum gessit, *Zachar. 6.* turpia scribitur vestimenta induisse. Sed & in Psalmis Christus de luto facis eductum se re- *Psalm. 39.* surrectionis gloria gratulatur. Vt igitur duplex est inquinamentorum genus, sic potest ipsa hominis purgatio bifariam intelligi: vel ab affectu prauo & cupiditate sæculi huius; vel à pœna peccati, tanquam à sordibus carceris, dum in pristinum honorem ac nitorem restituitur, penitusque liberatur. Prius illud purgationis genus, non raro D. Augustinus attendit, vt Libro 9. de Ciuit. Dei, cap. 15. & 16. vbi distinguit emendationem peccati & cohibitionem à peccato, ab ipsa punitione. Clarissimè vero libro 21. de Ciuitate Dei cap. 13. vbi contra Platonicos multa differit, qui omnes pœnas purgatorias esse censebant, quia per eas fieret emendatio atque correctio. Platonici, inquit, quamuis impunita nulla velint esse peccata, tamen omnes pœnas emendationi adhiberi putant, vel humanis inflictas legibus vel diuinis, siue in hac vita, siue post mortem; si ita parcatur hic cuiquam aut ita plectatur vt hic non corrigatur: Et paucis interpositis: Qui hoc opinantur, inquit, nullas pœnas nisi purgatorias volunt esse post mortem, vt quoniam terris superiora sunt elementa, aqua aër, ignis, ex aliquo istorum mundetur per expiatorias pœnas, quod terrena contagione contractum est: Et infra; Nos vero etiam in hac quidem mortali vita esse quasdam pœnas purgatorias confitemur, non quibus

O iij affli-

affliguntur, quorum vita vel non inde fit melior, vel potius inde fit peior, sed illis sunt purgatoriae qui eis coerciti corriguntur. Iuxta hanc igitur quam D. Augustinus cum Platoniciis aspexit purgatoriae poenae significationem, incertum se subinde esse declarat, sine poenae ad hunc modum purgatoriae post hanc vitam, quibus videlicet affectus quidam pravi atque distorti corrigantur & aboleantur; an vero omnes potius istiusmodi affectus & amores saeculi, quibus saepenumero iusti homines tenentur usque ad corporis mortem, in ipsa corporis & animae dissolutione prorsus secundum seipsos intereant. At iuxta posteriorem purgatoriae poenae rationem, qua videlicet per temporariam afflictionem transit homo ad plenam libertatem, nusquam se D. Augustinus de Purgatorio dubitare significat, quin illo ipso capite 13. postquam dixisset, in hac vita ijs duntaxat purgatorias esse poenas, qui illis coerciti corrigerentur, subiunxit temporarias poenas alios in hac tantum vita, alios post mortem, alios & nunc & tunc (verutamen ante iudicium illud severissimum nouissimumq;) perpeti. Vbi proculdubio Christianarum animarum Purgatorium est, quia sufficiat ibi poenas constituisse temporarias, seu aliquando finiendas; quamuis an purgatoriae sint, quomodo Platonici de purgatorijs poenis loquebantur, non certo constet. Ideoque libro 2. de Genesi contra Manichaeos capite 20. ignem purgationis post hanc vitam sine dubitatione posuit,

posuit; scribens in hunc modum: Qui coluerit agrum suum interius, & ad panem suū, quamuis cum labore peruenerit; potest vsque ad finem vitæ huius hunc laborem pati: post hanc autem vitam non est necesse vt patiatur. Sed qui fortè agrum non coluerit, & spinis eum opprimi permiserit, habet in hac vita maledictionem terræ suæ in omnibus operibus suis; & post hanc vitam habebit vel ignem purgationis, vel pœnam æternam. Ita nemo euadit istam sententiam: sed agendum est vt saltem in hac tantum vita sentiat. Sic D. Augustinus. Constat igitur inter Catholicos doctores, purgationem quorundam, post huius vitæ mortalis exitum, diuino iudicio fieri: Neque ea purgatio intelligenda est nisi à peccatis grauioribus hic remissis, aut puluere quodam sæculari, quo per facile est inquinari eos qui super terram desiderijs adhuc sæcularibus gradiuntur. Cæterum cum in peccato sint, & affectus & reatus; neque habeatur exploratissimum vtrum sit post hanc vitam ab affectibus carnis in ipsa voluntatis correctione futura purgatio, tamè quin sit tum futura purgatio à peccatis quoad reatum, neque id modò Ecclesiæ dubium est, nec fuit vnquam inter Catholicos tractatores controuersum. Atque id sufficit vt Purgatorij ratio teneatur, ne videlicet illud magnoperè sit formidandum quod Lutherus obieciebat, Punitorium, non Purgatorium vocari oportere. Pœna quippe est, sed per quam peccati debitum

O iiii

ab-

abstergitur , Carcer est & pœna polluens , vt plenè repurget à vinculis & obligatione peccati ; brevis est seruitus , sed per quam tribuitur æterna libertas.

Habes Areti quid sit quod pro incerto habuerit Augustinus ; id nimirum quod nunc quidem satis certum est : & quid rursus sine dubitatione tenuerit , hoc ipsum videlicet quod nunc Catholica tenet fides , vestra vero hæresis oppugnare non desistit. Neque verò ea res Augustini ætate aut dubia fuit , aut quæstionem habuit , in qua , vt fingis , à multis acriter vrgeretur , sed si qua prius per Aërium hæreticum mota quæstio fuerat , ea diligenter magnoque consensu Ecclesiasticorum tractatorum refutata est , celeriterque damnata & oppressa ; nihil vt D. Augustino , vel alijs eius coætaneis negotij relictum sit hac quidem in parte , vbi possent vrgeri. Quod si te in aliam opinionem induxerit epistola quæ inscribitur [Cyrilli Hierosolymitani ad Augustinum] in qua expressum est post obitum Hieronymi quandam hæresim inter Græcos surrexisse , quæ ad Latinos vsque deuenerit , qua assereretur nullum fore Purgatorij locum , in quo animæ quæ nondum de suis peccatis in mundo plenam egissent pœnitentiam , purgarentur : Potuit eadem epistola hanc ipsam opinionem eximere , in qua narratur Diui Hieronymi meritis tres mortuos ad vitam reuocatos , qui de pœnis , & æternis & purgatorijs tam efficaciter testificati sint , vt
hoc

hoc pacto hæresis confestim in fumos abierit, prius omninò quàm Augustino potuerit esse molesta. Neque proinde, vt dicis, tanquam fluctuans, aliàs concedit aliàs dubitat, interdum caussa ita postulante palam negat, sed de quorundam fidelium pœnis non perpetuis post hanc vitam, à quibus vt liberentur precibus, eleemosynis, missæque sacrificijs agendum sit, dubitat nunquam; quin hoc ipsum varijs locis concedit: nullo denique in loco, aut rectè aut palam negat faciendum esse, quod & sedulo pro sua matre fecit, & illa vt id pro se fietet, filio commendauit.

*Vide libro
9. Confess.
cap. 13.*

Nam quod de tertij loci ignoratione repetisti, ad id iam antea responsum est: Quin & hoc addam, tantum abesse vt ea de re dubitauerit Augustinus, vt etiam aperte disertisque verbis dubitandum esse negauerit, serm. 34. de verbis Apostoli. Sic enim scribit: Proinde pompa funebris, agmina exequiarum, sumptuosa diligentia sepultura, monumentorù opulenta constructio, viatorum sunt qualiacunque solatia, non adiutoria mortuorum. Orationibus verò sanctæ Ecclesiæ, & sacrificio saluari, & eleemosynis quæ pro eorum spiritibus erogantur, non est dubitandum mortuos adiuuari, vt cum eis misericordius agatur à Domino, quam eorum peccata meruerunt. Addit etiam verbis consequentibus, cur dubitandum non sit: Hoc enim, inquit, à Patribus traditum vniuersa obseruat Ecclesia, vt pro ijs qui in corporis & san-

O v guinis

guinis Christi communione defuncti sunt, cum ad ipsum sacrificium loco suo commemorantur, oretur; ac pro illis quoque id offerri commemoretur. Cum verò eorum commendandorum causa opera misericordie celebrantur, quis eis dubitet suffragari pro quibus orationes Deo non inaniter allegantur? Non omnino ambigendum, est ista prodesse defunctis; sed talibus qui ita vixerint ante mortem, ut possint hæc eis vtilia esse post mortem. In his verbis Augustinus non semel duntaxat, sed iterum ac tertio omnem dubitationem abigit, simulque declarat propterea de eo dubitare nefas esse, quod & à Patribus sit traditum, & ab universa Christi Ecclesia observatum. An forte alias nesciebat Augustinus quid haberet ea de re traditio Patrum, quid Ecclesie observatio, & ideo dubitabat? Quæ si de tanto Ecclesie præfule absurda existimatio est; nunquam ergo dubitavit, quoniam hæc ei cur dubitandum esse negaret, causa fuit, quod maiorum traditioni universæ Ecclesie observatione responderet.

Ex veteri pro defunctis officio Ecclesiastico, clarè colligi Purgatorium Christianarum animarum. CAP. XXVII.

Addis tamen pari impudentia, hunc in modum cætera contexens:

Et sanè, inquis, apparet ante tempora Augustini plane fuisse ignoratum Purgatorium. Sed quia

quia Veteres in exequijs habebant conuentus, in quibus habebantur conciones, orationes, fiebant eleemosyna, & defunctis latam comprecabantur resurrectionem, posteri malè hanc consuetudinem ad preces pro defunctis applicarunt; quibus peior subsequens ætas orta est, qua Purgatorium inde cōmischeretur. Ac veteris illius consuetudinis manifestum est indicium apud Papistas. Nam illi in officijs mortuorum, qua Vigiliæ appellant, nullam faciunt mentionem Purgatorii, sed resurrectionis solum & magnitudinis peccatorum. Libera me Domine (canunt) de morte illa æterna, in die illa tremenda &c. Et, de profundis libera me (clamant) non ex Purgatorio, &c.

Fateris Areti, Veteres in exequijs habuisse conuentus in quibus orationes funderentur, & eleemosynæ fierent. Quæ te consuetudo, si sapias, commouere posset, vt non existimares vanum esse quod etiam de Purgatorio creditur. Nam & propterea eleemosynæ fiebant, vt defunctis subueniretur, & (quod omititis studiose quamuis eius expressè Tertullianus, Cyprianus, Chrysostomus, Ambrosius, Augustinus, cæteri que meminerint) sacrificiorum oblationes. Quibus rebus omnibus quid opus erat, nisi vt defunctis indulgentia, & à pœnis lenitio impetraretur? Propterea ergo lugebāt Africani populi, abductis in exilium persequutione Vandalica sacerdotibus, ea voce quam sic Victor Vricensis expressit. Qui nos solemnibus orationibus sepulturi sunt morientes? à quibus diuini

lib. 2. per
cap. V. vand.
lica.

diuini sacrificij ritus exhibendus est consuetus. Nam de læta resurrectione iustorum, quos omnes statim vos in cælum subuolare creditis, & beatifica Dei visione frui, nulla eos ne temporaria quidem pœna remorante, non fuit quod quisquam deberet ad eum modum esse sollicitus. Alioqui & pro Martyribus hæc in Ecclesia frequentarentur officia, cum tamen è diuerso illud tritum sit, iniuriam facere Martyri qui orat pro Martyre: Quod & Augustinus, vt iam tum vulgatum referens, Ser. 17. de verbis Apostoli: Perfectio (inquit) in hac vita nonnulla est, ad quam sancti Martyres peruenerunt; Ideoque habet Ecclesiastica disciplina, quod fideles nouerunt, cum Martyres eo loco recitatur ad altare Dei, vbi non pro ipsis oretur; pro cæteris autem commemoratis defunctis oretur: Iniuria enim est pro Martyre orare, cuius nos debemus orationibus commendari. Sic Diuus Augustinus. Quare posterius suorum patrum optimè perspectam habentes fidem, rectè maiorum suorum cōsuetudinem in ijs precibus quæ pro defunctis liberandis fierent tenuerunt. Nec ratio est cur peior putetur ætas subsequens, quia inde Purgatorium crediderit, cum nihil aliud sit nostra de Purgatorio fides, quam ea persuasio ex qua pro defunctis oratio nascitur, qua id petitur à Dei benignitate vt à suis æumnis atque miserijs, plena libertate donentur. Ideoque pro defunctis canere fideles soliti sunt, Kyrie eleyson; qua voce petitur misericordia, quæ solis est

mise-

miseris necessaria. Eam ob rem in cōcilio Arc-
 latensi 3, quod Leone primo Pontifice coactum *cap. 5.*
 est, remotis quibusdam pestiferis canticis, &
 ineptā lāritia, qua laici in excubijs funeris dif-
 fluebant, prætēxtu beatæ Christianorum mor-
 tis; si quid canere laicus dēfideret, cantare iu-
 betur, Kyrie eleyson. Hæc enim Christiano lu-
 stui congruebat precatio, quem pro defuncto
 suscipi conuenire, veterum exemplis patres illi
 docuere. Quod autem ais, in officijs mortuorū
 quæ Vigiliās appellamus, nullam fieri à nobis
 mentionem Purgatorij, quid id te adiuvat, cum
 res ipsa quæ Purgatorij vocabulo significata est
 luculenter exprimatut? Cur enim illis petere-
 tur requies, nisi essent in labore? cur lux æterna,
 nisi adhuc in tenebris versarentur? cur sinus
 Abrahamæ Isaac & Iacob, vnde aufugit dolor &
 tristitia, si mox in eo lāti ac sine omni dolore
 acquiescūt? Hæc, quæ faciliē sunt in officio de-
 functorum celeberrima, & ex veterum libris
 voceque populi Christiani publica atque per-
 petua, in vsum Ecclesiastici cantus inducta, tu
 vel de industria prætēris, vel non attēdis quam
 vim habeant ad Purgatorij significationem.
 Neque necesse est plura ex ipso officio repetere,
 cum vnum, hoc sufficiat; hoc (inquam) quod
 pro defunctis vsurpat, semperque vsurpauit po-
 pulus Christianus, Requiem æternam dona eis
 Domine, & lux perpetua luceat eis. Cui & il-
 lud aptissimē consonat quod in sacro Missæ ca-
 none, Græcis pariter Latinisque consentienti-
 bus le-

bus legitur: Ipsis Domine, & omnibus in Christo quiescentibus, locum refrigerij lucis ac pacis ut indulgeas deprecamur, per eundem Christum Dominum nostrum. Quod denique præter Tertullianum de vidua, quæ marito defuncto requiem poscit, D. etiam Ambrosius videtur alludere, cum sic ait de obitu Valentiniani: Date manibus sancta mysteria, pio requiem eius poscamus affectu, Dare sacramenta cælestia, animam piam matris oblationibus prosequamur. Et rursum in oratione funebri de obitu Theodosij Imperatoris: Tu (inquit) Domine solus inuocandus es, tu rogandus, ut eum in filiis representes: Tu Domine custodiens etiam paruulos, in hac humilitate saluos facito sperantes in te. Da requiem perfecto seruo tuo Theodosio, requiem quam præparasti sanctis tuis.

Quid de illis sentiendum sit, qui ex gentiliū libris aliquam Purgatorij significationem petunt. CAP. XXIX.

Sequitur (inquis) ut alia firmamenta Purgatorij videamus. Ex sacris malè astringitur, & Patres illi malè patrocinantur: siros Poëtarum & Philosophis cōmitteretur, pleniora haberi possent testimonia. Notum est plura fuisse catariſmon genera. Homicidiū purgabatur flumine bis septies ablūdō: & Thesens post occisos Pallātis filios Purgationis causſa ē Titæzenijs abiit, & Adrastus ad Gæsum regem profugit, ut purgaretur à cede. Pastor

Pastor, etiam oves solebat purgare sulphure, herba sabina & lauro igne succensis, ac circum onilia suffibat, cum sacro carmine milio & libo, cum lacte & sapa Pali Dea sacra faciebat. Roma exercitus solebat purgari sue, ovis, & tauro. Hos & similes mores frequenter invenias apud Ethnicos scriptores. Ac fiebat omnis purgatio vel per aërem, vel per ignem, vel aquam. Sed ut ad nostra veniamus, Purgatorium depictum habes apud Virgilium sexto *Æneidos*, ubi Anchises ita loquitur.

Non tamen omne malum miseris nec fundum omnes

Corporea excedunt pestes, penitusq; necesse est.

Multa d'u concreta modis inolescere miris.

Ergo exierunt panis, veterumq; maiorum

Supplicia expendunt; alia panduntur inanes

Suspensa ad ventos: alij sub gurgite vasto

Insectum elidunt scelus, aut exurit ignis.

Quisque suos patimur manes, exinde per amplum

Mittimur Elysium, & pauci lata arua tenemus,

Donec longa dies perfecto temporis orbe,

Constitam exemis labem, purumque reliquit

Aetherem sensum, atque aurai simplicis ignem.

Quibus sanè non poterat melius exprimi ratio Purgatorii. Et Pindarus Graecus Poëta in Olympiade secunda, affirmat lustratos demum apud inferos pervenire ad Saturni illam urbem, in beatorum insulis, quam Tyrsin vocari dicit. Hinc Purgatorio vehemèter fauerunt & Philosophi, in primis Pythagorici & Platonici. De Platone satis constat ex *Dialogo Phaedone* & *Axioccho*, ubi defunctos fluminibus inferni purgari dicit, priusquam perveniant in campos Elyseos. Ex quibus sanè constat Purgatorium, nihil aliud esse quam

Philos-

Philosophorum & Poëtarum figmentum, quibus hoc debent eius defensores Christiani.

Haëtenus ille.

Si Catholicam de Purgatorio fidem tam irridendam ostendisses; quam tu hic multum, Areti, ridere ac rideri voluisti, iam profectò cõfusi discedere cogeremur. Sed quantum quidem rideri cupias animaduertimus, quid autem irridendum probes non videmus. Posteaquam enim illa omnia de varijs gentilium purgationibus vano labore collegisti, ne tamen ad rem nihil pertinere putarentur, concludis ex iis constare, nihil aliud esse Purgatorium quam Poëtarum & Philosophorũ figmentum. Quid ais? an quia Poëtæ & Philosophi purgationes finxerunt, ideo Christianorum Purgatorium nihil est nisi Poëtarum & Philosophorum figmentum? Poteras eodem modo & Christi descensum ad inferos, & inferorum pœnas, & iustorum in cælo felicitatem, Philosophorum & Poëtarum esse figmenta concludere; quoniam & Poëtæ quorundam ad inferos finxere descensus, & Philosophi supplicia improborum, & bonorum felicitatem post corporis dissolutionem esse putauerunt. Neque verò in colligendis eorum hac in parte testimonijs, minus esse disertus & copiosus potuisti. Occurrisset indubiè homini literato, mox illud Ouidij:

Thesea Pirithous Stygias comitatur ad undas.

Et quod apud Homerum scribitur de Vlyssæ, qui ad inferos descenderit, indeque redierit:

Itemq;

Itemque apud Vergilium de *Ænea*, (quæ illi Poëtæ ad commendandam fortitudinem, singularemque virtutis excellentiam retulerunt.)

facilis descensus Avernus:

Sed revocare gradum superâsq; enadere ad auras

Hoc opus, hic labor est.

Quo etiam pertinent ipsi campi Elysij, quos ex Platone cōmemoras, nisi ut aliqua post mortem bonorum felicitas crederetur? Quam ob rem ergo hic quoque non concludis satis consistare, inferos & cælum nihil aliud esse quam figmenta Poëtarum? Viam certè Areti demonstras qua possint & illa à prophanis hominibus irrideri, quoniam similia quædam à gentilibus videantur esse conficta; vîque aded sæculum, non vitam modo iustorum beatâ, sed nec ipsam resurrectionem mortuorum (quemadmodum Tertullianus ait) dum errat, ignorat. Sed & ipsa de vno mediatore Dei & hominum, de restituta per eum iustitia & felicitate fides Christiana, concludetur esse nihil aliud quàm figmentum Sybillarum, imò etiam Poëtarû; quoniam & Sybillæ, & ex Sybillinis versibus Poëtæ de Christo quædam prædixisse putentur: Nam Vergilius, ut ait Ludouicus viues, & Ovidius, manifestè in poëmata sua de Sybillinis carminibus versus mutuuntur, quos nemo ita cæcus est, inquit, quin esse de Christo dictos perspi-
ciat. Qualis est tota quarta Egloga Vergilij, & digressus de morte Cæsaris in fine primi Georgicorum. Apud Ovidium verò illa sunt:

— 225

P

Es

Et Deis humana lustro sub imagine terras.

Rursum:

Esse quoque in satis reminiscitur affore tempus

Quo mare, quo tellus, correptaq; regia calis

Ardeat, & mundi moles operosa labores.

Item apud Lucanum de ijs quæ præcedent iudicium Domini:

Sic cum compage soluta

Secula tot mundi suprema collegeris hora,

Antiquum repetens chaos.

Denique & hoc ipsum quod pios dicis habere suū Purgatorium in sanguine Christi, simili ratione ridebimus, quia (sicut ipse commemoras) Romæ exercitus sanguine purgari solebat. Sed & hominum cæde & sanguine purgationes atque expiationes in gentilitate fieri solitas, satis clarum est ex veterum scriptorum monumentis. Idcirco Diuus Ambrosius lib. 6. in Lucam, cum esse dixisset qui non statim credere possent per crucem mundo salutem esse refulam, Astrue ergo (inquit) per historias Græcorum hoc fuisse possibile. Sic interdum etiam Apostolus suadet incredulis, nec versus refugit Poëticos, ut fabulas destruat Poëtarū. Si enim reuocetur in memoriam, quod legiones sæpe & magnos populos, oblatis aliquorum mortibus, historiæ Græcorum asserunt liberatos: Si recordentur quod Imperatoris filia propter Græcorum exercitus transferendos, ad sacrificium sic vocata: Si nostrum illud consideremus, quia sanguis taurorum & hircorum & cinis vitulæ aspersus, inquinatos sanctificat ad carnē mundan-

dandam: Si pestilentia regionum, aliquibus hominum contracta peccatis, vnius alicuius morte asseritur esse resoluta; quod aut ratione præualuit, aut dispositione conualuit, quo facilius in crucem Domini crederetur, proclive erit, vt qui sua negare non possint, nostra confirment. Hoc ergo genere argumenti, cum sic vsus sit Diuus Ambrosius, cur non similiter dixerimus purgationem atque expiationem Christi sanguine factam, nihil esse aliud quam gentilitatis commentum? Et hoc tamen tu Purgatorium diligenter excipis, cum ita subiungis:

Interea verè pij suum habent purgatorium in sanguine Christi, qui sanguis est nostrum purgatorium. Unica enim est satisfactio pro peccatis mors Christi. Hoc sufficiens est purgandi genus, vt non sit opus illo fabuloso.

Addis tamen habere bonos viros etiam sua purgatoria in hac vita, ærumnas & antichimata, & fortasse alios Socraticam Xantippen. Cur hic quoque non metuis ne tibi illæ fabulæ de purgationibus obijciantur? Cur etiam tam absurdum censes aut fabulosum, ærumnas poni post hanc vitam purgatorias, cum tu nihil metuas aut dubites ærumnas purgatorias in hac vita constituere? quæ tamen plenissimæ purgationi per Christum factæ tam obstare debere videantur, quam illæ quæ post hanc vitam constituentur à nobis. An non attendis Areti, quam non modò causam nostram confirmes, dum illam infirmare conaris, verum etiam quam te-

ipsum subvertas, dum oppugnās veritatē? Bonis in hac vita purgationes, bonorum ærumnas & antichimata. Præsidio ergo nobis es, ne accusari possimus, si post hanc vitam eiusmodi bonorum purgationem posuerimus, qui præsertim hic per ærumnas & antichimata purgati non sint. Ac ne metuere debeamus hic dominicæ purgationis occursum, tu idem nobis adiutor es, qui præter ærumnas & afflictiones Christi, bonorum quoque antichimata purgatoria facis. Quid enim interest, siue in hac vita, siue post mortem ærumna & afflictio constitutatur quæ purget, modò alia quæpiam quam Christi mediatoris afflictio purgatoria asseratur? Postremo si illa interdum de Poëtarum libris à Christianis scriptoribus collecta sunt, nō quo fides Christiana quæ de Christo est, & purgatione per eum facta, aut de iudicio extremo sic stabiliretur; sed ut gentilibus demonstraretur, non debere absurdam videri Christianorum sententiam, quam ipsi quoque gentiles quos mirentur, vel suis prædictionibus vel carminibus commendarint, non debet tam alienum existimari si in hac quoque de Purgatorio causā & illa superius posita Vergilij carmina proferantur: non ut eiusmodi testimonio probetur quod credimus, sed ut ostendatur ipsa quoque gentilitas, de purgatione post hanc vitam sensisse aliquid, quomodo & de tormentis impiorum, & de felicitate piorum, quas res nātum quidem ignorat dum errat. Sic fane Iohannes

nes

nes Eckius de Purgatorio contra Lutherum disputans, non solum illa ipsa Virgilij carmina proutit, sed adiunxit etiam aliqua Claudiani. Quin & Platonis atque Algaselis Arabis idem meminit. Non (inquit) quod quicquā authoritatis Ecclesiæ Dei per hoc accedat, vt de Sybillinis & gentilium libris monet Augustinus, sed vt confandatur aduersarius, cum viderit veritatem gentilibus cognitam, quam ipse patitur Christianis esse absconditam. Quod si quis obijciat, authorem esse Iustinum in Dialogo cum Tryphone, eiusmodi multa diabolum per suos ministros Poëtas atque Philosophos euulgasse, vt nostris fidem detraheret, eaque obscuraret ac velut similia fabulis indeque petita eleuaret; ideoque illos qui his vtantur, diabolicæ malevolentia studio nimium obsequi, nec prodesse, sed grauiter perniciosèque nocere, quemadmodum ille hostis per hæc introducta nocere studuerit: huic respondebo discerni vigilanter oportere, quid sibi diabolus propositum habeat, quidq; intendat ab eo quod omnipotens Deus vel ex ipsa diaboli malevolentia in vsus Ecclesiæ suæ colligit atque decerpit. Nouit enim Dominus, etiam id quod factum est vt obfit, ad aliquam vtilitatē conuertere; quia quemadmodum Apostolus ait: *Diligentibus Deum omnia cooperatur in bonum, his qui secundum propositum vocari sunt sancti.* Quamquam ergo diabolus illas Poëtarum fabulas introduxerit, vt Christianorum placitis tanquam

Rom. 8.

similiter fabulosis, fidei minus haberetur, ideoque suæ malevolentissimæ intentionis effectum præclare sortiatur in hæreticis, qui nostra hæc tanquam gentiles fabulas redolentia repudiât: tamen providentissima Dei erga nos benignitate hunc ex illis vsum decerpimus, ut si qui sint qui nostra vel ut falsa negent vel ut impossibilia irrideant; illa verò ut sua mirentur, atque amplectantur, de his ipsis quæ teneant refelli & coargui possint. Sic enim proclivius erit, quemadmodum ait D. Ambrosius, ut nostra confirmet qui sua negare non possunt. Ideoque contra gentiles, aut leues illos Christianos, quos magis Poëtarum lectio & commenta quam instituta Christiana delectant, aprius proferentur, quam aduersus hæreticos, in quibus diabolus gratulatur indubiè se tam vberem studij conatusque sui fructum reperire. Quo tamen tolerabilius facere videantur, qui & aduersus hæreticos disputantes, illa profecerunt; poterit vel obiter annotari, quod Lactantius lib. 7. cap. 22. scribit: Quamuis Poëtæ veritatis arcana in parte corruerint, tamen ipsa res eò verior inuenitur, quòd cum prophetis in parte consentiunt: quod nobis (inquit) ad probationem satis est.

LIBRI PRIMI FINIS.

PVRGATORIO,

LIBER SECVNDVS.

Contra Lucæ Loffij scholion in
caput 21. libri tertij Alcuini
De Trinitate.

PRÆFATIVNCVLA.



ALCVINVS, cuius* ante
quoque meminimus pro-
pter Aretij reprehensionē,
Caroli illius verè Magni
præceptor, vir & ætate sua
inter optimos doctissimosque habitus, &
post mortem à posteris iure laudatus, tres
scripsit libros de Sancta & indiuidua Tri-
nitate. Quod opus vt verè egregium, ve-
reque pium & Catholicum, recogno-
scendum sibi, ac breui etiam illustran-
dum commentariò Lucas Loffius existi-
mauit. Sed in eo, tanquam pulchro alio-
qui corpore, næuum suo quidem iudicio
reperit propter doctrinā de Purgatorio.
Quæ si, vt clamitant, Christi satisfactio-
nem euertit, grauis profectò & pernicio-
sus est error, nec vulgaris nævus, sed in-

* Superioris
libri cap. 8.
& 10.

P iijj tole-

Epist. 4.

toleranda deformitas. Ac si tanta, ut censere, deformitate Alcuinus laborauit, non dubium quin eadem & Carolo Magno, & Pastoribus, toti que tunc inhæserit Ecclesiæ Dei, in qua hic Alcuinus doctrina & pietate singulari, simulq; & præceptoris & Abbatis dignitate atque autoritate fulgebat. Ex quo perspicui potest, huius Alcuini ea in parte repræhensionem, totius Ecclesiæ quæ ea tempestate Caroli virtute passim vbique florebat, grauem & iniuriosam damnationem esse. At nos eius Ecclesiæ, quæ acceptam religionem à prædecessoribus ad nos usque transmissit, quoniam auctoritatem suspicimus, ut eam in tanti momenti doctrina suspectam habeamus, id procul à nobis abesse debere arbitramur. Et quoniā ipse Loffius post Apostolos, quorum opera Ecclesiæ fundatæ sint toto orbe terrarum, missos esse dicit Episcopos, pastores, & doctores usque ad nostra tempora; per quos iterum ineffabili misericordia Dei, vox Euangelij restituta & accensa sit: atque inter hos pastores & doctores Ecclesiæ, de quibus dicat Apostolus positos esse ut non essemus tãquam paruuli fluctuantes, meritò commemorari hunc ipsum

ipsum Alcuinum Abbatem Turonen-
sem, idcirco quod de Alcuino dat nobis
laudis, gratanter accipimus, lubentesque
eundem in hac de Purgatorio doctrina
ut doctorem Ecclesiæ sequimur; magis-
que eo ipso animamur, ut argumēta qui-
bus aduersus Alcuinum utitur, discu-
tienda hoc loco, breuiterque & cursim
duntaxat refellenda putemus.



Quas hæretici fingant origines doctrinæ
de Purgatorio. CAPVT I.

EST (inquit Lossius) *hæc erronea & fal-
sa opinio de Purgatorio, quam hic Al-
cuinus vera & catholica doctrina de san-
cta Trinitate interserit. Est autem primum orta
persuasio de Purgatorio, hoc est, pœnis & crucia-
tibus animarum post hanc vitam, à spectris, tem-
pore Gregorij Pontificis, qui anno 590. vixit.*

Doctrinæ eius quæ de Purgatorio est veram
originem, quoniā in diuinis literis hæretici no-
lunt agnoscere: fontem eius alibi reperire co-
nantur. In quo proinde conatu, dissidere illos
inter se necesse est, & tanquam errantes atque
dispersos alium hic, alium alibi quærere; eorum
videlicet communi more, qui à recto itinere
aberrantes quærūt aliquid ubi id inuenire non
possunt. Itaque Lossius transfuerso impeditus

P v aspe-

aspectu non longè prospiciens, primâ originem posuit in spectris tempore Gregorij: Calvinum non piguit ad superiora longè tēpora respicere.

Nec enim (inquit) deteriores essent prophanis hominibus Christiani, puduit illos nullum mortuis officium prestare, ac si penitus extincti forent. Hinc malè consultâ sedulitas; quia si pigri essent in curandis funeribus, in epulis & oblationibus, putabant se magno probro expostum iri.

Hoc Calvinus de prima traditionis huius origine, satis haud dubiè perspiciens, multò ante Gregorij tempora fuisse illam de Purgatorio persuasionem exortam: propter quam in iustis persolvendis animabus defunctorum susceperetur malè consultâ, ut ait, sedulitas. Huius ergo sententia, gentilitatis æmulatio peruersa, purgatorium nobis peperit: at Lossij iudicio, spectra Gregorij. Quid igitur Machabæis hanc persuasionem generavit? etiâne spectra Gregorij? aut fortè peruersa gentilitatis æmulatio? Scilicet hac æmulatione tenebatur vir ille religiosissimus, qui diuinis protectus præsidij meruit in bello fortis esse; cuique propria tot subeundorum belli discriminum causa fuit, patriarum legum amor, odiumque prophani gentilium cultus.

Deinde (inquit Lossius) propter questum est confirmata, & adhuc à Pontifice Romano, Cardinalibus, Canonicis & sacrificulis armis pertinaciter defenditur & retinetur, contra clarissima testimonia scripturæ prophetice & Apostolica, quæ
affir-

affirmant non esse liberationem post mortem.

Imò, verò, Loffi, quia iuxta clarissima scripturarum testimonia, ministerio potestatis eius cui Deus non sine causa gladium dedit, doctrina hæc defensa est; non id pertinaciter, sed planè fortiter constanterque factum videri debet. Cur enim non hoc quoque modo, cum facultas adest, vestris aduersus ecclesiam pertinacissimis contentionibus resistatur?

Frustra gloriari Hæreticum in hac causa, de claritate scripturarum.

CAPVT II.

NAm quod de clarissimis scripturarum testimonijs gloriaris, tale est, vt cum particulatim excutimus, vix obscuras quasdam sententiolas, illustri per tot sæcula veritati, deprehendamus opponi. *Affirmant enim scriptura* (inquis) *non esse liberationem post mortem.* Sed quo loco? nusquam enim id scriptura expressit ad eum modum, cum non parū intersit vtrum dicas, non esse liberationē post mortem, & non esse in inferno redemptionem siue liberationem. Post mortem quidem liberationem redemptionemque futuram, docet B. Apostolus; Quia & ipsa creatura (inquit) liberabitur à seruitute corruptionis, in libertatem gloriæ filiorum Dei; sed & nosipsi intra nos gemimus, adoptionem filiorum Dei expectantes redemptionem corporis nostri. Et Christus in Euangelio cum

Rom. 8.

cum ait, de futuro iudicio præmonens; *Cum*
Luce 21. hæc videritis fieri, lenate capita vestra; quo-
 niam appropinquat redemptio vestra. Erit ergo
 post mortem liberatio, imò ante mortem per-
 fecta erit nemini: tantum abest ut verum sit
 docere scripturam non fore liberationem post
 mortem. Quod si intelligas docere scripturam
 non fore post mortem liberationem eam, qua
 quis à dominio peccati liberetur, & è regno te-
 nebrarum tum primum in lucis iustitiæ que li-
 beratatem transfératur; lubentes hoc tibi do-
 nabimus, modisque omnibus approbavimus.
 Sed quid hoc ad euertendum Purgatorium?
 Quod autem celebrè est in ore fidelium; In in-
 ferno nullam esse redemptionem, rectè intel-
 ligitur non solum de illo damnationis loco, vn-
 de nemo post mortem eruitur: verum etiam de
 de ipso Purgatorio; propterea quod in eo qui
 sunt, redimere iam se suis operibus omninò nō
 possunt, ne à temporaneo quidem illo cruciatu:
 Verumque est generatim, in inferno nulli esse
 redemptioni, quemadmodum nec merito, lo-
 cum. Hic enim, quod inculcandum est, omno
 meritum comparatur, quo quis post mortem
 aut leuari possit aut grauari. Quāquam de ipsa
 gehenna, quæ ~~stat~~ statius inferni nomine conci-
 pitur, magis obuium habet sensum; quem Di-
Serm. 5 de *Epiphania.* uis Leo sic expressit: Non ita delinquētes pec-
 cata delectent, ut illos in suis actibus vitæ finis
 inueniat; Quoniam in inferno nulla est corre-
 ctio, nec datur remediū satisfactionis, vbi iam
 non

non superest actio voluntatis; dicēte Propheta Dauid; Quoniam nō est in morte qui memor *Psalm. 6.* sit tui, in inferno autem quis confitebitur tibi? Tunc ergo nulla redemptio est., quando id fit, quod ille à se deprecatur; Ne quando ut leo rapiat animam meam, dum non est qui redimat, neque qui saluum faciat. *Psalm. 7.*

Quod autem adiungis ex Psalmo 113. Non mortui laudabunt te Domine: nōne attendis tam latè patere, tamque obscurum esse, ut possit etiam de ijs qui in cēlo sunt spiritibus, negotium facessere? Si enim mortui non laudant Dominum, nec Petrus igitur nec Paulus, nec sanctorum quisquam qui mortui sunt, laudant Dominum; reddeturque hoc argumento non modò vacuum Purgatorium, verum etiam tristi & ignauo silentio plenum cælum. Imò verò, quoniam purgatorius locus afflictioni & ærūnis ob peccata sustinēdis destinatus est, in quibus nec solet, minusq; conuenit Alleluia cantari, quæ vox Hebræis ad laudis significationē pertinet, magis illud abs te contra cælestem felicitatem quam contra purgatorium carcerem, torqueri oportuerat argumentum. Quippè his qui ob sua peccata affliguntur, non laudes necessariae sunt, sed humilis & sine murmure patientia sufficere potest. Quid igitur probabilitatis habeat ista collectio? Post mortem non sunt laudes; non ergo pœnæ purgatoriae, non afflictiones, non venia locus. Hæc edō dico, ut animaduerti possit, quam bono iure Loffius in hac

hac caussa, de scripturarum possit tanta perspicuitate gloriari. Tamen si non desint qui nihil aliud eo scripturæ loco declaratum putent, quam post mortem apud inferos, quo & iustorum spiritus ducebantur ante Christi ascensum, non posse psalmis, hymnis & canticis Deum colaudari, quomodo hic in terris iucunda quadam operum varietate colitur, eiusque laudes celebrantur, beneficiorum quæ in nos contulit cōmemoratione. Hæc enim sunt nostræ peregrinationis cōcessa temporibus, non quo Deus eiusmodi nostris egeret officijs, sed ut hic nobis vberes colligeremus pietatis & iustitiæ fructus. Cuius rei contemplatione & seipsum & alios Propheta pius, ad diuinas in hac vita laudes celebrandas, excitans; Non (inquit) mortui laudabunt te Domine, neque omnes qui descendunt in infernum: sed nos qui viuimus benedicimus Domino. Diuus Augustinus mortuos interpretatur peccatores, qui etiam hanc agentes corporis vitam, mortui sunt, utpote à Deo suo qui animæ vitæ est, longo affectionum interuallo seiuncti. Iusti verò etiam carne mortui, viuunt Deo: vnde & Abraham, Isaac, &

Matth. 22 Iacob dicitur Deus; quia non est Deus mortuorum sed viventium. Non ergo ij qui in suis peccatis mortui sunt, laudabunt te Domine; quia

Isa. 15. speciosa esse non potest laus egressa ex ore peccatoris: neque omnes qui descendunt in infernum, eò quod peccator cum in profundum malorum venerit, contemnit. Ceterum apud

He-

Hebræos planior est sensus, quiq; minus multò negotij, aut illis exhibeat ne cælestium spirituum laudes conticescant, aut nobis ne post hanc vitam sperari venia haud possit. Eum ita quidam expresserunt. In hac terra mortui non laudabunt te Domine, neque omnes qui per mortem descendunt in infernum. Hoc ergo significat; eos qui mortui sunt, apud viuos non posse laudare Dominum, neque iam cetibus nostris inferi, vt vna nobiscum præconijs extollant omnium seruatorē. Sed nos (inquit) quoad vixerimus laudabimus Dominum, ab hoc tempore vsque in finem vitæ, perpetuo halleluia.

Tanquam diceret concludens, Quoniam ergo hominibus terrā tradidisti possidendam, in eaq; te ab ijs laudari voluisti, nomenq; tuum apud viuos celebrari; ne quæso nos cultores tuos ex hac terra ante tempus rapi sinas violentia & scelere impiorum. Illud autem alterum: Quoniam non est in morte qui memor sit tui; in inferno autem quis confitebitur tibi? doctissimi quidam interpretes de morte æterna accipiunt, quæ mors dicitur anthonomasticōs, de quæ inferno, in quem demersi sunt peccatores & impij: eumq; sensum supra commemoratis verbis Diuus Leo sequutus est. Alij significatum volunt, quod ij qui mortui sunt atq; in infernum descenderunt, non possint apud eos qui superstites sunt, gratum pro acceptis à Deo beneficijs animum ostendere. Diuus vero Hilarius in Psal. 51. scribens, cuius ante verba posui-

Psal. 6.

*Superius
libri cap. 4.*

mus

mus, interpretatur significari, interclusam esse mortuis facultatem bona sibi merita comparandi, vbi ex merito præteritæ voluntatis lex constituta aut pœnæ aut quietis, excedentium è corpore suscipiat voluntatem. Ergo & hinc animaduertere quisque potest quæ sit illa scripturarum claritas de qua Loffius gloriatur, quando & tam varias interpretationes hæc scripturæ testimonia recipiant, & quamcunque omnium amplecti libuerit, nulla prorsus, doctrinæ quæ de Purgatorio est, aduersetur. At aliquam fortè aliam multò clariorem protulit ex libro Ecclesiastes, multoq̃ue vehementius nostro Purgatorio repugnantem.

Quomodo intelligendum sit, mortuos nescire quicquam, & non esse eis amplius mercedem. CAP. III.

ET affirmat (inquit) scriptura, mortuos omnino nescire quid his in terris agatur, nec prodesse illis vlla merita aut opera viuorum. Nam sic Eccles. cap. 9. dicitur: Mortui nesciunt quicquam, & non est eis amplius merces: In obliuionem enim venit memoria eorum, &c. In quem locum inquit Hieronymus: Nos viuentes cognoscimus Patrem & Filium & Spiritum sanctum: illi verò mortui nihil sciunt, neque expectant aliquam reparationem atque mercedem, sed completa est memoria eorum. Neque ipsi meminerunt quæ scire debuerant, neque illorum iam Domini recordatio est.

Hactenus Loffius.

Qui

Qui si ea quæ proutit clarissima putet, dicat mihi quoniam modo verum sit omnes mortuos obliuioni traditos, cum Apostolorum & Martyrum tam celebris apud Christianos memoria, & modò sit & fuerit semper? Dicat quæadmodum nos quidem nouimus Patrem & Filium & Spiritum sanctum: at Petrus & Paulus & cæteri Apostoli hoc nesciant, qui sunt eius rei potissimum cognitione beati? Explanet quo pacto nullam expectent repromissionem, qui expectet redemptionem corporis sui, ipsis procul dubio cum hic agerent repromissam? Quod si hic sibi permittet è numero mortuorum excipiendi quos volet licentiam, quam obrè quod sibi concedi cupiet nobis denegabit? Si nullos excipi patietur, ostendat ergo sui testimonij non dico iam claritatem (cum hoc esse obscurum nemo non videat) sed etiam veritatem? Non quod illa vera esse non putem, sed quoniam ut ab eo sic intellecta, contra Ecclesiæ doctrinam torquentur, vera esse non possunt. Quid igitur est (inquis) Mortuis non amplius esse mercedem? Si tibi respondero hoc significari quod quidam reddiderunt, non esse mortuos apud viuos vllò amplius in pretio; videlicet ut eis, non post hanc vitam Sapiens neget esse mercedem, sed hic inter mortales in ijs rebus quæ consueto rerum humanarum cursu geruntur, quoniam modo id mihi refelles, aut pro te facere dicturus es? Rursum, quia Diui Hieronymi testimonio niteris, quæ tibi possit adiumento esse

Q

esse hic eius commentarius? Quia (inquit) supra dixerat cor filiorum impleri malitia & procacitate, & post hæc omnia morte finiri; nunc eadem complet & repetit, donec viuunt homines eos posse fieri iustos: post mortem verò nullam boni operis dari occasionē. Peccator enim viuens potest melior esse iusto mortuo, si voluerit in eius transire virtutes; vel certè eo qui se in malitia, potentia, procacitate iactabat, & mortuus fuerit, melior potest quiuis pauper esse & vilissimus. Quare? quia viuentes, metu mortis possunt bona opera perpetrare: mortui verò nihil valent ad id adijcere quod secum semel tulere de vita, & obliuione obuoluta sunt omnia; iuxta illud quod in psalmo scriptum est:

Psalm. 30. Obliuioni datus sum tanquam mortuus à corde. Sed & dilectio eorum & odium & æmulatio, & omne quod in sæculo habere potuerunt, mortis finitur aduentu: nec iustè quippe possunt agere nec peccare, nec virtutes adijcere nec vitia. Licet quidam (inquit) huic expositioni contradicant, asserentes etiam post interitum excrescere nos posse & decrescere. Et in eo quod nunc ait; Et pars non eriteis adhuc in sæculo, in omni quod factum est sub sole, ita intelligunt vt dicant eos in hoc sæculo, & sub hoc sole quem nos cernimus, nullam habere communionem: habere verò sub alio sæculo, de quo Saluator ait; Non sum ego de hoc mundo; & sub sole iustitiæ: & non excludi opinationem quæ contendit postquam de hoc sæculo migraverit.

Joan. 8.

uerimus, & offendere posse creaturas & promereri. Haftenus D. Hieronymus : qui quod scriptū est, Mortuos nihil scire amplius, interpretatur non de scientia cognitionis sed operationis : nihil enim mortui sciunt amplius facere, nec adijcere quicquam ad id quod secum detulere de vita, ideoque nec eis merces est, quam possint bene operando promereri. Viuentes autem cum sciāt se esse morituros, hoc metu extimulantur ad bene operandum, meritaq; hic sibi comparanda. Quæ autem huic expositioni contradicit opinio, apud eundem Hieronymum, id falsi continet quod merita constituat post hanc vitam, quibus in premio crescere quisque possit; cum illic non merendi tempus sit, sed recipiendi secundum ea quæ quisq; gesserit in corpore suo. Alioqui quod in eadem opinione est, non habere mortuos partem sub isto sole visibili, sed habere sub sole iustitiæ Christo, nemo est qui negare possit. Sunt enim illi qui in Domino moriuntur, heredes quidem Roman. 8. Dei, coheredes autem Christi. Sed sub isto sole partem nobiscum non habent, qui iam neque prosperitatis nostræ, neq; aduersorum quæ patimur possunt esse participes. Id quod si quis Sapientem hoc loco significare dicat voluisse, non video cur eum quisquam iure reprehendar. Quod verò Lossius profert ex eodem Hieronymi cōmentario, mortuos neque scire quicquam, neque ullam expectare repromissionem, cum viuentes norint Patrem & Filium & Spi-

Qij ritum

ritum sanctum ; id vel non attendit , vel ut falleret attendere noluit , non de fidelibus mortuis , sed de Iudæis à Diuo Hieronymo dictum. Mysticam enim post omnia loci huius expositionem tradens , in cane viuo gentiles , in leone mortuo populum circumcisum intelligit. Canis ergo viuens (inquit) nos sumus ex nationibus : Leo autem mortuus , Iudæorum est populus à Domino derelictus : Et melior est apud Dominum iste canis viuēs , quam leo ille mortuus. Nos enim viuētes cognoscimus Patrem , Filium , & Spiritum sanctum ; illi verò mortui nihil sciunt , neque expectant aliquam repositionem atque mercedem , sed completa est memoria eorum. Neque ipsi meminerunt quæ scire debuerant , neque illorum iam Dominus recordaturus est. Hæc ergo à Diuo Hieronymo de Iudæis incredulis , suaque infidelitate mortuis dicta esse cum sit clarissimum , consideret lector Lossij huius transuersam intelligentiam , aut certè subdolam impudentiam , qui ea de Christi discipulis & sanctis martyribus , omnibusq; Christianis in Domino morientibus intelligi voluerit. Quibus etsi neque sit necessarius honor sepulturæ , quia possit fortius dicere Christianus quam gentilis ;

Cælo tegitur qui non habet urnam ,
ut est apud Lucanum : aut quemadmodum apud Vergilium legitur ;

Non tumulum curo , sepelit natura relictos :
neque per seipsum leuamen afferat , magisque quem-

quemadmodum Augustinus ait, curatio fune- *Libro 1. de-*
 ris, conditio sepulturæ, pompa exequiarum, vi- *ciuit. Dei,*
 uorum solatia sint quam subsidia mortuorum: *cap. 12.*
 tamen plerisque bonorum operum & oratio-
 num subsidia aut necessaria non esse, aut mini-
 mè profutura, nec dixit Augustinus, nec pror-
 sus dicere fas est.

Nec de vijs duabus, nec de Latrone ob-
 esse nobis argumentum. CAP. IIII.

TEstatur (inquit) & promissio baptismi duas
 tantum esse vias morituris propositas, vel vi-
 ta, vel interitus; vbi inquit Christus; Qui credi-
 derit & baptizatus fuerit, saluus erit: Qui verò
 non crediderit, condemnabitur.

Nemo est, Loffi, qui dubitet duas tantum
 esse vias; vnã vitæ, alteram interitus. Sed ne-
 scis in via quoque bona sordes contrahi, & pul-
 ueris aspergine pedes maculari? Nisi hoc ita
 esset, non diceret Christus Dominus: Qui lo- *Ioan. 13.*
 tus est, non indiget nisi vt pedes lauet. Non Ia-
 cobus Apostolus; In multis offendimus omnes. *Epist. sua*
 Ideoque licet quotidiano Dei munere (inquit *cap. 3.*
 Sanctus Leo) à diuersis contaminationibus e- *Serm. 3. de*
 mundemur, inhaerent tamen incautis animis *ieunio 7.*
 plerunque maculae crassiores, quas oportet di- *mensis.*
 ligentiori cura ablui & impendio maiore deleri.
 Quod si quispiam hic per incuriam pedes non
 lauerit, nonne priusquã eo recipiatur quo ten-
 debat salutis iter ingressus, perpurgari debebit?
 Qui ergo post mortem ad infernas purgatorij
 Q iij sedes

sedes demittuntur, hi sunt in via vitæ, non interitus. Ex ijs enim sunt qui crediderunt & baptizati sunt. Sed propter contractas vitæ maculas quas hic non eluerant, purgari habent necesse, priusquam regnum intrent, quo nihil potest vel leuiter inquinatum intromitti.

Et Christus (inquit) ad Latronem conuersum ait: Hodie mecum eris in Paradiso, hoc est, vita tranquilla & beata, non in pœnis aut paenibus.

Vnum hoc nobis Latronis exemplum semper occinitur, quum animaduersum oportuerit vno quopiam exemplo generalem regulam nō solere figi. Cur non etiam sceleratis omnibus spem faciunt in extremo vitæ pœnitendi, quo peccent securius; quia Latio ille pœnitentiam egit moriturus? Deindè, Latio iam recēs Christo incorporabatur, supplente inuisibiliter Deo quod ex parte Baptismi necessitas illa deesse cogebat. Eo proindè priuilegio gaudere debuit, quo ij qui recentes à baptismo ex hac vita discedunt. Postremo, etsi fuisset post Baptisma relapsus, (quia inquit beatus August. vtrum non fuerit baptizatus, incertum est) magna tamen magnæ fidei & charitatis vis est, in qua pares non sunt omnes: Quo accedebat & supplicij magnitudo, & cum Christo in illo probro crucis, fidelis communicatio. Tot ergo discrimina cum Latronis illius vitam, quamuis breuem, à tot relapsorum Christianorum vita secernant; quid mirandum est si post ipsum quoque exitum distinguatur? Ex huius igitur vnus

Para-

Lib. 1. Re-
tract. ca. 8.

Paradiso, tanquam videlicet si vna hirundo faceret ver, malè omnium iustorum continuò post mortem Paradisum colligis, cum ita concludis.

Non igitur anima iustorum, hoc est, qui in hoc saeculo fide iustificati & accepti Deo fuerunt, & inchoarunt nouitatem vite, discedunt ad nouos cruciatus, præter eas afflictiones & misérias, quibus in hac vita exercetur Ecclesia; sed ad gaudium spirituale & pacem perpetuam, in qua dulcissima Dei consuetudine, perpetuò fruuntur.

Homines etiam iustos in hac vita, propter sua peccata flagellari, non tantum exerceri.

C A P. V.

V Aldè sibi cauit, ne afflictionibus & miserijs vite huius, puniri diceret Ecclesiam ob peccata commissa; vsque ad eò metuitur hoc, ne qua inde ratio probabilis affulgeat Purgatorii construendi, si hic & iusti homines à reatu damnationis æternæ liberi, temporalibus interim supplicijs flagellentur. Non ergo puniri, sed exerceri dicere maluit; quia reuera punitio in præterita peccata respicit: exercitium ad virtutes quas habere cupiamus. Ideoque & supra dixerat, afflictionibus Ecclesiam in hac tantum vita subiectam esse, vt in illis agnoscat reliquias peccatorum hærentes in carne corrupta, & inuitetur ad pœnitentiam agendam in hac vita. At longè aliter scriptura diuina sonat. Si (in-

Q^{uij} quit)

- Psalms* 88. quit) filij eius dereliquerint legem meam, & in iudicijs meis non ambulauerint; visitabo in virga iniquitates eorum, & in verberibus peccata eorum: Misericordiam autem meam non dispergam ab eo, neq; nocebo in veritate mea.
- Psalms* 98. Et alio in loco; Moses & Aaron in sacerdotibus eius, & Samuel inter eos qui inuocant nomen eius. Inuocabant Dominum, & ipse exaudiebat eos; in columna nubis loquebatur ad eos: Custodiebant testimonia eius, & præceptum quod dedit illis. Domine Deus noster tu exaudiebas eos, Deus tu propitius fuisti eis, & vlciscens in omnes adinuersiones eorum. Quid Petrus? Tempus est (inquit) vt iudiciũ incipiat à domo Dei: Si autem primum à nobis, quis finis eorum qui non credunt Euangelio? Et si iustus vix saluabitur, propterea quod nec illius peccatis diuinæ iustitiæ parcat seueritas, impius & peccator vbi parebunt? Nec solum in Veteri testamento scriptum est: Quem diligit Deus corripit, flagellat autem omnem filium quem recipit, sed etiã in nouo; Ego quem amo, arguo & castigo; Et, *1. Cor.* 11. Cũ iudicamur, à Domino corripimur, ne cum hoc mundo damnemur. Est & apud Beatum Augustinum dignus omni obseruatione locus de causis correptionum, propter quas & boni & mali pariter flagellantur. Quid (inquit) igitur in illa rerum vastitate Christiani passi sunt, quod eis non magis fideliter ista considerantibus ad profectum valeret? Primo quod ipsa peccata quibus Deus indignatus impleuit

uit tantis calamitatibus mundum, humiliter cogitantes, quamuis longè absint à facinorosis, flagitiosis atque impijs; tamen non vsque adeò se à delictis deputant alienos, vt nec temporalia pro eis mala perpeti se indicent dignos. Excepto enim quod vnusquisque, quamlibet laudabiliter viuens, cedit in quibusdam carnali concupiscentiæ, etsi non ad facinorum immanitatem & gurgitem flagitiorum, atque impietatis abominationem; ad aliqua tamen peccata vel rara, vel tantò crebriora, quantò minora. Hoc ergo excepto, quis tandem facile reperitur, qui eosdem ipsos, propter quorum horrendam superbiam, luxuriàm & auaritiàm, atq; execrabiles iniquitates & impietates, Deus sicut minando prædixit conterit terras, sic habeat, vt habendi sunt; sic cum eis viuatur, vt cum talibus viuendum est? Plerumque enim ab eis docendis, admonendis, aliquando etiam obiurgandis & corripicndis malè dissimulatur: vel cum laboris piget; vel cum eos eorum, coram verecundamur offendere; vel cum eorum inimicitias deuitemus, ne impedianc & noceant in istis temporalibus rebus; siue quas ad ipsi adhuc appetit nostra cupiditas, siue quas amittere formidat infirmitas: ita vt (quamuis bonis vita malorum displiceat, & ideo cum eis non incidant in illam damnationem, quæ post hanc vitam talibus præparatur; tamen quia propterea peccatis eorum damnabilibus parcunt, dam eos in suis, licet leuibus & venialibus metuunt).

Q v iure

iure cum eis temporaliter flagellentur, quamvis in æternum minimè puniantur. Iure istam vitam quando diuinitus affliguntur cum eis amarum sentiunt, cuius amando dulcedinem peccantibus eis amari esse noluerunt. Hactenus D. Augustinus. In illis igitur scripturæ locis, & his Augustini verbis, audis, Loffi, virgam & flagella non ad virtutes exercendas expressè id quidem, sed ad flagellanda, puniendaque peccata: audis non exercitium sed vindictam: non quod cum eiusmodi castigatoria disciplina, extendi quoque coniuncta non fuerit utilitas; sed quoniam pœna quæ in præterita peccata respiciat, in flagellis atque verberibus debeat imprimis cogitari. Nec verbi vis eadem in flagello, castigatione & vindicta, quæ in afflictione est. Nam & læsum chirurgus affligit sectione membrorum, quem non ob id punire aut flagellare seu castigare dicendus est: Recteque Diuus Augustinus flagelli proprietatem iuxta

*Libro 2. de
pec. mer. &
remiss. c. 16* sacrarum literarum vsum attendens; Nulla (inquit) vindicta, nulla correptio, nullum Dei flagellum debetur nisi peccato. Est igitur vbi afflictio pœna nō sit, quoniam in ea inferenda, non culpæ, sed profectus aut alterius cuiuspiam rei ratio habeatur. Quo fit vt non omnia quæ accidere sanctis mala, in peccati pœnam accidisse censenda sint. Ideoque loco supra dicto beatus Augustinus, posteaquam flagelli communis causam communem, in peccatis vindicandis constituisset, subiunxit aliam quibusdam sanctis

sanctis excellentioribus peculiarem. Habent *Lib. 1. de*
 (inquit) aliam causam boni, quare tempora- *Cin. ca. 9.*
 libus affligantur malis: qualem habuit Iob; ut
 sibi ipsi humanus animus sit probatus & cog-
 nitus, quanta virtute pietatis gratis Deum di-
 ligat. Est etiam ubi afflictio pœna tantum sit; ut
 in perditis; velut in Pharaone; ut in paruulis
 non modò recens natis, verumetiam regene-
 ratis, quibus propter ætatem neque ad cauē-
 dum vitium, neque ad exercendam virtutem,
 ex afflictione prouenire potest vtilitas. Est de-
 nique ubi non modò pertineat ad pœnam an-
 te actorum, verum etiam valeat ad cautionem
 futurorum, exercitationemque virtutū. Quod *Hebr. 12.*
 ille declarat in epistola ad Hebræos locus; Om-
 nis disciplina in præsenti quidem videtur non
 esse gaudij, sed mœroris; postea autem fructum
 pacatissimum exercitatis per eam reddet iusti-
 tiæ. Vtrumque igitur in hac castigatoria disci-
 plina cogitare debemus. Quia neque corre-
 ptio est nisi ob præcedentē culpam; neq; exer-
 citium, nisi ad nitorem & incrementa virtutum.

Ad locum Pauli 1. Corint. 3. ineptum esse
 de igne pœnitentiæ commentarium.

CAPVT VI.

Locus autem Pauli (inquit) quem citat Al-
 cinius, secutus in hoc superiorum errorem,
 ad confirmationem Purgatorij 1. Corint. 3. Vniuf-
 cuiusque opus quale sit ignis declarabit. Item;
 Sal-

Saluabitur, sic tamen quasi per ignem; intelligendus est de pœnitentia & afflictionibus huius vite. Nam ignis sæpè afflictiones significat.

Vide hic varietatem eorum qui veritatem refugiunt. Alius ignem Spiritus sancti, alius pudoris iusti aut censuræ diuinæ; alius pœnitentiæ; alius afflictionum comminiscitur. Hic vtrumque, hoc est, pœnitentiam cum afflictione coniunxit; cum tamen ea differant longo discrimine. Nam & pœnitentia sine afflictione exteriori agitur, & afflictio sæpè grauis sine pœnitentia sustinetur. Alius ergo pœnitentiæ; alius afflictionum ignis sit oportet. Cumque Paulus vnus duntaxat ignis meminerit, hic pro vno, duo nobis ignium genera repente confluxit. Ac de afflictionis igne & eius quidem quæ in hac mortali vita discruciat, non posse intelligi vniuersalem omnium eorum qui superædificant probationem, declarationemque operis cuiusq; superædificati (de qua perspicuum est à Paulo haberi sermonem) supra satis, vt reor, ostendimus, cum aduersus Aretium ageremus. Pœnitentiæ verò qua subindè homines afficiuntur, ignem, si quis ad tantæ manifestationis lucem sufficere arbitretur, qualescunque certè oculos habeat in carne, nullos in mente habere se demonstrat. Primum, quia de suis erratis innumeri sunt qui nulla tangantur pœnitentia. Deindè, reperias etiam quos vera dixisse atque docuisse pœniteat. Postremò, qui non frustra latantur conscientia prædicatæ & illustratæ
apud

apud homines veritatis, quónam modo ad hos pœnitentiæ ignis pertineat? Primorum ergo doctrinam qualis sit, non probat ignis pœnitentiæ, quam non agunt; sed regit potius & obumbrat constantiæ falsa species, quæ apud multos efficit vt error pro veritate habeatur. Secundi verò ordinis hominum, multò minus ipso igne pœnitentiæ doctrina patescit; quia pœnitudo quæ de veritate suscipitur, non ignis est illuminans, sed tenebricosi potius fumi caligo, veritatis conspectum quantum in ipsa est, intuentium oculis adimens. Postremi quoque, quoniam bona conscientia pœnitentiam non admittit, per hunc ignem probari non possunt, neque qualis eorum doctrina fuerit, pœnitendo prorsus ostenditur. Atqui Paulus ait: Vniuscuiusque opus quale sit, ignis probabit; Et, dies Domini declarabit qualis sit cuiusque structura. Porro cum dicat etiam Apostolus, ab igne detrimentum accepturos eos esse, qui ligna, fœnum & stipulam superædificauerint, num intelligi possit ignem pœnitentiæ cuiquam detrimento futurum? Vt enim statuamus per ignem pœnitentiæ, ea quæ malè superædificata sint exuri, tamen ei qui superædificauit non affert ignis ille, temporale semper detrimentum. Afflictio quidem ipsa damnosa est, non ita pœnitentia quæ de falsa doctrina suscipitur. Sed expositiones scripturarum falsæ inutiles & erroneæ (inquit Lossius) exurentur igne, hoc est, non permanebunt in ecclesia, sed abolen-

tur

tur & reijciuntur. Quonam ergo (inquam) id sit igne? pœnitentiæ, an afflictionis? Doctrinam tu quidem, Lossi, quæ de Purgatorio est apud Alcuinum, inter hæc ædificia quæ exurentur, collocasti. Dic ergo de tuis ignibus, illam doctrinam in Alcuino vter exusserit in hac vita? Num afflictio hæc illi extorsit? num de ea pœnitentiam egit? Non est (inquis) necesse id in vnoquoque doctore fieri; sed sufficit si tandem erroneæ cōmentationes eijciantur ex Ecclesia. Atqui Paulus disertis verbis pronūciat; Vniuscuiusque opus quale sit, ignis probabit. Ac ne hoc ad doctrinæ probationem referas non personæ, subiunxit eum qui superædificauerit ligna, fœnum, stipulam, saluum fore; sic tamen quasi per ignē. Vt igitur omnis ille cuius opus in igne manserit, hoc est, qui superædificauit aurū, argentū & lapides pretiosos, mercedē accipiet: sic omnis cuius eodem tempore superædificatio, ligno & fœno cōstabit & stipula, saluus erit, sic quasi per ignem. Quæ si huius vitæ non sunt (vti non esse quiuis bona mente præditus intelligit) frustra quæ vel in Alcuino completa, vel alio quolibet doctore hac in vita complēda demonstrare studueris, ad illud tibi post hanc vitam Domini iudicium redeundum est, vbi & Alcuini & nostra vestraque omnium doctrina probabitur igni, palamq; fiet vōsne melius doctrinam de Purgatorio repudiaueritis, quam nos amplexi simus. Dominus enim (inquit **69. v.** Isaias) in igne veniet, & quasi turbo quadrigæ
cuius

eius, reddere in indignatione furorem suum, & increpationem suam in flamma ignis; quia in igne Dominus dijudicabit. Quem Prophete locum, ad ignem purgationis in extremo iudicio futuræ, Diuus Ambrosius retulit: Augustinus quoque, totaq; vetustas tenuit Dominum igne præcedente venturum. Quanquam non satis etiam forsitan in eo tibi cõstes, quod cum doctrinam hanc de Purgatorio clarissimis scripturæ testimonijs repugnare statueris, vestroque omnium iudicio pernitiõsa & hæretica isthæc doctrina sit, quæ ipsum dominicæ satisfactionis fundamentum euertat; tu tamen eam super fundamento stare & superædificari, atq; ad ligna, fœnum & stipulã pertinere significes.

Serm. 3. de
Psal. 118.
Lib. 1. q.
euangel.
q. 10.

Malè probari vitiosum fuisse Iudæ Machabæi factum, quod Sacrificia legis nihil prodesse coram Deo, sed tantum coram Ecclesia. CAP. VII.

Sed omisso eo, quid est Lossi cur exemplum quod ex Machabæis citatur de oblationibus pro mortuis, vitiosum erroneumque sit? Quia nimirum *Sacrificia Levitica, qua figura fuerunt Christi sacrificij, non debebant peccata coram Deo, sed tantum coram Ecclesia.*

Hoc ergo tuum est argumentum. Sacrificia temporis illius non valebant ad remissionem peccatorum obtinendam à Deo; ergo mortuis apud Deum nihil ea prodesse potuit Machabæorum

batorum oblatio. Cuius si verum est anteceden-
 dens; cur toties legitur; Offeret qui peccauit,
 hoc aut illud; orabitque pro eo sacerdos, & propi-
 tius erit ei Dominus? quid est quod Prophe-
 ta Daniel, inter alienigenas positus, cum offer-
 re per captiuitatem sacrificia iuxta legem non
 posset, exaudiri poscat in corde contrito, sicut
 antea in holocaustis & victimis legalibus? Quo
 pertinet eiusdem prophete illa deploratio; Non
 est in tempore hoc princeps & dux & prophe-
 ta, neque holocaustum, neque sacrificium, ne-
 que oblatio, neque incensum, neque locus pri-
 mitiarum coram te, vt possimus inuenire mise-
 ricordiam tuam. Solamne propheta coram ho-
 minibus misericordiam expetebat? aut cor con-
 tritum non illi prodesse potuit ad obtinendam
 veniam coram Deo, sed tantummodo coram
 Ecclesia? Quanquam igitur illa sacrificia nihil
 per seipsa valetent ad veram peccati coram Deo
 expiationem; tamen in his operabatur fides
 vtentium, perque fide efficax erat in illis Chri-
 sti mediatoris sanguis, qui, quemadmodum ait
 sanctus Leo, tam potens in suis significationi-
 bus fuit, vt non minus per eum acceperint qui
 illum credidere promissum, quam qui dona-
 tum susceperunt. Cuius Pontificis & illa sen-
 tentia est. Patriarche & Prophete & Sacerdo-
 tes omnesque sancti, qui prioribus fuere tem-
 poribus, eiusdem sunt Spiritus sancti sanctifi-
 catione vegetati: & sine hac gratia nulla vn-
 quam sunt instituta sacramenta, nulla celebrata
 myste-

*Daniel. 3.**Ibidem.**Serm. 3. de
natiuitate.**Serm. 2. de
Pentecoste.*

myſteria, vt eadem ſemper fuerit virtus chariſ-
 marum, quamuis non eadem fuerit meſura
 donorum. Diui quoque Auguſtini doctrina eſt
 conſimilis. Sacrificia (inquit) illa, ſi per ſeipſa *Quæſt. 29.*
 attendantur, nullo pacto poſſunt mederi: ſi au- *ſuper Na-*
 tem reſipſæ quarum hæc ſacramenta ſunt in- *meros.*
 quirantur, in ijs inueniri poterit purgatio pec-
 catorum. Et rurſum, fructum viſibilium illius *Quæſt. 84.*
 temporis ſacramentorum, ponit in ſanctifica- *ſuper Le-*
 tione inuiſibili per Spiritum ſanctum. Quale *niticum.*
 autem eſt, vt hic obſiſtant nobis, qui aliàs, quod
 ad inuiſibilem gratiam attinet, nullum eſſe vo-
 lunt inter ſacramenta teſtamenti veteris & no-
 ui diſcrimen? Si igitur illa quoque ſacramen-
 ta ad ſpiritualem animæ gratiam conducebant;
 cur ab eo reſilientes, modò ſtatuunt nullum ea
 fructum expiationis habuiſſe coram Deo, ſed
 duntaxat coram Eccleſia? Nimirum, quia il-
 lud in hæreticos aptiſſimè quadrat: Quod vo-
 lumus ſanctum eſt.

Non rectè improbari Machabæi factum,
 eò quod nulla eſſent in Veteri lege pro
 mortuis inſtituta ſacrificia.

CAP. VIII.

ADdit Loſſius, nulla Sacrificia pro mor-
 tuis inſtituta fuiſſe in Veteri teſtamento;
 ex eoque colligit, errore id commiſſum à Ma-
 chabæis, vt pro mortuis ſacrificare præſume-
 rent. Quo loco reſpondeo, multo æquius eſſe

R

vt ex

vt ex huius viri facto interpretemur sacrificiorum veterum oblationes, etiam ad mortuorum aliquam vtilitatem pertinuisse, quam vt propterea illum coarguamus, quod nullum ea de re speciale & expressum reperiamus institutum. Quis enim hoc sibi nisi impudenter arroget, vt nunc melius scire se dicat, quosnam ad vsus illa sacrificia solerent applicari, quã illi ipsi quibus erat familiaris illorum sacrificiorum ritus, quiq; non vt ex infima plebe rudi cõsuetudine ducebantur, verùm etiam præerant rebus eiusmodi, ad Dei cultum, salutemque hominum gerendis? An quenquam, tunc Machabæi factum offendit vt nouum? An sacerdotes, ad quos sacrificij causa pecunia mittebatur Hierosolymam, Machabæo vt contra legem, contra patrium morem aliquid postulanti, restiterunt? Nemo tunc in tota illa Ecclesia potuit animaduertere, quid contra legem peteretur? Et vnde Machabæo res eiusmodi venisset in mentem, nisi neque obstare legem, cuius non erat ignarus, & hortari patrium morem, cuius obseruantissimus erat, perspexisset? Scilicet vir tantus, tanto, tamque religioso patre genitus, populi princeps, Sacerdos summus, pro lege Dei, pro patrijs ritibus tuendis vsque ad mortis contemptum fortis atque zelosus, hic quid faceret ignorans, tam grauiter contra diuinam legem impegit. Nõne id magis ratio postulabat, vt si quid esset in illius temporis lege positum obscurius, nos viri huius factum legis

gis interpretationem putaremus? Quanquam enim verum est quod Iureconsultus ait; veritatem rerum, gestorum erroribus non vitari *Ulpianus.* (quod ipsum antea quoque protulit Aretius) & quod contra Aristocratem Demosthenes admonuit, non tam quid factum sit, quam quid rectè sit factum spectari oportere, *μὴ δὲ τοῦτο ἡμῖν εἶπε λέγειν, ὥς γέγονεν ἄλλ' ἐπὶ δίκαστον γενέσθαι:* tamen cum rei veritatem clarè lex non expressit, sed aliqua generaliore sui parte cōcluserit, tum & popularem consuetudinem, & publica insignium virorum facta generatim expressæ legi consentanea, rectè legis interpretationem esse duxerimus. Vt enim verum est quod Iureconsultus ait, Rerum veritatem non vitari, gestorum erroribus: ita & à Iureconsulto verissimè dicitur; Optimum legis interpretem, vsum & consuetudinem esse. An fortè nulla legis pars est, cui possit videri facta pro mortuis oblatio consonare? Cum ergo iuberetur Pōtifex pro se, *Leuit. 16.* proque domo sua offerre sacrificium; quid alienum, si in domo sua & mortuos intelligeret esse comprehensos? Siquidem vsu scripturæ ad aliquius (verbi gratia, David, Iacob, Ioseph) domum etiam mortui pertinent. Rursum, cū *Leuit. 16.* sacrificandum esset orandumque ex lege pro filiis Israël, & pro cunctis peccatis eorum semel in anno; mirandum est si in filiis Israël computarentur & mortui, deque peccatis eorum vt in obliuionem venirent coram Deo, pia cura posterī tangerentur? Quod si contenderis, tam

accuratè præscriptum lege, quæ & quando quibusque de causis offerenda essent sacrificia, ut intelligeretur extra ea quæ expressa & præscripta forent nullum offerri Deo sacrificium oportere, ideoque Machabæi sacrificium improbandum esse, quod non sit ex legitimis illis, quæ stans temporibus celebrari debebant: fatebor sanè ordinaria fuisse gentis illius sacrificia per multa: & quotidiana, mane ac vesperi, & annua solenniaq; temporum diuersorum: sed præter hæc legitima, erat etiam spontaneis seu extraordinarijs neque lege præscriptis oblationibus ad sacrificia locus. Sic enim scriptum est in

cap. 29. Numeris: Hæc offeretis Domino in solennitatibus vestris præter vota & oblationes spontaneas, in holocausto, in sacrificio, in libamine, & in hostijs pacificis. Quid igitur isti, ut omnia quæ rectè & laudabiliter fiant, lege sint mandata requirunt; cum & spontanea ab ipsa lege commendetur oblatio? Iudas itaque Machabæus, legis diuinæ scientia probè instructus, quemadmodum id personæ dignitas postulabat, mortuorum in bello pio & iusto curam gerens, spontanea oblatione misit Hierosolymam duodecim milia drachmas argenti, ut his comparata sacrificia offerretur ibi pro peccatis mortuorum.

Sed hætenus ad Lucæ Lossij argumenta.

Falsò

Falsò caussari Caluinum, quod Machabæi exemplo vtentes, in hac Purgatorij caussa, Sacrificia legalia tanquam nondum abolita, trahant ad nouum testamentum. CAP. IX.

VNdè etiam æstimari posse puto, quid de illa sit arrogantissima Caluini censura iudicandû, quam in sua Institutione sic expressit.

Superstitione quidem & prepostero zelo non caruit hoc facinus. Sed plusquam fatui sunt, qui sacrificium legale ad nos vsque trahunt, quando aduentu Christi scimus cessare qua in vsu tunc fuerant. Lib. 3. cap. 5. § 8.

Quis hic non protinus videat quanta fatuitate nos fatui iudicemur? Non enim factum legale ad nos trahimus, sed facti sequimur rationem. Nam etsi Christus Dominus, aduentu suo legalia sacrificia dum impleuit aboleuit, sacrificandi tamen rationem non sustulit. Quare quemadmodum is qui colligeret nunc quoque agi Deo gratias oportere pro acceptis beneficijs, quia paschalis agnus à Iudæis in gratiarum actionem quotannis immolabatur, non ita carpi deberet vt diceretur ei quod sacrificium legis ad nos traheret, qui procul dubio nequaquam id faceret, sed illius sacrificij causam sequeretur: (Revera enim in magna etiam diuersitate factorum, eadem sæpe manet ratio faciendi:) ita nos quamuis ex Machabæi sacrificio pro defunctis oblato, colligamus nunc quoq; pro defunctis, pium esse preces fundere

R iij &

& sacrificium, non illud muti pecoris, sed hoc Dominici corporis offerre, non per fatuitatem sacrificium legis ad nos trahimus, sed sacrificandi causam prudenter attendentes, ex eadem suscipimus, quod pro tempore faciendum esse, diuinis edocti literis arbitramur.

Quibusdam Augustini locis quam abutuntur hæretici. CAP. X.

* *Præcedens*
lib. cap.
27. ex En-
chiridio.

ES T autem omnibus propè familiare, quod nec Aretius* antea præterijt, vt cōtra Purgatorium, illum detorqueant Augustini ex Enchiridio locū, vbi dicere fingatur, falli eos humana beneuolentia, qui aliquos opinentur, non æterno quidem illō, sed diuturno tamen igne puniendos. Non enim hoc dicit Augustinus; sed illos humana quadam beneuolētia falli docet, qui homines sceleratos, qui tamen Catholici essent, in suis licet criminibus ad finem vsque vitæ perseuerarent, asseriebant per ignem quendam saluos futuros. Quod à Catholicorum doctrina longè semper fuit alienum: Nam & contra hūc errorem scripsit Augustinus ipse librum, cui titulus est, De fide & operibus. Sed ipsa Diui Augustini verba ponam integrè, quæ illi mutilant ac deprauant. Creduntur (inquit) à quibusdam etiam ij qui nomen Christi non relinquunt, & eius lauacro in Ecclesia baptizantur, nec ab ea vllō schismate vel hæresi præcitantur, in quantissibet sceleribus viuunt, quæ nec diluant pœnitendo, nec eleemosynis redimant,

cap. 67.

mant, sed in eis vsque ad huius vitæ vltimum diem pertinacissimè perseuerent, salui futuri per ignem; licet pro magnitudine facinorum flagitiorumque, diuturno non tamen æterno igne puniri. Sed qui hoc credunt, & tamen Catholici sunt, humana quadã beneuolentia mihi falli videntur. Nam scriptura diuina aliud consulta respondet. Librum autem (inquit) de hac quæstione scripsi, cuius titulus est, De fide & operibus: vbi secundũ scripturas sanctas, quantum Deo adiuuante potui, demonstraui, eam fidem saluos facere, quam satis euidenter expressit Paulus Apostolus dicens: In Christo e- *Galat. 3.*
nim Iesu neque circũcisio aliquid valet, neque præputium; sed fides quæ (benè) per dilectionem operatur: Si autem malè & nõ benè operatur, proculdubio secundum Apostolum Ia- *cap. 2.*
cobum, mortua est in semetipsa. Cõtra eosdem agit Augustinus lib. 21. de Ciuitat. Dei, cap. 17. quos misericordes vocat, qui hominum Dei iudicio damnatorum, miseras temporales, postque eas, æternam felicitatem fore putabant. Quæ sententiã (inquit Augustinus) si propterea vera & bona quia misericors est, tantò erit melior & verior quantò misericordior fuerit. Extendatur ergo ac profundatur fons huius misericordiæ, vsque ad damnatos angelos, saltem post multa atque prolixa quantumlibet sæcula liberandos. Hæc Augustinus: quem proculdubio sic loquẽtem, & ita suis instructum plu-
mis, quas detrahunt, pro sua hæresi proferre

R iiij vere-

vererentur. At hic istorum mos est, ut vnde-
cunque collectis quasi quibusdam verborum
flosculis, suas ornent sententias: non quod ma-
gnificiāt Veterum libros vnde illa decerpunt;
sed partim ut fucum faciant imperitis, partim
ne omni illorum patrocinio destituti esse vi-
deantur. Itaque & Calvinus postquā in hoc de
oratione pro defunctis argumento, totius ve-
rustatis consensum suā pedibus superbiæ satis
conculcasset, tandem addidit, nonnulla etiam
Veterum testimonia proferre non difficile sibi
fore, quæ totas illas pro mortuis preces, quæ
tunc vlitatæ erant, manifestè evertunt. Nonne
hic vides Augustinum obijci? non quia vel tan-
ti sit Augustinus, cuius testimonium etiā con-
tra illas preces quæ tunc fiebant, produca-
tur; sed ne nihil omninò indè quoque videatur
potuisse desumi, quod ad causam pertineret.
Quid autem illud est Augustini? Videlicet quia
resurrectionem carnis & æternam gloriam ex-
pectari docet ab omnibus: requiem verò quæ
post mortem sequitur, tunc vnumquemque ac-
cipere, si dignus est, cum moritur. Quasi verò
in illa conditione quam interponit (Si dignus
est) difficile sit intelligere, ut non modò requie
aliquando tribuēda dignus esse debeat, verum-
etiam dignus, quam statim post mortem acci-
piat? Idque sine controuersia certū est, vnum-
quemque piorum simul ac moritur, requiem
accipere, si dignus est qui eam post mortem sta-
tim accipiat. Quod ad illam quoque transferri
sen-

In Iohann.
scilicet 49.

sententiam potest quæ profertur ex libello de Vanitate sæculi, & alias si quæ interdum repariantur consimiles. Namque & illo eodem Tractatu, declarat Augustinus diuersas animarum esse custodias receptionesq; diuersas cum hinc emigrarint; multumq; interesse quali custodia quisque excipiat, postea ad Iudicem producendus. Quomodo videlicet in sæculo (talem enim affert similitudinem) receptiones in custodia pro meritis caussarum adhibentur; alios iubentur custodire lictores humano & miti officio atque civili; alij traduntur optionibus; alij mittuntur in carcerem; & in ipso carcere, non omnes, sed pro meritis caussarum, in ima carceris contruduntur. Hæc Augustini omnia, causam nostram magis adiuuant, quam infirmant. Quamuis & alias clarè doceat quosdam recipi statim in beatas illas cælorum sedes, nullis post mortem interuenientibus pœnis purgatorijs; vt paruulos regeneratos in ipsa infanti ætate decedentes: alios verò multos, non mox eò migrare post mortem, sed ante quibusdam purgatorijs pœnis expiari. Tanta enim (inquit) in vasa misericordiæ quæ præparauit in gloriam, Dei misericordia est, vt etiam prima hominis ætas, id est, infantia, si Sacramenta Mediatoris acceperit, etiam si hanc in eis annis vitam finiat, translata scilicet à potestate tenebrarum in regnum Christi, non solum pœnis non præparetur æternis, sed ne vlla quidem post mortem purgatoria tormenta patiatur.

Cap. 1. habetur
Tomo 9
operū Aug.

Lib. 21. de
Citat. c. 16.

R v

Suf-

Sufficit enim sola spiritualis regeneratio, ne post mortē obsit quod carnalis generatio cum morte contraxit. Cum autem ventum fuerit ad ætatem quæ præceptum iam capit, & subdi potest legis imperio, suscipiendum est bellum contra vitia, & gerendum acriter, ne ad damnabilia peccata perducatur. Paucissimi autem sunt tantæ felicitatis, ut ab ipsa ineunte adolescentia nulla damnabilia peccata committant; vel in flagitijs, vel in facinoribus, vel in nefarijs cuiusquam impietatis errore, sed magna spiritus largitate opprimant, quicquid in eis posset carnali delectatione dominari. Plurimi verò præcepto legis accepto, cum prius victi fuerint prævalentibus vitijs, & prævaricatores eius effecti, tunc ad gratiam confugiunt adiuuantem, qua fiant & amarius poenitendo, & vehementius pugnando, prius Deo subditi atque ita carni præposita mente victores. Ex hac ergo præcipuè multitudine, volens Augustinus intelligi veniri post mortem in purgatorias quasdam poenas, subiungit: Quisquis ergo cupit euadere poenas sempiternas, non solum baptizetur, verumetiā iustificetur in Christo, ac sic verè trāseat à diabolo ad Christum. Purgatorias autem poenas nullas futuras opinetur, nisi ante illud vltimum tremendumque iudicium. Quibus verbis planissimè declarat, ante illud extremum iudiciū, purgatorias quorundam poenas futuras: non autem post illud iudicium. Id quod contra Platonicos dictum est, qui omnes omninò futuræ quo-

quoque vitæ afflictiones, purgatorias esse censabant; cùm inter Christianos cõstet damnatorum & dæmonum pœnas, purgatorias non esse futuras. Intelligendus autem est dicere, ante illud extremum trēmendumque iudicium, id est, antequam peractum & completum sit; ne præiudicare putentur ea verba, illi sententiæ Apostoli, qua declarat in ipso iudicio extremo, cum Dominus ad iudicium igne præcedente veniet, quosdam igne purgandos esse; quemadmodum Apostoli verba Catholici tractatores acceperunt.

Quod rursum idē Augustinus scribit, in re-
 quie esse animas piorum à corpore separatas;
 impiorum autem, pœnas luere: satis ex antec-
 edentibus intelligi potest, ad quorum sit piorum
 animas referendum; eorum nimirum quos &
 initio capitis dixit, pro veritate fideliter & lan-
 dabiliter mori; & proximè ante illa quæ obij-
 ciuntur verba, dicit fortiter mortē tolerare, pro
 tenendo vel adipiscendo summo bono. Nam
 pijs licet omnibus communis sit quies in tran-
 quilla securaq; cōscientia, propter quam etiam
 dormire dicuntur in somno pacis; tamen quin
 requie pleniore fruantur martytes, vt verè ex-
 cellenterque pij homines continuò post mor-
 tem, dubium non est: quandoquidem & non
 percepto regenerationis lauacro, si pro Christi
 confessione moriuntur, tantum id his valeat
 ad dimittenda peccata, quantum si ablueren-
 tur sacro fonte baptismatis. Qui enim dixit;
 Nisi

*Lib. 13. de
 Civitate Dei
 cap. 8.*

- Joan. 3.* Nisi quis renatus fuerit ex aqua & Spiritu sancto, non intrabit in regnum cælorum; alia sententia istos fecit exceptos, ubi non minus generaliter dixit; *Qui me cōfessus fuerit coram hominibus, confitebor & ego eum coram Patre meo: Et alio loco; Qui perdiderit animā suam propter me, inueniet eam. Hinc & illud scriptum est; Pretiosa in conspectu Dñi mors sanctorum eius. Quid enim pretiosius quam mors, per quam fit vt etiam delicta omnia dimittantur, & merita cumulatiue augeantur?*

Fueritne quæstio de Purgatorio Diui Augustini ætate controuersa.

C A P V T X I.

- V** Ideo tamen nonnullos hoc nomine sibi applaudere in hac controuersia, quod & Augustini ætate fuerit res ea controuersa, vt ne inter Catholicos quidem satis constiterit, quid esset ea de re sentiendum. Hoc autem vt aliquo probent argumento, proferunt Dulcitij quæstiones ad Augustinum, inter quas vna sit eiusmodi proposita verbis: Vtrum oblatio quæ fit pro quiescentibus, aliquid eorum conferat animabus, cū euidenter nostris aut subleuemur actibus, aut grauemur: cū siquidem legamus quod in inferno nemo possit iam confiteri. Ad quod multi dicunt, quod si aliquis beneficij in hoc locus possit esse post mortem, quanto magis sibi anima ferret ipsa refrigeria,
sua
- Quæst. 2.*
Tom. 4.

sua per se illic confitendo peccata, quam in eorum refrigerium ab alijs oblatio procuratur? Hæc igitur Dulcitij propositio, sed Dulcitij filij non Episcopi, non Ecclesiæ pastoris fuit. Nam Paulinus quidem ipse Nolanus Episcopus, ad quæ conscriptis literis se rem hanc attigisse subiungit, nō id interrogauerat; sed de eo cōsuluerat Augustinū; Vtrum sepultura quæ fit in memorijs Martyrū, prosit aliquid spiritibus mortuorum. Deindè, cuius hoc circumspectionis est, vt vnius priuata quæstio plenioris doctrinæ capiendæ gratia proposita, publicam putetur inter Catholicos controuersiam demonstrare? Quamuis enim multos ille dixerit hoc mouere, quōnam modo huic alieno refrigerij beneficio locus esse queat post mortem, cū multò magis id sibi quisque sua confitendo peccata post mortem esset præstiturus; tamen aliud est quid Ecclesiæ pastores moueāt, quorum est aliorum esse Doctores, aliud quid subditi & auditores. Multum etiam interest quid mota quapiam quæstione admirationem teneat ignorantium & discere cupientium; & quid asserat pertinacia contradicentium. Denique, si publicas in Ecclesia turbas aduersus tam vetustam tamque publicam & vniuersalem Ecclesiæ consuetudinem orandi pro defunctis, res ea dedisset, non fuisset profectò satis Augustino paucis illam attingere, cū se rebus alijs pertractandis obtulisset occasio, sed quod alijs in rebus fecit, ex professo scripssisset, iustoque opere tam manifeste-

nifestum Ecclesiæ vniuersæ morem defendisset: Qui mos, tam ipsum quoq; mouerat Paulinum Episcopum, vt eo ipso ad aliud quiddam suscipiendum propensius moueretur. Aiebat enim, vacare non posse, quod vniuersa pro defunctis Ecclesia supplicare consuevit: Vnde colligebat etiā illud homini prodesse post mortem, si fide suorum humando eius corpori talis prouideatur locus, in quo appareat opitulatione etiam isto modo quæsitæ sanctorū. Sed vt tunc ad tantę tamque illustris consuetudinis improbationem, publicus error quam plurimos abripuisset, nunquid placet vt simili de causa toleranda videri debeat hoc tempore controuersia de personarum diuinarū distinctione? De filij, de Spiritus sancti diuinitate? de Christi vnica persona, aut eius vnus personę duplici natura? de rebus alijs iam quoq; publico & Protestantium & aliorum plerorumq; hæreticorum sensu damnatissimis? Imò verò si tunc ista res tantam altercantium conflictationem habuisset, quantam habuit vnquam vlla alia de Religione mora disputatio, quoniam tamen in eo tanto conflictu, vetus consuetudo & antiqua traditio valuisset, & vsque ad hanc ætatem victrix euasisset, quemadmodum vsque ad illam ætatem Augustini, ab ipsis Ecclesiæ primordijs in Ecclesia Christiana vigerat, multò profectò magis eam nunc, vt solida veritate subnixam, venerari & firmitus tenere deberemus, minimeque eam controuersiam existimare ferendam

dam esse, quæ tanquam non satis discussa prius quaestione, aut nondum satis eliquata veritate, rursus sibi ex integro iudicandi sumeret libertatem.

Quod Purgatorij assertio magis illustret vim Dominicæ passionis. CAP. XII.

QUod autem clamitant detrahi sanguini Mediatoris, Purgatorij huius assertione; multum profectò sua opinione falluntur. Quis enim iuxta Dei verbum, & vberius & magnificentius illius meriti vim prædicet; quam is qui doceat eam non in hoc modò sæculo valere, verum etiam vsque ad ipsos inferos penetrare? Illi præfigunt Agni misericordiæ in hac terra limites: nos etiam pro defunctis fidelibus precamur; Agnus Dei qui tollis peccata mundi, dona eis requiem. Illi profusissimam Mediatoris indulgentiam ad solos porrigi patiuntur mortalem hanc agentes vitam: nos eius pro defunctis implorantes gratiam, dicimus; Qui Lazarum resuscitasti à monumento factum, tu eis Domine dona requiem & locum indulgentiæ: Illi exuberantes gratiæ riuulos, huius vitæ breuissimæ sine præcidunt: nos precamur per illius Agni meritum, vt quæ per fragilitatem humanæ conuersationis peccata commissa sunt, in altero quoque sæculo, venia misericordissimæ pietatis abstergat: Illi Christo dicunt; Misereere eius hic, quoniam ibi iudex eris: nos cum Paulo dicimus; Det illi Deus inue-

inuenire misericordiam, etiam in illa die. Breuiter, sic Agni prædicamus misericordiam, ut eam & in cōuersione peccatoris, & in iusti perseuerantia, & in ipso etiam quo coronandi sumus, iudicio celebremus: Non ignari scilicet *Psal. 102.* scriptum esse; Qui coronat te in misericordia & miserationibus. Quod autem hic obijciunt ab Hieronymo dici in *Psal. 103.* Hic misericordem esse Deum, ibi iudicem; facile apparet locum inspicienti esse ridiculum, cum apertè profiteatur aduersus illos agere se, qui dicant in inferno esse pœnitentiam & resipiscentiam peccatorum.

Quemadmodum circa locum *Matth. 12* de peccato in Spiritum sanctū non remittendo neque in hoc sæculo neque in futuro, se torserit Theodorus Beza in suis annotationibus. CAP. XIII.

M Inimè molestum putauero si huc & illud reiiciam, quod apud Theodorum Bezam non sine voluptate legere me contigit, de loco *Matthæi 12.* quem ante tractauimus. Valdè enim cōducit ad perspiciendam loci firmitatem pro austruendo Purgatorio, si animaduuerterimus tot interpretationū laboriosissimè quæsitatum cuniculis, quam frustra illi conentur elabi. *Notum est* (inquit Beza) *cuius Christiano, duplicis vite sine duplici sæculi mētionem fieri in sacris literis. Quorum unum ab eo die incipit*

incipit quo nascimur, & huius vita spatium terminatur: alterum vero ab eo die quo morimur initium capit, estq; infinitum. Ceterum quia peccatorum remissio quam quispiam in ipso mortis articulo consequitur, propria respicit futurum seculum, ideo, opinor, dixit Christus fore, ut blasphemia in Spiritum sanctum, neque in hac vita constitutis, neque etiam morientibus, id est, nunquam remittatur: quum alioqui multa in hac vita remittantur, & rursus multorum absolutio in extremum vitæ momentum differatur. Hæc Beza.

Qui cum dissimulare non posset aliquam dari significationem remittendorum peccatorum in futuro sæculo; idq; nobis ingenuè concederet, laborat in eo ut ostendat ubi & quando illa præstetur futuri sæculi remissio. *Nempe (inquit) in morte, aut in extremo vitæ momento, seu ipso mortis articulo.* Atqui non paululum ista differunt, neque nihil interest quid horum exprimatur. Nam si dixerit [In futuro sæculo, id est, in extremo vitæ momento] ostendere debet quonam modo extremum vitæ momentum non huius sæculi sit. Tota quippe hominis vita, usque ad ipsum mortis punctum, sæculi huius est non futuri. Extremum autem vitæ, proculdubio ad aliquam pertinet vitæ partem; cum nequeat idem esse extremum vitæ & mortis principium, nisi mortem velimus in eodem cum vita coniungere. Hoc igitur absurdi continet ista interpretatio, quod dum accuratè nititur sæcula distinguere, tamen ea confun-

S fun-

fundere cōvincitur, sæculum futurum eo puncto temporis accipiens, quo adhuc sæculum est præsens, propter vitæ huius mortalis vel extremam partem. Quod si intelligit extremum vitæ punctum, quo iam ipsa vita extincta est, vt ipsum sit mortis momentum quo verè dixeris iam non viuere hominem sed mortuum esse; Agnosco sanè hic futurum sæculum, sed agnoscat ille quoque vicissim oportet, remissionem quæ post hanc vitam fiat, & animæ seiunctæ à corpore iudicium hac misericordia temperatum, vt aliqua detur ei remissio peccatorum. Quod si dederit, fateri cogetur hominem quamuis iustum & mortis æternæ reatu absolutum, à quibusdam adhuc quæ restent peccatorum vinculis absoluendum mox à morte; aut certè & ipsum damnationis æternæ vinculum, post huius terminum vitæ resolui; animamque non iustificatam in hoc sæculo, in altero demum iustificari. Dic ergo, Beza, clarè, quodnam istud est sæculum futurum? quando (ais) quisque moritur: Ergone (inquam) moritur homo corporis etiam morte in sæculo futuro? Quin igitur & morientis lectulum ad futurum sæculum eadem opera transferimus? Quod si ipsum mori, huius sæculi est non futuri; profectò non rectè dixeris, In futuro sæculo, id est, cum moritur. Dic ergo rursus, quid intelligi velis per hoc ipsum [cum quisque moritur, aut ipsum mortis momentum?] An tempus id quo anima iam est auulsa à corpore? sed id

Id tempus te minimè iuuat, quemadmodum ex antedictis intelligi potest. An vitæ pars extrema proximè ante ipsum mortis punctum? sed illa multò magis huius sæculi est, quam ipsa vitæ extinctio. Quoquo te veritas igitur, Beza, fatearis necesse est, vel in hoc sæculo fieri istam quam vis remissionem; aut verum esse quod docemus, remissionem aliquam fieri peccatorum circa animam à corpore separatam, prius tamen iustificatam cum adhuc hæreret in corpore mortis huius. Et quia nobis ipse, quæ es subtilitate, quæstionem hanc ad temporis punctum reuocas, trium ego tibi punctorum optionem do: Vnius proximè ante extinctionem vitæ: Secundi, in ipsa extinctione: Tertij, post extinctionem, cum est anima iam exuta corpore, ad diuinum producta iudicium. Duo priora si eligis, damnes necesse est interpretationem tuam de futuro sæculo, cum sit vtrunque huius sæculi. Sin tertium amplecteris, in nostra, velis nolis, castra partesque trāseundum est. Quod si contenderis vnum idemque esse momentum, eius quod dicitur mori & mortuum esse; seu animam à corpore separari & separatam esse, illamque nobis disputationem refrices, quæ apud Augustinum lib. 13. de ciuit. Dei à cap. 10. per aliquot sequentia subtilissimè producit, nos de eo nobis contendere non necesse esse putabimus: & si tria nolis tibi momenta dari, duo si voles dabimus; vnum proximè ante animæ discessum; alterum post

S ij disces-

discessum : Quorum quidem momentorum priore adhuc viuitur , posteriore non viuitur : & illud quidem huius sæculi constat esse ; istud verò sæculi futuri esse donabimus. Horum ergo alterū si deligis , quo plena fiat peccatorum remissio ; tunc velea huius tantum sæculi est, vel futuri. Si hoc annueris, plenam cuique remissionem dari in ipsa vitæ extremitate ; cum adhuc tamen viuitur , sed quomodo ab ijs qui animam agere dicuntur ; ergo omnis remissio datur in hoc sæculo : Sin aliqua derur extincta iam vita ; ea vel est in solutione reatus damnationis æternæ , vel temporariæ duntaxat pœnæ sita , vel in vtroque simul . Si coniunctim in vtroque ; quoniam remitti negatis vnquā peccatum posse quin plenè simul quoad culpam & pœnam aboleatur ; fatendum igitur erit quemquam iustificari post hanc vitam , qui cum viueret non fuerit iustificatus : quod quidem est absurditatis non ferendæ plenissimum. Sin remissionem culpæ in ipso quidem vitæ vel extremo tempore posueris , pœnæ verò remissionem extincta iam vita , id est , cum homo sic moritur vt eodem puncto mortuus sit , quæadmodum dicimus aërem eodem temporis puncto & illuminari & illuminatum esse , tunc saluum relinquitur nobis assertionis nostræ fundamentum , quo statuimus non plenam semper homini simul remissionem peccatorū contingere , sed remissa hic culpa , post hanc vitam pœnæ temporariæ obligationem resolui ; & quæ hic

hic remissa non sint peccata, tunc remitti. Veruntamen etsi maximè sentiendum sit, eodem temporis puncto hominem mori & mortuum esse, tamen negari non potest quin ipsum mori, siue animam à corpore diuelli, ad hoc sæculum pertineat: Vt enim ingressus animæ, ita & egressus, sæculi huius est; ideoque si qua fieri ponatur eodem puncto remissio, ea profectò sæculi huius erit, nec magis futurum sæculum respicit, quàm quæ cuiusque in baptismo longè ante mortem facta sit. Sed audiamus quæ sequuntur.

Præterea (inquit) quamuis nulla peccata post mortem propriè remittantur; sed vel in vita, vel in ipsa morte: tamen quia huius remissionis plenum fructum non percipient fideles nisi ab extremo illo die iudicij futuri, videtur quodammodo ipsa peccatorum remissio in illum diem differri, ac vicissim declaratio eorum quæ hic non fuerint remissa.

In his verbis tria illa licet animaduertere momenta, quorum prius optionem dedimus. In vita, in morte, post mortem: siue quemadmodum illa Diuus Augustinus expressit; vnum ante mortem; secundum in morte; tertium post mortem: quibus singulis tria ista singula redduntur, viuens, moriens, mortuus: eaque vulgatio & promptior animorum conceptio est. Sed tamen aliam iam expositionem adiungit, ne forte in priore non satis firmiter, solideque consisteret: vt nimirum intelligatur in futuro sæculo, id est, in extremo iudicio futura remissio, quia tunc plenè fructus eius percipietur à

*Lib. 13. de
Cinita. Dei
cap. 110.*

S iij fide-

fidelibus. Verum hæc quoque improuidentia
 puerilis euasio est. Primum, quia tunc dicen-
 dum erit, omne peccatum remitti in futuro sæ-
 culo, & ipsam quoque iustificationem ac re-
 generationem fidelium, in futuro sæculo fieri;
 propterea quod eius fructum plenè fideles non
 percipient, nisi in extremo illo iudicij die, cum
 resurgēt ad beatam immortalitatem. Nec con-
 sistet iam illa distinctio significata Euangelij
 verbis, quædam peccata remitti in hoc sæculo,
 quædam in futuro; aliæ neque in hoc sæculo,
 neque in futuro. Deinde quid alienius, vel à
 communi sensu, quàm vt intelligatur remissio
 peccatorū fieri, in ipso beato illo regno, quo ne-
 mini patere potest ingressus, nisi remissis prius
 peccatis? Atqui in eo demum regno, plenus
 accipitur remissionis fructus. Rursum, si pro-
 pterea tunc fiet peccatorum remissio, quia eius
 ibi percipietur plenus fructus; licebit pari ra-
 tione futurum dicere, vt & tum diabolo resista-
 tur & peccato, atq; aduersus tentationes carnis
 adhuc spiritus cuiusque luctetur: quoniam ibi
 percipietur huius quoq; pugnae fructus. Quod
 si absurdè, nec sine proximo merita irrisu-
 periculo, dixerimus certamen ad tempus dif-
 ferri coronæ; & agriculturam ad tempus mes-
 sis; & præparatoria rudimenta ad tempus per-
 fectionis atque splendoris; absurdum & hoc e-
 rit, peccatorum remissionem ad tempus perci-
 piendi ex ea fructus distulisse. Est enim ea præ-
 uia quædam præparatio atque purgatio, quam
 idcir-

idcirco priorem cogitari oporteat beati illius regni consequutione. Cuius etiam erat prudentia dicere; Non remittetur, neque in hoc sæculo, neque in futuro, quando palam sit plenum remissionis fructum à nemine percipi in hoc sæculo? Hoc igitur tantummodo dici oportuerat; Qui peccauerit in filium hominis, remittetur ei in futuro sæculo, quia poterit ad beati illius regni possessionem peruenire: sed qui peccauerit in Spiritum sanctum, non remittetur ei in futuro sæculo; quia damnabitur, regnoque illo beato excidet. Vt nimirum remitti peccatum in futuro sæculo, sit beatum fieri & à Domino coronari: non remitti verò, sempiternis addici tormentis. Verum multò aliter Christus Dominus, cuius in verba nihil otiosum, nihil superfluum cadere potest; Non remittetur (inquit) neque in hoc sæculo, neque in futuro. Nec remitti peccatum, est donari præmium, sed per condonationem non exigi supplicium: peccato enim pœna debetur; iustitiæ præmium redditur. Et quia indulgentia quæ pœnam relaxat, prior esse debet remuneratione iustitiæ, necesse est vt si ad extremum iudicium differatur ista remissio, aliquæ tunc iustis hominibus relaxentur pœnæ, priusquam iustitiæ suæ præmio munerentur. Quo loco si responderit, non se dixisse remissionem differri vsque ad extremum iudicium; sed vsque ad id tempus videri dilatam: nos ex aduerso referemus significasse Dominum remissionem tri-

S iij

buc-

buendam in altero illo sæculo; nec quid videatur futurum, sed quid futurum sit indicasse. Deinde, *videtur* (inquit) *quodammodo ipsa peccatorum remissio, in illum diem differri*. Si videtur, verène an falsò? si videtur, & non est; ut quid ad explicationem Dominicorum verborum talis adhibetur error? cur falsitatis tenebræ ad illustrationem veritatis inferuntur? Sin ita ut se res habet, videatur; differtur ergo quodammodo usque ad extremum iudicium, omnis omnino remissio peccatorum: unde colligo sic quoque differri fatendum esse, & fidem & cordis conuersionem, & quicquid hic rectè geritur; quia nec fidei nec iustitiæ fructus plenè vnquam nisi ab extremo illo iudicij die, capietur. Et hactenus quidem de præclaro illo Bezae commentario.

In locum 1. ad Corinth. 3. quid Theodorus Beza notauerit contra Purgatorium.

CAP. XIIII.

FAcilè apparet hic quoque quam laborent, cum ad solius doctrinæ superædificationem referunt Pauli locum. Ait enim Beza, *aberrare à scopo, qui ad doctrinas verbo Dei vlla ex parte contrarias hanc Pauli similitudinem accommodant: in quibus etiam numero* (inquit) *ciborum delectum, dierum & vestrum discrimina; reliquiarum venerationem, & cetera id genus*. Aber-
rauit ergo, Beza, à scopo tuus Caluinus, cuius
in

in Institutione verba sunt. *Eos ecclesia Paulus Lib. 3. c. 3.*
Architectes notat, qui retento legitimo funda-
 mento disparem materiam superstruunt, hoc est,
 qui non deflectentes à præcipuis & necessarijs fidei
 capitibus, in minoribus nec ita periculosis halluci-
 nantur, commenta sua Dei verbo admiscentes.
 Tales inquam operis iacturam facere oportet,
 abolitis eorum commentis. Ipsi autem salui fiunt,
 sed quasi per ignem; hoc est: non quod eorum igno-
 rantia & hallucinatio coram Domino sit proba-
 bilis; sed quia Spiritu sancti gratia & virtute ab
 illa repurgantur. Proinde quicumque auream di-
 vini verbi puritatem, isto purgatorij stercore in-
 fecerunt, operis iacturam facere necesse est.

Hæc Caluinus; Planè & apertè significans
 intelligere se hoc loco, etiam illas doctrinas,
 quæ verbo Dei aliqua ex parte repugnent, modò
 non deflectant à præcipuis, & necessarijs fidei
 capitibus. Quin & de hac ipsa Purgatorij do-
 ctrina, subiunxit exemplū; Quod eo modo, nisi
 ineptè, contexi non potuit, si noluerit hanc de
 Purgatorio doctrinam, ad ea quæ superædificā-
 tur ligna, fœnum, & stipulam pertinere. Cùm
 hoc ergo, Theodote, te committo: Tu illi dici-
 to: Chare præceptor, quid tibi in mentem ve-
 nit? vllāno doctrina verbo Dei repugnans po-
 terit cum fundamento coherere? An non eo
 duntaxat nomine reprehendit Corinthiorum
 doctores Apostolus, quod curiosis argutijs &
 humanæ potius quàm diuinæ sapientiæ dediti
 essent, non quia falsam doctrinam annuncia-

S v rent?

rent? Iam quid minus ferendum sit, quam exemplum poni doctrinæ de Purgatorio? Nonne paulò ante dixeras in Institutione tua, clamandum esse non modò vocis, sed gutturis ac laterum contentione, Purgatorium exitiale Sathanæ esse commentum, quod Christi crucem euacuat, quod contumeliam Dei misericordiæ non ferendam irrogat, quod fidem nostram labefacit & euertit? Quid enim illis est Purgatorium nisi quæ post mortem à defunctorum animis pendatur pro peccatis satisfactio? Ea verò quo modo Christi satisfactionem illam vnicam non euertit? Hæc erit Theodore iustissima tibi cum præceptore tuo expostulatio, si verior est tuus commentarius quàm illius: quem tamen & Lossius & Benedictus Aretius ea in parte sequuti sunt. Sed in hac te cum tuis pugna non inuitus relinquam, id obiter admonens quàm & laborent, & malè inter se consentiant, qui referunt Pauli locum ad superædificationem doctrinarum. Cur ergo non potius illum teneant sensum, qui superædificationem etiam ad priuatorum hominum vitam & actiones extendit? At subiungit Beza, *hos multò longius excurrere, qui ad priuatorum vitam & actiones hoc referant.* Non video cur excurrant, quamuis ampliore loci expositione delectentur, quæ non solum priuatim operantium, verum etiam publicè prædicantium labores compræhendar. Omnes enim superædificant pro suo quisque vitæ instituto, mercedem accepturi, aut
statim

statim, aut interueniente purgatione, secundum laborem atque intentionem suam.

Deniq, longissimè (ait) atq, adeò in contrariam partem feruntur, qui hoc loco Purgatorium suum ignem extruunt; sed benè habet, quod is ex ligno, feno & stipula sit extructus, ut nihil mirum sit illum nostra memoria Dei flamma rursus accensa, magna ex parte conflagrasse.

Quid, hoc rogo, Theodore, profuerit, si multorum in cordibus Purgatorium vestræ hæresis communi incendio ad id conflagratit, ut inde cæcis & improuidis maior gehennæ flamma consurgeret? Vnum ignem frustra nitimini extinguere, ut alium vobis grauiorem funestiorémq; reddatis: Purgationem tollitis, ut vestris in sordibus pereatis. Sed benè habet, quod è cordibus multorum dissipatum esse dicas: Non enim in te propterea esse desijt, quia in cordibus vestris perierit. Verborum vestrorum flatribus tenue fidei lumen extinguere in ijs qui vos libenter audiunt, potestis: scripturas nobis adimere, quibus vestra coarguatur perfidia, non potestis.

Sed praeclaros (inquis) istos architectos opus suerat suo saltem Gregorio assentiri. Is verò libro Dialogorum quarto, capitulo 39. quum aliquos scriptura testimonia citasset. Ex quibus (inquis) sententijs constat, quia qualis hinc quisque egreditur, talis in iudicio presentatur. Sed tamen de leuibus quibusdam culpis, ante Iudicium purgatorius ignis censendus est: Nam cum Paulus dicat

cat Christum esse fundamentum, atque subiungat; Si quis superadificauerit, &c. quāuis hoc de igne tribulationis in hac nobis vita adhibere possit intelligi: tamen si quis hoc de igne futurae purgationis accipiat, pensandum sollicitè est: quia illum per ignem dixit posse saluari, non qui super hoc fundamentum ferrum, æs, plumbum edificat, id est, peccata maiora; sed lignum, fœnum, stipulam. Hac (inquit) Gregorius, & Papa, & Diuus, & Doctor, ut volunt, irrefragabilis.

Facimus, Theodore, quod dicis fieri debuisse; Assentimur lubentes Gregorio, ut & Pontifici, & diuo, & doctori in Ecclesia Dei iure colendo. Nam esse purgatorium ignem credimus post hanc vitam, quemadmodum id ille citatis verbis pro indubitato se habere demonstrat. Non enim consequens est, ut rem pro incerta habuerit, si de loci vnius expositione dubitarit. Veruntamen ne id quidem vtrum accipiendus esset de igne futuræ purgationis Pauli locus, dubium reliquisse videbitur penitus introspectanti: sed hoc potius significasse, quod Apostolus dicit de probatione per ignem, intelligi posse fieri in hac vita, quod attinet ad ipsum probationis genus, & in quibusdā superadificantibus; non autem hic totum illud impleri quod ait, Vniuscuiusq; opus quale sit ignis probabit. Quod autem subiungit: Si quis de igne futuræ purgationis accipiat, &c. non est ambigenti de intellectu, sed cautionem præscribentis ne in eo cōtingat error, quo putetur etiam sceleratos
in eo

in eo iudicio per ignem posse saluos euadere. Cùm enim verisimile sit Diuum Gregorium cùm id diceret ad Augustini tractationes respexisse; quònam modo induxisset in animum vt existimaret generalem illam omnium superædificantium probationem in hoc mundo fieri, quod neque putauit Augustinus, neque etiam credi sine absurditatis nota possit? Nam quod fabulantur quadruplicem ab Augustino tradi loci eius explicationem, lib. 21. de ciuit. cap. 26. ex ea profectum inscitia est vel fraudulentia, qua pars expositionis, pro tota explicatione simplicioribus obtruditur. Quippè quod Apostolus dixit de hominum purgatione & probatione, varijs id quidem modis & temporibus opinatus est, etiam hac in vita, circa fideles fieri: at nunquam perfici seu generaliter compleri, nisi in extremo illo tremendoque iudicio.

*Vide libri
prioris, cap.
15.*

SECVNDI LIBRI FINIS.



TERTII LIBRI

PROOEMIUM.

VT ij qui munitas arces aut vrbes
 obsident, nihil patiuntur in vici-
 nia consistere, vnde retardari aut
 frustrari queant oppugnantium conatus:
 ita Benedictus hic noster tanquam indu-
 strius scilicet ac circumspectus castro-
 rum princeps, cum animaduertet e vici-
 no Limbo, non mediocriter sua in Pur-
 gatorium tela frustrari, in id separatim
 incubuit, vt hanc quoque demoliretur
 inferorum mansionem; forsitan & Tar-
 tarum aggressurus aliquando, vt nec dæ-
 monibus quidem ipsis apud inferos lo-
 cus esse possit. Est enim nonnullorum,
 hac tempestate, illa cognita progressio,
 vt sublati Limbo & Purgatorio, tan-
 dem nec Infernum damnatorum crede-
 rent esse vllum: Sic enim impius, cum
 in profundum venerit, omnia contem-
 nit.

Ysaia. 18

LIMBO PATRVM,

LIBER TERTIVS.

Quæ sit Catholicorum de Limbo
sententia. C A P V T I.



An prius quidem Aretius Catholicorum explicat de Limbo sententiam: Postea sic refellit, ut nullum omninò Limbū fuisse demonstrare nitatur. *Limbū* (inquit) vocāt infernī partem superiorem, in qua detenti sunt salvandī patres, quovsq̃ue debitum primi parentis solveretur per mortem Christi. Quem locum *κόλποι*, id est, sinum *Abrahe* dici volunt à Christo, *Luca* 16. Et apud *Hebræos* *גִּרְגֵּז* hoc est, *Ligatorium* vel *conservatorium* esse. 1. *Regum* 25. Et erit anima Domini mei ligata *גִּרְגֵּז* *גִּרְגֵּז* in *ligatorio* viventium. Quæ ut rectius intelligamus, sic accipite. Qui hāc doctrinam de Limbo patrum & *Purgatorio* defendunt, statuerunt duo loca seu receptacula animarum; vnum gloriæ; alterum miserie & pœnarum. Gloria locus est calum ipsum, in quo sit vita aeterna, & vera *πλεθυσία* rerum omnium: sed ante Christi aduentum animabus nondum patuisse. Pœnarum locum distinxerunt in plura receptacula, vel domicilia ac mansiones: Nam pœna illa aut sensum habent aeternum

pœna-

pœnarum; In quo loco soli sint damnati impij,
 quibus nulla sit spes liberationis. Hic locus pro-
 prie infernus dicitur, & infernus inferior; quia
 infimum sit domicilium totius inferni: Aut pœna
 sunt cum sensu coniuncta, sed ad tempus solum.
 In hac mansione sunt ab illis constituti, qui post
 mortem, liberationem expectare possunt peccato-
 rum; ideoq; purgatorium ijs est attributum. Ac
 collocant purgatorium supra tartarū illum dam-
 natorum, tanquam in secunda mansione vel inter-
 stitio: Aut pœna illa nullum habent coniunctum
 sensum, sed privatio est solum melioris & perfe-
 cti boni, ideoq; damni appellantur; quia damnum
 tantum sit in mora: Estq; conclave hoc tertium,
 seu in tertia contignatione totius inferni; & Lim-
 bum appellantur, in quo conclusi manserint Pa-
 tres vsque ad Christi aduentum. Sed qui diligen-
 tius inspexerūt regiones illas, & infernum lustra-
 runt, dicunt Limbum hunc geminum esse; alium
 patrū, de quo iam diximus, eumq; euacuatū Chri-
 sti descensu; aliū verò infantium, qui sine baptismo
 decedunt, qui indies magis magisq; cōpleatur vsq;
 ad nouissimū iudicium, quo sint resurrecturi etiam
 atate perfecta, annorum circiter triginta trium;
 deinceps verò, vbi sint mansuri, ignorant. Ex
 his facile animaduertitis, infernum tanquam in-
 tegrum adificium, distinctum esse in quatuor con-
 tignationes. Infima, in ipsis fundamentis & cen-
 tro totius, damnatos sine spe retinet. Superior, qua
 secunda dici potest, purgandos habet, & inde pur-
 gatorium; Et rectè in secunda contignatione, ut
 ignis

ignis damnatorum ad hos penetrans, eosdem expurget. Tercia contignatio infantes innocentes recipit, Limbus infantum dicta. Quarta demum & supremamansio, patrum fuit Limbus, iam vacuus, translatis patribus à Christo, in ipsam caelam & vitam æternam.

Hactenus Aretius, de Limbo cæterisque inferni mansionibus, scholasticam sententiã explicauit; subindè tamen eam & ironiæ suæ felle tingens, & proprii sensus insperione tanquam fermento deprauans. Nam vt diuinationem de triginta trium annorum ætate præteream, infantes quidè ipsi qui sine baptismo ex hac vita decesserunt, quis dixit catholicus paulò instructior, nescire se vbi post resurrectionem mäsuri sint; cùm inter omnes eruditos constet, illos in æterna apud inferos damnatione mansuros? Siue enim ignis sensu, sed leuissimo torquébuntur (quod videtur nonnullis) siue à facie Dei proiecti, sine tali cruciatu, soloque affectu tam funestæ priuationis damno iacebunt (quæ receptior apud Scholasticos authores opinio est) tamen & in damnatione, & in morte æterna cum diabolo & angelis eius futuros, nulli inter catholicos mediocriter instituto dubiũ esse potest: Iudiciũ enim (inquit Apostolus) ex vno in

*Thomas in
3. parte 4.
52. art. 7.*

ROMAN. 5.

T rectio-

Cap. xlviii.

Lib. 9. 20

Lib. 6. 16.

rectionem, sicut ante quoque fuit extremum æternumque receptaculum, quamuis in eo pro meritis quique suis, pœnis afficientur disparibus: & leuissima sine dubio paruuli, quemadmodum etiam perspicuis verbis scriptum reliquit Augustinus. Ideoque inter fidei regulas ponere non dubitauit Sanctus Fulgentius scribens de fide ad Petrum Diaconum, id quod eiusmodi expressit verbis: Qualitas malæ vitæ ab infidelitate incipit, quæ ab originalis peccati reatu initium sumit, In quo quisquis viuere ita incipit, vt ante finiat vitam quam ab eius obligatione soluatur, si vnus diei vel vnus horæ spatium anima illa vixit in corpore, necesse est eam cum eodẽ corpore interminabilia gehennæ sustinere supplicia, vbi diabolus cum angelis suis in æternum arsurus est, qui & primus peccauit, & peccatum primis hominibus persuasit. Hæc D. Fulgentius. Quibus & illa sunt apud Gregorium Magnum persimilia: Nonnulli (inquit) prius à præsentī luce subtrahuntur, quam ad proferenda bona malæ merita actiuè vitæ perueniant. Quos quia à culpa originis sacramenta salutis non liberant, & hic ex proprio nihil egerunt, & illuc ad tormenta perueniunt. Quibus vnum vulnus est corruptibiliter nasci, aliud carnaliter emori. Sed quia post mortem quoque æterna mors sequitur, occulto eis iustoq; iudicio etiam sine causa vulnera multiplicantur. Perpetua quippe tormēta percipiunt, qui nihil ex propria voluntate peccauerunt. Sic Diuus Gregorius

de

de æterna damnatione non renatorum paruulorum. Quod autem dicit Ioannes, post extremum illud iudicium, mortē & infernum in stagnum ignis proijciendos, hoc opinor, significat: (quid enim melius? nam si quis dixerit nomine inferni diabolus, mortis vero peccatum designari, ostendat quonam modo de diabolo & morte possit intelligi quod proximè antecedit: Et dedit mare mortuos qui in eo erant, & mors & infernus dederunt mortuos suos qui in ipsis erant.) Illud ergo potius significat vsque ad extremum quidem iudicium, nō mortem solum fuisse extra illud stagnum, quoniam hic corporis dissolutione grassabatur; sed & infernum sic extitisse, vt aliqua sui parte stagnum illud ignis perpetui non haberet. At post resurrectionem carnis, neque mortem alibi quam in illo tartaro fore, vbi erit mors secunda, (nulli enim amplius super terram, carne morientur) neque inferni vllam aliam fore partem siue statum alium, quam eorum qui in illo æterno stagno, sint diuinæ visionis perpetua priuatione mulctandi. Quicunque enim præordinati fuerant ad vitam æternam, qui ad tempus inferni claustris tenebantur, in cælos tandem redditi immortalī & incorruptibili carne deferentur. Nunc interim sicut mors nondum est in solo illo stagno quam & hic iusti patiuntur, ita neq; infernus ad solum est stagnum ignis æterni relegatus, quoniam aliquos adhuc hominum spiritus complectitur, non addictos æternæ illi

T ij morti,

morti, sed suo tempore ad vitam beatam educendos; sicut & ante Christi aduentum sanctorum animos, qui hic in fide vixerant venturi mediatoris, complexus est: quo quidem locali situ, quâc dispositione mansionum corporea, haud satis exploratum, neque de eo nobis contendendum est: At quis cælesti adhuc domicilio priuarentur, sed in infernum aliquem locum demitterentur, donec eos inferni claustra restringens, Christus educeret, in Ecclesia Christi non est dubium. Verum quibus hoc tu machinis impetas videamus.

Quemadmodum in cælo apud Patrem, ita & apud inferos diuersas esse pro cuiusque meritis mansiones. CAP. II.

A Nimas piorum & impiorum in eodem domicilio statunt; contignationibus postea distinguunt, sine scriptura, quasi de arca Noë disserentes. Quis enim illis monstrauit hanc dispositionem? aut ubi scriptura habet illam quadripartitam inferorum mansionem? Deinde, vocem Limbi scriptura quoque non habet. Et quod illi finem Abrahe eò trahunt, impertinens est & alienum à mente scriptura, ut videbimus infra.

Tua hæc, Benedicte, in Limbum ciaculatio est, qua nobis absurditatem objicis & temeritatem: Hanc quidem, quia nemo nobis quadripartitam istam inferorum mansionem ostenderit: Illam verò, quod piorum & impiorum ani-

animas, in eodem domicilio statuamus. Quod tamen telum tuum valde abs teipso retusum & debilitatum est. Quonam enim modo consequens videri debet, vt animas piorum & impiorum statuamus in eodem domicilio, qui dicamur abs te regionem inferorum in diuersa domicilia distinguere, quorum alia piorum propria sint; vnum, totius videlicet inferni domicilium infimum, receptaculum sit damnatorum? Qui ergo, teipso quoque teste, animarum domicilia tam accuratè disiungimus, non benè absurditatis eius insimulamur, tanquam qui piorum & impiorum animas eodem in domicilio statuamus. Quod si te dicas, domicilij vocabulum pro tota inferorum regione communique locoposuisse; quid absurdi est, si ad tempus duntaxat, bonis malisque communis quædam post mortem miseria est, quibus hic fuerat peccati causa cõmunis? Nam si piorum & impiorum animabus nulla potest ad tempus esse communis miserie conditio, cur hoc miseriarum vallis cõmune domicilium? Cur vnus per mortem exitus pio & impio, sacrificanti & sacrificia contènnenti? Si autem piorum animabus perpetuâ cum impijs miseriam faceremus, meritò conseremur absurdi, nosque ipsos vehementius nostra damnaret sententia, quam vestra reprehendat oratio, propterea quod piorum animabus vitam æternam deberi pro suis meritis asseramus: Vos autem sublata iustitiæ ratione, quæ pios remuneret, etiam hos iustè

T iij

posse

posse in infimum inferni domicilium detrudat
statuitis. Quánam ergo in parte maior absur-
ditas est, nostráne, qui perpetuum miseriz do-
micilium pijs dari contra iustitiam esse doce-
mus; an vestra potius, qui pios pariter & im-
pios communibus gehennæ meritis copulatis?
Quod autem adiungitur nos inferorum domi-
cilium contignationibus distinguere sine scri-
ptura, quasi de arca Noë differentes, tale est, vt
sic ipse quoque Christus irrideri potuerit, qui
tanquam de arca Noë differens, mansiones esse
dixerit apud patrem suum multas. Quæ enim
mansiones multæ? Nisi quia & supremæ quæ-
dam, & infimæ, & mediæ pro diuersitate meri-
torum? Multæ quippe mansiones (inquit Au-
gustinus) diuersas meritorū in vna vita æterna
significant dignitates. Alia enim est gloria solis,
alia gloria lunæ, alia gloria stellarum: stella enim
à stella differt in gloria, sic & resurrectio mor-
tuum. Quod ipsum D. Hieronymus in arca
Noë significatum accepit, cū aduersus Ioui-
niantum libro posteriore differeret, vt nihil mi-
randum sit, si quisquam de hac in cælo diuer-
sitate mansionum, tanquam de arca Noë dif-
ferat, in qua illius rei typus habeatur. Si au-
tem in cælo diuersæ mansiones; ergo & apud
inferos, vbi pro varietate meritorum, ita sunt
diuersi pœnarum gradus statusque miseriz di-
stincti, quomodo in domo patris plura diuer-
sæque præmia, pro multarum distantia & di-
uersitate virtutum, Nisi fortè vt patet merita
bono-

bonorum, ita etiam tibi videbuntur æqualia esse peccata, meritaque iniquorum, vt nihil sit opus mansionum distinctione; vbi omnes pari pœna, propter æqualia peccata teneantur. A qua sententia si te erroris magnitudo deterret, fatearis Areti necesse est nobiscum, diuersa esse domicilia inferorum. Quam si distinctionem inter damnatos seu reprobos admiseris, nihil erit cur nos iure reprehendas, si mansionum differentiam in tota ipsa inferorum regione ponamus. In toto enim facimus, quod tu etiam in parte faciendum esse perspicis, si scripturarum sanctarum doctrinæ acquiescis. Nam si parricidarum & ebriosorum non eadem in inferno mansio, propter maximam scelerum distāciam, tu miraberis, si pueros qui sine baptismo ex hac vita sublati sunt, nullumque aliud quam originale peccatum secum detulerunt, proprio quoque ab ijs domicilio seiungamus, qui ad originale ipsum multas addiderunt propriæ actionis offensas? Id enim potissimum hac distinctione docemus, non debere parem esse illis miseriæ statum cum cæteris, qui sibi proprijs grauiusque delictis damnationem accersierunt.

At Limbi vocabulo offenderis, quia non sit in scriptura; Quasi nō & vos teraris vocabula, que nusquam in scriptura canonica expressè ponuntur. Vbi enim in illa reperias, Orci & Auerni vocabula, quibus tu ipse infernum damnatorum designari dicis à Latinis, nec refellis? Deinde cum rem ipsam ex scriptura tenuerimus,

T iiij

non

non sic Areti scrupulosi sumus, ut non cum quouis vocabulo designari patiamur, modò id subiectam rem non ineptè expresserit. Hoc ergo restat, aptene satis Limbi vocabulo designetur is apud inferos miseræ status, qui sit pro ratione & mensura peccati leuissimus? Et ipsos quidem inferos interdum significari legimus periphrasi regionis vmbre mortis, seu terræ tenebrosæ; interdum nomine laci, cuius etiam insinuetur profunditas, in quam Lucifer ipse detractus sit. Vbi ergo tanquam regio quædam tenebricosa, vbi lacus, vbi profunditas quasi putei cuiuspiã præalti, aut immensæ voraginis; mirandum est, si tanquam extremæ quædam oræ, quæ ab ipsa profunditate procul sint, cogitentur? aut absurdius Limbum dicimus propter extremitatem, quam sinum scriptura dicit propter quietem?

De Sinu Abrahæ. CAP. III.

NEc verò ed trahimus sinum Abrahæ, quasi idem esse omnino sinum Abrahæ & limbum existimemus. Est enim Abrahæ sinus, vbicunque post mortem secreto quodam beatæ quietis anima perfruitur. Sic Augustinus interpretatus est Abrahæ sinum, ut esse diceret, nescio cuius quietæ felicitatis, magnum abditarumque secretum. Sicut & Ambrosius, Cùm ait Lazarum in Abrahæ gremio, quasi in quodam sinu quietis, & sanctitatis locatū recessu. Quorum vestigijs insistens Diuus Gregorius:
Quid

Cap 5. lib.
33. contr
Faustū Ma
nichæum

Lib. 8 in
Lucam.

Quid (inquit) Abrahæ sinus nisi secretam re- *Hom. 39.*
 quem significat patrum? Neque enim hic (quæ. *in Euang.*
 uis id aliquos velle video) ad illa littora curua
 respicitur, quæ ad similitudinem Sinus, quibus-
 dam quasi brachijs amplectitur mare; sed pla-
 nè ad humanum sinum seu gremium, quo in-
 terdum quos habemus charos, ad quietem ex-
 cipimus ac fouemus. Habebant igitur & illæ in
 limbo sanctæ Patriarcharum animæ sinum A-
 brahæ: quomodo & Lazarus, qui in sinum A-
 brahæ per angelos dicitur esse deportatus, ubi
 solatio non mediocri afficeretur, non modò ab
 omni vitæ huius labore liber, verù etiam à cru-
 ciatu & tormentis inferorū. Sed quamuis mo-
 dò Limbus ille patrum non sit, hoc est, talis ali-
 quis qualis ille erat apud inferos, sanctarum &
 plenè alioqui purgatarum animarum status, si-
 nus tamen Abrahæ nec modo esse desijt. *Quin-*
plus etiam in eo quietis atque solatij post Chri-
sti aduentum esse cœpit, ex Dei clara contem-
platione: quippe qui tunc apud inferos illis e-
rat Abrahæ sinus, nunc ijsdem & alijs sancto-
rum spiritibus in cælo est; in quem ut recipian-
tur animæ defunctorum, Christi quoque Ec-
clesia (teste Dionysio Areopagita) deprecatur.
In quo sinu D. Augustinus gratulatur suum esse
Nebridium: Quicquid enim illo significatur *Lib. 8. Com*
(inquit) sinu, in eo meus viuit Nebridius, & sess. cap. 3.
 & iam non ponit aurem ad os meum, sed spiri-
 tale os ad fontem tuum, & bibit quantum po-
 test sapientiam pro auiditate sua, sine fine felix.

T v Sic

Sic & apud Seuerum Sulpitium est : Martinus Abrahæ sinu lætus excipitur , Omnisque ante corporum resurrectionem purgata anima , hūc in sinum deportatur ; quemadmodum id Prudentius versu expressit in hymno defunctorū.

*Sed dum resolubile corpus
Renocas Deus, atque reformas,
Quā nam regione iubebis
Animam requiescere putam ?
Gremio senis abdita sancti
Recubabit, ubi est Eleazar :*

Atq; id quidē rectē Prudentius. Nam reformato per gloriosam resurrectionē corpore , non iam abdita & secreta quies , sed erit electorū omniū manifesta, ipsisq; etiam reprobis conspicua felicitas. Ideoq; & illa distinxit Hilarius enarrans Psalm. 51. Extendit (inquit) sanctus Propheta, spēs suas ad infinitam perennitatis ætatem, nec concluditur mortis occasu, quum sciat sibi in Abrahæ sinibus, exemplo pauperis Lazari esse viuendum ; sciat quoque gloriosæ resurrectionis demutatione coæternum se & conformem Deo esse mansurum. Quod si quis hic obijciat, Ipsa differentia Lazari & epulonis, qua ille dicitur esse deportatus in sinum Abrahæ, hic verò sepultus in inferno, significari, Lazarum non fuisse apud inferos, sed diuitem solum: Nos ei respondebimus illud primum ; Non solum in græcis codicibus, vērū etiam in latinis permultis secus haberi : vt nimirum hæc sit contextus illius distinctio, Mortuus autem est & diues, & sepultus est . In inferno autem eleuans

trans oculos suos; &c. Quomodo & Augustinus legit lib. 12. cap. 33. de Genesi ad Literam; Et homilia 7. li. 50. homiliarum, alijsque interdum locis. Deinde, ne lectionem alteram, aut damnare ut vitiosam, aut non sustinere posse, ut aduersam, videamur; considerandum est; Diuitem epulonem non simpliciter in inferno collocatū, sed sepultum dici, ut illic obrutum, & in ima detrusum planeque coopertū supplicij cogitemus. Sed neq; chaos illud magnum intelligi necesse est spacium ingens illud, quod est inter cælos & inferos interiectum, cum & in ipsa inferorum amplitudine, tanquam vasta quadam regione, cōcipi possit hoc chaos, quod rectius hiatum seu voraginem dixerimus, Id enim græca dictio *χάσμα* significat: Hac nimirum figura sermonis, insinuante nobis Abrahamo, (Id quod D. Ambrosius, hunc interpretatus locum, breuissimè dixit:) non posse merita post mortem immutari.

Apud inferos non solum gehennam seu Tartarum statui debere ex scripturis ostenditur. CAP. IIII.

Sed ne quidem, inquis, opus est illa dispositione. Nam scriptura solum duo receptacula agnoscit animarum; Vnum vitam æternam, cælos, paradysum, sinum Abraha; Alterum verò impiorum, gehēnam, Tartarū, inferos, & quicquid tale est: nec potest ex scriptura tertius monstrari locus.

In his verbis tuis, primum illud attendere de-

debueras, Vitam æternam, Paradisum, Sinum Abrahæ, non esse receptaculi vocabula. Nam & cum in terris ministrant angeli, vita æterna fruuntur extra ipsum beatorum receptaculum, **Luce 23.** hoc est cælum: Et Latro, cui dictum est; Hodie mecum eris in paradiso, ad inferos, vti & Christus ipse, descendit, vbi non erat propria beatitudinis sedes. Denique sinus Abrahæ non localis receptaculi, sed quietis per trópum significationem habet, vt & in cælo & apud inferos, & vbicunque voluerit Deus, esse possit. Quem admodum nec receptaculum vllum designatú est apud Ioannem c. 1. vbi scriptum est; Deum nemo vidit vnquam; Vnigenitus qui est in sinu patris, ipse enarrabit. Quod deindè adiungis, scripturam duo tantum receptacula nosse, videlicet cælos & inferos, siue (quod idem esse vis) gehennam & Tartarum, id declarat te in scripturis non animaduertisse, aut certè intelligere noluisse, inferos patere latius, quam vt debeát restringi ad gehénam & tartarum. Id quod tamen Diuus Hieronymus animaduersum his verbis annotauit, scribens in caput decimum tertium Osæ ad illa prophetiæ verba: Ero mors tua ô mors. ero morsus tuus infernè: Inter mortem (inquit) & inferos hoc interest: Mors est qua anima separatur à corpore, Infernus locus in quo animæ recludútur, siue in refrigerio siue in pœnis, pro qualitate meritorum. Ac reuera quid in sacris literis luculentius magisque obuium? Cùm enim Christus loquitur in Psalmo;

Non

Non derelinques animam meam in inferno, *Psal. 15.*
 nunquid significat animam suam non esse in
 gehenna relinquendam? An fortè Christus &
 gehennâ passus est, quia in infernum ierit? Cùm *Eccles. 9.*
 rursum dicitur homini, vt ante mortem suam
 operetur iustitiam, quoniam apud inferos non
 sit inuenire cibum, quo tu (inquit) properas;
 num significatum est, hominem iustum prope-
 rare in gehennam & tartarû? Aut vbi scriptum *1. Reg. 2.*
 est, Dominum mortificare & viuificare, dedu-
 cere ad inferos & inde reducere, an declaratum
 est Deum ex tartaro & gehenna, vbi supplicio-
 rum æternitas est, solere quenquam educere?
 Quid item pius rex cum vitæ suæ lugens bre-
 uitatem diceret: In dimidio dierum meorum *Isaia 38.*
 vadam ad portas inferi? adeòne perditâ con-
 scientia significatur fuisse, vt desperata salute,
 in gehennam se crederet esse detrudendum?
 Quid etiam Propheta Iob, cùm oprantis voce *Iob 14.*
 precaretur: Quis mihi tribuat vt in inferno
 protegas me? Tantùmne desipuit, vt se vellet in
 extrema sui proiectione protegi, hoc est in ge-
 henna? Quod enim effugere conamini statuē-
 tes vocabulum *השׂוּל* scheol, interdū pro sepul-
 chro poni, Id cum nullo in loco scriptura re-
 quirat, tum in superioribus locis recipi non po-
 test. Quoniam accuratè illa, distincta sunt, vt
 vnum ad corpus, alterum ad animam perti-
 neret, vbi dictum est de Christo: Non dere- *Psal. 15.*
 linques animam meam in inferno, nec dabis
 sanctum tuum videre corruptionem. Quo
 signi-

significatum est neque animam in inferno, neque corpus in sepulchro ad putrefactionem relinquendum. Nam illud quidem Beza commentum impudentissimum, ut Infernus eo quoque loco sepulchrum significet, Anima verò pro cadauere, id est, vita pro morte ponatur, suam secum refutationem damnationemque euidenter trahit. Iusto quoque generatim dicitur, quod ad inferos properet, ubi non sit inuenire cibum; cum multi ante Christum sepulti non sint iusti, sed vel igni consumpti, vel deuorati à bestiis, vel aliàs in tenues auras puluerémue redacti. Quid etiam attinebat dicere & docere, quod in sepulchro non sit inuenire cibum? An de corporis cibo loquebatur, quem se fortè nonnulli adhuc in sepulchro reperturos & manducatu- ros per incredibilem stultitiam expectarint? Inferni quoque portas non te puto dicturum esse portas sepulchri, quæ plerumq; nullæ sunt; nec optasse prophetam, ut protegeretur in sepulchro. Aliud quoque mortem esse per quam sepulturæ corpus mandandum relinquitur, aliud infernum diligenter annotauit Hieronymus in supradictū scribēs Osæ caput. Quod enim aliud sit mors (inquit) & aliud infernus, & Psalmista demonstrat dicens: Non est in morte qui memor sit tui; in inferno autem quis confitebitur tibi? & *Psalm. 54.* in alio loco. Veniat mors super illos & descendant in infernum viuentes. Fateris & ipse cum de inferno scribis, non posse inferni vocabulum qui-

quibusdam locis pro sepulchro sumi : Velut Deuteronomij 32. vbi Moyses inquit in persona Domini ; Ignis succensus est in furore meo, & ardebit vsque ad inferni nouissima, siue, vsq; ad infernum inferiore, vt ipse legis. Et Prouer. 9. Nescit quod ibi sint gigantes, & in profundis inferni conuiuat eius. Et 15. Semita vitæ sumum est ad erudiendum, vt declinet ab inferno qui infra est, siue, inferno nouissimo, vt legimus. Et Psal. 86. Quia misericordia tua magna est super me, & liberaisti animam meam de inferno inferiori. Neque ergo locis ijs, quæ à nobis producta sunt, neque his quæ abs te proferruntur, potest infernus pro sepulchro intelligi. Vnde ergo alibi, pro sepulchro poni diuinas, nisi quia si non eo cõfugas, metuas tibi à Limbo patrum, à quo propterea tibi tantopere cauendum existimas, ne si ille esse conuincitur, inter cælum & tartarum, tertius aliquis locus in scriptura sacra repertus sit ? Et tamẽ illis ipsis locis quæ abs teipso commemorata sunt, non parua significatio est eius, quod times. Cum enim infernus dicitur qui infra est, siue inferior atque profundior, cur absurdum sit superiorem aliquem cogitari, si non loci situ, de quo non firmissima forsan opinio est, certè ipso discrimine atque distantia status, sicut fuerat differentia meritorum ? Vnde & Petrus in epistola posteriore, profundiores ac tetriciores hæc partes, vocabulo Tartari designans, infernum insinuat patère latius ; cùm ait Dæmones rudentibus cap. 21
scu

seu catenis inferni detractos, in tartarum traditos esse cruciandos; Non enim illic Infernus & Tartarus idem significât. Neque tamen aut sepulchrum, aut aduersa vitæ huius cogitari possunt, quæ annotas vocabulo inferni designari,

2. Reg. 22. vbi dicitur; Funes inferni circumdederunt me. Quo tamen loco si attendas, cur aduersa vitæ huius, non quidem infernus, sed funes inferni dicantur, possit & hoc adiuuentò esse tibi ad verum perspiciendum. Nam dolores atque aduersa vitæ huius, quibus Dauid conquerebatur se esse circumuallatum propter grauissimas, vt vis, persecutiones quas à Saule patiebatur, cur dicuntur inferni funes, nisi quia per eas tanquam funes constrictus implicitusque, pertractus fuisset ad inferos, nisi eum Dei protectio è mortis periculis eruisset? Ex his opinor similibusque locis quæ frustra aliorum detorquere conamini, intelligi potest, quàm illud falsò statuatur, non agnoscere scripturâ aliud quam Cælum & Tartarum siue gehennam. Quamuis enim nihil aliud nisi superos & inferos; tamen in ipsis inferis aliud quoddam præter gehennæ locum, agnoscit domicilium temporaneum, in quo fuerint inclusi spiritus aliqui, donec eos Christus educeret ad perfectam libertatem & lucem. Quam sententiam, post Gregorium Magnum, coq; vetustiores multò Patres, luculenter admodum explicatam Sanctus Bernardus reliquit sermone quarto de omnibus sanctis. Diuus quidem Ambrosius cap. 1. lib. 4.

lib. 4. de fide ad Gratianum : Mosen (inquit) licet corpus eius non apparuit in terris, nusquam tamen in gloria cælesti legimus, nisi posteaquam Dominus Resurrectionis suæ pignore vincula soluit inferni, & piorum animas eleuauit. Theophylactus quoque in Matthæi caput 27. scribens, breuiter annotauit illam mortuorum resurrectionem, quæ mortuo in cruce Domino facta est, significasse eorum qui in inferno fuerint libertatem; propterea quod ante id tempus, & sanctorum animæ intra inferni penetralia conclusæ captiuæque tenerentur. Et quod scriptum est : *Contriuuit portas areas, & Psal. 106.* vectes ferreos confregit (quamuis id non patitur Calvinus) eodem retulit tamē Eusebius, sub finem libri eius quem scripsit de euangelica demonstratione; multoque plures postea suis proferentur locis, quorum grauissima auctoritate hæc de Limbo doctrina confirmetur. Sed quod eiusmodi loco tertio nihil opus fuerit, videamus nunc quibus rationibus tu patere demonstrares.

Diluitur argumentū petitum ex vtriusque testamenti Sanctorum fide communi.

CAPVT V.

Primum (inquis) *Quod sancti in veteri testamento eadem fide in Christum, qua nos, sint iustificati. Quod si eadem fides est utrosque iustificans, habuere igitur eandem iustificationis gloriam: Gloria autem iustificationis est vita eterna.*

V

aterna. Quare mea quidem sententia, pii ante Christum defuncti, animabus ad celos ascendere corpore in terra quiescente. Sic ille.

Tua hæc, Areti, prima ratio tum demum aliquem aduersum nos locum habere potuisset, si iustificationis gloriam; hoc est, vitam æternam, sanctis ijs qui ante Christi aduentum in iustitia decesserunt, nostra aliquando detraxisset opinio. Sed iustificationis gloriam, plus etiam quam vos, illis tribuimus, quam & meritis eorū fuisse iusto Dei iudicio reddendam asseramus, Habes ergo quod tuum argumentum postulat, sicut vnam fidem iustorum omnium vnamque ex fide iustitiam, ita etiam cōmunem quæ omnibus promissa sit iustificationis gloriam, vitam æternam. Hic nempe diurnus est ille denarius, quem paterfamilias vocatis in vineam proposuit, perseveranter operantibus certissimè redditurus, quacunque tandem hora venissent. Sed ut illic murmurabant quidam, quod non plus acceperint priores, qui dici pondus æstumque pertulerant, quam posteriores, qui vna tantum hora laborarant: ita video quid tu quoque submurmures, cur videlicet antiquorum iustorum dilata sit mercedis retributio, ut non ante, quam his qui posterius vocati sint, redderetur. Nam & propterea dictum intelligi posse putat Augustinus, redditam operarijs esse mercedem, incipiendo à nouissimis vsque ad primos, quod ij qui posterius venerūt in vineam, minus ab ipsa Dei contemplatione dilati sint quam priores.

Id vi.

Id videre est in fine cap. 24. lib. de spiritu & li-
 tera, cumque sensum Augustini Diuus Grego-
 rius hom. 19. super Euangelia sine cunctatione
 complexus est. Verum ob id, Areti, si murmur
 operariorum exaugeas, tibi iure paterfamilias
 respondere possit; Amice, ego nullam illis an-
 tiquioribus facio iniuriam; Nonne denarium
 accipiunt, de quo mecum conuenire? Quod si
 aliquanto tardius quam hi, quid tum postea,
 quando id quod differtur non aufertur? An non
 licet mihi facere quod volo? An non sat ma-
 gnum est, tantum mercedis vel serò accipere?
 Tale quiddam, Areti, responderi tibi poterit:
 quin addi etiam increpatione conueniet, quod
 oblitus tui, dicas statim illis oportuisse vitæ æ-
 ternæ mercedem reddi, qui statuas merè gra-
 tuitam esse, nullisque parari meritis illius vitæ
 retributionem; Cur ergo differri non potuit,
 quod potuit & negari? Sed & de ipsa beata cor-
 porum resurrectione, vehementer redargueris,
 quam differri vsque ad sæculi finem constar, in
 qua tamen tantum inerit boni, tantumque felici-
 tatis, ut propterea electi omnes, in illo commu-
 ni supremoque iudicio audituri sint: Venite be-
 nedicti patris mei, possidete regnum quod vo-
 bis paratum est ab origine mundi. Hoc ergo
 beatum regnum quod sanctis in fine reddetur,
 in quo demum erit vera *πλούθυεια* rerum om-
 nium, differri certissimum est, donec fratrum
 numerus compleatur. Neque tamen, si audien-
 dus es, differri debuit, sed statim post mortem

Matth. 25;

V ij reddi

reddi iustis omnibus, sicuti post mortem continuò reddetur eis iustis, qui in fine sæculi iudice veniente morientur. *Quanam*, inquis, *hoc consequentia ratiocinationis astruitur?* Tua (inquam) ipsius, si attēdere me libuerit, per tuæ rationis vestigia gradientem. Sancti in veteri testamēto eadem fide in Christum qua nos, sunt iustificati. Quod si eadem fides est utrosque iustificans, habuēre igitur (statim videlicet post mortem, hoc enim intelligi vis) eandem iustificationis gloriam. Gloria autem iustificationis, est resurrectio gloriosa, totiusque hominis beata & æterna vita. Quare tua quidem sententia, Areti, pij ante Christum defuncti, non anima solum in cælos ascendēre, sed ipsis quoque corporibus beata immortalitate donatis, translati sunt toti prorsus ad superos, ut totius hominis vita beata potirētur: Aut hoc tibi quod sic colligo concedendum est, aut rationis tuæ imbecillitas confitenda. Denique tibi Apostoli magis audienda doctrina est, quam tuis rationibus auscultādum. Ille autem de antiquis iustis verba faciens: Et hi omnes (inquit) testimonio fidei probati, non acceperunt repromissionem, Deo pro nobis aliquid melius providente, ut non sine nobis consummarentur, hoc est, ne prius donarentur vita beata, veteris testamenti sancti quam novi; sed tum demum illi perfici inciperent euecti ad cæleste domicilium, cum hoc novi testamenti electis donaretur. Sicut & non prius resurgent illi ad beatam corporum

Hebr. II.

tum immortalitatem, quam Apostoli ceteriq;
 noui testamēti participes. Nisi enim etiam (in-
 quit Chrysostomus) nos illuc venerimus, tunc *Hom. 28.
in epist. ad
Hebræos.*
 prædixit eis saluator non dare mercedem, vide-
 licet immortalitatis. Sicut pater bonus amator
 filiorum, probis & genuinis filiis & opus perfi-
 cientibus dicit, non se daturum comedere, nisi
 venerint etiam alij fratres. *Cap. 91*
 Quin & illud in ea-
 dem ad Hebræos epistola magis etiam huc fa-
 cit quod scriptū est, semel in anno solum Pon-
 tificem in secundum tabernaculum introire so-
 litum, eo significasse Spiritū sanctum nondum
 propalatum seu manifestam esse viam Sancto-
 rum, siue in Sancta; hoc est, cælum ipsum:
 quomodo paulò post interpretatur Apostolus,
 Quia nimirum (authore Chrysostomo, quem *Homil. 15.
in epist. ad
Hebræos.*
 & Theophylactus & Oecūmenius & Haimo
 & Anselmus, alijque sequuntur patres) tunc ad-
 huc oclusum fuerit & inaccessum cælū, prius-
 quam Sacerdos noster Christus Dominus, ob-
 lato proprii sanguinis sacrificio, eo fuisset in-
 gressus, suoque ingressu manifestasset iam re-
 ipsa, membris suis eodem patere deinceps viā.
 Quemadmodum & ipse ait ex sua suorumque
 persona: Notas mihi fecisti vias vitæ. Quia (in- *Psal. 115.
serm 74.*
 quit Ambr.) dum post mortem ab inferis redit
 ad superos, cœpit reipsa notam habere viam
 vitæ, quæ antea habebatur ignota. Nemini igi-
 tur ante Christi ascensum iter in cælum patuit,
 sed hanc ipse, vt est Hebr. 10. initiauit Sancto-
 rum viam: Ascendit enim, quemadmodum ha-

Num. 35. bet Michæas, cap. 2. pandens iter ante eos, qui sua morte, tanquam verè summus Sacerdos, exilibus liberum iam in patriam reditum effecerat.

Ostenditur imbecillitas argumenti quod ex eo fit, quia meritum Christi semper fuerit paternis oculis præsens.

CAPVT VI.

DEinde, inquis, Cùm sit eadem nostra fides, qua fuit piorum in veteri testamento, idem etiam meritum esse Christi vtrisque salutare fieri necessum est. Eadem autem fides, idem meritum approbare potuit. Hebræorum 13. Christus heri & hodie, & idem in sæcula. Itaque mors Christi quavis ætate eundem effectum præstavit. Non igitur opus est Limbo. Denique, mors filij Dei, expians primi parentis & vniuersæ posteritatis delictum, Deo patri semper præsens fuit & est. Nam temporum hæc intervalla, æterna illa maiestas non sic metitur, vt aliud illi præsens sit, aliud præteritum, aliud denique futurum. Quo facit locus 2 Petri 3. Vnus dies apud Dominum est, vt mille anni, & mille anni vt dies unus. Quod sumpsit ex Psalm. 89. Hinc Apostolus ad Ephes. 1. ait nos in Christo electos ante iacta fundamenta mundi, vt essemus sancti & irreprehensibiles. Ideoq; cùm Deo Patri mors Christi semper fuerit præsens, non fuit opus hoc carcere ad piorum animas concludendas.

Hactenus ille.

Hoc

Hoc quoque eiusdem omnino *'farinæ* est, cuius illud prius. Quis enim nescit meritum Christi tunc quoque fuisse salutare, eademque fide apprehendi potuisse? Et quid illo molimine fuit opus, ut mors Christi paternis oculis præsens semper fuisse probaretur? Verum si propterea consequi putes, eosdem omnes effectus habuisse promissum Christi meritum, quos produxit aut producet exhibitum, confunderis de vocatione gentium, de amplificatione ecclesiæ Christianæ per orbem terrarum, de copiosa illa spiritus effusione, propter quam scriptum est: Spiritus nondum erat datus, quia *Iohann. 7.* Iesus non erat glorificatus; De ipsa postremo resurrectione gloriosa, quæ si ad secundum Christi aduentum præstabitur, quamuis eam multò ante meruerit, quid alienum tibi videatur, si & priorem aduentum quidam sint salutares meriti eius effectus consecuti? Sic enim Christus Dominus antecedere voluit suum aduentum quædam gratiæ suæ munera, ut tamen aduentu ipso præcipuam munificentiam suæ benignitatis exhiberet. Ac tamen si in Christo electi simus ante iacta mundi fundamenta, ut essemus sancti & irreprehensibiles, num ideo sancti & irreprehensibiles fuimus, priusquam mundi fundamenta iacerentur? Sicut igitur mors Christi, ab æterno præsens Deo fuit, ad homines illius intuitu prædestinandos, & tamen neque mortis neque prædestinationis effectum sunt ab æterno consecuti; sic licet ante

aduentum Christi; Deo Patri mors eius fuerit præsens, ut eius intuitu suos electos vellet ad beatificum Dei conspectum perducere: Non tamen id ante aduentum suum præstitit, sed hoc præsentiæ suæ reservauit, quam decebat clarioribus diuinæ gratiæ muneribus, & effusione bonorum largiore atque vberiore decorari. Idcirco enim & præsens, plurimos ad se conuertit, exaltatusq; à terra, tum demum euidentissimè cœpit trahere omnia ad seipsum, qui vix paucos antea à perditorum massa segregabat. Deniq; si mors Christi semper oculis paternæ maiestatis præsens, plenè statim delictum primi parentis, & vniuersæ posteritatis expiauit, cur adhuc electi ex primi illius parentis delicto moriuntur? Per vnum enim (inquit Apostolus) peccatum mors: Et; Sicut in vno omnes moriuntur, ita & in Christo, omnes (suo tempore) viuificabuntur. Quod si quia mors Christi semper fuerit Deo præsens, idcirco nullus esse debuit Limbi carcer ad piorum animas concludendas; nulla ergo etiam mors esse debuit, quæ piorum corpora summa cum molestia, & tristi omnino separatione, à suis animis diuellerentur. Primi autem parentis delicto non mortem solum corporis relictam esse regeneratis renouatisque spiritu Dei hominibus, verum etiam interclusum olim aditum in cælestem habitationem, clarissimè beatus Anselmus expressit, tractans locum posterioris ad Corinthios cap. 5. Scimus quoniam si terrestris domus

ROMAN. 5.

1. COR. 15.

mus nostra huius habitationis dissoluatur, quod ædificationem ex Deo habemus, domum non manufactam, sed æternam in cælis. Non dicit, habebimus (inquit Anselmus) quia videlicet protinus habetur illa domus ex quo ista dissoluitur. Prius autem quam Redemptor noster morte sua humani generis pœnam solueret, eos etiam qui cælestis patriæ vias sectati sunt, post egressum carnis inferni claustra tenuerunt: Non vt pœna quasi peccatores plecteret, sed vt eos in locis remotioribus quiescentes (quia necdum intercessio Mediatoris aduenerat) ab ingressu regni reatus primæ culpæ prohiberetur. Sic ille.

Respondetur ad argumentum petatum
à Sacramentis veteris Testamenti.

CAPVT VII.

A Dde etiam illud, inquis, cum Apostolus ad Corinthios prioris cap. 10. & Coloss. 2: tanta diligentia doceat, veteres eadem habuisse Sacramenta quæ & nos, Quid ni etiam eundem habuerint usum quoque? Tempus igitur Patres non impediuit, quo minus fruerentur virtute mortis Christi, quemadmodum & nos.

Si te, Areti, mortis Christi meritum, perpetuo patri præsens, nihil in tua hac causa adiunxit, multò minus sacramenta iuuabunt, præsertim quæ nihil aliud quam signa esse statuitis, aut sigilla quædam acceptæ per fidem iustificationis. Quæ si nec iustitiam vlllo vnquam

V v

tem-

tempore præstiterunt, nec iuxta conscientiam (quemadmodum beatus Apostolus docet cap. 9. epistolæ ad Hebræos) perfectum potuerunt facere seruientem; quonam modo mox à morte cōtemplationem beatificam diuinitatis præstissent? Sint ergo sacramenta eadem populi vtriusque, neque de hoc tecum digladiemur hoc tempore: quamuis & Augustini & Catholicorum cæterorum non ignota tibi doctrina sit; Veteris testamenti sacramenta significasse & præfigurasse iustitiam; noui verò testamenti Sacramenta, eandem præstare atque efficere virtute dominicæ passionis. Verum hoc nunc certamen omitto; tantum ex te quero, quonam modo illius temporis sacramenta beatificabant post mortem, & quidem continuò, quæ nec in vita iustificauerant? Quonã usu suo efficere potuerunt, ut animæ iustorum mox clara Dei visione fruerentur, quæ nihil veræ purgationis, vti & B. Apostolus docet, & ipsi quoque dicitis; efficere per se ipsa potuerint, sed infirma fuerint egenaque elementa; à quibus proindè nec sanctitas nec beatitudo fuerit expectanda? An sicut hic fidem excitabant ad apprehendendam iustitiam, ita & post mortem excitârunt fidem ad apprehendendam visionem? Vides tu hoc quoque esse ridiculum. Sed usum Sacramentorum fuisse dices, in exhibenda virtute mortis Christi. Vbi ergo, inquam, exhibebant illa mortis dominicæ virtutem? Si in hac tantum vita, ergo ad solam iustitiam: si & post mortem

eam

eam exhibebant ad beatæ visionis effectum, ergo & post mortem vtendum erat Sacramentis. Quod si dixeris, eo ipso profuisse ad accipiendum sine mora cæleste illud regnum, quo hic ad iustitiam contulerant: tum ad superiora te reuocabo, vnde intelligas non fuisse necesse iuxta documenta scripturarum, vt iustitiæ sine mora sua post mortem præmia redderentur. Veruntamen quoniam id, quod falsissimum esse constat de iisdem vtriusque populi Sacramentis, Scripturæ Apostolicæ testimonio corroborare voluisti, non omitam quin te obiter admoneam vt iterum iterumque legas quod ex capite decimo prioris ad Corinthios protulisti: Omnes (inquit Paulus) eandem spiritualem escam manducauerunt, & omnes eundem potum spiritualem biberunt. Quæro ergo, num dicere velire eundem illos nobiscū, an eundem inter se, & manducasse cibum spiritualem & potum bibisse? Quod si intenderis animum, profectò reperiēs nihil in toto illo cōtextu Apostolicæ doctrinæ esse, quod nos ad priorem illam, hoc est, tuam intelligentiam cogat. Imo verò cum subiungat: Sed non in pluribus eorum bene placitum est Deo; satis id insinuat se velle, quamuis omnes illi eadem inter se habuerint Sacramenta communia, non omnes tamen, sed nec plærosque Deo fuisse acceptos, vt qui non obstantibus Sacramentis quæ magno Dei munere acceperant, perditè nihilominus viuentes, tantisque Dei beneficijs ingrati

grati, merito suo prostrati sint in deserto : & hoc ut populus etiam Christianus intelligat, non impeditura esse Sacramenta, quæ accepit, quamvis ea multò sint præstantiora veteribus, quin iram Dei grauiorem incurrat, si vitijs similibus inquinetur, quem maiore deceat sanctitate pollere. Capite vero secundo epistolæ eius quæ scripta est ad Colossenses, nec iota quidem vnum est, quod pro tua sententia faciat. Neque enim quia circuncisos dicit esse nos circuncisione non manufacta, ideo Sacramentum Circuncisionis significare voluit, nobis cū illis esse commune: sed Sacramentum quidem ipsum circuncisionis penes illos fuisse; at penes nos esse rem eam, quæ illo signaculo adumbrabatur: quæ res ne nunc quidem Sacramentum est, sed tantum Sacramenti, non eiusdem, hoc est, Circuncisionis, sed baptismi quo regeneramur, effectus.

Ridiculo conatu descensum Christi ad inferos, ad mortis manifestationem detorqueri.

C A P. V I I I.

Post hæc niteris nostras ipse rationes conuellere: quod quanta dexteritate facias, ex tuis hisce verbis liquet.

Caterum, inquis, rationes illorum audiamus. Primum aiunt articulum fidei esse, Christus descendit ad inferna; ad quid autem descendisset, nisi ut Patres inde liberaret? quomodo autem inde libe-

liberaret, nisi illic essent? Ad hoc argumentum solutionem subiungens. Respondemus, inquis, non esse consequens, Christus descendit ad inferna, ergo illic patres fuere in limbo. Nam de eo articulo notum est fuisse varias semper sententias, & non defuere, qui planè è symbolo tollerent, quibus tamen minimè consentimus. Deinde alij [ἡρώ] school, hic pro sepulchro sumunt, ac si idem quod prius diceret, Sepultus est, quod tamen non recipimus: quare descendisse Christum ad inferos concedimus, Sed quid hoc ad limbū? Nam descensum Christi piè possumus intelligere, quod sit manifesta mors illius malis spiritibus, ut quem hactenus sepè audierant promissum mortalibus, hunc iam exhibitum scirent. Quod sanè clariori aliqua illustratione fieri potuit: Non tamen sequitur, ergo patres illic in limbo fuerunt.

Ut video Areti, valdè hic te torquet Christi ad inferos descensus, & ideo fidei nostræ articulum incertum ac dubium, & pro tuo instituto, problematicum conaris efficere. Quo sanè ipso causæ nostræ demonstras firmitatem, quæ labefactari abs te, nisi sublato fidei articulo, non possit. Cùm enim ais, non nuper, sed semper varias extitisse, de hoc articulo sententias: & alios quidem planè è symbolo sustulisse, alios infernum pro sepulchro accepisse, quid aliud moliris, quam ut existimandum videatur non esse fidei, Christum ad inferos descēdisse? Nam si hæreticorum varias illas sententias intelligis, nihil id confert ad infirmandum argu-
men-

mentum: sin catholicorum & ecclesiæ Dei, non ergo fidei est articulus. Quare nec symbolo fidei nostræ fuit inferendus, qui mox à catholicis quibusdam sine fidei præiudicio è symbolo fidei tolleretur. Vellem ergo dixisses quorum illa fuerint sententiæ: non quod nostræ ætatis hæreticorum pugnas hac in re nesciamus; sed quia semper varias fuisse de hoc articulo sententiās scribis: dic quorum; Ecclesiæ, an aduersariorū eius? An fortè quia Concilij Nicæni patres, descendens ad inferos non meminere, idcirco id è symbolo fidei sustulerunt? Quasi videlicet propterea deleuerint in symbolo Apostolico, quia non expresserint in suo. Nam neque sepulturæ idem symbolum meminit, vti nec Athanasius in symbolo suo; neque tamen propterea eum articulum è symbolo fidei sustulisse dicēdi sunt. Qui etiam descēsum ad inferos, nihil aliud esse putarint quam sepulturæ eius significationem, vnumque alterius interpretationem esse censuerint; nullos nisi hæreticos, aut nullius ponderis authores proferre possis. Quod & Calvinus ipse, vti cuius facillimū fuit, sic refellit, vt dicat rem minimè difficilem, verbisque expeditis & clavis demonstratam, obscuriore verborum cōplexu non potuisse illustrari, neque esse verisimile irreperere potuisse superfluā eiusmodi battalogiam in compendium hoc, vbi summam, quam fieri potest, paucissimis verbis præcipua fidei capita notantur. Quocirca sententiarum ista varietas, ad iumentum tibi non potest

test esse ad debilitandum argumentum, quod tamen hoc modo conaris infringere. Ais enim propterea ex Christi ad inferos descensu nihil posse de Limbo statui; quia notū sit varias semper de illo articulo sententias extitisse. Cæterum qualescunque ad authores aspicias, tamen eorum sententias probari tibi negas. Melius ergo aliquid Areti substitue. At quid illud? *Descensum enim ais Christi, piè possumus intelligere, quod sit manifestata mors illius malis spiritibus.* Iam melius Areti, aut ex professo sustulisses de symbolo, aut in sepulchro mansisses, quam sic piè, hoc est, imperitè luderes in Christi ad inferos descensu. Si enim propterea descendit ad inferos: quonā ergo modo reductus ex inferis? Reduxisti (inquit) ex inferno animam meam; *Psal. 29.* Et, Non derelinques animā meam in inferno. *Psal. 15.* An fortè vsq; ad tertium duntaxat resurrectionis diem, cum qui promissus fuerat exhibitum scierunt, & resurgente Christo omnis illa scientia elapsa est? Quæ si perdurauit, Christus ergo remansit apud inferos. Quomodo enim non propter hoc mansit, propter quod solum descendit? Atqui non ait Psalmus, Non derelinques mei notitiam in inferno; sed, non derelinques animam meā in inferno. Vnde certissime colligitur non per sui duntaxat notitiam, sed planè secundum animam suam descendisse Christum ad inferos, quomodo secundum corpus suum triduo duntaxat in sepulchro relictus est, ne coningeret sanctum eius videre corruptio-

prio-

prionem. Rursum, si malis spiritibus manifestari cōueniebat apud inferos exhibitum illum esse, quem sæpè mortalibus promissum audierant, vnde tibi constat non esse manifestationem hand factam, mox vbi stellæ indicio natus est, aut postquam miraculis clarus & celebris effectus est? Quod si id factum est, quoniam ille iam exhibitus erat, qui fuerat promissus mortalibus, idq; spirituum eorum intererat vt nossent, igitur & ante mortē ad inferos descendit; cū tamen habeat regula fidei, descensum ad inferos mortem ipsam subsequutum esse. Id quod tu ipse sic retines pro indubitato, vt obijciendum putaueris ijs, qui totum quod de descensu ad inferos scribitur, ad sensum iræ diuinæ referunt, qui sensus eo grauior erat, quod pœnas subiret irati patris pro tanto humani generis delicto.

Nam si queras, inquis, quando hic sensus ira diuina inceperit, quando item sit finitus, respondebūt fortasse cœpisse in horto dū orauit & sanguine sudare cœpit: finitum autem in cruce cū tradidit animam. Verum descensus ad inferos hac omnia est consecutus, ideoq; frustra adferuntur illa.

Hæc tu in problemate de descensu ad inferos: Quibus, vt iure vereque refellis commentum illud improbabile de sensu iræ diuinæ, tanquam is fuerit ad inferos descensus; ita metuere debes, ne istud tuum inuentum de manifestatione mortis Christi, iure ab alijs refellatur, nec alio, quam tuo ipsius argumento. Qui deinde
con-

conueniebat malis spiritibus mortem saluatoris peculiariter manifestari, cū ex mortis nuncio increduli illi spiritus magis persuadere sibi potuerint, non esse saluatorem mortalium, qui mortem ipse subire coactus esset? Nam & hi qui in terris vagabantur spiritus mali, ipsique aded principes spirituum immundorum, si scissent mortem Christi futuram fuisse mortalibus salutarem, nunquam eum in mortem per Iudeorum furorem pertraxissent, neque vnquam, vt Apostoli verbis utar, Dominum gloriæ crucifixissent. Sed hoc insitum tenebant, saluare non posse, quem mori coëgissent. Quæ illos decepit opinio, quod vim dominicæ mortis ignorabant: Magis ergo resurrectionem Christi, & ascensum eius in cælum, atq; effusionem promissi spiritus manifestari conuenerat apud inferos: Quod si proindè factum est; igitur & postquam resurrexit, immo & posteaquam iam ascendit in cælos, descendit ad inferos Christus, per illam gloriæ suæ manifestationem. Cū enim non ad salutem, sed ad cruciatum facta putanda sit Christi manifestatio apud malignos spiritus, magis profectò de gloriæ & virtutis nuncio terreri, torquerique potuerunt, quam de nuncio imbecillitatis & mortis. Quid deinde clariori illustratione præstitum malis spiritibus? an vt scirent Mariæ filium esse mortuum? Sed hoc per suos collegas, qui eum occiderant, discere potuerunt, nihil vt opus esset ad eam rem clariori illustratione. An vt cre-

1. Cor. 2.

X

derent

derent eum, qui occisus esset, Dei esse filium, mundi que liberatorem? Ergo fideles effecti sunt apud inferos, qui hic credere recusarant. An ut hoc ipsum intelligerent, non crederent? Feliciores ergo nobis, quibus adhuc in expectatione est, ut quod credimus, tandem clario-
 ris beneficio illustrationis intelligamus. Rursum, si in hac manifestatione mortis, descensus ille ad inferos constituendus est; qua ro id ne faciendum sit propter rem manifestatam, an propter manifestantis operationem? Si propter rem manifestatam; Mors ergo Christi & crux eius atque sepulchrum ad inferos descenderunt: sin propter manifestantis operationem, ergo & pater & spiritus sanctus descendit ad inferos; eò quod nulla sit vnus operatio personæ, quæ non sit eadem numero cæteris tribuenda personis. Certa enim sententia est, & tam vera quàm trita, Opera Trinitatis indiuisa esse. Quod vellem Durandus ipse attendisset, non esset (quantum arbitror) tam incircumspectè descensum ad inferos interpretatus, propter effectum quem anima Christi in ijs qui apud inferos erant, habuerit. Cum enim eundem effectum tota produxerit beatissima Trinitas, quis non intelligat sequuturum ut pari ratione totam illam ad inferos descendisse fateri debeamus? Nec verò satis fuerit à quoquam hoc patrocínio defensum, si dixerit illū ad causam meritoriam respexisse. Nam si Christus rectè dicetur ad inferos descendisse propter effectum meriti sui, quan-

quanto magis tota Trinitas propter suæ diuinitatis energiam? Postremò si propter mortis manifestationem descendit ad inferos Christus, non igitur eo descendit secundum animam tantummodo, verum etiam secundum corpus; cum constet mortem hominis tam sine corpore quam sine anima concipi omnino non posse. Atqui hoc apud omnes catholicos in cōfesso est, quod etiam clarissimè Diuus Fulgentius explicauit tanquam ad fidei regulas pertinēs, Dei filium in sepulchro secundum solam carnem iacuisse, & in infernum secundum solam animam descendisse: & hoc cum in libro De fide ad Petrum diaconum facit, tum & alijs inculcat locis: velut in epistola ad Ferradum diaconum, & lib. 3. ad Trasimundum Regem cap. 34. Non enim nesciebat esse hanc Augustini doctrinam tractatu in Ioannem 78. sic scribentis. Quis non est derelictus in inferno? Christus Iesus, sed in anima sola. Quis resurrecturus triduo iacuit in sepulchro? Christus Iesus, sed in carne sola. Iam ut te ipsum audias Areti magnopere postulo. Nōne cum de descensu Christi ad inferos scribis, constare ex Petro asseris Christum spiritu ad inferos descendisse? Ais enim: Porro quomodo descēderit corporēne, an spiritu: difficile quidem est hac Dei arcana perscrutari. Tamen ex Petro constat, spiritu Christum descendisse. Nam expresse inquit, In quo, scilicet spiritu, profectus predicauit spiritibus, &c. Spiritu igitur cum predicasset illis, & spiritu cum sit ad eos profectus,

X ij sequi-

sequitur spiritum illum descendisse. Ac ne dubium esset, quid nomine spiritus significare velles, non multò post animam Christi significare te demonstras, his verbis. Sed de illo non satis constat, quamdiu apud inferos sit commoratus. Non diu ut apparet, ut eadem die secundum animam ab inferis reversus, gloriòse paradisum sit ingressus cum Latrone. Hoc tu quidem magno errore ob vanum illum metum, ne dicendum esset, Christum eadem die qua mortuus est, non fuisse cum Latrone in paradiso. Veruntamen satis apertè declaras, quid vocabulo spiritus lineis superioribus intelligi volueris. Paulò quoque post: Nec validius est, inquit, alterum quod afferunt, Christum scilicet commendasse animam in manus patris. Nam anima Christi semper in manibus patris fuit, etiamsi descenderit ad inferos. Quin etiam doces postea, descensum illum Christi secundum animam necessarium fuisse: Quod verò discunt, ais, Non fuisse opus hoc descensu, principium petunt: Quomodo enim opus nõ esset, quod Christum fecisse pronunciat scriptura, & quod cõfitemur in symbolo? Necessarium igitur fuisse indicamus.

Hæc tua (vt opinor) verba recognoscis. Cùm igitur Areti, alio loco de Christi ad inferos descensu sic differas, vt de eo secundum spiritum seu animam ex scriptura sacra constare dicas, vt necessarium fuisse iudices, vt hoc nos in symbolo affirmes profiteri; cur hic eandem rem in dubium vocas? Cur in eo iam catholicis aduersaris,

faris, quod aduersus alias sectas defendis vt
 certum & indubitatum? Nónne hic animad-
 uertis, quanta tenearis libidine ecclesiæ cōtra-
 dicendi, aduersus quam disputans, non ei con-
 cedendum putas, quod aliàs vt certum neces-
 sariumq; defendis? Quæ deinde pietas intel-
 lectus, qui sit contra scripturam, contra sym-
 bolum, cōtra tuum ipsius iudicium? Si ergo, vt
 ipse vehementer alio loco confirmas, Christus
 secundum animam descendit ad inferos, pate-
 re nos hoc vti argumento, ad Limbi stabiliendā
 assertionem; quia Christi anima apud inferos
 fuit te quoque iudice, & tamen in gehenna &
 stagno illo ignis & sulphuris cum diabolo non
 fuit. Nec vlla efficiet tua ratio, vt propter solos
 spiritus reprobos aut dæmones, hic Christi se-
 cundum animam descensus, aut factus esse, aut
 necessarius extitisse credatur: Nam quod de
 illuminatione seu clariori apud inferos illustra-
 tione facta commemoras, Id scriptura refert
 non ad damnatos, qui proiecti sunt in tenebras
 exteriores, longeque ab omni spiritus illumi-
 natione remoti, sed ad eos iustorum spiritus,
 qui illic positi sperabant in Domino. Sic enim
 apud Ecclesiasticū loquitur Sapiētia Christus *cap. 24.*
 Dominus: Penetrabo omnes inferiores partes
 terræ, & inspiciā omnes dormientes, & illumi-
 nabo omnes sperantes in Domino; illos nimi-
 rum de quibus à Domino dicitur in euangelio;
 Multi prophete & iusti cupierunt videre & au- *Matth. 13.*
 dire, quæ vos videtis & auditis. Propter hos
 X iij enim

*Libro 4. de
Trinit. is
sue.*

enim (inquit S. Irenæus) descendit Christus in inferiora terræ; sicut Hieremias ait: Re-
memoratus est Dominus sanctus Israël mor-
tuum suorum, qui prædormierūt in terra de-
fossionis, & descendit ad eos, ut euangelizaret
eis salutare suum, & saluaret eos. Sic Irenæus
lib. 4. aduersus hæreses cap. 39. Quo referen-
dum est quod Diuus Hilarius ait mortem in
inferno peremisse Christum; quia videlicet e-
lectos suos qui communi mortis lege apud in-
feros tenebantur, reuocarit ad vitam. Idcirco
enim, ut habet epistola Felicis Pontificis, ver-
bum Dei, inferni claustra contriuit, ut viuifica-
ret eos qui à sæculo mortui sunt. At Caluinus
suarum Institutionum lib. 2. cap. 16. Hilarij
sententiam aliò longè detorsit. Cum enim do-
ctrinam de Patrum Limbo receptissimam, fa-
miliari sibi arrogantia, fabulam esse pronuncia-
ret; simulque interim fateretur à magnis au-
thoribus eam confirmari, (qui tamē magni au-
thores esse non possunt, si tanto consensu, pro
veritate, fabulosa commenta posteris propina-
rint) inferos, ne procul esset eundum, in ipsa
cruce posuit; videlicet ipsum terræ cor in exal-
tatione à terra constituens, descensumque ad
inferna fingens ipsa morte priorem, ut qui in eo
positus fuerit quod Dei filius in cruce pendens
ad corporis cruciatus hoc adiunxerit, ut cum
inferorum copijs, æternæque mortis horrore,
quasi consertis manibus luctaretur: atque hoc
totum, ut Dei iudicio satisfaceret, placataque
Patris

Patris ira, hoc suo merito mortem, vt Diuus Hilarius ait, perimeret. Quasi non euidentissimè sanctus ille doct̃or, symboli Apostolici secutus ordinem, inferos post crucem mortemque posuerit, libro 2. de Trinitate. Quo quidem loco non significat, descensu ad inferos, Christum vitam nobis meruisse: quod vult Calvinus in illis Hilarij verbis intelligi; vt inferos non post crucem, sed in cruce statui Christo debere, Veteris alicuius auctoritate confirmaret. Sed nihil mirum si perperam intelligat, qui vel deprauatum legit Hilarium, vel lectionem ipse deprauarit. Sic enim legit Calvinus; Crux, mors, inferi, nostra vita sunt: cum ex diuo Leone qui hunc citat Hilarij locum, sic constet esse legendum: Virgo, partus & corpus; post quæ crux, *Epist. 79.* mors, inferi, salus nostra est. Quibus verbis non significat quod descensu ad inferos nostram salutem patri satisfaciendo meruerit; sed ordinem expressit rerum gestarum, quo crucem & mortem, descensus ad inferos, atque hæc omnia salus nostra, in populorum conuersione secuta est. Verùm contra Calvinum prolixius agere non huius est instituti: & si esset, nihil ei grauius atque intolerabilius impingi posset, quam id quod vltro ipse fatetur; cum tale sit vt ne torto quidem, si fateretur, ignosci deberet, Christum quo maius atque excellentius patri pretiũ offerret, diros in anima cruciatus dam-nati & perditi hominis pertulisse, istoque modo ad inferos descēdisse; videlicet, non propter

infernales sedes ad quas penetrârît, sed propter gehennæ & desperatissimorum spirituum tormenta quæ in cruce perpeffus sit. Cæterum, benè habet quod alibi D. Hilarius, clarè nobis suam aperuerit mentem, de Christi ad inferos descensu. Siquidem enarrans Psalmum 53. Morte, inquit, non interceptus vnigenitus Dei filius ad explendam quidem hominis naturam, morti se, id est, discessioni se tanquam animæ corporisquæ subiecit, & ad infernas sedes, id quod homini videtur debitum esse, penetrauit. Habes in illis D. Hilarij verbis, Christum Dominum post animæ à corpore discessionem, non ad desperationem damnatorum sese demisisse, sed ad ipsas inferorum sedes penetrasse. Quid autem respondisset Calvinus ad Ephesini concilij verba, scire vellem: Aiunt enim Patres, pro omnibus Christum gustasse mortem, & tertia die resurgentem expoliassè infernum. Quo etiam modo S. Basilius ait, deuictò mortis regno, redisse à mortuis Dei filium cum spolijs; quemadmodum eius verba referuntur lib. 5. Vigilij Tridentini. Et D. Ambrosius resurgentem ex inferis Christum venisse nouis redemptum exuijs, & spolio ex morte quæsito. Hic certè nullum ei refugium relictum est ad Christi satisfactionem qua infernum spoliauit, quoniam ea peracta sit ante diem tertiam, fueritque in ipsa cruce plenissima. Quoniam ergo modo, tertia demùm die resurgēs Christus, infernum spoliauit; nisi quia tum, ex inferis rediens victor

*Libro 4. de
fide ad Gra-
tiani ca. 1*

victor mortis atque inferorum, secum eduxerit quos voluit, & in ijs tanquam spolia quædam pretiosissima amplissimaque exportarit? Habes igitur grauissima quoque illius concilij autoritate confirmatum, propter quos Christus ad inferna descenderit; nimirum non propter impios illos damnatosq; spiritus, quos ibi reliquit æternæ captivitatis obstrictos vinculis; sed propter eos qui in ipso spem habuerāt, quos illuminatos præsentia sui, eripuit inferis, regnoque cælesti donauit.

Petri locus num quam vim habeat ad Limbum stabiliendum. CAP. IX.

Afferunt, inquis, locum 1. Petri 3. & 4. capite, Christum descendisse & predicasse spiritibus in carcere detentis, Et ca. 3. Ideo predicatum est mortuis, vt iudicentur secundum carnē, viuant autem Deo spiritu. Primum, locus prior cap. 3. planè loquitur de impijs, quos non redemit nec eduxit: Frustra igitur ad limbi defensionem trahitur, vt cui sanctos tribuant. Posterior autem locus, de bonis quidem loquitur, sed non exprimit à Christo factam hanc predicationem. Deinde si maxime Christo tribuatur id, non tamen hic dicit apud inferos & in limbo factum; sed mortuis inquit predicatum esse euangelium: quod verū est; Christus enim ascēdens in calum, plausibile illis attulit euangelium, ac indicādos inquit esse secundum carnē, vt viuerēt Deo spiritu. Quod de sanctis omnino verū est. Indicabuntur etenim pij

XV

etiam

etiam secundum carnem tanquam homines, in iudicium autem non intrabunt, hoc est, non damnabuntur, sed Deo vivent. Sed possunt mortui intelligi etiam viventes peccatores, ut Christus inquit: Sine mortuos sepelire mortuos suos: Et Apostolus ad Timoth. 5. Vidua petulans vivens mortua dicitur. Ideoq, D. Augustinus, vult esse collationem temporum Noë & predicationis Christi in carne. Haftenus Aretius.

Quod ad priorem pertinet Petri locum, das hoc saltem nobis Areti, de Christi ad inferos secundum animam descensu rectè intelligi, ut hac in parte patrocinio Veterum non magno-perè sit opus; in quibus clari aliquot scriptores Petri locum eodem retulerunt. Velut, Athanasius in epistola ad Epiſtetum Corinthiorum Episcopum: Et Tractatu aduersus Apollinaré, de salutari Christi aduentu. Cyrillus quoque lib. de recta fide, ad Theodosium; In libro de recta fide ad Reginas: Libro quoque 12. in Ioannem capite 36. Quibus consentit & ille commentarius Diuo inscriptus Ambrosio in illud 10. capituli ad Romanos: Quis descendit in abyssum. Nec ab eo sensu alienum est, quod legitur apud D. Hieronymum in cap. 54. Isaia; ubi commētarius ex Origene depromptus est. Nec verò necesse est, plura testimonia cōgerere in eo quod abs te nobis conceditur. Veruntamen nihil id valere ad Limbum astruendum, propterea vis, quod de impijs loquatur Petrus; ad quos quamvis descenderit Christus, non
tamen

tamen eos redemerit neque eduxerit. Sed quæro, Cui tam planum sit, Petro sermonem esse de impijs apud inferos constitutis? Respondetis, opinor, quia dicat prædicatum esse spiritibus ijs qui increduli fuerant aliquando. An verò propterea planum est de impijs in sua incredulitate damnatis sermonem esse? Imò verò non permanentis impietatis potius significationem facit, quod non dicit, Qui increduli adhuc erant; sed qui increduli fuerant aliquando. Nam quod adiungitur de arca Noë, id probabili sensu ab antecedentibus auellitur, in quo explicando hæzere non nostri est instituti. Quod si quæras, quando ergo spiritus illi fuerint increduli siue inobedientes? facile erit respondere, priusquam iustificarentur, beneq; ac sanctè ex fide viuerent, incredulos inobedientesque fuisse, saltem in parente primo, in quo omnes, teste Paulo, peccauerunt. Nam eò respexisse sanctum Athanasium, verba eius illa declarant: Qui de Adæ inobedientia quæstionem habuit, iudicioque peracto duplicem poenam in sententia sua complexus erat, dum rei terrestri ita loquitur: Terra es, & in terram reuerteris: Atq; hinc est quod homo in duas partes discerpitur, & vt ad duo loca discedat condemnatur. Ac proindè opus fuit illo ipso iudice qui hoc decretum tulerat, vt ipse per se sententiã solueret, sub specie condemnati, in condemnatum se sincerumque à peccato ostendens. In his verbis eam condemnationem qua fit, vt corpore

Roman. 5.

*In tractatu
de natura
humana
suscepta ab
vigenito
verbo, &
contra
polluarẽ;
longe ante
finem.
tom. 3.*

pore in terram abeunte, anima discedat in infernum, ascribit Adæ inobedientiæ. Nam agi de descensu ad inferos, ex superioribus constat verbis. Qua ratione, inquit, factum est, ut cum Dominus adesset incorporaliter, pro homine à morte sit agnitus, ut earum animarum quas infernus tenebat, vincula, sua anima inobnoxia quidem vinculis mortis, sed tamen quæ quasi obnoxia facta esset, dirumperet, explicans illis modum rationemque suæ resurrectionis, ut Plastes ille & conditor hominis, hominem damnationi subiectum ipse præsens ad plenum liberaret in sua forma. Hæc Sanctus Athanasius. Quibus per similia reperies apud Diuum Fulgentium: nec vana, ut arbitror, suspicio est, hæc illud ex Athanasio mutuatum esse. Diuus quoque Hieronymus in illud Zachariæ 4. Tu quoque in sanguine testamenti; Et in illud Osee 13. Ero morsus tuus inferne, detentionem sanctorum in inferno refert ad peccatum Adæ, siue inoliti erroris peccata. Et Epiphanius in hæresi Tatiana, quæ est 46. Christum venisse dicit, ut his qui olim ipsum cognouerant, & ab ipsius Deitate non aberrauerant, verum propter errores in inferno detenti erant, indulgentiam largiretur. Si autem placuerit nullam auulsionem facere, sed vno cõtextu accipienda putentur quæ subiuncta sunt de Noë historia, in promptu erit & ille sensus, ut intelligatur increduli fuisse, qui fabricanti quidem arcam Noë non crediderunt diluuium esse venturum, nimium videlicet

sibi

*Libri tertij
ad Trasimundum
Regē, c. 30.*

sibi de Domini lenitate promittentes, sed tamen diluuium inundante, terrore perculsi seroque credentes pœnitentiam egerint. Nam & ea non contemnendorum interpretum expositio est. Sed & hoc reperitur apud quosdam, ut dicantur illi sancti increduli fuisse cum expectabat Dei patientia, (siue ut alia habet lectio, quando expectabatur Dei patientia) in diebus Noë, quia cum vulgo hominum expectantium Dei patientiam, non crediderint diluuium non esse venturum, ideoque pro incredulis habiti sint à multitudine: quomodo de se ait Ieremias; *cap. 10*
 Seduxisti me Domine & seductus sum, propterea quod passim ut malus propheta & seductus haberetur. Cernis Areti quot vię nobis pateant, ut libera esse possit de piorum spiritibus interpretandi facultas. Quanquam quid ad rem pertinebat, ut de impijs spiritibus hoc interfereretur, quibus nulla potuit ad salutem prædicatio fieri, sed ad confusionem duntaxat ac damnationem; Quid, inquam, attinebat illud interferi à Petro, à quo ex professo Christi beneficium & misericordia erga homines amplificaretur? Nam Christus, inquit, semel pro peccatis nostris mortuus est, iustus pro iniustis, ut nos offerret Deo, mortificatos quidem carne, viuificatos autem spiritu: in quo & his qui in carcere erant spiritibus veniens prædicauit, qui increduli fuerant aliquando. Ideoque fateatur ipse Caluinus, libro suarum Institutionum secundo, *cap. 16.* contextum cò nos ducere, *i. Pet. 3.*
 fide-

fideles, qui ante id tempus defuncti fuerant, consortes fuisse eiusdem nobiscum gratiæ: quia vim mortis (inquit) inde amplificat, quod ad mortuos usque penetrauerit, dum pax animæ eius visitationis, quam sollicitè expectauerant, præsentī aspectu sunt potitæ. Verum pias hæc mortuorum animas Calvinus in carcere fuisse non putat, quemadmodū nos apud Petrum legimus, sed in Specula, quomodo ipse legēdum arbitratur; quod vndè somniarit diuinare non possum, cum constet alienum id esse à græcæ dictionis significatione, & à communi (quod & ipse agnoscit) hætenusque probata lectio-
ne abhorre-
re. Sed hoc fingendum erat potius, quam Limbi carcer agnoscendus. Quanquam viderit, an non melius illos spiritus reliquisset in carcere, qui si fuerint in Specula, inde res humanas prospicere & curare, operumque cum necesse esset afferre potuerint.

Quod verò ad alterum Petri locum spectat: Quamuis eum non vrgeamus, neque vim aliquam ad Limbum statuendum habere putemus; tamen quale est, quod eum tu referas ad spiritus in cælo beatos? Quasi videlicet priusquam ascendisset Christus in cælum, non vixissent Deo spiritu, sed vt sic viuerent, ad hoc eis fuerit euangelium Christi voce prædicandum. Si enim propterea est illis euangelizatum, vt spiritu viuerent Deo; mortui ergo prius erant spiritu; quare nec beati, nec Dei clara visione perfruentes, nec omnino in cælo; in quo
ille

ille status est, quem Propheta expressit, vbi vi- *lerem. 31.*
delicet iam amplius non diceretur, Cognitione
Dominum; ideoque nec euangelio omnino sic
opus. Deinde, cum iudicium secundum car-
nem opponat Petrus vitæ ei quæ secundum
spiritum est, hoc sensu, vt quamuis iudicentur
carne, tamen viuant spiritu: perspicuum est iu-
dicium hoc carnis, damnationem quandam &
pœnam mortemque esse, quæ à beatorum cor-
poribus in illo vltimo iudicio longè erit. Mor-
tuos ergo rectè intellexerimus homines morti
destinatos & propinquos, siue per iudicis sen-
tentiam, siue per morbi vim, qui immedicabi-
liter oppresserit; Hi enim pro mortuis deputan-
tur. Veruntamen & quibusdam talibus euan-
gelizatum fuit, vt quamuis carne mortis iudi-
cium subirent, tamen conuersi atque baptizati,
spiritu viuere possent. Sic enim sanctus Epi-
phanius libro primo aduersus hæreses, hæresi
28. rectè accipi posse putat illud: Quid faciunt *1. Cor. 15.*
qui baptizantur pro mortuis? Quod morti vi-
cini, inquit, si fuerint in pietatis doctrina in-
structi, ob hanc spem ante obitum, lauacro
digni fiunt, ostendentes quod qui mortuus est
resurget, & ob id indiget remissione peccato-
rum per lauacrum: Sic Epiphanius. Ac tamen si
D. Augustinus epist. 99. sub finē declarer, posse
mortuos, infideles intelligi (Fieri enim potest,
inquit, vt mortuos dixerit infideles, hoc est *Matth. 8.*
in anima mortuos: de quibus dicitur; dimit-
te mortuos sepelire mortuos suos) & ideo non
cogere

1. Petri 4.

cogere ea verba, vt apud inferos intelligatur hæc mortuis facta prædicatio: tamen iudicium secundum carnem non aliter accipere potuit, quam vt pœna & dampnatio aliqua temporalis nomine iudicij significaretur. Propterea enim (inquit) in hac vita & mortuis euangelizatum est, id est, infidelibus & iniquis, vt cum crediderint, iudicentur quidem secundum homines in carne, id est, diuersis tribulationibus, & in ipsa morte carnis. Vnde idem Apostolus alio in loco dicit, tempus esse vt iudicium incipiat à Domo Dei: Viuant autem secundum Deum spiritu. Sed quamuis in priore illo de mortuis per infidelitatem, Augustinum sequeris; in hoc tamen quod adiungitur de iudicio secundum carnem, sequi D. Augustinum non poteris, nisi fateare peccatis remissis, in quo inest vita spiritus, restare adhuc temporalem in morte pœnam. Quid ergo te iuuat, quod cum Augustino infideles intellexeris, quando quod de iudicio exponitur, cum Augustino intelligere nec velis nec per tuam hæresim possis? Denique quod postremò loco ponis, de collatione temporum, Noë & prædicationis Christi in carne, non posteriorem hunc Petri locum, (quemadmodum tua verba præ se ferunt) sed priorem, Augustinus eò retulit, neque id interpretatione non dubia, sed téperata per [fortè]. Considera (inquit) ne fortè totum illud, quod de conclusis in carcere spiritibus, qui in diebus Noë non crediderant, Petrus Apostolus dicit, omninò ad in-

Epist. 99.
Inter me-
dium &
finem.

ad inferos non pertineat; sed ad illa potius tempora, quorum formam ad hæc tempora transtulit. Illa quippe res gesta forma fuerat futurorum, ut ij qui modò non credunt euangelio, dum in omnibus gentibus ædificatur Ecclesia, illis intelligantur esse similes, qui tunc non crediderunt cum fabricaretur arca. Illi autem qui crediderunt, & per baptismum salui fiunt, illis comparentur qui tunc in eadem arca salui facti sunt per aquam. Vnde ait: Sic & vos simili forma, baptisma saluos facit. Hæc Augustinus. Quibus si additur epistolæ conclusio eiusmodi: Hæc expositio verborum Petri cui displicet, vel cui etiam si non displicet, non tamen sufficit, quærat ea secundum inferos intelligere. Qui si valuerit illa quibus moueri supra commemoravi ita soluere, ut eorum auferat dubitationem, impartiat & mihi. Ad hæc igitur omnia Augustini verba si quis attenderit, facile perspiciet non esse verum, quod ais, Augustinum velle esse collationem temporum Noë & prædicationis Christi in carne, cum constet nihil eum hic adhuc fixum habere, sed inquirere, & quod melius sit impartiri sibi cupere.

De loco i. Petri 3. quid annotatum Beza reliquerit. CAPVT X.

CÆterum ad doctrinam de Limbo & Christi ad inferos descensum, Petri locum accommodari non posse, quibusdam argumentis
Y se The.

se Theodorus Beza confecisse non dubitat.

Sit (inquit) ista opinio quantumlibet vetus, & maximorum virorum auctoritate nitatur, tamen non posse huc applicari quod hic commemorat Petrus, istis argumentis ostendo. Primum, nulla hic mentio sit animæ Christi, sed spiritus, id est divina potentia. Neque enim per spiritum intelligere possis animam Christi, quin simul dicas eum per animam fuisse revocatum in vitam.

Interpres quidem noster Theopore, reddidit: Ut nos offerret Deo, mortificatos quidem carne, viuificatos autem spiritu; In quo & his: ubi cum Spiritus opponatur carni, dicere non possis ad animam id non esse referendum. Si quidem anima præsertim deposita vetustate peccati, spiritualis effecta, non rarò spiritus est appellata: velut ubi legitur; Quod natum est ex carne, caro est; & quod natum est ex spiritu, spiritus est: Et rursus; Caro concupiscit aduersus spiritum, & spiritus aduersus carnem: sed euidentius ubi scriptum est de tradendo Sathanæ Corinthio illo, in interitum carnis ut spiritus saluus sit in die Domini nostri Iesu Christi. Item ad Romanos 8. Corpus quidem mortuum est propter peccatum, Spiritus verò viuit propter iustificationem. Hæc igitur cum sic expressa legamus, neque ipsam diuinitatem intelligere possimus saluam fieri in die Domini, aut per iustificationis gratiam viuere, sed animam humanam debeamus accipere [Spiritus] vocabulo designatam, quid causæ sit cur hic quo-

Ioan. 3.

Gal. 5.

1. Cor. 5.

quoque in vocabulo [spiritus] animam Christi intelligere nequeamus? Etenim etsi legendum sit, quemadmodum legi vis & verus interpres legit, & Epiphanius & Hieronymus & Oecumenius & Augustinus, vt videlicet Christus ipse dicatur mortificatus carne, viuificatus autē spiritu: nihil tamen terret nos quod ais, nō posse per [Spiritum] animā Christi intelligi, quin simul dicatur eum per animam suam esse in vitam reuocatum. Neque enim necesse est vt viuificatus spiritu, idem sit quod reuocatus in vitam siue suscitatus, cum aptius intellexerimus, viuificationem spiritus, ipsa suscitatione posteriorem, naturæ saltem ordine. Diuina siquidem virtute anima corpori reddita est per resurrectionem; Reddita verò anima, corpus antea mortuum penitus viuificare cœpit, vsque aded vt id iam sine alimentorum subsidijs, viuum ac vegetum ipsoque immortalitatis vigore perpetuum redderet. Propter quam animæ in Christo vim dicit Paulus ad Corinthios: Factus est 1. Cor. 15. primus homo Adam in animam viuentem, nouissimus Adam in spiritum viuificantem. Quod etiā loco nomine [Spiritus] significata est anima Christi, quæ cum prius in corpore mortali vitam animale efficeret ad similitudinē primæ Adæ, postea conditionem corporis animalis in spiritalem quendā habitum transformauit, non vt corpus esse aut caro desineret, sed vt in modum status angelici cibo deinceps & potu non egeret. Mortuus ergo semel est Christus, iustus

Y ij pro

pro iniustis, vt nos offerret Deo, mortificatus quidem carne prius, sed post resurrectionem ita in eadem carne viuificatus à spiritu suo siue anima sua, vt in posterum iam mori non posset. Quanquam & sic quidam intelligant, vt dicatur Christus secundum carnem quidem mortuus, secundum spiritum verò, hoc est, animam semper viuus. Siue ergo hoc, siue illo modo accipias, quid verbis consequentibus intelligendum relinquitur, nisi quod in illo spiritu, hoc est, secundum animam suam, profectus ad eos qui in carcere inclusi tenebantur, prædicarit? Sed vt demus sanè per spiritum intelligi oportere spiritum sanctum, quomodo ipse intellexit Athanasius, cur sit colligendum ad doctrinam de Limbo nihil omninò Petri locum posse pertinere? Adeòne bona mente caruit Athanasius, vt cum diuinum spiritum interpretaretur, tamen non dubitarit accipere significatum esse descensum Christi, quo secundum animam profectus sit ad spiritus quosdam iustorum, adhuc inferni carceris vinculis compeditos? Quod enim secundum animam eo profectus sit, etiamsi in vocabulo spiritus non oporteret intelligi, tamen in eo quod dicitur [veniens] aut [profectus] ex regula rectissimæ rationis, intelligi posset. Nam cum ad eos spiritus qui erant in carcere, non ierit secundum carnem, nec ire potuerit nisi secundum aliquam suæ naturæ humanæ partem; cur non verissimè cogitetur illuc secundum animam profectus esse? Siqui-

Siquidem nomine [Spirituum] non debere accipi homines totos in hac mortali carne viuentes, ad quos venerit Christus etiam secundum carnem, vt prædicatione suæ doctrinæ suscitaret eos à morte peccati, ipse quoque Beza declarat: *Primo enim* (inquit) *cur vniis hominibus Spirituum nomen tribueret? Nam certè noua est & inaudita ista Synecdoche, præsertim cum de ijs agitur qui non sunt regenerati. Secundo cum mortuos aperte non nominet, coactum esse allegoricam istam interpretationem apparet, & cetera.* Sic Beza; in eo proculdubio sensum illum adiuuans, qui de Limbo traditur à vetustis authoribus: Quem multo minus alijs suis argumentis euertit, quæ & nullius momenti sunt, & superioribus dissoluantur, vt non putem operæ pretium ijs sigillatim proponendis atque dissoluendis tempus conterere. Quale enim est vt vrgeatur, non esse dictum [liberauit] sed [prædicauit] cum facillimè possit intelligi non eo descendisse Christum vt frustra & sine effectu solatij prædicaret? Aut cur putetur aliud esse prædicare, aliud dicere, Adsum ille quem expectabatis; cum eo ipso Christus suum in terris Euangelium prædicarit, quia sese demonstrarit, & rebus & verbis illum esse Messiam quem Prophetæ promiserant? Denique quid affert Beza melius? Nempe vt Christus in spiritu suæ diuinitatis neque secundum carnem, neque secundum animam, quæ nondum susceperat, iam olim adueniens,

Y iij

ipsa

ipsa Arcæ constructione prædicarit spiritibus, hoc est illis hominibus quorū spiritus iam sunt in carcere infernali. Sed meminisse illū oportuit quod ante dixerat nomine [Spirituum] nō rectè homines viuos intelligi: prædicatio autem illa per Arcam facta ad viuos homines pertinuit. Non ergo sic veniens Christus spiritibus hominum, sed ipsis hominibus qui spiritus non erāt prædicauit. Deinde quamuis Beza legendum putet [Qui sunt in carcere] nos sic tamen nō legimus, sed [Qui in carcere erant] aut [in carcere constitutis] quomodo & Erasmus sine omni scrupulo reddidit, & hætenus lectū ab omnibus est. Non ergo hi spiritus iam sunt in carcere, sed tunc erant, cū veniens Christus prædicaret eis. Et hætenus quidem de illo Petri loco, quo non facile reperiatur obscurior in nouo testamento, vt non tam videri velimus certum eius aliquem sensum astruxisse, quam restituisse illis qui ad Limbum Patrum accommodari posse negant, quantumlibet vetusta auctoritate sensus ille nitatur.

Frustra exagitari locum Lucæ, de Lazaro & Diuite, aduersus Limbum Patrum.

C A P V T X I.

EX Luca, inquis, afferunt historiam Lazari & diuitis, cap. 16. qui finis illis non calum, sed locus aliquis intermedius fuisse videtur. Respondemus nihil effici eo argumento. Nam magnum χάσμα inter electos & damnatos esse affirmat

mat Abraham, ita vt nemo possit vltro citroq̃ transire. Quare potius efficitur ex inferno non esse sperandam liberationem. Deinde procul Abraham non vidit; non igitur apud inferos. Hactenus ille.

Antea dictum est Areti, sinum Abrahamæ receptaculi non esse nomen, sed quietis eius quæ Abrahamæ promissa sit & semini eius: quæ quidem quies & in cælo & extra cælum esse possit. Ideoque si quis argumentetur propterea Lazarum in limbo fuisse, quia fuerit in sinu Abrahamæ, nulla is vtetur ex vocabulo quidē [sinus] firma collectione. Verum circumstantia temporis suffragante, confici potest argumentum eiusmodi non contemnendum: Eo tempore quo defunctus Lazarus est, hoc est, ante Mediatoris ascensum, nondum patebat cælum spiritibus electorum, sed tamen in sinum Abrahamæ deportabantur, id est, ad quietem aliquam beatam, quamuis nondum clara Dei visione perfectam: Ergo præter infernum damnatorum & cælum, debet locus siue status aliquis intermedius constitui, qui commodissime Limbi metaphora designetur. Hoc igitur argumentum quoniam tu modo, Benedicto, refellis? Nam magnum chasma, inquis, inter electos & damnatos esse affirmat Abraham; ita vt nemo possit vltro citroq̃ transire. Quare potius efficitur ex inferno non esse sperandam liberationem. Certè, inquam, hoc quidem efficitur, nullam esse liberationem ex inferno eo, in quo ille erat damnatus Epulo, siue ex damnatione. Neque enim plus tua illa

Y iiij verba

verba postulant, quibus ais affirmare Abrahamum, magnum esse chasma inter electos & damnatos, ita ut nemo possit vltro citroque transire. Sed nondum conuicisti sinum illum, siue quiete illam non potuisse esse Lazaro apud inferos. Quamvis enim nulla fuerit expectanda liberatio ex eo damnationis statu, in quo diues Epulo torquebatur, tamē potuit ex eo statu sperari liberatio & redemptio plenior, in qua erant Abraham & Lazarus, & quicunque illa secreta quiete fruebantur, adhuc licet apud inferos constituti. *At procul, inquis, vidit Abrahamum, non igitur apud inferos.* Quasi non & apud inferos ingēs sit, uti meritum, ita etiam statuum conditionumque distantia. Nam si necesse esse statuis ut localis distantia intelligatur, propter quam alter ab altero procul fuerit constitutus, iam oculos quoque corporeos, & linguam, & vocem in diuite Epulone requiram, praesertim cum scriptum sit, eleuatis oculis vidisse procul Lazarum in sinu Abraham. Quae & si tu corporea ponerēs in diuite, quērerem quomodo in caelo situm videre carnis oculis Lazarum potuisset, ipse in inferno sepultus? quomodo item non frustra alloqui, cum sanctos in caelo constitutos audire negetis posse preces & clamores eorum qui in terra versentur? Sin spirituales intelligis oculos, & eleuationem mentis, non carnis, clamoremque non cum qui faucibus corporis, sed desiderij magnitudine ederetur, cur non hic spirituales quoque distan-

distantiam concipias, quæ damnatos pro suis
 meritis non patiatnr ullius solatij fieri partici-
 pes? Quam distantiam Diuus Ambrosius su-
 pra citatus expressit, cùm ait per illud chaos
 significatum esse merita post mortem non posse
 mutari. Quam & D. Hilarius interpretatus est,
 cum sic commentatur in Psalm. 51. Non enim,
 inquit, confessio peccatorum, nisi in huius sæ-
 culi tempore est, dum voluntati suæ vnusquis-
 que permissus est, & per vitæ licentiam habet
 confessionis arbitrium. Decidentes namque de
 vita, simul & de iure decidimus volûntatis. Tunc
 enim ex merito præteritæ voluntatis lex iam
 constituta, aut quietis aut pœnæ, exceden-
 tium ex corpore suscipit voluntatem. Cuius
 temporis non iam liberam, sed necessariam vo-
 luntatem ostendit Propheta dicens: Non est
 mihi in diebus illis voluntas. Cessante enim
 voluntatis libertate, etiam voluntatis, si qua
 erit, cessabit effectus. Transire namque ad A- *Luce 16,*
 braham volens diues, chaos medio non fini-
 tur, cum tamen per libertatem voluntatis in
 Abrahæ sinibus esse potuisset. Interclusa est
 ergo libertas voluntatis, quia confessio nulla sit
 mortuis, secundum id quod dictum est: In in- *Psalm. 6,*
 ferno autem quis confitebitur tibi? Hactenus
 S. Hilarius. Denique cum tu contra Purgato-
 rium disputas, non rei gestæ historiam, sed pa-
 rabolam esse dicas, atq; id hoc loco sic repetas,
 vt neges omittendum fuisse narrationem de
 diuite & Lazaro parabolam esse, idque multos
 Y v etiam

eriam Patres agnoscere, quid tibi nunc in mentem venit, ut tam historicè localem vrgeas distantiam & chasma locale? Sed nimirum sic te semper ad institutum magis tuum, quam ad veritatem accommodas, & quidquid contra nos facere potest, arripis; oblitus etià quod antè dixeris. Cæterum fac localem intelligi distantiam, & chasma corporeum (nolo enim in eorum quibusdam Catholicis scriptoribus aduersari) cur talè quid apud inferos esse non potuit, ut procul positum diues cerneret Abrahamum, chasmaque medium interesset, quando sæpè numero contingit hoc in amplissimis illis, vastissimisque terrarum voraginibus, ut quamuis intracuiusdem hiatus seu cavitatis spatium plures teneantur, tamen alij alios ita supra positos suspiciant, ut clamore vel maximo vix eorum ferire possint aures? Itaque cùm maior multò sit vastitas & amplitudo inferorù, nihil prorsus impedit, quo minus apud inferos, illud chasma, & illa intelligatur fuisse distantia. Tibi verò laborandum erit, ut esse voraginem & chasma doceas inter cælum & infernum, cùm inter hæc continua ordinatissimaque interiaceat elementorum dispositio, in qua nisi ineptè, vorago & hiatus intelligi nequit. Nec dici chasma solet, nisi in fissuris & interruptionibus, velut cùm quid abruptum perit: Vnde & chasmaticus dictus est terræ motus; estq; Lex apud Iurecōsultos, Si qua agri portio chasmate periisset, quid fieri tunc oporteret.

Argu-

Argumentum ex consensu Patrum, aduersus hæreticorum exceptiones defenditur.

CAPVT XII.

T Andem ais, *Vrgent nos consensu & auctoritate Veterum. Ad quam respondemus; Verum quidem esse à quibusdam affirmari hoc, praesertim à Dino Hieronymo, qui in caput 13. Ozea ad finem, interpretatur vasa desiderabilia, quae in thesauris inferni detinebantur: Sanctos inquit intelligimus, quos alligatos fortè Dominus eripuit, & rapuit, & eulias de infernis, & quasi vasa praestantissima secum perduxit in paradysum. Et mox ibidem: Terram inferni non debemus accipere esse terram viventium, sed mortuorum, quae diripitur & vastatur, quando morte Christi vincita apud inferos anima liberantur. Et epistola 25. Patres ante natum Christum ad inferos descendisse, quia nondum paradisi ianuam Christus effregerat, Nondum flammeam romphaam, & vertiginē praesidentium cherubim sanguis extinxerat: Unde & Abraham licet in loco refrigerij, etiam apud inferos cum Lazaro fuisse scribitur, &c. Sed meminisse eos decet, eius auctoritatem valere, quatenus scripturis nititur: Quatenus verò suas offert rationes, aut suum priuatum iudicium sine scripturis & rationibus firmis, nos non illius teneri prauidicio.*

Laudo Areti, quod tuo instituto tam aptè subseruias. Vt enim vim minueres consensus & auctoritatis Veterum, frigidissimè dixisti af-
firma-

firmari à quibusdam, & præsertim à D. Hieronymo. At alibi cum de Inferni pœnis disputas, quia tunc vsui tibi erat autoritas consensusque Patrum, vrges ipse quoque illum aduersus alios tuos contradictores, quem à nobis contra te vrgeri non pateris.

Ad ista, inquis, loca inferorum descendisse ante Christi aduentum etiam patriarchas, & in genere mortales omnes, plerique voluerunt patrum. In qua sententia video Hieronymum esse, qui scribit in epistolam ad Ephes. c. 4. ita: Inferiora autem terra, infernus accipitur, ad quem Dominus noster saluatorq; descendit, ut sanctorum animas que ibi tenebantur inclusa, secum ad calos victor abduceret. Idem in commentarijs super Ecclesiasten cap. 3. ait, Ante aduentum Christi omnia ad inferos pariter ducebantur: Unde & Iacob ad inferos descensurum se dicit, & Iob pios & impios in inferno queritur reseruari. Et euangelium chaos magnum interpositum apud inferos, Et Abrahamum cum Lazaro, & diuitem in supplicijs esse testatur. Et reuera antequam flammam illam rotam, & igneam rompham ad paradisi fores Christus cum Latrone reseraret, clausa erant caelestia. Et in cap. 9. Ecclesiastes ait, Nota ut Samuelem quoque verè in inferno credas fuisse, & ante aduentum Christi, quamuis sanctos, omnes inferni lege detentos. Et epistola. 3. Ante Christum Abraham apud inferos; Post Christum Latro in paradiso. Hæc tu Areti, eo loco memoria tenes te scripta reliquisse; Vndè colligamus, quo nostra quo-

quoque causa abs te firmetur, Diuum Hieronymum non vno loco, nec varie, sed pluribus & constanter, Limbum Patrum astruere: nec aliquos tantum modo Patres duos vel tres; sed plerosque in eadem esse sententia. Cur ergo hic in eo tantum elaboras, vt de D. Hieronymi auctoritate satisfacias, quasi is solus ita sensisset? An, cum plerosque Veteres in eadem esse sententia non nescires, vnius Hieronymi ita te terruit auctoritas, vt eum solum censes submouendum? An & de cæteris quoque hoc intelligi voluisti, eorum te non teneri præiudicio, quoniam priuatum suum iudicium, non scripturas secuti sint? Atqui hoc potius existimare te conuenerat, plerosque veteres ecclesiæ Patres, eodemque diuinarum literarum sedulos tractatores, scripturas intellexisse melius quam te vnum, aut tui similes. Et ideo quia Limbum sine scriptura non affirmant, sed ex varijs scripturarum locis astruunt, non parui ponderis esse tantum eonsum per-suadere tibi debuisti. Nam & tu ipse alio in loco patrū consensum, quantifacere deberemus non dissimulas, vbi Christi ad inferos descensum probare hoc ipso argumento conaris. *Nam cum videret (inquis) Ecclesia, aperte tradi in scriptura descensum ad inferos, graui consilio tandem hanc clausulam in formulā fidei ad-misit. Aut dicant illi nobis quæ ratione factum sit, vt tāto consensu apud omnes nationes, in omnibus linguis, adeoque constanter & consentienter recepta sit illa clausula. Impossibile sanè videtur, si error*
hic

hic esset cōmissus, quin aliqui huic se opposuissent malo; non sine concertatione fuisset in vsum recepta: Superessent etiā aliqua ecclesiæ quæ non agnoscerent; Ideoq; consensus iste, graue est argumentum veritatis. Adde Patrum ferè omnium, licet discrepans, explicatio, tamen concessio est aliquem esse descensum, & secundū aliquem modum Christum ad inferos descendisse. Hæc tu eo loco. Itaque nunc ex te quæro, vt dicas qua ratione factum sit, vt tanto consensu apud omnes nationes, in omnibus linguis, adeoq; constanter & consentiēter, recepta sit hæc de Limbo sententia, si non eam ecclesiā in scriptura sacra traditā animaduernerit? Quī fieri potuit, vt tam grauis error, tanto sit consensu receptus? Cur se huic non aliqui iam olim opposuerunt? Quī factum est, vt sine concertatione in vsum doctrinæ receptus sit? Quæ superfuerunt vnquam ecclesiæ quæ id non agnoscerent? Itaque dicito, Cur secundum tuam ipsius sententiam, consensus iste, non sit graue argumentum veritatis? Forsitan hic excipies Augustinum, quem ais hisce in rebus, suam ignorantiam fateri non erubescere, eiusque hoc nomine modestiam laudas, ac nobis seruandam proponis. Cur ergo ipse eam primus non sequeris? Cur tam petulanter repudias Limbi assertionem vt absurdam, quam ipse non damnauit? Qua fronte te scire præ te fers, cuius ille ignorantiam (vt ais) confessus est? Quid causæ est, quamobrem tantæ Patrum plerorumque consensio (vt ipse testis es)

es) non plus deferas, cui scis Augustinum plurimum deferre solere? Neque enim ignorare te hic dicis, quid sit de re obscurissima sentiendum, aut incertum hærere, propter varias scripturarum expositiones, aut dubitationes aliquorum; sed quæstionem hanc pronunciare non dubitas, quæstum & superstitionem stabilire; eandemque absurdam; deinde, non necessariam; demum, præter scripturas esse. Non pudet, Areti, modestiam ab alijs exigere, quam tu in eo ipso in quo præstari eam vis, tâta hac tua petulantia violasti? Cur tu, dic rogo, modestus es qui ita scribis, ego immodestus qui contraria pono? Quæstionem de Limbo nec superstitionem stabilire, sed conferre ad pietatem; nec ad quæstum, sed ad veri cõfirmationem spectare: Deinde non absurdam, quam Veteres omnes, ijque grauissimi authores comprobant: & necessariã, quia nec tenuem sanæ doctrinæ particulam ferendum sit à quoquam expungi: Demum nec præter scripturam esse, cuius occasione tractandæ discutitur, & luculenta satis definitione terminatur. Nam à tanto cæterorum consensu, vnum eximi non debere Augustinum, discere potueras ex cap. 15. libri 20. de Ciuitate Dei, vbi ait, Non absurdè credi, antiquos etiam sanctos qui venturi Christi tenuerunt fidem, locis quidem à tormētis impiorum remotissimis, sed apud inferos fuisse; donec eos inde sanguis Christi, & ad ea loca descensus erueret. Vnde etiam animaduertas licet, quàm

tu eius imiteris modestiam. Ille enim dicit, non absurdè hoc credi; tu eam sententiam absurditatis condemnas. Quin & li. 17. cap. 11. de Ciuitate Dei, affirmat sine cunctatione descendisse ad inferos Christum, vt quorundam illic peccatorum vincula dissolueret. Tamen igitur Augustinus, alijs quibusdam locis operum suorum quæ iunior confecerat, rem hanc nondum sibi omninò perspectam significauisset; tamen non parum nos mouere deberet, quod in libris de Ciuitate Dei, quos & senior & accuratissimè conscripsit, à cæterorum consentienti iudicio sese disiungere noluisse. Sed videamus obsecro quid id sit, quod se ignorare, vt ais, fateri non erubescat Augustinus. *Quod ad locum*, inquis, *Petri attinet, fatetur ignorantiam suam.* Quid tum postea? An consequens est, propterea Limbum Patrum ignorasse, quia nescierit, possène illo Petri testimonio confirmari? Sunt enim multa certissima, quæ vtrum his aut illis confirmètur scripturæ locis, incertum est. Et Christum quidem ipsum ad inferos descendisse, & apud inferos fuisse, ita non dubitat illa epistola 99. vt dicat: Quis nisi infidelis negauerit fuisse apud inferos Christum? nimirum ad fidem hoc pertinere significans, de quo tu vt problemate disputas. Deindè (quod ad rem propius facit) quosdam in inferno iustos tunc fuisse, qui adhuc essent à quibusdam suis vinculis exoluendi ac liberandi plenius, ita sine dubitatione sibi persuaerat in eadem epistola,

*Penult post
initium.*

stola, vt significet frustra descensurum fuisse Christum ad inferos, si nulli eorum profuisset qui ibi tenebantur inclusi. Quod enim scriptum est (inquit) in morte Christi factum, Solutis doloribus inferni; vel ad ipsum potest intelligi pertinere, quod eos hactenus soluerit, hoc est irritos fecerit, ne ab eis ipse teneretur, præsertim quia sequitur: In quibus impossibile erat teneri eum. Vel si causa quaeritur cur voluerit venire in infernum, vbi dolores illi essent quibus teneri omnino non poterat, tunc quod scriptum est; Solutis doloribus inferni, non in omnibus, sed in quibusdam accipi potest, quos ille dignos ista liberatione iudicabat; vt neque frustra illuc descendisse existimetur, nulli eorum profuturus qui ibi tenebantur inclusi; nec tamen sit consequens, vt quod diuina quibusdam misericordia iustitiaque concessit, omnibus concessum esse putandum sit. Post hæc vide quid subiungat: Et de illo quidem primo homine patre generis humani, quod eum ibidem soluerit, ecclesia ferè tota consentit, quod eam non inaniter credidisse credendum est, vnde cunque hoc traditum sit, etiam si canonicarum scripturarum hinc expressa non proferatur authoritas. Quamquam illud quod in libro Sapientiae scriptum est: Hæc illum, qui primus factus est, patrem orbis terrarum, cum solus esset creatus, custodiuit & eduxit illū à delicto suo, & dedit ei virtutem continendi omnia; magis pro hac sententia, quam pro vllō alio intellectu

*Interprin-
cipium &
medium.*

Cap. 10.

Z

face-

facere videatur. Addunt quidam hoc beneficium antiquis etiam sanctis fuisse concessum Abel, Seth, Noë & domui eius, Abraham, Isaac, & Iacob, alijsque Patriarchis & Prophetis, ut cum Dominus in infernum venisset, illis doloribus soluerentur. Sed quonam modo intelligatur Abraham in cuius sinum pius etiam pauper ille susceptus est, in illis fuisse doloribus, ego quidem non video: explicent fortasse qui possunt. In his Areti, verbis quæ ignorantie professio est? aut quæ dubitationis, de eo quod præcipue quæritur, significatio? Nam & si Abrahamum & Noë, & quosdam excellētissimi meriti sanctos, nō tunc putarit fortè apud inferos fuisse, tamen quin iusti aliqui apud inferos fuerint Christo illuc veniente, quos suis doloribus liberarit, minimè profecto dubitavit. Veruntamen neque illud negat; sed dicit se non videre, quonam modo ad eos pertinere potnerit, dolorum solutio, propter quam Christus ad inferna descēdit; cum Abraham & Lazarus in doloribus non fuisse videantur, quos exceperat secretæ cuiusdam quietis beata habitatio. Deindè negat videre se, quid illis iustis, qui in sinu Abrahamæ erant cum Christus in inferna descenderet, suo hoc descensu contulerit (*quātum videlicet ad solutionem dolorum spectat de qua agebatur) à quibus, inquit, cum, secundum beatificam præsentiam suæ diuinitatis, nunquam video recessisse. Hoc ergo est, quod illic Augustinus non definit, sed adhuc disputando in-

uesti-

Thomas dicit quod liberavit eos à dolore qui ipsis erat ex dilatione gloriæ, iuxta id

quod scriptum est Proverb.

7. Spes quæ differtur affligit animā.

parte 3. q.

52. art. 2.

ad 2.

* Thomas

in 3. parte

q 52. art. 5

ad 1,

uestigat, sicut & in libris de Genesi ad literā in ea disputatione versatur. In quibus libris plura se quæsisse quam inuenisse * cōfitemur. In Psalmum verò 85. scribens, eumque tractans Psalmi versiculum : Quoniam misericordia tua magna est super me, & eruisti animam meam ex inferno inferiori, pro incerto non habet, quin Dominus ad inferos descenderit, vt omnium sanctorum præcedentium animas indè erueret: sed de loci infernalis situ, secundum quem superiore in parte esset Abraham cum Lazaro; Epulo verò multò inferiore, id nondum dicit se inuenisse quid statui oporteret. Nec tamen opinionem, more tuo repudiat; Fortassis enim (inquit) apud ipsos inferos est aliqua pars inferior, quo trudentur impij qui plurimum peccauerunt. Etenim apud inferos, vtrum in locis quibusdam fuisset iam Abraham, non satis possumus definire. Nōdum enim Dominus venerat ad infernū, vt erueret indè omniū sanctorum præcedentium animas; & tamē Abraham in requie ibi erat. Et quidem diues, cūm torqueretur apud inferos, cūm videret Abraham, leuauit oculos; Non enim posset leuatis oculis videre, nisi ille esset superius, ille inferius. Ergo inter ista fortasè duo inferna, quorum in vno quieuerunt animæ iustorum, in altero torquentur animæ impiorum, attendens quidam orans hic iam in corpore Christi positus, & orās in voce Christi, eruisse Deum animam suam ab inferno inferiori, dixit, Quia liberauit se à tali-

Lib. 12. de
Genesi ad
lit. cap. 33.
* Libro 2.
Retrahae.
cap. 24.

bus peccatis, per quæ posset deduci ad tormēta inferni inferioris. Hinc apparet incertum fuisse Augustino, non quin Abraham in inferno fuerit, vbi dicit eum in quiete fuisse: sed vtrum illic fuerit sicut in loco statūque infernali. Quo etiā referri fortasse potest dubitatio Epistolæ 99. Vtrum sinus Abrahæ quoddam inferni membrum fuerit. Ac re vera propriæ significationis ratione, non est Abrahæ sinus membrum inferni, cum & modò sinus Abrahæ sit, vbicunque sanctorum animæ requiescunt, expectantes redemptionem corporis sui, ex ea fide per quam Abrahæ filij esse meruerunt. Infernus verò propriè ac per se, locum statumque miseræ & luctus significat. Ideoque benè dicit Augustinus nusquam poni in bono; propriam videlicet inferni rationem attendens. Quare sicut Deus in inferno est secundum locum non statum, & Christus ad inferna descendit, locum illum ingrediens, non loci tristitiam & luctum suscipiens: Ita Abraham vna cum Lazaro, cæterisque quibus eximæ sanctitatis testimoniū scriptura perhibet, in loco quidem illo inferno fuisse; at non secundum propriam infernalis loci statusque rationem concipi ab Augustino potuerit; sicut & Latronis anima, quamuis in loco illo vna cum Christi spiritu fuerit, non tamen ibi proprium loci inferni statum, sed paradysum habuit ex præsentia Deitatis. Quāquam paradisi nomine non necesse sit illam beatitudinem cogitari, aut illam diuinitatis contem-

pla-

Sic interpretatus est D. Thomas Augustini locū: Quia nomen infernorum (inquit) sonat in malū pena. parte 3. qua. 52. art. 1. ad 1.

plationem, quæ mundis corde pro fine promittitur, cælestibusque sedibus reſeruatur. Poteſt enim paradifum ſpiritualem præſtare, inferior quidam diuinæ præſentiæ modus, quantum ſat eſt ad ſolatum quietis, cum gaudio & opabili quadam felicitate præſtandum. Nam & de Moſe legitur, quod Dominum viderit facie ad *Exod. 33.* faciem. Paulus quoque raptus fuit in paradifum, & audiuit arcana quæ non licet homini *2. Cor. 12.* eloqui. Nec tamen illis viris exiſtimandum eſt viſionem illam contigiffe, quæ iuſtiæ ſaturitatem & inamiſſibilem felicitatem præſtans, præmium cuique ſanctorum aliquando futura eſt.

Forſitan & Tertullianum nobis obieciſſes, ſi *Libro 4. contra Marcionem.* legiſſes, Cuius verba ſunt: Aliud (inquit) inferi vt puto, aliud quoque Abrahæ ſinus; Nam & magnum, ait, intercidere regiones iſtas profundum, & tranſitum vtrimque prohibere. Sed nec alleuaſſet Diues oculos, & quidem de longinquo, niſi in ſuperiora, & de altitudinis longinquo per immenſam illam diſtantiã ſublimitatis & profunditatis. Vndè apparet ſapienti cuique, qui aliquando Elyſios audierit, eſſe aliquam localem determinationem, quæ ſinus dicta ſit Abrahæ, ad recipiendas animas filiorum eius, etiam ex nationibus, Patris ſcilicet multarum nationum in Abrahæ cenſum deputandarum, & ex eadem fide, qua & Abraham Deo credidit, nullo ſub iugo legis, nec in ſigno circunciftonis. Eam itaque regionem ſinum dico Abrahæ, & non cæleſtem, ſublimio-

rem tamen inferis; interim refrigerium, præterea animabus iustorum, donec consummatio rerum resurrectionem omnium plenitudine mercedis expungat. Et infra: Si æternus locus repromittetur, & ascensus in cælum ædificatur à creatore promittente etiam semen Abrahæ velut stellas cæli futurum, utique ob cælestem promissionem, salva ea promissione, cur non capiat sinum Abrahæ dici, temporale aliquod animarum fidelium receptaculum, in quo iam deliniatur futuri imago, ac candida quædã utriusque iudicii prospiciatur. Hæc Tertullianus. Verum & ille tibi, ut cernis, aduersatur, qui Abrahamum cum Lazaro in cælesti regione fuisse neget; Quamvis sublimiorem inferis localem determinationem existimet fuisse Abrahæ finum, sed ijs inferis apud quos diuersabatur epulo: Nam in libro de resurrectione carnis, Abrahamum & Lazarum apud inferos scribit fuisse. Nisi magis hoc intelligendum sit existimasse Tertullianum, sinum Abrahæ totis inferis fuisse contiguum à parte superiore. Quod imaginari videntur multi, qui inferni Limbum appellant, quomodo vestium limbos dicimus, quæ neque propriè vestium partes sunt, ad earum integritatem pertinentes, & tamen adherent certoque nexu iunguntur. Cum ergo hæc illi ad istum modum scribant, quem tandè nobis Veterum ab illa cōcordia separabis? Author emne expositionis Symboli, quæ sub nomine Cypriani inter eius opera falso recēsetur? Videlicet quia

quia dicat in ecclesiæ Romanæ symbolo nō haberi additum: Descendit ad inferna: Sed neque in Orientis ecclesijs haberi hunc sermonē. Vim, tamen verbi eandem videri esse, in eo quod sepultus dicitur. Et tamen in eadem expositione symboli, vide quid author ille scribat, & animaduerte cum ceteris in quadam discordiæ specie quam pulchrè concordet: Redijt, inquit, victor à mortuis, inferni secum spolia trahens: Eduxit enim eos qui tenebantur à morte, sicut & ipse prædixerat vbi ait: Cū exaltatus fuero *Iohann. 12.* à terra, omnia ad me traham. Attestatur autem euangelium de hoc cum dicit: quia monu- *Matth. 27.* menta aperta sunt, & multa corpora sanctorum dormientium resurrexerunt & apparuerūt multis. Rursumque in eodem libro: Consum- *Paulo post.* matis (inquit) his, quæ in terra gerebantur, & animabus de inferni captiuitate reuocatis, ascendere memoratur ad cælos, sicut propheta *Psal. 67.* prædixerat: Ascendēs in altum, captiuam duxit captiuitatem, dedit dona hominibus, illa scilicet dona quæ Petrus in Actis Apostolorum de Spiritu sancto dicebat; Exaltatus ergo dex- *Athen. 2.* tera Dei effudit hoc donum, quod vos auditis & videtis. Donum ergo spiritus sancti hominibus dedit, quia captiuitatem quam prius diabolus per peccatum deduxerat in infernum, Christus per mortis suæ resurrectionē reuocauit ad cælum. Nec verò, quod de ecclesiæ Romanæ symbolo, aut ecclesiarum Orientalium dicit, ad symbolum Apostolicum referendum

Z iiij est,

est, quod à suis authoribus hoc est Apostolis sine hoc articulo descensus ad inferos nunquam est profectum; sed ad ea symbola quæ postea in ecclesijs condita sunt, pro natis occasionibus (velut in Synodo Romana sub Iulio, in Nicæna sub Siluestro; & in Antiochena, Sardicensi, Syrmienti, quarum symbola à Diuo Hilario referuntur in libro de Synodis) ubi prolixius explicatis ijs, quæ ad hæreses illorum temporum confutandas pertinebant, cætera omnia de quibus nulla tum mouebatur quæstio, expressè repeti non necesse esse putabatur; præsertim, quia vel ex resurrectione à mortuis tertia die, vel ex sepultura & morte, descensus ad inferos, qui mortem communi lege comitabatur, facile posset cogitari: proptereaque dixit author ille, vim verbi eadem videri, in eo quod sepultus dicitur: non quia (vt videtur nonnullis) Infernus pro sepulchro ponatur, aut sepulchrum significet, sed quia hæc reipsa ita coniuncta erant, hoc est sepultura secundum corpus, & descensus ad inferos secundum animam, vt alterum in altero soleret intelligi; quomodo & in passione crucem, & in cruce mortem, alij intelligendam cogitandamque reliquerunt. Nam quod in infernum Christus secundum animam descenderit, dicit ille author, euidenter prænunciatum in psalmis, ubi scriptum est: Et in puluerem mortis deduxisti me. Et iterum: Quæ utilitas in sanguine meo, dum descendo in corruptionem? Et iterum: Descendisti

disti in limum profundi, & non est substantia. Hisque adiungit Petri locum; Et eis qui in carcere inclusi erant in diebus Noë; In quo etiam inquit, quid operis egerit in inferno, declaratur. Et multis interiectis, illas quoque scripturas profert: Domine eduxisti de inferno animam meam, saluasti me à descendantibus in lacum. Et illam: Quoniam conuersus viuificasti me, & de abyssu terræ iterum reduxisti me. Euiden-
tissimè autem (inquit) in octuagesimo & septimo Psalmo dicitur de eo: Et factus sum sicut homo inter mortuos liber sine adiutorio; non dixit, homo, sed sicut homo. Sicut homo enim erat, quia etiam descenderat in infernum: sed inter mortuos liber erat, quia à morte teneri nō poterat. Hæc ille ex scripturis de Christi ad inferos descensu; & quid illic egerit, secundum animam. At erit forsitan qui nobis Chrysostomum diuellere conetur ab hac Patrum concordia, propterea quod in Matthæum scribens, tractansque illud quod narratur ab Euangelista, apertos esse Christo cælos; Vis, inquit, manifestè scire, quoniam ante Christum, cæli si aperiebantur iterum clauderentur. Nam iusti quidem forsitan ascende-
bant in cælum; peccatores autem nequaquam. Ideo autem dixi, forsitan, ne quibusdam placeat & ante aduentum Christi, iustorum animas ascendere potuisse in cælum. His verbis quid aliud loquitur Chrysostomus, quam nondum certam sibi fuisse huius nostræ sententiæ veritatem? Verum meminisse

Matth. 3.

Z v opor-

oportet Catholicorum nos doctorum vrgere consensum : quo in numero non esse illum commentarij in Mattheum imperfecti scriptorem , vndè superiora verba prolata sunt , apertus eius Arrianismus testabitur,quem varijs locis inspersum in antiquioribus exemplaribus videre licebit . Veruntamen ne illum quidem dissentientem habemus, qui suam sententiam aperiens , post illa verba continuò subiunxerit: Alioqui nullam animam ante Christum arbitror ascendisse in cælum, ex quo peccavit Adam, & ei clausi sunt cæli; sed omnes in inferno detentas, propter quas etiam descendit ad inferiores partes terræ: Sicut ipse in Sapietia dicit; Descendam ad inferiores partes terræ, & visitabo omnes dormientes, & illuminabo sperantes in Deum . Animaduertis & illum commentarium , ad veterum Catholicorum concordiam accedere, tametsi alias in multis grauibúsq; erratis deprehensum. Exurgit & alius qui dicat, Damascenum cum in hoc argumēto versaretur, nihil ausum esse definire. Vide, inquit, quo nos cursu suo sermo produxit, dum rem quam propè occultam esse oportebat, soluere & dijudicare auxilio Dei conamur. At nos (indignū enim foret) definimus nihil; tantum fraternitatis studio ratiocinamur. Cæterum hūc Damascenum de eo quod agitur, velle dubium & incertum efficere, id quidem operam perdere est . Cum enim de liberatis per Christi descensum animabus duo dicat; alterum eos qui

fideles

*In oratione
qua decla-
rat, mor-
tuis vine-
rum suffra-
gijs innari.*

fideles hic fuissent, eductos esse; alterum, eos etiã liberatos, qui hic sine fide sobriè continenterque vixissent: prius quidem illud pro indubitato confirmat; posterius verò, non credere sed opinari, nec definire sed disputare magis se dicit. Quamuis enim (inquit) ita dicat Propheta; In inferno quis confitebitur tibi? omninò tamen in inferno aliqua confessio fuit; eorum, inquam, qui in salutarem Domini descensum crediderunt. Christus enim assertor vitæ, non simpliciter omnes, sed eos tantum qui crediderant, vt dictum est, saluauit. Et quinam ante nos crediderunt? Patres & Prophetæ, Iudices Reges & Præsides, alijq; ex Hebræorum gente in magno numero, & noti omnibus. Oportebat ergo omnes huiusmodi, per descensum Dei & Domini nostri, ab inferni vineulis liberatos saluari: quod & illius prouidentia factum est. Hoc igitur est de quo Damascenus minimè dubitat. Consequentibus verò verbis, quid duntaxat opinetur expressit. Solius, inquit, misericordiæ gratia saluatos opinor omnes, qui in vitæ puritate nullum nō perfecerunt opus bonum, continenter, sobriè tenuiterque viuendo; licet minus satis exercitati, fidē diuinam ac sincerā non acceperint: Aliaq; multa subiungit in eam sententiam. Verùm libro quarto de Orthodoxa fide, cap. 29. (vndè non iniuria videri possit, sermonem illum non esse Damasceni) docet Christi animam ad inferos vsque penetrantem, his quidem qui in terra crediderāt saluti fuisse; illis

illis verò qui non crediderant, improprio & redargutioni. Descendit, inquit, ad infernùm anima deificata, vt quemadmodum ijs qui in terra, iustitiæ ortus est sol; sic & ijs qui sub terra in tenebris & vmbra mortis sedebāt, lux infulgeret: & vt quemadmodum in terra euangelizauerat pacem, captiuis remissionem, cæcis visum, & ijs qui crediderunt factus est causa salutis æternæ, incredulis autem infidelitatis improprium & redargutio; sic & ijs qui in inferno, vt ipsi omne genu flectatur, cælestium, terrestrium & infernorum: atque hoc pacto à sæculo compeditos soluens, rursus ex mortuis redijt, nobis viā parans ad resurrectionē. Hætenus Damascenus. Itaque iam, Areti, quantus sit hac in re Patrum consensus, vides. Tantus enim est, vt quem hinc reuellas, reperire non possis: tantus omninò est de Limbo patrum consensus, quantus & de descensu Christi ad inferos, quem tu propter consensum Patrum negare non audes: tantus denique in id est Patrum consensus, vt propterea publicis hymnis atque carminibus in ecclesia celebretur, iamque olim celebratum sit. Inde enim illa sunt,

*Ex Hymno
D. Ambrosij.*

*Inferni claustra penetrans,
Tuos captivos redimens,
Victor triumpho nobili,
Ad dextram Patris residens.*

Inde & illa Lactantij Firmiani, in carmine de Resurrectionis Dominicæ die:

*Solue cathenas inferni carceris umbras.
Et renoue sursum, quicquid ad ima ruit.
Redde ipsam faciem, videant vt sacula lumen,*

Redde

Redde diem, qui nos te moriente, fugit,
 Sed planè implesti, remans pie victor, Olympum;
 Tartara pressa iacent, nec sua iura tenent.
 Infernū insaturabiliter caua guttura pandens,
 Qui raperet semper, sit tua prada Deus.
 Eripis innumerum populum de carcere mortis;
 Et sequitur liber, quo sumus author abis.
 Tuomit absorptam pauide fera bellua plebem;
 Et de fauce lupi subtrahit agnus oves.
 Hinc tumultum repetens post tartara carne resumpta,
 Belliger ad calos ampla trophæa refers.
 Quos habuit pœnale chaos, iam reddidit iste,
 Et quos mors peieret, hos noua vita tenet.

Hoc verò ita esse, vsque adeò inconcussè Veneres tenuerunt, vt id sumerent in argumentum diuinitatis Christi. Ex quo & illa sunt apud Prudentium in Apotheosi.

Hunc ego non cumulem, myrrhæ, & thuris, & auri
 Muneribus? scio quem vidiam, qua dona rependam,
 Hunc ego non veneret: qui, caelo visus, humiq;
 Inuentus Rex, atque Deus, moderatur utrumque
 Natura specimen, tumuloque inferna refringens
 Regna, resurgentes secum iubet ire sepultos?
 Cælum habitat, teris interuenit; abdita rumpit
 Tartara. vera fides, Deus est, qui totus ubique est.

Et infra:

Totum heminem Deus assumit: quia totus ab ipso est.
 Et totum redimit quem sumperat, omne reducens
 Quidquid homo est, istud tumultis, ast illud abyssis.

Quin & Arriani cum nollent filium consubstantialem & æqualem dici patri, sed similem; idque in symbolo expressissent quod apud Syrmium præsentē Constantino ediderunt, ne tamen nihil magnum viderentur Christo tribuere, in eodem symbolo, præter morem Orientalium symbolorum quæ ab Hilario referuntur, posuerunt & descensum ad inferos; quem sic

Paul' post
medium.

sic expresserunt. Hunc nouimus vnigenitum
 eius filium, nutu paterno venisse de cælis ad de-
 structionem peccati; & natum ex Maria virgi-
 ne, & secundum paternam voluntatem cruci-
 fixum, & mortuum, & ad inferos descendisse,
 & quæ ibi erant dipensasse, quem ianitores in-
 ferni videntes expauerunt, & die tertia resur-
 rexisse. Hoc igitur Arriani, quoniam sciebant in
 confesso esse apud omnes, vt inuidiam, quam
 se de Christi diminutione pati non ignorabant,
 temperarent, expressè in suo symbolo ponen-
 dum esse putauerunt; vt catholica hac confes-
 sione quæ satis de Christo magnifica videretur,
 nonnullam errori suo apud simplices vm-
 bram facerët. Nec scio vtrum vlla hæresis olim
 hoc è symbolo fidei putauerit esse submouen-
 dum; nisi fortè Apollinaristas id facere necesse
 fuerit, propterea quod animam Christo detra-
 herent. Sed inuenissent, opinor, illi quoq; inter-
 pretandi rationem aliquam, potius quam pri-
 mum illud ecclesiæ traditum fidei symbolum,
 vnus articuli detractione mutilarent. Nam
 quod hoc additum symbolo, idque à recentio-
 ribus quidam suspicentur, & forsitan à D. Tho-
 ma (quam suspicionem Erasmus iniecit) absur-
 ditatem habet non ferendam. Vndè enim nisi
 ex prima fidei regula, tantus omnium Veterum,
 eorumq; ipsorum qui haud procul ab Apostolicis
 temporibus vixere cōsensus? Vndè eius memi-
 nissent Ephesini concilij Patres, in explicatio-
 ne fidei suæ? Vndè id antea D. Athanasius, suo
 sym-

symbolo inferuisset? Vnde hoc ipsum Ruffinus legisset in symbolo eo, quod à maioribus pro Apostolico symbolo traditū esse testatur? Vnde hoc transtulissent in professionem fidei suæ, Tolerani concilij quarti, hoc est, totius Hispaniæ & Galiciæ Patres, circa tempora Honorij Papæ primi? Aiunt enim; Secundum diuinas scripturas, & doctrinam quam à sanctis Patribus accepimus. Ac postea, symbolum percurrentes: Descendit (inquiunt) ad inferos, vt sanctos qui ibi tenebātur erueret; & deuicto mortis imperio resurrexit. Pauloque post: Hæc est (aiūt) Ecclesię catholicę fides: Hanc confessio-
nē seruamus atq; tenemus. Iam autē, quisquis vel mediocri prudentia præditus est, intelligit quam rationi consentaneum sit, vt quibus authoribus hunc esse fidei catholicę Christianique symboli articulum credimus, iisdem de eius sensu atque interpretatione credere debeamus.

Absurdè statui Christi animam vno duntaxat die apud inferos fuisse, propter id quod dictū est Latroni; Hodie mecum eris in paradiso. CAP. XIII.

Sed præclarū est, quod tu inter extrema ponis; *ex descensu Christi ad inferos, non posse Limbum confirmari. Id vel inde constare, quia Christus in cruce Latroni respondet; Hodie mecum eris in paradiso: Notum autem est, inquis, Non eadem die Christum resurrexisse. Quare*
fruo-

frivolum est, Christum resurgendo, tandem primum ingressum calos, & secum pompam Patrum deduxisse.

Quid sibi ista, rogo te Arcti, volunt? quid concludunt? Primum, ut tibi demus, Christum secundum animam eodem die calos ingressum: saltem fateberis, quod apud inferos aliquantisper secundum eandem animam fuerit; neque id frustra; ergo propter electos; quia frustra propter reprobos & damnatos. Statueremus ergo Limbum ex descensu, etiam si id verum esset quod dicis, Christum eodem die secundum animam in calum subuolasse. Quare tua isthæc infirma omninò collectio est. Quale verò id unde sic colligis? Non enim solum infirma vteris conclusionem; sed absurdum etiam id est, ex quo ad eum modum concluditur; Nempe, Christum secundum animam ante diem tertium in calum esse profectum: Sequitur enim quod in calum ascenderit Christus priusquam resurrexerit; cum in symbolo Apostolico hic ordo seruetur: Tertia die resurrexit à mortuis, Ascendit in calos: Tuque ipse annotes, ea quæ in symbolo fidei expressa sunt, eo ordine intelligi debere gesta, quo sunt expressa. *Nam in symbolo, inquis, hic ordo servatur, ut quæ tempore præcessere, tempore succedant, quod Christi personam dico attinet.* Hoc tu in eo loco, qui est de descensu ad inferos. Quod si neges cōsequi, ascendisse propterea Christum in calum, quia illuc secundum animam ierit; Quæro abs te, cum sit anima

anima multo præstantior corpore, eaque portio
 vnde propriè hominem æstimare debeamus,
 cur non potius dicendus est ascendisse in cæ-
 lum propter animam, quam propter corpus?
 Ac sepultus quidem esse dicitur filius Dei, pro-
 pter solum corpus. Quare & ascendisse verè
 diceretur propter solam animam; cùm tamen ipse
 dicat Magdalenz; Noli me tangere, Nondum *Luc. 20.*
 enim ascendi ad Patrem meum. Rursum, si a-
 scendit secundum animam, priusquam secun-
 dum corpus; ergo iterum descendit è cælo,
 vt secundum animam corpori iungeretur, ro-
 tusque postea posset in cælum ascendere: Aut
 manente in cælo anima, nec resurrexit Chri-
 stus tertia die, ad veram scilicet hominis vitam,
 quæ esse in corpore sine anima non potest, so-
 loque in cælum corpore sublatus est. Sed quid
 etiam illa sibi vult scriptura; Quemadmodum *Matth. 12.*
 Ionas fuit in ventre cæti tribus diebus & tribus
 noctibus, sic erit filius hominis in corde terræ?
 An ergo secundum corpus suum in corde terræ
 per triduum hæsit? Et sepulchrū eius in super-
 ficie terræ, an in ipsis terræ visceribus intimis-
 que & profundissimis partibus constructū est?
 Hoc si absurdè statuitur, ergo secundum ani-
 mam suā in corde terræ tridui spacio fuisse cre-
 dendus est. Quod sanè sic esse, ex antiquissima
 regula fidei Veteres astruxerūt. Ireneus aduer-
 sus hæreses, in fine totius operis, non minus ad-
 uersum vos, quam aduersus suæ ætatis hæreti-
 cos disputās; Qui, inquit, vniuersam reprobant *Cap. 31. se-
cundum no-
nam edit.*
 a resur-

resurrectionem, & quātum in ipsis est auferunt eam de medio, quid mirum est, si nec ordinem resurrectionis sciūt, nolentes intelligere. Quoniam si hæc ita essent quemadmodum dicunt, ipse vtique Dominus, in quem se dicunt credere, non in tertia die fecisset resurrectionem, sed super crucem expirans, confestim vtique abiisset sursum, relinquens corpus terræ. Nunc autem tribus diebus conuersatus est vbi erant mortui, quemadmodum prophetia ait de eo: Commemoratus est Dominus sanctorum mortuorum suorum, eorum qui ante dormierunt in terram sepelitionis, & descendit ad eos extrahere eos, & saluare eos. Et ipse autem Dominus: Quemadmodum, ait, Ionas, in ventre cæti tres dies & tres noctes mansit, sic erit filius hominis in corde terræ. Sed & Apostolus ait: Ascendit autē, quid est, nisi quia & descendit in inferiora terræ? Hoc & Dauid in eum propheta dicit: Eteripuisti animam meam ex inferno inferiori. Resurgens autem tertia die, & Mariæ quæ se prima vidit & adorauit, dicebat: *Ioann. 20.* Noli me tangere, nondum enim ascendi ad Patrem meum: sed vade ad discipulos, & dices eis; Ascendo ad Patrem meum & Patrem vestrum. Si ergo Dominus legem mortuorum seruauit, vt fieret primogenitus à mortuis, & commoratus vsque ad tertiam diem in inferioribus terræ, post deindè surgens in carne, vt etiam figuras clauorum ostenderet discipulis, sic ascendit ad Patrem, quomodo non con-

confundentur, qui dicunt inferos quidem esse hunc mundum, qui sit secundum nos, interiorum autem hominem ipsorum, derelinquentem hic corpus, in supercaelestem ascendere locum? Cùm enim Dominus in medio umbræ mortis abierit, ubi animæ mortuorum erāt; post deindè corporaliter resurrexit; & post resurrectionem assumptus est, manifestum est, quia & discipulorum eius, propter quos & hæc operatus est Dominus, animæ abibunt in inuisibilem locum, definitum eis à Deo. Hęc S. Irenæus vetustissimus author, Christi ad inferos descensum ijs verbis cōprobandis, quæ de Hieremiæ prophetia resecata à Iudeis, & erasa esse Iustinus Martyr Dialogo cōtra Triphonem conqueritur. Ex Hieremiæ similiter dictis (inquit) ista resecurerūt: Recordatus est Dominus Deus mortuorum suorum ex Israhel, qui obdormierunt in terra aggeris, & descendit ad eos ut euangelizaret, lætoque eis nuncio significaret salutare suum. Irenæo & Diuū adiungam Fulgentium ex eo libro, in quo ad Petrum diaconum scribens, fidei regulas se tradere profiteatur; ideoque & librum ipsum de fide inscripsit. Eius ergo libri c. 2. sic scriptum reliquit: De matris (inquit) utero, idem Deus homo factus exiuit, & in cruce idem Deus homo factus pependit, Et in sepulchro idem Deus homo factus iacuit, & ab inferis idem Deus homo factus tertio die resurrexit; Sed in sepulchro secundum solam carnem idem Deus iacuit, & in infer-

a ij

num

num secundum solam animam descendit, quæ de inferis ad carnem die tertia reuertente, idem Deus secundum carnem, quæ in sepulchro iacuit, de sepulchro resurrexit. Colligit hoc ipsum D. Leo ex illis verbis; * Quoniam non derelinques animam meam in inferno, nec dabis sanctum tuum videre corruptionem. His enim utique verbis, manifestum est (inquit) quod caro Domini & verè sepulta requieuit, & corruptionem non subiit; quia celeriter vivificata reditu animæ resurrexit. Quid? quod ipsa Dominica resurrectio, non modò secundum carnem è sepulchro, verùm etiam secundum animam ex inferis intelligenda est. Hoc enim in Actis Apostolorum B. Petrus significat cum ait; Què Deus suscitavit, solutis doloribus inferni. Hoc & S. Hilarius insinuat, enarrans Psalm. 54. Non relicto, inquit, in fluctuatione iusto, illi in puteum interitus deducuntur, cuius os clausum, resurgente ex inferis vnigenito Deo esse non potuit. Hoc ipse quoque Lactantius (quoniam ea communis erat Christianorum fides) sic accepit: Quoniam (inquit) prædixerat Dominus, se tertio die ab inferis resurrecturum. Et infra: Illum autem apud inferos non remansurum, sed tertio die resurrecturum, Prophetæ cecinerant. David in Psalmo 15. Non derelinques animam meam apud inferos; nec dabis sanctum tuum videre interitum. Item in tertio: Ego dormiui, & somnum cœpi, & resurrexi: quoniam Dominus auxiliatus est mihi.

Oscas

Epist. 93.
cap. 17.
* Psal. 15.

Ab. 2.

Libro 4.
cap. 19.

Oſas quoque primus duodecim prophetarū,
 de reſurrectione eius teſtificatus eſt: Hic fi-
 lius meus ſapiens; propter quod nunc reſiſtet
 in contriſultatione filiorum ſuorum; & de ma-
 nu inferorum eruam eum. Vbi eſt iudicium
 tuum mors, aut vbi eſt aculeus tuus? Idem alio
 loco; Viuificabit nos poſt biduum, die tertio.
 Hæc Lactantius Cyprianum imitatus, qui Li-
 bro aduerſus Iudæos ſecundo, docet ab inferis *Cap. 24.*
 reſurrecturum fuiſſe Chriſtum die tertio, tum
 ex Ozæ cap. 6. tum ex illo Ionæ ſigno, qui in
 ventre cæti, diebus tribus & noctibus fuit. Vn- *Serm. I. de*
 de & S. Leo, reſurrectionem Dominicam ſe- *Reſurrect.*
 cundum vtriuſque partis locum intelligens, ſic *Domini.*
 ait: Reſurrectio ſaluatoris, nec animam in in-
 ferno nec carnē diu morata (ſiue morari paſſa)
 eſt in ſepulchro. Quo etiam modo intelligunt
 Veteres, reſurrexiſſe à mortuis Dominū. Non
 enim dicitur, Reſurrexit à morte; ſed, Reſur-
 rexit à mortuis: quia videlicet poſtquam ad
 mortuos deſcendiſſet, ab his ruriſum aſcēdens,
 corpore quoque è ſepulchro ſurrexit, idque die
 tertia. Nam quemadmodum S. Iræneus loqui-
 tur, tribus diebus conuerſatus eſt vbi erant
 mortui; & hoc procul dubio, ſecundum ani-
 mam ſuam. Cum igitur Chriſtiana teneat fides
 Chriſtum die tertia reſurrexiſſe, non id modò
 referendū ad corpus eſt, quod ſit die tertia ere-
 ctum è ſepulchro; verum ad animam quoque
 ipſam; quæ ex inferis reducta ad corpus, bea-
 tam illi ſuo conſortio præſtiterit immortalita-
 tem.

tem. Sed in aduersum errorem Aretium impulit, non intellectus scripturæ locus; Hodie mecum eris in paradiso. Quia enim paradysum, sine cælesti domicilio concipere non potuit, consequens esse putauit, eadem die Christum secundum animâ in cælum ascendere debuisse, si prestare vellet quod promiserat: Hodie mecum eris in paradiso. Cui legendus fuerat Augustinus li. 12. de Genesi ad literam c. 34. Quo loco, si propriè (inquit) Paradysus, locus, quidam est nemorosus: translato autem verbo, omnis etiam spiritalis quasi regio vbi animæ benè est, meritò paradysus dici potest; non solum tertium cælum quicquid illud est, verum etiam in ipso homine lætitia quædam bonæ conscientiæ paradysus est. Vnde & ecclesia in sanctis temperanter & iustè & piè viuentibus, paradysus rectè dicitur, pollens affluentia gratiarum castisque delicijs. Quâto magis ergo post hanc vitam, etiam sinus ille Abrahæ paradysus dici potest, vbi iam nulla tentatio, vbi tanta requies post omnes dolores vitæ huius? Sic Augustinus: Vnde intelligimus nihil vetare quin dicamus Patriarcharum quidem animas fuisse in sinu Abrahæ, & in paradiso, in quo & Latronem futurum eodem secum die Christus fuerat pollicitus: sed tamen ante ascensum Christi in cælum, nondum quemquam istorum fuisse in tertio cælo, hoc est in paradiso meliore & multo perfectiore, & si dici oportet, Paradiso paradysorum: Neque enim esse potest, quicquam

quam ea lætitia præstantius, quæ capitur ex verbi Dei non qualicumque præsentia, sed per omnia beatifica, hoc est, clara illa, qua sicuti in seipsa est videatur, contemplatione diuinitatis. Quæ tamen tanta diuinę contemplationis excellentia, etiam si putetur Latroni mox esse concessa, ne tum quidem concludi potest eodem illo die Latronis animam in cælum subuectam fuisse, non ad inferos descendisse. Quoniam ab illo paradiso excellentiore nunquam recessit Dei filius (inquit Augustinus) quamuis a Iudeis per susceptam carnem tanta pateretur. *Lib. 2. q. 1. enūg. c. 38. & epist. 57.* Quid autem est unde nunquam recessit Dei filius, nisi diuinitas, hoc est natura patris & sua, cuius contemplatione beatus & ipse semper fuit? Deus enim seipso non aliundè beatus est: nos verò illius efficimur participatione beati. Hoc itaque Latroni dicitur; Eris eò beatus quo ego sum & nūquam esse desij, idque tibi paradisos erit, quod mihi & modo est in hac cruce & semper fuit paradisos.

Haftenus de Limbo.

TERTII LIBRI FINIS.

a iiij

VE

AUTHORITATES, QUIBUS CON-
sensus eorum de Patrum Limbo declaratur : partim,
eò quod animas, etiam sanctorum, ante Christi mor-
tem, non in cælum admittas fuisse, sed ad infernum
descendisse dicant; partim quia Christum ad inferos
descendisse affirmant, ut piorum animas inde liberaret.

Et primum

Testimonia quibus sanctorum etiam animas, ad in-
fernum descendisse ante Christi aduentum, asserunt.

Citatur
supra pag.

357.

&

358.

Tertullianus lib. 4. contra Marcionem.

Aliud inferi ut puto, aliud quoque Abraha sinus. — Eam
itaque regionem sinum dico Abraha, & non caelestem, subli-
miorem tamen inferis, &c.

Athanasius in psalm. 138. ad illud; Si descen-
dero in infernum ades.

Humana ista lex necessitatis est, ut sepultis corporibus, ad inferos ani-
ma descendant. Quam descensionem Dominus ad consummationem
veri hominis non recusavit.

Ambrosius lib. 4. de Fide ad Gratianum c. 1.

305.

Licet corpus Moysi non apparuerit in terris, nusquam tamen in gloria
caelesti legimus.

Et in cap. 5. ad Rom. ad illud. Sed regnavit mors.
Abraham quamvis apud inferos fuerit, discretus tamen erat longo in-
teruallo, ita ut chaos esset ingens inter iustos & peccatores.

Chrysostomus hom. 15. in epist. ad Hebræos.

309.

Hoc significante spiritu sancto, nondum manifestam esse sanctorum
viam. Propterea inquit ista ita constructa sunt, ut discamus quia san-
cta sanctorum, hoc est, calum adhuc est inaccessibile.

Author operis imperfecti apud Chrysostomum
hom. 5. in illud Matthæi 3. Aperti
sunt ei cæli.

Nullam animam ante Christum arbitror ascendisse in calum, ex quo
peccavit Adam, & ei clausi sunt celi; sed omnes in inferno detentæ:
propter quas etiam descendit in inferiores partes terra.

Homil. 4. in Marcum, inter opera Chrysost.

Ante aduentum saluatoris & euangelij charitatem, antequam Chri-
stus aperiret paradisi ianuam, cum Laitone omnes sanctorum animas ad
inferos deducebantur. Si Abraham ad inferos, quis non ad inferos?

120

In lege Abraham apud inferos: in euangelio Latio in paradiso.
Sumpta sunt ex Hieron.

Citatur
suprapag.

Hieronymus, epist. 3. quæ est ad Heliodorum.
Ante Christum Abraham apud inferos: post Christum Latio in paradiso.
Epistola 25. quæ est ad Paulam, de obitu Blesillæ,
circa medium.

348.

Euxie Iacob filium quem putabat occisum, ad quem & ipse erat ad
inferos descendurus, quia necdum paradiſi ianuam Christus effregerat;
Vnde & Abraham licet in loco refrigerij, tamen apud inferos cum La-
zaro fuisse scribitur.

347.

Epistola 127. ad Fabiolam, de 42. mansio-
nibus manf. 34.

In lege descensus ad inferos; in Evangelio ad paradysum transmigratio.
Epist. 129. ad Dardanum, longe post initium.

Ante aduentum in carne Domini saluatoris, nec Abraham & alij in-
ſi viri, terram viventium conſequi potuerunt. Et Abraham cum La-
zaro videtur apud inferos.

In caput 3. Ecclesiastes.

Ante aduentum Christi, omnia ad inferos pariter ducebantur, &c.

348.

In caput 9. Ecclesiastes.

Nota, ut Samuelem quoque verè in inferno credas fuiſſe, & ante ad-
uentum Christi, quamvis ſanctos, omnes inferni lege detentos.

348.

Augustinus lib. 20. Ciuit. cap. 15.

Non abſurde credi videtur, antiquos etiam ſanctos, qui venturi Chri-
ſti tenuerunt fidem, locis quidem à tormentis impiorum remotiſſimis,
ſed apud inferos fuiſſe, donec eos inde ſanguis Christi & ad ea loca
deſcenſus erueret.

351.

Petrus Chryſologus, ſerm. 123.

Inſtos erſi diſcretio locorum, una tamen inferni adhuc regio continetur.
Et multa qua ſequuntur.

Gregorius lib. 4. Moral. cap. 27.

Prinſquam redemptor noſter, morte ſua humani generis penam ſolue-
ret, eos etiam qui celeſtis patriæ ſuæ ſectati ſunt, poſt egreſſum car-
nis inferni clauſtra tenuerunt. Non ut pena quaſi peccatores plederet,
ſed ut eos in locis remotioribus quieſcentes (quia necdum interreſſio
mediatoris aduenerat) ab ingreſſu regni, reatus primæ culpæ prohiberet.
Citantur eadem verba ab Anſelmo in illud. 2. Cor. 5.
Scimus quoniam ſi terreſtris. Vide ſupra pag. 312.

Idem Greg. lib. 29. Moral. c. 7.

Profundum maris ante redemptoris aduentum non via ſed carcer fuit,
quia in ſe etiam bonorum animas, quoniam non in locis penalibus,
clauſit.

Citatur
suprapag.

378

DE LIMBO PAT.

Theophilactus in cap. 15. Marci ad illud, Pater,
in manus tuas com.

Hoc beneficium Christi est, quod nunc sanctorum spiritus in manus
patris ascendunt, qui olim ab inferno tenebantur; donec veniret quâ
prædicavit captivis remissionem.

Bernardus serm. 4. de omnibus sanctis.

305.

Providerat eis (sanctis veteris testamenti) Dominus in inferno
ipso locum quietis & refrigerij; chaos magnum firmans inter sanctas
illas animas, & animas impiorum. Quamvis enim utraq; in tenebris
essent, non utraq; erant in pœnis.

Anselmus lib. 2. Cur Deus homo, cap. 16.

Nulla anima ante mortem Christi, paradisum caelestem ingredi potuit.

Idem in cap. 9. ad Hebræos.

309.

Ante saluatoris ascensionem, calum fuit inaccessible sanctorum ani-
mabus.

Haimo in cap. 9. ad Hebræos.

Caeste regnum inaccessible erat adhuc mortalibus, quoad usque ve-
niret Christus, qui expleta passione sua aperiret nobis ianuam patriæ
caelestis.

TESTIMONIA VETERVM

QUIBUS CHRISTI PROBATVR
ad inferos, hoc est, ad Limbum, descensus, ut inde
iustorum animas liberaret.

GRÆCI

Symbolum Apostolorum.

Descendit ad inferos.

Ignatius epistola 2. quæ est ad Trallianos.

Descendit ad inferos solus; ascendit verò cum multitudine.

Irenæus lib. 5. contra hæreses cap. 39.

326.

Propter Prophetas & iustos descendit Christus in inferiora terra; sicut
Hieremias ait, Reconnemoratus est Dominus sanctus Israel mortuo-
rum suorum, & ascendit ad eos ut evangelizaret eis salutare suum,
& salvaret eos.

Et in fine lib. 5. siue secundum postremam edit.

lib. 5. cap. 31.

396.
& sequer.

Tribus diebus conversatus est ubi erant mortui, quemadmodum pro-
phetia ait de eo. Commemoratus est Dominus sanctorum mortuorum
suorum, eorum qui ante dormierunt in terra sepelitionis, & descendit
ad eos, extrahere eos & salvare eos. &c.

Ori-

Origenes hom. 15. in Genes. sub finem.

Ciratur
supra pag.

Sub finem seculorum, unigenitus filius pro salute mundi usque ad inferna descendit, & inde protoplastum renocavit. Quod enim dixit ad Latronem, Hodie mecum eris in paradiso, hoc non illi soli dictum, sed & omnibus sanctis intellige, pro quibus in inferna descenderat.

Idem in 5. caput epistolæ ad Roman.

Intelligimus Christum idcirco in infernum descendisse, non solum ut ipse non teneretur à morte, sed ut & eos qui inibi, non tam præmaticationis crimine, quam morientis conditione habebantur absolueret.

Eusebius Cæsariens. lib. 4. de Euang. demonst. c. 12.

Christus cum altius vocem emisisset, & patri dixisset Commendo spiritum, solutus corpore abiit, mortem à tergo insequens atque impellens, aternaeque additorum tenebrarum portas refringens, & mortuis quæ illie catenis mortis impliciti erant, remeandi ad vitam iter retrorsum aperuit. Et mox. Dominus noster qui Christus est Dei, victoriarumque reportator dicitur, in propheticiis vaticinijs mortem obiurgans inducitur, & animas solvens quæ illie vincula detinebantur, &c.

Idem lib. 10. de Demonst. Euang. sub finem.

Vni Christo hoc servabatur, ut ausus esset regias mortis domus inuadere, atque ad auxilium animarum quæ illic erant, socium se præbere, & unum illum Orci ianitores conspicati formidauerunt.

305.

Athanasius in symbolo suo.

Descendit ad inferos.

Idem serm. in illud, Profecti in pagum. tom 3.

Resurrexit Dominus tertia die, spoliato inferno.

Idem serm. de Pass. & cruce, post med. tom. 3.

Postmodum eiectus ille miser ex inferno, sedensq; ad limina, conspicatus est omnes suos vincitos, virtute Christi educi; & omnes sanctos quicum Adamo erant, obuiam cedere.

Idem in Tractatu de natura humana suscepta ab vnigenito verbo, post initium tom. 3.

Mortis condemnationem in inferno peregit, omnia loca permeans. Ibidem paulò post. Christus in terra potestatem dimittendi peccata, in sepulchro incorruptibilitatem, in descensu inferorum solvenda mortis potestatem ostendit.

Multis interiectis.

Corpore Christi non ultra sepulchra delato, anima ad inferos penetravit, ut earum animarum quas infernus tenebat, vincula disrumperet. Et paulò ante finem. Nonne diuisus in duas partes ut homo, & in sepulchro, & apud inferos agebat? &c.

332.

Basilius in Psalm. 44.

Non inefficax in sepulchro permansit tribus illis diebus, sed in infernum descendit, gratia dispensationis circa resurrectionem absolvenda.

Idem

Citatur
supra pag.

Idem in psal. 48. ad illud, Veruntamen Deus redimet animam meam.

palam vaticinatur Christi ad infernum descensionem, qui una cum alijs, propheta ipsius animam sit liberaturus, ut ibi nequaquam remaneat.

Idem in psal. 115. ad illud. Dirupisti vincula mea.

Ex quo peccati vinculis me exemisti, mox à tuo in infernum descensu, & exoluta hominum numerosissima multitudine, qua illic mortis astricta vinculis, &c.

328. Idem, referente Vigilio Tridentino lib. 5.
Deiſſo mortis regno, redijt à mortuis Dei filius cum ſpſijs.

Gregorius Niſſenus orat. 1. de Reſurrectione Domini.

In hac feſtinitate, conſtricta ſunt ſitrea mortis porta, in hac aerei inferni veſtes conuſi ſunt. Nunc mortis carcer apertiur, nunc predicatur captiuis diſmiſſio. Et multa quæ ſequuntur.

Et longius ante finem. Quomodo eodem tempore, & apud inferos & in Paradifo Dominus fuerit, quaeritur, &c.

Gregorius Nazianzenus in Paſcha orat. 2.

Si in infernum ſcendat, ſimul ſcende. Ea quoque myſteria co-
gnoſce qua Chriſtus illic designauit, utrum omnes ſine ulla exceptione
aduenta ſuo ſaluos fecerit, an illic quoque eos duntaxat qui credide-
runt. Si in celos aſcendat, ſimul aſcende, &c.

Theophilus Alexandrinus lib. 1. Paſchali.

Credibile non eſt quod ad inferos caro eius ſcenderit, vel prudentia
carnis qua appellata ſit anima, inferis apparuerit, ſed quod corpus eius
poſitum in ſepulchro, & ipſe nec de corpore, nec de diuinitate ſua di-
xerit, non derelinques animam meam in inferno.

Inter opera Chryſoſtomi. hom. 4. in Marcum.

Dominus noſter atque ſaluator, & in terra predicauit, & apud infe-
ros predicauit. Ideo mortuus eſt, & ideo ſcendit ad inferos, ut ani-
ma qua ibi vincla fuerant laxarentur.

Epiphanius hæreſi 46. quæ eſt Tatian. poſt med.

332. Chriſtus venit, ut his qui olim ipſum cognouerant, & ab ipſius Dei-
tate non aberrauerant, verum propter errores in inferno detenti ſunt,
indulgentiam largiretur.

Idem hæreſi 69. quæ eſt Arrianor. poſt med.

Volebat Deitas omnia perficere, qua ad paſſionis myſterium pertinent,
& cum anima ſcendere ad inferna, ad operandum ſaluem eorum qui
illic prædormierunt, ſanctorum inquam Patriarcharum.

Idem hæreſi 77. quæ eſt Dimær. longiuſculè ante finē.
Deſcendit in Deitate cum anima ad infernum, & ſoluens ligatos in
forti-

fortitudine ac potentia, rediens Deus verbum cum anima sancta, cum qua liberavit captivitatem, &c.

Citatur
suprapag.

Idem sub finem Panarij.

Depositus in monumento concluso per lapidem, non conclusa Deitate, sed simul cum sancta anima descendente ad inferna & auferente illinc animarum captivitatem, &c.

Eadem ijdem verbis re-

petit sub finem Anacephalcosis.

Cyrillus Hierosolymitanus Catechesi illuminar. 4.

Descendit ad inferos ut & illinc iustos liberaret. Cur enim vellet vi-
nientes quidem frui gratia, quamvis plurimi ex his sancti non essent;
qui vero cum Adam à longo tempore conclusi erant, deinceps non potui
libertate?

Idem catechesi 14.

Solus Christus quidem descendit ad inferos, cum multis autem inda
ascendit. Exterrita est mors videns nonnum quendam descendentem in
infernum, vinculis qua illic sunt non ligatum. Fugit mors, accurrerunt
sancti propheta, &c.

Cyrillus Alexandrinus lib. 12. in Ioannem c. 36.

Cum tempus iam esset ut etiam spiritibus apud inferos predicaret, mor-
tam pro nobis suscepit, & spoliatis inferis, primogenitus mortuorum sa-
ctus, recursum ad vitam natura nostra largiretur, &c.

Idem libro de recta fide ad Theodosium circa med.

Anima quidē descendit in infernum: divina autem virtute & potes-
te utens, etiam spiritibus qui illic erāt apparuit. Neg. enim opinor dix-
erit (Petrus) quod nuda & per se divinitas descendit in infernū, &c.

Ephesini Concilij PP.

Pro omnibus Christus gustavit mortem, & tertia die resurgens spolia-
vit infernum.

328.

Damascenus lib. 3. de orthod. fide c. 29.

Descendit ad infernum anima deificata — & hoc pacto à saculo
compeditos solvens, rursus ex mortuis redijt, nobis viam parans ad re-
surrectionem.

364.

Idem in Oratione qua declarat quod mortui viuo-
rum suffragijs iuventur.

Oportebat omnes (Patres & prophetas) per descensum Dei & Domi-
ni nostri ab inferni vinculis liberatos saluari.

363.

Theophilaetus in cap. 27. Matthæi.

Mortuorum resurrectio qua facta est in cruce Domini, significavit eo-
rum qui in inferno fuerint liberationem.

305.

Nicephorus lib. 1. hist. cap. 31.

Iustitia sol Christus, anima sola per mortem à corpore segregata, apud
inferos iustorum animis præsio fuit.

LA-

Citatur
suprapag.

Tertullianus lib. de Anima, Tit. de Inferis, cap. 32.
Christus non ante ascendit in sublimiora celorum, quam descendit in inferiora terrarum, ut illic patriarchas & prophetas cōpotes sui faceret.
Felix Pontifex epist. sua.

326. Verbum Dei inferni claustra contriuit, ut vinificaret eos qui à seculo mortui sunt.

Cyprianus lib. 2. contra Iudæos cap. 24

373. Quid ab inferis tertio die resurgeret, apud Ozea, &c.

Author expositionis symboli apud Cyprianum.

359. Redijt victor à mortuis, inferni secum spolia arahens. Eduxit enim eos qui tenebantur à morte. Paulò post. Consummatis his quæ in terra gerebantur, & animabus de misera captiuitate liberatis, ascendere memoratur ad calos. Et iterum. Quod in infernum Christus secundum animam descenderit, euidenter in Psalmis prænuntiatur.

360. Author Serm. de Vnctione Chrismi. sub finē, apud Cyp. Passus est rex illud, & vita occidi, descendensq; ad inferos captiuam ab antiquo captiuitatem reduxit, &c.

Author Serm. de Resurrect. Christi, apud Cypr.
Honorificatus est Christus resurgens à mortuis, victor mortis spoliatus inferos, & captiuos pramittens ad superos.

Lactantius lib 4. cap. 19.

372. Illum apud inferos non remansurum, sed tertio die resurrecturum propheta cecinerant.

Idem in carmine de Resurrectione Dominica.

364. Solue catenas inferni carceris umbras, &c.

Iulius Firmicus Maternus, lib. de Mysterijs & erroribus prophanarum religionum, ad Constantinum & Constantem A. A. cap. 25. Extrat lib. 5. Biblioth. PP.
Ne iustorum meritum ex longa desperatione concideret, fregit claustra perpetua, & ferrea fores Christo imbenie collapsæ sunt. Et postea. Exultat salutare nomen, & triumphales currus eius, iustorum ac sanctorum turba comitatur. Et quæ sequuntur.

Hilarius lib. 4. Trinit. in fine.

326. Mortem in inferno peremit Christus. Idem in psalm. 53.

328. Morte non interceptus unigenitus Dei filius, ad explendam quidem hominis naturam, mori se, id est, discessioni se tanquam anima corporisq; subiecit, & ad inferni sedes, id quod homini videtur debitum esse, penetravit. Idem in Psalm. 54.

Inferni os clausum, resurgente ex inferis unigenito Deo non potuit.

Idem in Psalm. 118. ad illud, Adiuvā me & saluus ero.
Adhuc sibi obcunda mors est, adhuc inferi sustinendi.

Pre-

Prudentius in Apotheosi post medium.

tumuloq; inferna refringens.

Regna; resurgentes secum iubet ire sepultos?

Cathemerimenon hymno. 9.

Quin & ipsum ne salutis inferi expertes forent
Tatarum benignus intrat, tracta cedit iannas;
Vestibum cadit renulsi cardo dissolubilis.

Illa prompta ad irrudentis tenax

Obijce extorsum recluso porta redit mortuos, &c.

Ambrosius lib. 4. de fide ad Gratianum cap. 1.

Dominus resurrectionis sue pignore, vincula soluit inferni & piorum
animas eleuavit.

Idem ibidem.

Resurgens ex inferis Christus venit, nonis redimitus exnujs, & spolio
ex morte quasito.

Idem in Hymno.

Inferni claustra penetrans

Tuos captiuos redimens.

Hieronymus in cap. 13. Osee. ad finem.

Sanctos intelligimus vasa desiderabilia qua in thesauris inferni detinebantur, quos alligatos forte Dominus eripuit & tulit de infernis, & quasi vasa prestantissima secum perduxit in paradysum.

Et infra. Terra inferi est terra mortuorum; qua accipitur & vastatur, quando morte Christi vincula apud inferos anima liberantur.

Idem in cap. 4. ad Ephes.

Inferiora terra Infernus accipitur, ad quem Dominus noster saluatorq; descendit, ut sanctorum animas qua ibi tenebantur incluse, secum ad calos victor abduceret.

Idem in cap. 3. Danielis.

In typo prefiguratur iste Angelus siue filius Dei, Dominum nostrum Iesum Christum, qui ad fornacem descendit inferni, in quo clausa & peccatorum & infortum anima tenebantur, ut absque exustione & noxa sui, eos qui tenebantur inclusi, mortis vinculis liberaret.

Idem in Psal. 15.

Non derelinques: quia propterea illic (in infernum) descendit, ut electos suos inde egeret & diabolum ligaret.

Idem in Psal. 29.

Animam Christi, cum alijs animabus sanctorum, Deus de inferno reuocauit.

Idem in Psal. 87.

Inter mortuos liber. Nemo me in inferno vinxit, sed ego victorum catenam propria virtute laxavi.

Idem lib. 2. contra Iouin.

Donec moriatur sacerdos magnus, & ad inferna descendens, liberes animas fugitiorum.

Augustinus lib. 17. Ciuit. cap. 11.

Animam suam Christus eruit de manu inferi, quia propter quorundam soluenda peccatorum vincula ad inferna descenderat.

Idem

Citatur
Suprapag.
352.

Idem August. Epist. 99. Quis nisi infidelium negaverit fuisse apud inferos Christum, &c. Et post. Teneamus firmissimè quod fides habet, fundatissima auctoritate firmata, quia Christus apud inferos fuit, soluiis eorum doloribus, à quibus recte intelligitur soluisse & liberaffe quos voluit. Et Epist. 57. ad Dard. post initum. Quasi solet, Si non pœnalis recte intelliguntur inferna, quomodo animam Domini Christi pœ credamus fuisse in inferno? Sed bene respondetur ideo descendisse, ut quilibet oportuit subveniret.

355.

Idem in psal. 85. ad illud, Quoniam misericordia tua. Nondum Dominus venerat ad infernum, ut erueret inde omnium sanctorum præcedentium animas; & tamè Abraham in requie ibi erat.

Idem Tract. 111. in Ioannem.

Qui homini pœnaliter pend. vii. ait, Hodie mecum eris in paradiso; secundum id quod homo erat, anima eius ipso die futura fuerat in inferno, caro in sepulchro. Serm. 137. de Temp. inter serm. Aug. Carnem in sepulchro posuit, & comitante secum anima ad inferna descendit. Per hanc electi, qui quamvis in tranquillitatis sinu, tamen apud inferni claustra tenebantur, ad paradisi amœna redacti sunt, &c. Sed quæ deprompta sunt ex homil. 22. Greg. in Euang.

Petrus Chrysologus serm. 123.

Ipse Dominus qui clausit infernum, ad inferos tota potestate descendit, ut clausa protinus aperiret, &c. Leo ser. 1. Resurrect.

373.

Resurrectio Salvatoris, nec animam in inferno, nec carnem diu &c.

323.

Fulgentius l. 3. ad Tras. c. 34. & li. de fide ad Pet. c. 2.

Gregorius. lib. 4. Moral. c. 27.

Redemptor noster pro nostra culpa debito occumbens inferna penetrat, ut suos qui ei in præserat, ad caelestia reducat. Et l. 29. Moral. c. 7. Profundum maris Dominus petijt, cum inferni novissima electorum suorum animas erepturus intrauit. &c. Idem lib. 6. epist. 15. Vera fides per ecclesiam catholicam docet, quia descendens ad inferos Dominus, illos solummodo ab inferni claustris eripuit, quos viventes in carne per suam gratiam in fide & operatione servavit.

Concilium Toletanum 4. can. 1.

367.

Descendit ad inferos, ut sanctos qui ibi tenebantur erueret. Hac est Catholica ecclesia fides. Bernardus serm. 4. de omn. sanct. In locum (infernũ) aluatur descẽdens, contrivit portas areas, eductosq; vinctos de domo carceris, sedentes quidem, sed in tenebris. &c.

304.

Romanum officium pro defunctis, Respons. lect. 9. Libera me Domine de vñs inferni, qui portas areas confregisti, & visitasti infernum, & dedisti eis lumen ut viderent te, qui erant in pœnis tenebrarum.

AUTHORITATVM FINIS.

S V-

SUPERIORVM QVORVNDAM LOCORVM ILLUSTRATIONES, ab ipso Authore adiectæ.

De quibusdam malis sanctorum affectibus etiam post mortem inhaerentibus. AD CAPVT VI. Pag. 46. post mediam.

QUOD ad piorum pertinet affectus vitiosos, sciendum est alios esse illos affectus & motus quos inuiti patiuntur, quibusque resistunt quotidiano certamine, tanquam in civili & domestico atque intestino bello; alios illos quibus adhuc voluntarie distinentur, quamuis non usque ad crimen perpetrandum. Hos enim usque ad mortem perdurantes, etiam post mortem in anima inhaerere, nihil obstat quo minus existimemus, ut inde etiam dolor animi sit, ab ijs abstractum esse rebus quarum amore tenebatur; Illos vero ex carne surgentes impetus quibus hic sedulo resistebatur, animæ iustorum simul ut exutæ suis corporibus fuerint, deponent, nec vllum ab ijs amplius patientur bellum, metumue cadendi. Ac de his vitijs loqui Diuum Augustinum cum ait lib. 2. contra Iulianum cap. 3. quod anima pia discedente peribunt, in resurgente corpore non redibunt, satis ex antecedentibus liquet. Iamne (inquit) discernis, iamne perspicis, iamne respicis, & in baptismo fieri omnium remissionem peccatorum, & cum baptizatis quasi civile bellum interiorum remanere vitiorum? Non enim talia sunt vitia quæ iam peccata dicenda sint, si ad illicita opera spiritum concupiscentia non trahat, & concipiat pariatque peccatum. Nec tamen extra nos sunt, quibus vincendis cum in hoc certamine proficienter laboramus, instandum est. Nostra sunt, passiones sunt, vitia sunt, frenanda, cohibenda, sananda sunt; sed dum
b curan-

curantur infesta sunt. Et si nobis ad meliora proficientibus magis magisque minuuntur, tamen dum hic vivitur esse non desinunt: discedente hinc anima pia, peribunt; in resurgente corpore non redibunt.

Hæc Augustinus.

De securitate sanctarum animarum in Purgatorio. AD CAPVT VI. Pag. 56.

Sciendum est securitatem dici tripliciter: Vno enim modo est in re ipsa securitas, quamuis non sit in opinione, quod propriè dixerimus esse in tuto; Alio in opinione etsi nō sit in re; Tertio demum in re & persuasione, quæ perfecta est veraq; securitas. Quibuldam enim nullum imminet periculum & agunt tamen timidius, alij nihil metuunt securique agunt etiam in magnis periculis; Illi demum perfectè sunt securi, qui & periculo carent omni, in tutoque sunt, & ita esse certa cognitione exploratum habent. Quod autem iustorum animæ in Purgatorio primo modo securæ sint, liberæ videlicet ab omni periculo excidendi à sua felicitate, illæ scripturæ docent. Qui perseverauerit vsque in finem hic saluus erit; & Estō fidelis vsque ad mortem, & dabo tibi coronam vitæ; & Lignum vbicunq; ceciderit, siue ad austrum siue ad aquilonem, illicerit. Illa quoque ex libro Sapientiæ, Raptus est, ne malitia mutaret intellectum eius, & fictio deciperet animam illius: Vnde constat post hanc vitam, nullum amplius à tentatione periculum impendere. Docet hoc luculenter Diuus Cyprianus, sermone de mortalitate, & Diuus Augustinus lib. de prædestinatione sanctorum cap. 14. ex Diuo Cypriano, quem docere ait, non solum non esse fidelibus inutilem mortem, verum etiam utilem reperiri, quoniam peccandi periculis hominem subtrahit, & in non peccandi securitate constituit. Vt autem & tertio modo securæ sint, propriè circa vnumquemque diuini iudicij sententia facit. Quia statutum est hominibus mori, post hoc autem iudicium; & facile est, (inquit) Sapiens

coram

Math. 10.

Apocal. 21.

Eccles. 11.

Cap. 4.

eoram Deo in die obitus retribuere vnicuique secundum Ecclesi. 11.
 vias suas; id quod propter diuini iudicii sententiam dictum est qua quisque post mortem continuò vel vitæ adiudicatur vel morti: sola enim hæc est adæquata viæ cuiusque retributio. Neque verò existimandum est sic ferri sententiam vt esse possit ignota, cum hoc ipsum circa vnumquemque Dei sententia sit, decreti eius manifestatio qua cuique sua retributio innotescit. Nam & hic aliqui suam quisque sententiam acciperet, imò & accepisset ab æterno, si nihil aliud esset Dei sententia quam decretum quo quemque secundum vias suas, aut vitæ aut morti destinaret. Sententiæ ergo circa quemque pronuntiatio, Diuini decreti manifestatio est qua suus cuique declaratur futurus status, aut felicitatis aut miseriæ secundum ea quæ in corpore gessit bona aut mala. Quamquam & hoc quod bona & tranquilla conscientia sunt, atque iustificati ex fide pacem habent cum Deo ac regni consequendi fiducia lætantur; imò verò iam intra se regnum illud habent, de quo Paulus, Regnum Dei non Roman. 14.
 est esca & potus; sed iustitia, & pax, & gaudium in spiritu sancto; id igitur certam ipsis persuasionem facit se non esse damnatos, neque à facie Domini proiectos in æternum: Tales enim desperatione torqueri necesse est, & luctum concipere inconsolebilem. Quod autem Diuus Cyprianus ait, loco citato, pendere quosdam in die iudicii ad sententiam Domini, id vel huius vitæ metum significat, quemadmodum & illud in euangelio à prudentibus virginibus dictum; Ne fortè non sufficiat nobis & vobis. Non enim hoc (ait Diuus Hieronymus) de auaritia, sed de timore respondent; aut magnæ misericordiæ & gratiæ intenta significatur expectatio propter actam in sceleribus vitam. Math. 25.

De Allegoria. Ad finem. CAP. XII.
libri primi.

Cum sit Allegoria duplex, verborum & rerum, tamen apud Theologos familiarius allegoria in rerum
b ij ipsa

ipsarum mystica significatione ponitur; ut ubi sit allegoria, ibi duplex habeatur sensus: vnus in significatione verborum, qui dicitur literalis; alter in mystica significatione rerum ipsarum quæ verbis designantur. Hoc enim sacræ Theologiæ ferè proprium est inter omnes disciplinas, ut cum quippiam narratur verbis, vltterius tamen per ipsas res aliud quippiam intelligendum offeratur: velut apertissimum est illis locis; Abraham duos filios habuit. Os non cōstringetis ex eo, non alligabis os boui trituranti, vbi sensus allegoricus altioris intelligentiæ est, quam censet beatus Hieronymus à Paulo interdum spiritualementem intelligentiam dici: ut ibi (inquit) Scimus quod lex spiritualis est, pro eo quod est allegorica. Et alibi. Omnes eandem spiritualementem comederunt escam, & eundem spiritualementem biberunt potum, id est per allegoriam, aliud quippiam spiritualiter significantem. Isto sanè modo euidens est Allegoriæ à Metaphora discrimen, quæ in verborum est significatione translata, nec literalis sensus fines egreditur; ut cum dicimus prata ridere, aut ciuitatem florere. Sicut autem ex sermone metaphorico non ducitur firmum argumentum vbi obscura & incerta verbi translatio est, potestque & in hanc & in illam accipi partem: secus autem cum nota & fixa fuerit & vsu iam trita; velut ex eo quod dicitur Ciuitas florere, cuius in pròptu est quid indubitanter colligat; Item ex eo quod de ecclesia dicitur ad literā, Vna est columba mea, colligunt omnes ecclesiæ Christi vnitatem: Sic cum incertum est & obscurum, quid significetur rebus, possuntque huc atque illuc trahi, nullum est firmum argumentum; at vbi certa notaque significatio est, rectè trahitur in argumentum, quemadmodum fecit Paulus, non solum in eo quod scriptum est de duobus Abrahamæ filiis, verum etiam in illo de non obligando ore bouis triturantis. Nihil proinde insulsius eo quod Donatistæ pro se afferebāt ex Cantico; Dic vbi pascis, vbi cubes in meridie, quo probarent apud se in Africa esse ecclesiam. Quibus respondens Augustinus. Quis (inquit) non impudentissimè nitatur, aliquid in allegoria positum, pro se interpretari nisi habeat

*In caput 4.
epistola ad
Galathas.*

1. Corint. 2.

Epistol. 49.

ad Vincetiū

Rogatiſſimam.

beat & manifesta testimonia, quorum lumine illustrē-
tur obscura. Non ergo docet Augustinus (quemadmo-
dum falsò Lutherus asserit) figuram nihil probare; aut
quod hic Benedictus ait, allegoriam ne perspicuam qui-
dem vim habere probandi: sed hoc docet, si obscura sit
allegoria, illustrari & perspicuā reddi oportere, vbi vsui
sunt & testimonia scripturæ clariora, & constantes ce-
lebrioresque interpretationes Patrum.

De igne extremi iudicij. AD CAP. XVII.

Ignis illius extremi iudicij triplex videtur effectus fu-
turus. Vnus in purgatione elementorum quæ mun-
di conflagratione futura est, qua fiet vt eæ qualitates
quæ nostris corruptibilibus corporibus congruebant,
ardendo penitus intereāt, succedant autem eæ quæ cor-
poribus nostris immortalibus mirabili mutatione con-
ueniant. Qua de re scriptum est apud Augustinū lib. 20.
de Ciuit. Dei cap. 16. Alius effectus in vindicta impio-
rum, de quo Paulus ad Thess. posteriore cap. 1. Tertius
in probatione iustorum, vbi ignis ille perfectioribus
hoc erit, quod fuit caminus Regis tribus pueris, quē ad-
modum docet Augustinus ad versiculum Psal. 101. Ipsi
autem peribūt, & ex Augustino Alcuinus: Vndè & illud
est Emisleni hom. 3. de Epiphania. Illuc (inquit) iusti
velut per amœnos gurgites, incendijs naturam suam
mutantibus transmeabunt intacta ignibus corpora, ipsis
honorificanda pœnis quia non sunt onerata peccatis. In
illos enim sæuis æstibus nihil licebit, quos ante libidi-
num flamma non attigit, & quibus puritas contulit
reuerētiam, inferre nesciet rationabilis ardor iniuriam.
Qui autem illa quæ huius sæculi sunt vsque in finem a-
mauerint, & cum huius mundi concupiscentia, quāuis
non vsque ad mortale peccatum dominante, ex hac vita
migrauerint, saluabuntur quidem merito fundamenti,
sed detrimentum per ignem accipient; quia non so-
lum mundus, sed etiam eius concupiscentia transire de-
bebit. Ideoque illa tunc exuretur concupiscentia, nisi
ante extremum illud iudicium in purgatorij loco fue-
rit exusta. In quo loco plenè purgati, cum his erunt
b iij in illo

in illo die qui illa si transibunt, quod detractis antea ligno foeno & stipula, nihil tunc præter purum iustitiæ aurum circumferent. Illi detrimentum patientur tunc, quibus adhuc, aut per affectum aut per reatum materia inflammabilis adhærebit. Quod si dixerit aliquis ignem illum conflagrationis, sequuturum esse resurrectionem corporum; iustos autem omnes in corpore impatibili surrecturos, & ideo tunc nullum eorum posse purgari aut detrimentum accipere. Respondebitur, de ordine rerum tunc gerendarum obscurissimam esse quæstionem, cuius plenam notitiam is solus habeat, cuius tunc nutu illa fient. Sed iuxta enumerationem Augustini, sequitur resurrectionem conflagratio; ponit enim ille primo loco Heliam Thesbiten; deinde ordine conuersionem Iudæorum, Antichristum persequuturum, Christum venturum vel iudicaturum, mortuorum resurrectionem, bonorum malorumq; diuisionem, mundi conflagrationem & renouationem: Quæ æstimo (inquit) eo ordine esse ventura, quo sunt à me cōmemorata. Cæterum poterit quibusdam iustis corpus resurrectione redditum ad tempus esse patibile, quomodo & nunc anima seiuncta à corpore affligitur ad tempus, postea donanda munere impassibilitatis. Patientur ergo tunc iusti quidam, ipsa quoque passione & afflictione purgabuntur. Neque id dubium habuit Augustinus ut videre est cap. 25. lib. 20. de Ciuitate, ubi postquam dixisset quæstionē de purgatorijs pœnis diligentius esse pertractandam, non quo sciret vtrum futuræ essent, sed quam ratione dicendæ essent purgatoriæ, subiungit. Filios autem Leui & Iuda & Hierusalē, ipsam Dei Ecclesiā debemus accipere, non ex Iudæis tantum sed ex alijs etiam gentibus congregatam; nec talem qualis nunc est, ubi, si dixerimus quia peccatum non habemus, nos ipsos seducimus & veritas in nobis non est; sed qualis tūc erit, velut area per ventilationem, ita per iudicium purgata nouissimum, eis quoque igne mundatis quibus talis mundatio necessaria est.

*Epistol. 80.
ad Hesychiū.*

De

*De consuetudine & vetustate. AD CAPVT
XXVI. libri primi. Pag. 210.*

Augustino tribuitur à Gratiano sententia qua dicitur; Nemo consuetudinem rationi & veritati præponat, quia consuetudinem ratio & veritas semper exclusit, cum ea sit Felicis à Buslacenis collegæ Diui Cypriani. Quam tamen sic approbat Augustinus, vt respondens mox adiungat: Si ratio, si veritas, optimè. Et certa quidem res est consuetudinem rationi & veritati præfertim manifestæ, non debere præponi: sed errantibus atque hæreticis plerumque id familiare fuit, vt cum sibi animaduernerent Ecclesiæ consuetudinem aduersari, ad istam sententiam confugerent tanquam ad sacram anchoram, veritati non esse consuetudinem præponendam. Fecerunt hoc Cyprianus eiusque collegæ. Fecit hoc & Tertullianus, cum ecclesiæ relictis castris ad Mōtanicum paracletum transfugisset. Non quidem in mala causa cum ageret de velandis virginibus, sed tamen ad sui instituti respiciens tacitus nouitatem, quemadmodum animaduerti potest ex ijs quæ paulò post consequuntur. Dicit ergo Tertullianus initio libri illius de virginibus velandis; Veritati nemo præscribere potest, non spatium temporum, non patrocinia personarum, non priuilegium Regionum. Ex his enim ferè consuetudo initium ab aliqua ignorantia vel simplicitate sortita, in vsum per successionem corroboratur, & ita aduersus veritatem vindicatur. Sed Dominus noster Iesus Christus veritatem se, non consuetudinem cognominauit. Et infra; Hæreses non tam nouitas quam veritas reuincit. Quodcunque aduersus veritatem sapit, hoc erit hærelis, etiam vetus consuetudo. Hæc Tertullianus, quem vt similia diceret, Cyprianus in causâ non bona sequutus est. Plausibilis enim est per seipsam causâ veritatis; consuetudo verò atque vetustas, veritate nitatur necesse est, neque quicquam ideo aut verum propriè quia vetustum, aut rectum quia consuetum. Cæterum quemadmodum in religione & fide, nouitas index est fallitatis, cum fides noua esse non possit: ita quod contra

b iiij Eccle-

Ecclesiæ vetustissimam consuetudinem emergit, eo ipso se prodit è quo spiritu proficiatur, Ideoq; Tertullianus ipse cuius illa superiora sunt, audi quid alibi cum adhuc catholicus esset scriptum reliquerit, initio libri aduersus Hermogenem. Solemus (inquit) hæreticis cōpendij gratia de posteritate præscribere. Inquantū enim veritatis regula prior, quæ etiam futuras hæreses renuntiavit, intantum posteriores quæque doctrinæ hæreses præiudicabuntur, quia sunt quæ futuræ veritatis antiquiore regula prænunciabantur. Et in libro de præscriptionibus hæreticorum. Sed ab excessu (inquit) reuertar ad principalitatem veritati, & posteritatem mēdacitati deputandam, ex illius quoque parabolæ patrocínio, quæ bonum semen frumenti à Domino seminatum in primo reconstituit: Auenarum autem sterilis fœni adulterium, ab inimico diabolo postea superducit: Pro parte enim doctrinarum distinctionem figurat, quia & alibi verbum Dei seminis similitudo est: ita ex ipso ordine manifestatur id esse Dominicum & verum, quod sit prius traditum; id autem extraneum & falsum quod sit posterius immissum. Ea sententia (inquit) manebit aduersus posteriores quasque hæreses quibus nulla constantia & conscientia concedit ad defendendam sibi veritatē. Hæc Tertullianus, nobis etiam nunc nostræ ætatis nouatores vero indicio prodens. Quantūeunque enim de veritate sibi applaudant, hoc ipso conuincuntur mēdaces, quia noui. Cum enim ecclesiā Christi debeat esse perpetua, regnumque illud quod in æternum non dissipabitur, fides quoque ac pietas noua esse non possit, sed vna eademque esse debeat omnium temporum, neque ea latens & oppressa ne Christum diabolo subiugemus, sed manifesta semper ecclesiæ professione clara & illustris, certum est verum & pium esse non posse quod deprehendatur nouum, & perpetuæ cum prædicationi tum consuetudini ecclesiæ contrarium. Eam obrem Christus Dominus veram afferens medicinam, quæ corruptos hominum

ea. 14. lib. de
vitiis. credendi.

mores sanatura erat, hoc est ordine progressus, vt mi-
raculis (quemadmodū inquit Augustinus) conciliare
autho-

authoritatem, authoritate mereretur fidem, fide contraheret multitudinem, multitudine obrineret vetustatem, vetustate roboraret religionem, quam non solum ineptissima hæreticorum nouitas fraudibus agens, sed nec gentium quidem veterinosus error violenter aduersans, aliqua ex parte conuelleret.

AD CAPVT XI. *libri secundi.*

EST & illud animaduertendum, non continuò de Purgatorio dubitari vtrum aliquod sit post mortem, si dubium videatur vtrū defunctis ad refrigerium aliena prodesse queat Satisfactio. Quamquam enim ex oratione pro defunctis, rectè Purgatorium esse statuatur, non tamen sublata pro defunctis oratione Purgatorium tolleretur; cum ipsæ poenæ quamuis temporariæ, post mortem, cō possint Diuino iudicio fixæ esse vt ad nouissimum vsque quadrātem seuerissimè ad omnibus exigantur. Nunc autem ita res habet vt taxata per Dei sententiam in nonnullos poena, possit interueniēte misericordia mitigari. Tametsi enim Deus consilium non mutet suum, tamen sententiam latam ab eo interdum mutari, & fundatum in scripturis est, & apud veteres ecclesiæ * Doctores tritum.

AD CAPVT VIII. *libri tertij.*

EST in vita Caluini scriptum, quod articulū descensus ad inferos concernit, vnde varium & impudens & nequam illius hæresiarchæ liceat ingenium agnoscere. Cum enim in primis suis catechismis, interpretatus fuisset, descendisse Christum ad inferos quia demissus esset in sepulchrum, ob idque repræhensus esset, quod tam vitiosa scædæque battologia, bis poneret in breuissimo symbolo sepulturæ mentionem, semel sub expressio nomine sepulturæ cum dicitur Mortuus & sepultus; semel sub nomine descensus ad inferos; quid hic consilij callidus impostor inijt? Nimirum suppressit priores illos catechismos, quotquot potuit vndecunque colligere. Anno verò 1562. sic recudi iussit, vt in ijs ne verbo quidem descensus ad inferos attingeretur. Hæc in vita

* Ambro. li. 3. offi. c. 12.
Hieron. in 4. & 26. cap.
Hiere. & in 4. cap. Dan.
& in 3. cap.
Iona. in c. 7
Amos, & in ca. 8. Zach.
Chrysost. ho mi. 1. & 37 in Genes.
Aug. lib. 14 Ciuil. c. 11.
Aperitissimè verò Diuus Gregor. lib. 15. Moral. cap. 4.

b v Cal.

Caluini reperies, quam mihi videre contigit gallico sermone descriptam : vnde colligere liceat quam ei pro ludo fuerit articulum fidei, aut deprauare; aut modò locū aliquem ei in Symbolo dare, modò excludere. Quid verò in sua Institutione? Primum ait esse extra controuersiam, quin ex communi piorum omnium sensu hic articulus desumptus sit, quādo nemo sit Patrum qui non in suis scriptis descensum Christi ad inferos commemoraret; Ac quo primū quidem tempore insertus sit, parum ad rem attinere, potius hoc curandū in Symbolo, vt plena & numeris omnibus absoluta fidei summa nobis cōfiter. Et si quos impedit morositas ne in Symbolum admittant, mox tamen se planum facturum tanti interesse ad redemptionis nostræ summam, vt ea præterita multum ex mortis Christi fructu depereat. Atque adiungit esse quidem qui opinentur non aliquid nouum hic dici, sed aliis verbis repeti quod de sepultura dictū fuerat; verū nō esse verisimile irreperere hic potuisse superfluam eiusmodi battologiā. Denique quid mysterij haberet descensus ad inferos explanans, eum in ipsa cruce peractum docet, in eo quod implicitus fuerit doloribus ijs, quos parit maledictio & ira Dei. Nō enim fingi posse magis formidabilem abyssum, quam sentire te à Deo derelictum & alienatū, & cū inuocaueris nō exaudiri, perindè atque si in tuam pernitiem ipse conspirasset. Hæc aliāq; in eandem sententiā Institutionum suarum lib. 2. cap. 16. sect. 11. anno 1561. Considera hic, Lector, varietatem leuissimam versipellis ingenij, quod huc illucq; suæ præsumptionis vento iactetur, nec tamen sensum mutet in melius, sed in absurdiora proficiat. Primo enim descensus ad inferos nihil aliud quam sepultura fuit, vt descenderit ad inferos secundum corpus. Secūdo descensus ad inferos horribili & indignissima Christo desperatione, & tetrīs damnatorū cruciatibus fœdatur atque obscuratur. Tertio demum loco, eraditur descensus è Symbolo tāquam ex priorum interpretationum pœnititudine. Quod autem Paulus ait cap. 4. epist. ad Ephes. descendisse Christum in inferiores partes terræ, id negat omninò pertinere ad Limbū aut descensum ad inferos.

Non

Non enim esse comparationem vnus partis terræ cum altera, sed totius terræ cum cælo; Quasi scilicet dictum sit in inferiores partes mundi, & non in inferiores terræ partes.

Si quis autem forte miretur, vnde potuerit Caluino in mentem venire, tam noua tamq; absurda interpretatio descensus ad inferos, quam & in sua Institutione tanti facit, & in Catechismis quibusdam suis explicatam reliquit; Ille quidem de hac cōstare sibi dicit ex Dei verbo, tanquam sancta & pia, plenaque eximie consolationis; sed adiutorem illi fuisse arbitror Erasmum, cuius in libello de præparatione ad mortem, verba sunt; Gehenna (inquit) cum summis malis summam habet desperationem; huius igitur horror superat omnem horrorem: quem tamen clementissimus redemptor vt nobis mitigaret in sese recipere dignatus est. Quod in horto expauit & angore extremo sic correptus est vt sudaret sanguine, nostræ naturæ erat infirmitas; quod autem affixus cruci clamat, Deus meus, Deus meus, cur deseruisti me? longè à salute mea verba delictorū meorum, videtur gehennæ horrorem animo persensisse. Quid enim superest à Deo destitutis, nisi extrema desperatio? Hæc, ni fallor, verba Christo impingunt extremam desperationem, quoniam à Deo fuerit destitutus quemadmodum ipse conqueritur, Vt quid deseruisti me? Hoc autē cum Calvinus sibi obijci videret, quod Christum faceret desperantem cum atrocissima filij Dei iniuria, id quidem refert ad exaggerationem calumniæ, sed se tamen non expedit. Quo namque modo non fuit necesse desperare eum qui se sentiret à Deo esse derelictum? Agnouit hoc Erasmus ingenuè, nihil superesse à Deo destitutis nisi extremam desperationem. Atqui fatetur cum Erasmo Calvinus Christum à Deo fuisse desertū, non ad hoc modò vt moreretur secundum carnem, verum etiam vt tanquam in gehennam iturus videretur. Nulla (inquit) fingi potest magis formidabilis abyssus quam sentire te à Deo derelictum & alienatum, & cum inuocaueris non exaudiri, perindè atque si in tuam perniciem ipse conspirasset. Eò Christum videmus fuisse deie-

deiectum, vt coactus fuerit urgente angustia exclamare;
 Deus Deus meus, vt quid me dereliquisti? Et addit:
 Quod enim nonnulli volunt ex aliorū potius opinione,
 quam ex suo sensu sic locutum fuisse, nequaquam pro-
 babile est, cum ex intimi animi angore deductam fuisse
 vocem conflet. Dixerat autem paulo antè, sciri debere
 non modò corpus Christi in pretiū redemptionis fuisse
 traditum, sed aliud maius & excellentius prætium fuis-
 se, quod diros in anima cruciatus damnati ac perditī ho-
 minis pertulerit. Quis autem est damnati ac perditī ho-
 minis cruciatus, nisi quod ad salutem reditum sibi esse
 posse desperet? Si enim confidit & sperat adhuc, neque
 vanam eam spem esse exploratum habet, tum se pro per-
 dito & damnato nequaquam habere potest, quare nec
 diros illos cruciatus damnati ac perditī hominis perfer-
 re: vbi enim solida spes est atq; fiducia, magnum id pro-
 fectò medijs etiā in malis solatium est. Quid igitur esse
 putes vbi adsit certissima securitas? Atqui sciebat Chri-
 stus se in gehennam detrudi non posse, non modò sciē-
 tia suæ diuinitatis, verum etiam animæ suę perpetua vi-
 sione Dei beatæ. An fortè scientiam illam propositz in
 conspectu gehennæ horror excussit? Hic vero nimius
 fuisset excessus, perturbatę atque extra se positę mentis.
 Atqui hoc ipso loco suarum Institutionum Calvinus di-
 ligenter admonet, cum fuerit integer Christus, in cūctis
 eius affectibus eam fuisse moderationem, quæ omnem
 excessum cohiberet. Non video etiam quæ possit ma-
 ior esse, phrenesis quam formidare & timere tam vehe-
 menter quod euenire non possit. Certè hi quos mente
 captos cernimus, qui gladios metuunt quorumlibet prę-
 tereuntium, à quibus nullum eis periculum est, metuūt
 tamen id quod accidere potest. At Christus, secundum
 Calvinum, timuit & anxius fuit, ingentesq; animi cru-
 ciatus perpeffus est, tāquam si perditus ac damnatus es-
 set, propter gehennę considerationem, in quam incidere
 non potuit. Nōne hanc intolerabilem phrenesim vi-
 deri necesse est? Vtunque ergo amolietur à Christo de-
 sperationem, quod tamen non potest si secum velit con-
 sentire, interim quin timuerit Christus quod timere nō
 de-

debut, id effugere nullo modo potest. Timuit autem quod timere nō debuit, si hoc timuit quod euenire non potuit. Nam vel ignorantis hoc est, quam ignorantiam longissimè à Christo alienam fuisse constat, vel præ perturbatione & ægritudine animi nō attendentis id quod alioqui non ignoretur. Est etiam timor ille gehennæ tantus, planè seruilis. Cuiusmodi timorem Ioannes negat esse in charitate; eumque foras expelli affirmat, vbi perfecta sit charitas. Num ergo Christus perfectam non habuit charitatem? Tale certè conscientiæ tormentum, quale Ioannes cum perfecta charitate negat consistere, in Christo fuisse Caluini catechismus docet, vbi Magister loquitur. Hinc colligimus quid differat conscientiæ tormētum, quod sustinuit Christus, ab eo quo cruciantur peccatores, quos Dei irati manus persequitur. Nam quod in illo temporarium fuit, in his est perpetuum; & quod illi vice duntaxat aculei fuit ad pungendum, his est lethalis gladius ad cor sauciandum. Habuit ergo secundum istum Christus conscientiæ tormentum, quale sustinent peccatores, in quibus charitas non est. Nec sanè refert, an perpetuus an temporaneus; an tanquam aculeus pungens aut gladius confodiens; cum constet, vbi sit perfecta charitas, ibi tormentum eiusmodi esse non posse. Ex his iam facillimè dilui potest, quod illi visum est Achillæum & inexpugnabile; Pontificem habere nos, qui nostras expertus infirmitates compati nobis posset, quiq̃ue tentatus esset per omnia pro similitudine, absque peccato: Non enim Christo accidere sine peccato eiusmodi angoris tentatio potuit, quæ sine diminutione charitatis esse non queat; quam in eo flagrantissimam perfectissimamq̃ue semper esse necesse fuit.

1. Ioan. 4.

Hebr. 4.

I N-

INDEX SCRIPTURARVM quæ in præcedentibus tribus Libris explicantur :

Et primum, E VETERI TESTAMENTO.

L Euitici 16. Cumq; (sacerdos) obtulerit vitulum, & offeret pro se & pro omni domo sua. Pagina 259.

Deuteron. 12. Quod præcipio tibi, hoc tantum facito, nec addas quicquam nec minuas. Pag. 193.

1. Regum. 28. Samuelem mihi suscita. 88. & sequent.

Ibidem Cras mecum eris. 90.

2. Regum 12. Veruntamen quia blasphemare fecisti nomen Domini, Filius qui natus est tibi, morte morietur. 49.

2. Regum 22. Funes inferni circumdederunt me. 304.

Tobix 4. Panem tuum & vinum tuum, super sepulcrum inibi constitue. Lib. 1. cap. 22.

Iob 14. Homo cum dormit non consurget, donec auertatur calum. 107. 108.

Psal. 6. Non est in morte qui memor sit tui; in inferno autem quis confitebitur tibi. 293.

Psal. 15. Non derelinques animam meam in inferno. 301. & seq.

Psal. 65. Transiimus per aquam & ignem. 167. & seq.

Psal. 113. Non mortui laudabunt te Domine. 237. & seq.

Eccles. 3. Non possumus eis (operibus Dei) quicquam addere, nec auferre, quæ fecit Deus ut timeatur. 194.

Eccles. 9. Mortui nihil nouerunt amplius, nec habent ultra mercedem, quia oblivioni tradita est memoria eorum. 241. & seq.

Ibidem. Quodcunque facere potest manus tua, instanter operare: quia nec opus, nec ratio, nec sapientia, nec scientia erunt apud inferos, quo tu properas. 18.

Eccles. 11. Si ceciderit lignum ad Austrum, aut ad Aquilonem, in quocunque loco ceciderit, ibi erit. 18. 19.

Sapient. 3. Iustorum animæ in manu Dei sunt, & non tanget illos tormentum mortis. 59.

Eccli. 14. Ante mortem operare iustitiam, quoniam apud inferos non est inuenire cibum. 301. & seq.

Eccli. 46. Notum fecit (Samuel) Regi (Sauli) & ostendit illi finem vite sue. 95. & seq.

Isa. 22. Non dimittetur vobis hac iniquitas, donec moriamini. 109. Isaia

INDEX SCRIPTURARVM.

Isaia vlt. Dominus in igne veniet, & quasi turbo quadrigæ eius, reddere in indignatione furorem suum, & increpationem suam in flamma ignis, quia in igne Dominus diiudicabit. 254. 255.

Zach. 9. Tu quoque in sanguine testamenti tui, emisisti vinelos tuos de lacu, in quo non est aqua. Lib. I. cap. 21.

2. Mach. 12. Collatione facta, duodecim milia drachmas argenti, misit (Iudas Machabæus) Hierosolymam, offerre ea pro peccatis mortuorum sacrificium. Lib. I. cap. 23. Et lib. 2. cap. 7. 8. & 9.

EX NOVO TESTAMENTO.

Matthæi. 1. Et non cognouit eam, donec peperit filium suum primogenitum. Pagina, 110. 111.

Matth. 5. Iota unum aut unus apex non prateribit à lege, donec omnia fiant. Pag. 106.

Ibidem. Esto consentiens aduersario tuo. Amen dico tibi, Non exies inde, donec reddas nonissimum quadrantem. Pag. 97. & seq.

Matthæi 12. Linum fumigans non exstinguet, donec eijciat ad victoriam iudicium. 106.

Ibidem. Qui dixerit contra spiritum sanctum, non remittetur ei in hoc saculo, neque in futuro. Pag. 115. & seq. Item 272. & seq.

Ibidem. Omne verbum otiosum quod locuti fuerint homines, reddent de eo rationem in die iudicij. 48.

Matthæi 18. Angeli eorum semper vident faciem Patris mei qui in calis est. 7.

Ibidem. Abijt, & misit eum in carcerem, donec redderet debitum 107.

Matth. 20. Redde illis mercedem, incipiendo à nonissimis Et acceperunt singulos denarios. 306.

Mat. 23. Nō me videbitis amodo, donec dicatis, Benedicite. 106.

Matth. 26. Hic est sanguis noui testamenti. 172.

Lucæ 9. Sunt quidam de hic stantibus, qui non gustabunt mortem, donec videant filium hominis venientem in regno. 106.

Lucæ 12. Dico tibi, non exies inde, donec etiam nonissimum minutum reddas. 97. & seq.

Lucæ 13. Acceptum fermentum mulier abscondit, in farina satietatibus, donec fermentatum est totum. 106.

Lucæ 16. Facite vobis amicos de māmōna iniquitatis &c. 161.

Ibidem. Historia Lazari & epulonis expenditur. 129. & seq.

Ibidem. Mortuus est autem & diues, & sepultus in inferno. 298. 342. & sequent.

Ibidem. Eleuans oculos, vidit Abraham à longè. 344.

Lucæ 23. Hodie mecum eris in paradiso. 246. 356. 357.

368. & sequentibus. Item 374.

Ioan.

Ioannis 5. Qui audit verbum meum, in iudiciū non venit. 55.
 Ioannis 13. Qui lotus est, non indiget nisi ut pedes lauet. 38.
 Ioannis 14. In domo patris mei, mansiones multa sunt. 293.
 Actorum 2. Quem suscitauit solutis doloribus inferni, iuxta
 quod impossibile erat teneri eum ab eo. 165.

1. Corinth. 3. Si quis superadificauerit ligna, fœnum, stipulam, &c. 45. 46.

Ibidem. Vniuscuiusque opus quale sit ignis probabit. Dies Domini in igne reuelabitur. Saluus erit, sic tamen quasi per ignem. 74.
 75. 80. Et lib. 1. cap. 15. 16. & 17. Et lib. 2. cap. 6. & 14.

1. Cor. 10. Omnes, eandem escam spiritalem manducauerunt, & omnes eundem potum spiritalem biberunt. Pag 315. & seq.

1. Corinth. 11. Idco inter vos multi infirmi & imbecilles, & dormiunt multi. 50.

1. Corinth. 15. Oportet illum regnare, donec ponat omnes inimicos sub pedibus suis. 106. & seq.

Ibidem. Quid faciunt qui baptizantur pro mortuis. 335.

Ibidem. Factus est primus homo in anima viuentem; nonisimū in spiritum viuificantem. 339.

Galat. 6. Dum tempus habemus, operemur bonū ad omnes. 27.

Ephes. 4. Descendit in inferiores partes terra. 78.

Philipp. 2. In nomine Iesu, omne genu flectatur, celestium, terrestrium & infernarum. 163. 164.

Col. 2. In quo & circūcisi estis, circūcisione non mansacta 316.

2. Theff. 1. Quas sustinetis, in exemplum iusti iudicij Dei. 170.

Heb. 11. Hi omnes testimonio fidei probati, non acceperunt re-promissionem. 308.

1. Pet. 3. Mortuus est Christus, iustus pro iniustis, ut nos offerret Deo, mortificatus quidem carne, viuificatus autem spiritu. In quo & his qui in carcere erant spiritu veniens predicauit. 324.

Et lib. 3. cap. 9. & 10. pag. 330. & sequent.

1. Pet. 4. Propter hoc & mortuis euangelizatum est, ut indicētur quidem secundum homines in carne, uiuant autem, &c. 334.

2. Petri 2. Deus Angelos peccantes rudentibus inferni detractos, in tartarum tradidit cruciandos. 303.

Apocal. 5. Nemo poterat neque in celo, neque in terra, neque subtus terram aperire librum. 122.

Ibidem. Audini omnem creaturam qua in celo est, & super terram, & sub terra, dicentem sedenti in throno. 165. & seq.

Apocalyp. 14. Beati mortui qui in Domino moriuntur.

Pag. 56. Et lib. 1. cap. 18.

Apoc. 20. Infernus & mors, missi sunt in stagnū ignis. Pag. 291.

IN-

INDEX RERVM,

QVÆ LIBRIS TRIBVS

præcedentibus conti-
nentur.

A.

Abraham ante Christi ascensum apud inferos.
Pagina 353. & sequent. & 376. & sequent.
Abrahæ sinus. Vide Sinus.

Absolutio sacerdotis, cur non semper plenè omnem
pœnam remittat. 61.

Aërius, qui pro defunctis orandum negabat, hæreticus
iudicatus. 205.

Aduersarius cui in hac vita secundum Matthæum est
consentiendum, quis sit. 101. & seq.

Afflictionum varia vtilitas. 251.

Afflictionum causæ. 248.

Afflictionibus huius vitæ, etiam puniuntur interdum
sancti, & non tantum exercentur. 247. & seq.

Afflictio non semper pœna 250.

Affectus prauus non omnes morte deponitur. 46. & 385.
de eo tamen dubitat Augustinus. 150. 214. 215.

Alcuini de Purgatorij loco sententia explicatur, & con-
tra Arctium defenditur. 80. 81.

Allegoriæ & metaphoriæ discrimen. 388.

Allegoria si perspicua sit, vim habet probandi. 114. 115.
& 389.

Anima Christi non vno tantum die apud inferos fuit.
368. & sequent.

Animas defunctorum interdum apparere docetur. Lib.
I. cap. 11. & tamen suæ beatitudinis detrimentum
non pati. Pag. 85.

Animas piorum & impiorum in eodem ad tempus esse
post hanc vitam generali domicilio, absurdum non
est, cum semper distinguantur proprijs. 293.

C

Ant-

- Animæ in Purgatorio existentes , inter ones censendæ sunt ; ad dexteram , & ad prudentes virgines pertinent.** 17. 18.
- Animæ in Purgatorio pertinent ad regnū Christi.** 21. 22.
- Animæ in Purgatorio licet sint in pœnis, rectè tamē dicuntur beatæ & à laboribus quiescere.** 56. 160.
- sunt de salute sua securæ.** 56. & 386.
- Animæ corporibus exutæ, possunt à corporeo elemento aliquam suscipere impressionem.** 77.
- Antonini de Purgatorii loco , vbi sit sententia defenditur.** 82.
- Aretij argumenta contra Purgatorium dissoluuntur.**
Lib. 1. cap. 3. 4. 7.
- Aretij mira contradicendi libido.** 325.
- Aretius modestiam à catholicis requirit , quam ipse violat.** 350. 351.
- Articulus fidei de Christi ad inferos descensu retinendus.** 317. & seq.
- Arrianos Christi descensum ad inferos non negasse.** 365. & seq.
- Apparitiones defunctorum generatim omnes malè ab Aretio repudiari.** Lib. 1. cap. 11.
- Apollinaristæ descensum Christi ad inferos submouisse videri possunt.** 366.
- Augustinus de pœnis purgatorijs quid alicubi dubitet.** 212. & seq.
- Augustinus quomodo doceat non esse locum medium.** 22. 23. 217. **quomodo doceat hic , & non in futuro peccata solui.** 31. 35. **quomodo doceat in futuro tantum esse remunerationem & condemnationem.** 35.
- Augustini dubitatio circa Apostoli de igne probationis, locum, quænam intelligenda.** 150. & seq.
- Augustini loca quædam contra Purgatorium obiecta explicantur.** 262. & seq.
- Augustinus de descensu Christi ad inferos, non dubiam profert sententiam.** 351. 352.
- quid sit quod de descensu Christi dubitat.** 354.
- Author libri Hypognosicon non repugnat Purgatorio.** 20. & sequent.

Author operis imperfecti non est Chrysostomus. 362.
 Auxesi qua, Christus in suis verbis vsus intelligi de-
 beat. Pagina 123.

B.

B Aptissimi & reconciliationis non par est indulgentiæ
 diuinæ facilitas. 51.

C.

C Aluius descensum Christi ad inferos in cruce tor-
 mentisq̃ue mortis posuit. 326. & sequent.
 & 395. & sequent.

Canonici libri sunt libri Machabæorum. 188. & seq.

Canonicus esse liber potest, etsi is qui scripserit, spiritus
 sancti nesciat esse oracula. 192.

Cælum ante Christi mortem fuisse inaccessum, nec
 quenquam ad illud admissum. 309.

Idem docetur Veterum testimonijs. 376.

Chaos magnum quid sit. 79. 129. 299. 345. 346.

Christi mors paternis oculis semper præsens, non con-
 uincit sanctorum animas ante Christi ascensum ad
 cælum admissas. lib. 3. c. 6.

Christus electos plerosque, aduentus sui tempore esse
 voluit. 311. 312.

Christi ad inferos descensus, conuincit fuisse Limbum
 Patrum. 317. & seq.

Christi ad inferos descensus, est articulus fidei, symbo-
 lo expressus. 317. & seq.

Idem descensus probatur Veterum ecclesiæ Patrum
 testimonijs. 378. & seq.

Christum descendisse ad inferos, non per sui duntaxat
 notitiam, sed secundum animam. 319.

Christi animam fuisse apud inferos, ipsius etiam Arerij
 confessione. 324.

Christi descensum mortem non præcessisse, contra Cal-
 uinum. 326. & seq.

Christum non descendisse propter dānatos spiritus. 329.

Christi animam non vno tantum die apud inferos fuisse.
 368. & seq.

Christum secundum animam non ascendisse in cælum
 primo post mortem die. 368.

c ij

Chri-

- Christum secundum animam, in corde terræ tridui
spatio fuisse, Veterum testimonio ostenditur. . . 369.
- Chrysostomi sententia de apparitionibus animarū post
mortem. Pag. 86.
- Consuetudo, veritati licet non præiudicet, index tamen
est testisq̃ue veritatis. . . lib. 1. cap. 26. & Pag. 239.
& 391. & sequent.
- Cyprianus quomodo dicat post hanc vitam nullum re-
linqui pœnitentiæ locum. 30.
- Cyrillus quomodo animas sanctorum statim in manus
patris euolare dicat. 58. 59.

D.

- D** Amascenus descensum Christi ad inferos non ne-
gat, nec de eo dubitat. 362. & sequent.
- Damnatio futuri sæculi duplex; Æterna & tempora-
lis. 34.
- per Defunctos veritas interdum manifestatur. 85. 90.
- Descensus Christi ad inferos defenditur. 317. & seq̃.
- astruitur Veterum Patrum testimonijs. 378. & seq̃.
- etiam hæretici testimonio. 349. 350.
- quo modo sit intelligendus. 356.
- quam prauè eum ex Erasmo intellexit Calvinus.
395. & seq̃.
- aliud significat quam Christi sepulturam. 318.
- neque fuit sensus iræ diuinæ. 320.
- Descensus ad inferos non præcessit crucem & mortem
Christi, contra Calvinum. 326. & seq̃.
- Descensum Christi ad inferos malè intelligi propter
mortis manifestationem. 319.
- Descensum Christi non euertit author expositionis sym-
boli apud Cyprianum. 358. & sequent.
- Patrum testimonia quæ contra descensum Christi
obiiciuntur, explicantur. 358. & seq̃.
- Diabolus quæ petit aut dicit, non omnia illicita falsaue
esse. 87.
- Donec, in scripturis quid valeat. 106. & sequent.
- Duo tantum loca in scripturis, non obitare Purgato-
rio. 14. 15. 16.
- Durandus interpretatur descensum Christi ad inferos
pro-

propter effectū , quem anima Christi in iis qui apud
infernōs erant habuerit, & refellitur. 322. & seq.

E.

Ecclesiam non falsam habuisse de Purgatorio do-
ctrinam. Pag. 4.

Ecclesiastici librum esse de canone scripturarum. 96.

Eraſmus descensum Christi ad inferos , à D. Thoma
symbolo additum esse suspicatus reiſcitur. 366.

quam peruersè illum intelligat explicatur, & refel-
litur. 395.

Exequiarum vetus officium , Purgatorio testimonium
perhibet. 218. & sequent.

F.

Fides eadem licet fuerit sanctis veteris & noui testa-
menti, non tamen illi perindè mox sunt post mor-
tem ad cælum admissi. Pagina 305. & seq.

Fulgentij doctrina de remissione peccatorum in hoc
tantum sæculo obtinenda explicatur. Lib. 1. cap. 5.

G.

Gentilium superstitiosas consuetudines , rectè in-
terdum in Christianos ritus conuerti. 183.

Gratiæ impetrandæ tempus solum esse in hac vita , &
tamen eam etiam post hanc vitam dari. 26. & seq.

Veterum Patrum testimonio id ipsum ostenditur 29.

Gratiani diligentia accuratior, in citandis Veterum te-
stimonijs requiritur. 93. 95.

Græcorum de Purgatorio sententia, in concilio Floren-
tino explicatur. 74.

H.

Hæretici infirmiora catholicorum argumēta exa-
gitant, vt eiusdem esse generis etiam potentiora
persuadeant. 129.

Hæretici quo consilio Veterum interdum Patrum te-
stimonia adhibeant. 264.

Hæreticus Aretius Veterum consensum dum pro sua
facit sentētia, vrget; quando verò cum sibi aduersari
videt, reiſcit. 347. 348.

Hilarij sententiam de descensu Christi ad inferos, quam
falsò Caluinus aliò detorquere conetur. 326.

c iij

leiu;

- I**eiunavit David & viri labes, Galaad pro mortuis, vt ad requiem pervenirent. Pag. 195. 196.
- Ignis extremi iudicij effectus triplex. 389.
- Inferorum nomine quid iuxta familiarem scripturis vs-
sum intelligatur. 14. 174.
- Infernum nusquam in bono in scripturis accipi quomo-
do intelligatur. 356.
- Inferorū vocabulum latius patet quam vt ad gehennam
aut Tartarum restringatur. 300. & seq.
- Inferni maxima pœna est esse à facie Dei sine spe reuo-
cationis proiectum. 12.
- Inferni nomine non posse sepulchrum intelligi. 301. &
sequent. & 360.
- Inferorum variæ mansiones contra Aretium defendun-
tur. Lib. 3. cap. 2.
- In inferno quomodo nulla esse intelligatur redemptio.
Pag. 175. 236.
- ad Inferos descēdisse etiam Patriarchas ante Christi ad-
uentum, docetur veterum testimonijs. 348. & 376.
- Respondetur ad Chrysostomū, qui obijci posset. 361.
- Iudæ Machabæi factum de duodecim milibus drach-
marum missis Hierosolymam, offerre pro peccatis
mortuorum defenditur. Lib. 1. cap. 23. &
lib. 2. cap. 7. & 8.
- Iudæ Machabæi legale pro mortuis sacrificium, quate-
nus noui nunc testamenti tempore in exemplum tra-
hatur. 161.
- Iustini verba quomodo nō aduersentur Purgatorio. 130
- Iustificatio duplex, prima & secūda ex scripturis osten-
ditur. 38.
- Iustos in hac vita propter sua peccata etiam flagellari,
non tantum exerceri. 247. & seq.
- non in omnibus tamen afflictionibus puniri. 250.
- Iustos ante Christi aduentum non ascendisse in cælum
habet in dictione Limbus.
- Iustos omnes non continuò transire ad vitam beatā. 44.
idque vel propter peccata venialia, affectusque pra-
uos. 45. 46. 47.
vel

- vel propter mortalium peccatorum reliquias. 48.
 Iustorum magna differentia. 52. 53.
 Iustitia nisi plena non continuò hominem in cælo constituit. 55.
 Iustitiæ post mortem non statim sua redduntur præmia. 307. & 315.

L.

- L** Abores sanctorum proprii qui sint. 56.
 Latinorum de Purgatorio sententia, explicata in Concilio Florentino. 73.
 Latronis exemplum non obesse Purgatorio. 246.
 Lazari & epulonis narratio, historicane sit, an parabolica. 129. 130. 345.
 an quid valeat ad probandum Purgatoriū. 128. & seq.
 Lazari historiam non convincere mortuos nunquam mitti ad viuentes. 84. 92.
 Lazarus fuit etiam apud inferos, non solus epulo. 298.
 Lazari historia frustra exagitur aduersus Limbū Patrum. Lib. 3. cap. 11.
 à Lege quomodo liberemur, & ei quomodo consentiamus. Pag. 102.
 Libertas Christiana hic inchoata, in futuro sæculo perficietur. 68.
 Liberati ex inferno quomodo electi intelligantur. 176.
 Liberationem redemptionemque aliquam post mortem futuram. 235. & seq.
 Limbi vocabulum, etsi non sit in scripturis expressum, rectè tamen frequentari. 295.
 Limbus vnde dicatur. 296. 358.
 Limbi assertionem cur deuitet hæreticus. 286. 303.
 Limbum Patrum, rectè statui ex Christi ad inferos descensu. 317. & seq. & 368.
 Limbum quibus argumentis conetur expugnare Arcetius. Lib. 3. cap. 4. & seq.
 Limbus Patrum, Veterum Ecclesiæ doctorum cōsensu astringitur. Pag. 347. & seq. & 376. & sequent.
 aduersus eum hæretici exceptiones reiiciuntur. 347. & sequent.
 de Limbo an dubitârit Augustinus. 351. & seq.

- M** Achabazorum libri canonici, soluunturque quam
aduersari videntur argumenta. Pag. 188. & seq.
Martyrij prærogatiua, quod iusti statim in cælum euo-
lent, secundum Tertullianum. 52.
Martyri facit pro eo orans iniuriam. 220.
Martyres Purgatorij expertes. 267. 268.
Meriti aliam esse rationem, quam boni operis. 15.
Merito non est post hanc vitam locus. 26. 236. 243.
Meritorum non eundem esse in Ecclesia gradum. 52. 53.
Misericordia quæ electis post hanc vitam præstatur,
ad iustam pertinet retributionem. 33. 34.
Modestiam à nobis requirit Aretius, quam ipse vio-
lat. 350.
Morte tempus merendi auferri, quomodo dicat Hiero-
nymus. 30.
Mortuos quomodo Abraham cæteri que Veteris testa-
menti sancti luxerint. 181. 195. 196.
Mortui quomodo nihil scire dicantur. 241. & seq.

N.

- N** Icænum concilium descensus Christi ad inferos,
etsi in Symbolo suo non meminit, non tamen
de eo dubitandum. 318.

O.

- O** Pera bona post hanc vitam non esse meritoria. 25.
Opera sanctorum non pauca laudari, quæ nus-
quam in scripturis præcepta inueniantur. 193. 194.
Orandum pro defunctis quia negabat Acrius, hæreti-
cus iudicatus. 205.
Orandum pro defunctis non dubitat Augustinus. 212.

P.

- P** Aruuli sine baptismo decedentes, in æterna sunt
apud inferos, quamuis leuissima, damnatione.
Pag. 289. 290.
Paradisus non est receptaculi vocabulum. 300.
in Paradiso quomodo Latro intelligendus esse. 356. 374
Patres sancti Veteris testamenti ante Christi ascensum
apud inferos fuisse, scripturæ & Veterum testimo-
nio ostenditur. 16. & 376. & seq.
Pa-

Patrum ecclesiae consensus ab hæreticis cõtemnitur. 264.
 Pauli dictum de igne qui opus cuiusque probabit, & per
 quem saluus erit, aliter à Græcis, aliter à Latinis ex-
 ponitur. Pag. 74.

Peccatum manere, & tamen per fidem remitti, absurdè
 ab hæreticis asseritur. 47.

Peccato dimisso remanere subinde temporalia suppli-
 cia, exemplis ostenditur. 49. 63. 64.

Peccata leuia, & lethalia quoad pœnam restantem, post
 hanc vitam dimittuntur. 121.

Pœtarum & Philosophorum de purgatione post hanc
 vitam figmenta, Purgatorii nostri nihil detrahunt ve-
 ritati 224. & seq.

Pœtæ quosdam etiam ad inferos descendisse, ac inde
 rediisse fabulantur. Ibidem.

Ibidem multa de inferorum pœnis, & beatorum feli-
 citate prædicant. 225.

Purgatorii origines quas fingat hæretici. 233. & seq.

Purgatorium esse non dubium fuit Græcis & Latinis,
 etiamsi esset aliqua de igne controuersia. Lib. 1.
 cap. 9. pag. 73. & sequent.

Purgatorii variae descriptiones defenduntur.

Lib. 1. cap. 3. 4. & 7.

Purgatorium non tam locum significat quam anima-
 rum statum. Pag. 7.

Purgatoriam afflictionem dupliciter intelligi posse.

Lib. 1. cap. 27.

Purgatorium esse locum seu statum medium inter æ-
 ternam felicitatem & statum damnatorum. Pag. 5.

Purgatorium non ignem, sed obscurum & labore plenū
 locum, existimarunt Græci. 75.

Purgatorii satisfactio, quomodo valeat contra peccata
 mortalia. 66.

Purgatorii pœnam esse satisfactionem in pœna. 9. 10.

Purgatorii pœnam esse grauissimam, infernali tamen
 minorem. 11. 12.

Purgatorii & inferni pœnæ, non sola differunt æterni-
 tate. 12.

Purgatorii doctrina nihil Christi detrahit redemptioni,

c v

sed

INDEX

sed passionis eius gloriam magis illustrat. 66. 67. 176.
& sequent. & 271. & seq.

Purgatorium ex veteri pro defunctis Ecclesiastico officio astringitur. Lib. 1. cap. 28.

Purgatorium vitæ huius, quale. pag. 227.

Purgatorij assertio quatenus adiuuetur Ethnicorum fabulis. 228. & seq.

Purgatorio non ob stare quod duo tantum videatur scriptura loca agnoscere, Cælum & infernum; dextrā & sinistram; Austrum & Aquilonem. 14. 15. 16. 17. aut quod Patres mediū locū non agnoscant. 22. 217.

Purgatorio vias duas non ob stare, vitæ & interitus. 245. nec aduersatur quod dicitur Apoc. 14. Beati mortui qui in Domino moriuntur. 56.

Purgatorio probando Lazari & epulonis historia, idonea an sit. 128. & sequent.

an efficax sit locus Philipp. 2. In nomine Iesu omne genu flectetur, cælestium terrestrium & infernorum. 163. 164.

Item locus Psalm. 65. Transiimus per aquam & ignem. 167.

Item locus Zach. 9. de lacu sine aqua. 172.

Item locus Tobiae 4. Panem tuum & vinum, super sepulturam iusti constitue. 177.

de Purgatorio non esse dubitandum, etiam si de eius loco nihil definitum habeatur. 70. & seq.

de Purgatorij loco ubi sit, probabilior sententia. 76.

Purgatorio qui Patres testimonium perhibeant.

Lib. 1. cap. 24.

contra Purgatorium quæ ex Augustino obijciuntur loca, explicantur. Pag. 262. & seq.

Purgatorio non aduersatur author libri Hypognosticon. 20. & sequent.

de Purgatorio quæstio, an fuerit D. Augustini ætate controuersia. 268. & 393.

Q. Voci, **Q** Vasi, non solam semper similitudinem, sed ipsam interdum veritatem exprimit. 154.

Recep.

R Eceptacula plura quam duo, Cælum & Inferos seu Gehennam & tartarum, à scriptura agnosci.

Pagina 14. 300. & seq.

Redimi quando quis intelligatur. 30.

Redemptionis humani generis, nullum ex rebus creatis suggeritur argumentum. 166.

Redemptio nulla in inferno, quo sensu. 175. 236.

Redemptio aliqua post mortem futura. 235. & seq.

Remitti peccatum non ideo rectè intelligitur, quia hic non puniatur. 126.

Remissio peccatorum duplex, prima & secunda. 39.

Remissionē peccatorum etiam post hanc vitam, rectè à pijs expectari. 42.

Retia tendi sanctis, si Purgatorium in aëre diffusum poneretur, quam malè opinetur Aretius. 76. 77. 82.

Retributio omnis non est in regno, neque omnis in gehenna condemnatio. 32.

S.

S Acramenta Veteris testamenti, non potuerunt sanctos illius temporis, statim à morte in cælum emit-tere. 313. & seq.

Sacramenta Veteris testamenti, iustitiam non contulisse. 314. quatenus tamen remissionem contulerint peccatorum. 256. & seq.

Sacrificia prodesse defunctis, vt tolerabilior sit ipsa damnatio, quomodo dicat Augustinus. 35.

Sacrificandum dum pro mortuis esse dicimus, nō facta legalia ad nos trahimus. 261. & seq.

Sacrificia Veteris testamenti, an pro defunctis offerre licuerit. 193. 194. 257. & seq.

Sacrificia Veteris testamenti, quatenus ad remissionem valuerint peccatorum. 255. & seq.

Sacrificia pro mortuis an fuerint aliqua in veteri lege instituta. 257.

præter Sacrificia lege præscripta, fuisse & alia extraordinaria lege non præscripta. 260.

Samuel an verè fuerit per Pythonissā suscitatus. 88. & se.

Sancti Veteris testamenti, ante Christi resurrectionem, ad cæ-

INDEX

- ad cælū admissi non sunt. Pag. 16. 306. & 376. & seq.
eos tamen accepisse iustificationis gloriam, hoc est,
vitam æternam. 306. & seq.
- Sanctos Veteris testamenti nō habuisse nobiscum com-
munia sacramenta. 315. & seq.
- Sanctos afflictionibus non tantum exerceri, sed & in-
terdum puniri. 247. & seq.
- non omnia tamen quæ eis accidunt mala, in peccati
pœnam accidisse. 250.
- Satisfactio quid, iuxta Grāmaticam significationē. 8.
- Satisfactio duplex; in pœna & pro pœna explicatur.
Ibidem.
- Satisfactio post hanc vitam agnoscenda. 7.
non tamen meritoria neque frugifera. 25.
neque euacuat Christi meritū, etsi pro lethalibus pec-
catis post hanc vitam admitteretur. 66. 67.
- Satisfactioni Christi non derogat Purgatorium. 176.
- Scripturæ quibus Purgatorium probatur, defenduntur.
Lib. 1. cap. 12. 13. 15. & sequent.
- Scriptura Veteris testamenti, etsi tota prophetica sit, nō
singula tamen prophetica esse debere. 191.
- Securitas triplex. 386.
- Securæ sunt de suā salute animæ in Purgatorio existen-
tes. 56. & 386.
- Sententiam interdum suam, non autem iudicium Deus
mutat. 393.
- Sinus Abrahæ quid. 130. & ex professo Lib. 3. ca. 3.
Pag. 296. & seq. & Pag. 356.
- Sinus Abrahæ non idem est quod Limbus. 296. 343.
- Sinus Abrahæ non est receptaculi vocabulum, sed quic-
tis. 300. 343.
- Sinus Abrahæ & quies illa apud inferos esse potuit. 344.
- Sinus Abrahæ ratione propriæ significationis, non est
membrum inferni. 356.
- Spiritus vocatur anima, iam spiritalis, deposita vetu-
state peccati, effecta. 338.
- Suffragia viuorum quibūsnam profint. 205. 206.
- Symbole fidei quædam, cur descensus Christi ad infe-
ros mentionem non faciant. 360.

Tcr

Tertulliani sententia an Abraham fuerit apud inferos explicatur. Pag. 357. & seq.

Theodori Bezae argumenta dissoluuntur, quibus conatur efficere ut Petri locus quo dicit Christum prædicasse his qui in carcere erant spiritibus, nihil ad Limbum pertineat. Lib. 3. cap. 10.

D. Thomæ Aquinatis de Purgatorii loco sententia explicatur, & defenditur. Pag. 78.

Tobiae liber canonicus. 179. 180.

Veritas rerum, non vitatur gestorum erroribus. 186. 259.

Vita æterna non est receptaculi vocabulum. 300.

INDICIS FINIS.

Pagina 38 versu 4. à fine, addatur in margine locus Augustini ex Tractatu 41. in Ioannem. Pagina 45. versu 12. pro qui, lege quod. Pag. 89. versu 11. lege æternum vitaret interitum. Pag. 90 versu 7. pro Hodie, leg. Cras. Item versu 19 & 20. Pag. 116. vers. 10. le. miserrime. Pag. 164. ver. 1 protum, l. tamen. Pag. 192. ver. 25. lege diligentiam. Pag. 223. ver. 17 l. a. ihs. Pag. 225. addatur locus Tertulliani de Resurrectione carnis, in margine. Pag. 226. versu 9. pro collegerit, l. coëgerit. Pag. 301 ver. 4. pro Eccl. f. 9. l. in m. 11. Eccl. 14. Pag. 312. ver. 2. à fine, addatur, clarissimè vel unus ex D. Greg. l. 4. Moral. c. 27. inter plurimos supra pag. 16. postremo loco citatus B. Ans.

C E N S V R A.

Hi libri, quia doctè, contra Aretium, & alios, DE PURGATORIO ET LIMBO conscripti sunt, vtiliter excudentur.

Iob. Molanus, censor.

Scriptum hoc D. Ioannis Lensæi, in quo catholica DE PURGATORIO ET LIMBO PATRVM, quem vocât, doctrina, cum aduersus cæteros, tum verò vel maximè contra Benedictum Aretium, nulli hæreticorum nostri temporis eruditione ac ingenio inferiore, solidissimè inuictissimeq; defenditur; & quibus ea confirmari à nostris solet, ab eorundem calumnijs mira euidentia dexteritateq; scripturæ vindicantur; & totius in hoc dogmate Antiquitatis consensus exhibetur; dignissimū esse iudico, quod typis excusum in publicum emittatur, & ab omnibus quam diligentissimè legatur.

Ita iudico, qui totum hoc opus à capite ad calcem attentissime perlegi, Henricus Granus S. Theolog. Regius Lomani professor.

PRIVILEGII SUMMA.

PHILIPPVS Dei gratia Hispaniarum Rex,
&c. Dux Brabantia, &c. Privilegio concessit
Ioanni Masio, Typographo iurato, vt illi impri-
mere & distrabere liceat librum, cuius titulus est:
De Fidelium animarum Purgatorio, libri duo:
& De Limbo Patrum, liber tertius. Authore
Ioanne Lensæo Belliolano, S. Theol. Louanij
Regio Professore: vt latius patet in originali
Privilegio, dato Louanij, Anno 1584. Die 7.
Mensis Septembris.

Subsignatum.

De Roij.

○ 1044230



